

書叢本基學國

集文詩江北洪

(下)

撰吉亮洪

行發館書印務商

上海图书馆藏书



A541 212 0006 0938B

~~175978~~

書叢本基學國

集文詩江北洪

(下)

撰吉亮洪

行發館書印務



# 更生齋文甲集卷第一

## 與安西州守胡紀謨書

昨握別後。出州城西北行九十里。至白墩子。宿墩旁。地勢高下。沙磧中尙有廢城舊址。土人居者亦不下數十家。右側有泉。寬二十餘步。土人呼爲疏勒泉。日用灌溉皆資之。余時卽疑漢疏勒國在龜茲之西。于闐之北。較烏孫等國更遠。何得敦煌郡地卽有疏勒泉。連日車中無事。取所攜前後漢書西域傳及耿恭等傳校之。而知恭所屯之疏勒城。實非漢疏勒國所都之城。但同其名耳。攷前漢書西域傳。疏勒國治疏勒城。後漢書傳云。疏勒國領戶二萬二千。勝兵三萬人。于西域中爲強國。則都城內既有王。又有疏勒侯。擊胡侯。以訖左右譯長等。官旣不一。加以居民勝兵。自不下數萬。何以棄而不居。反留空城爲恭等一二千人所據。若云與疏勒國衆同城。則匈奴車師不僅圍恭等。并圍疏勒國君民矣。匈奴旣于城下擁絕澗水。則一城之人。心皆大困。恭卽能穿井得水。疏勒國衆又將何飲乎。恭卽能煮弩作食。疏勒國衆又將何食乎。且自圍城已及圍解。傳不涉及疏勒國一字。明非疏勒國都城可知。一也。二則地理遠近不合。恭傳言恭爲戊己校尉。屯金滿城。謁者關寵爲己校尉。屯柳中。金滿城卽今奇臺縣東之古城。柳中卽唐柳中縣。在哈密城西十里。皆與今州西之疏勒泉近。而與漢疏勒國城遠至二倍。圖經古疏勒國去陝西省九千六百里。今鎮西府去陝西

不及五千里。古城在二也。三則日月遲速不合。恭傳言肅宗建初元年正月。秦彭等會柳中。擊車師。攻交河城。自柳中至交河城。一往一返。及攻城之日。至少亦須一月。及車師降後。乃分兵使范羌從山北迎恭。又遇大雪丈餘。卽至速亦必半月可達。圍解之後。且戰且行。吏士又素饑困。然恭傳云。是年三月。已至玉門。則道里甚近。必非自疏勒國至玉門可知。三也。又恭傳云。發張掖。酒泉。敦煌三郡及鄯善兵。鄯善國在今沙州衛西。與三郡皆距今州西之泉密邇。當日必就近徵發。四也。四則南北向背不合。交河城卽今土魯番。在雪山之北。今疏勒泉亦在山北。而疏勒國遠在雪山之南。若恭果據疏勒國城。則當使范羌從山南迎恭。何得反從山北。此又一顯證矣。五也。又與班超傳彼此情形不合。超傳建初三年。上疏言。臣孤守疏勒。于今五載。自建初三年。上溯至永平十七年。方及五載。校恭傳被圍之日。正在永平十八年。及建初元年。且超傳言。永平十八年帝崩。焉耆以中國大喪。遂攻沒都護陳寵。超孤立無援。而龜茲。姑墨。數發兵攻疏勒。超守槃橐城。與忠爲首尾。卽疎勒國王使恭此時在疏勒國都城。正可與超往來接應。不慮勢孤。而何以超傳旣言孤立無援。恭傳又云。孤城固守。明二人必不同在一國可知。況一疏勒城也。豈有龜茲。姑墨攻其一面。匈奴。車師又攻其一面。而兩不相聞者乎。且恭果在此城內。是以喪敗之餘。二三十人。受四國迭攻。恐亦無此理。況鮑昱。鄭衆。上疏訟恭之功。使圍城有四國。正當張大其詞。而何以一則言匈奴圍之。歷旬不下。一則言當匈奴之衝。對數萬之衆。皆僅言匈奴不及他國乎。此又可準情酌理。明爲必無之事。

矣。至非疏勒國城。而亦名爲疏勒者。此亦如上郡之有龜茲。酒泉之有玉門。或居其流人。或徒彼降戶。皆未可定。總之。此疏勒泉。卽爲耿恭所守。疏勒城旁之泉。雖不敢懸斷。而恭所守之疏勒城。必非疏勒國都城。則已萬無疑義矣。前者坐次縱談。知足下素留心輿地之學。況此泉又近在足下州城之下。用敢就便質之。負罪遠行。不克多攜書籍。恐有窒礙處。尙望足下有以教之。

### 昆侖山釋

昆侖山。卽天山也。其首在西域。山海經。昆侖墟在西北。河水出其東北隅。釋氏西域記。謂之阿耨達山。爾雅釋水云。河出昆侖墟。史記。太史公曰。禹本紀言。河出昆侖墟。其高二千五百餘里之類。是也。其尾在今肅州及西寧府。漢書地理志。金城郡臨羌縣。有弱水。昆侖山祠。郡國志。臨羌有昆侖山。其地在今西寧塞外。崔鴻十六國春秋云。張駿時。酒泉太守馬岌上言。酒泉南山。卽昆侖之體。周穆王見西王母。樂而忘歸。謂此山也。括地志。元和郡縣志。輿地廣記。太平寰宇記。並云。昆侖山在酒泉縣西南八十里。是矣。杜佑通典云。吐蕃自云。昆侖山在國中西南。河之所出。唐書吐蕃傳云。劉元鼎使還。言自湟水入河處。西南行二三百里。有紫山。直大羊同國。古所謂昆侖。虜曰闐摩黎山。東距長安五千里。在今青海界。一統志。今黃河發源之處。雖有三山。而其最西而大。爲真源所在者。巴顏喀喇也。東北去西寧邊外一千四百五十五里。延袤約千餘里。山不極峻。而地勢甚高。自查靈鄂靈二海子之西。以漸而高。登至三百里。始抵其下。山

脈自金沙江發源之犁石山。蜿蜒東來。結爲此山。自此分支向北。層岡疊嶂。直抵嘉峪關。東趨大雪山。至西寧邊東北。達甘肅涼州。以南大小諸山。並黃河南岸。至西傾山。抵河洮階諸州。至四川松潘口諸山。河源其東。而其枝幹盤繞黃河西岸。勢相連屬。蒙古槩名之爲枯爾坤。枯爾坤。華言昆侖也。益可知自賀諾木爾至葉爾羌。以及青海之枯爾坤。綿延東北。千五百里。至嘉峪關。以迄西寧。皆昆侖山也。華言或名敦蕞之山。或名蔥嶺山。或名于闐南山。或名紫山。或名天山。或名大雪山。或名酒泉南山。又有大昆侖。小昆侖。昆侖邱。昆侖墟。諸異名。譯言則名阿耨達山。又云。閼摩黎山。又名騰七里塔。又名麻犖刺山。又名枯爾坤。其實皆一山也。善乎馬岌之言曰。酒泉南山。卽昆侖之體。明昆侖山首在西域。而其體則縣亘漢敦煌。漢書地理志。敦煌郡。廣至有昆侖障。酒泉。金城等郡界。穆天子傳。爾雅。以及史記。漢書。所言昆侖。皆指今酒泉南山。及臨羌大雪山而言。不遠迹至于闐。葉爾羌。以及先零。燒當等境也。禹貢所言昆侖。析支。搜渠。亦當去雍州不遠。昆侖國。蓋因附近昆侖山而名。今考水經注。引涼土異物志。蔥嶺之水。分流東西。東爲河源。禹紀所謂昆侖山者。是也。是蔥嶺名昆侖之證。漢書張騫傳。天子按古圖書。名河所出爲昆侖山。此昆侖山。卽指今于闐南山。是于闐南山名昆侖之證。唐書吐蕃傳。其南三百里三山。中高而四下。曰紫山。直大羊同國。古所謂昆侖者也。是紫山名昆侖之證。元史河源附錄云。吐蕃朶甘思東北。有大雪山。亦名麻不莫刺。其山最高。譯言騰七里塔。卽昆侖也。是大雪山名昆侖之證。馬岌言酒泉南山爲昆侖之體。是酒泉南山爲昆侖

之證。總之。昆侖者。人之首。昆侖山者。山之首。亦地之首。故以爲名。河圖括地象云。昆侖山爲地首。是也。今攷南山自西域至酒泉金城。實皆南條諸山之首。故可總名爲昆侖。此山邈迤至雍州境。卽爲太乙。終南諸山。山名終南。明塞外之南山至此已終也。

### 西海釋

吾家容齋隨筆。以爲四海一也。無所謂西海。其實不然。山海經海外大荒經云。西海之南。流沙之濱。有大山。名曰昆侖。漢書西域傳云。于闐之西。水皆西流。注西海。水經注引涼土異物志云。蔥嶺之水。分流東西。西入大海。大海卽西海。與西域傳略同。又引康泰扶南傳云。恆水之源。乃極西北。出昆侖山中。有五大源。枝扈離大江。出山西北流。東南注大海。又引法顯云。恆水又東。到多摩犂鞞國。卽海口。云海口。卽西海口也。班固西域傳。犂鞞條支國臨西海。范蔚宗西域傳論云。甘英臨西海。以望大秦。晉書。安息天竺人。與大秦國交市海中。又云。鄰國使到者。途經大海。海水不可食。杜佑通典。大秦國。卽拂在。西海之西。亦云海西國。此西海之見于唐以前史傳者。若以近今證之。葉爾欽卽古于闐國。西域聞見錄。葉爾欽西行六十餘日。至克食米爾。克食米爾復西南行四十餘日。至溫都斯坦。水亦可通。云云。又云。溫都斯坦。其地之江河皆通海洋。時有閩廣海航到彼停泊。是西海卽在溫都斯坦之西。東西南北之海無不通。故西海中亦時有閩廣船到也。所云葉爾欽水可通溫都斯坦。又可證西域傳于闐之西。水皆西流。注西海矣。余遣戍伊



犂親遇温都斯坦人。以筆詢其曲折甚悉。土人又云。喀什噶爾連界有阿諦國。在西海之濱。而一統志于榜葛刺。拂菻。古里。柯枝。錫蘭山。西洋。瑣里。諸國下。皆云在西海中。又可知昆侖之西實有西海。與東南北三面之海並通。非荒遠浩渺無所指實者可比矣。蓋西海有泛言者。漢書。王莽立西海郡。在今青海。續漢志。建安末。以張掖居延屬國置西海郡。歐陽忞輿地志。北庭大都護下有西海縣。云唐寶應二年置等是也。有土俗名爲西海。而實非西海者。禹貢山水澤地記。谷水出姑臧南山。北至武威入海。屆此水流兩分。一水北入休屠澤。俗謂之西海。水經注又云。敦薨之水。自西海逕尉犂國。去都護治所三百里。此西海卽鹽澤。一名泐澤。水經稱爲蒲昌海等是也。容齋又疑西海卽蒲昌海。亦非是。有實言西海所在者。前後漢書西域傳及山海經。水經注。以迄上文所稱異物志。扶南傳。及一統志。西域見聞錄等所述是也。或又難余曰。故書言河源上通天漢。則河源當在地之極西。今旣言實有西海。則河源在西海之外乎。西海之內乎。曰。河源介西海之南。淮南子墜形訓可證矣。云。河出昆侖東北陬。貫勃海。入禹貢所導積石山。高誘注。勃海。大海也。河水自昆侖。由地中行。書曰。道河積石入。猶出也。蓋河水伏流。至積石山始出耳。故漢書西域傳云。于闐之西。水皆西流。注西海。其東。水東流。注鹽澤。河源出焉。下語極有斟酌。不言水東流注黃河。而云注鹽澤。河源出焉者。明從此以上。河皆伏流。不礙于闐以西之水注西海也。是黃河又伏流于西海之下。與濟水之伏流于河水下等耳。南宋疆域既蹙。皋蘭以外。卽如異域。又何況萬里外之葉爾欽。温都

斯坦等乎。此則校容齋隨筆。又未嘗不首欽昭代輿圖之廣。得以目驗口述者。證前人所未及也。

### 竹栢樓記

入楓橋半里而近。有小谿。通胥江。谿旁夾岸各數百家。岸西有老栢合抱。修篁成林者。爲袁氏竹栢樓。竹栢樓者。袁君廷構之生母韓太孺人撫孤所居也。余交袁君遲。不及親觀太孺人之行事。然每過吳門。士大夫必稱袁君學行。其稱袁君學行也。又必本諸袁君之母。余已悚然異之。繼于友人處識袁君。又嘗一登袁君之堂。則所爲五硯之樓。萬巷之閣者。皆太孺人所留貽也。又于梁棟閒讀太孺人庭誥家範。輒諷誦不忍去。袁君又嘗泣告余曰。太孺人之教廷構也。凡廷構一言一行之善。太孺人必色喜。獲交一端士聞人也。亦然。凡與廷構問學相長者。過從。太孺人必親爲治具。或有以緩急告者。必傾橐以助之。適力有不能。則歛歔不怡者。累日。太孺人歿後。廷構承太孺人之志不改。家以此中落。嗚呼。太孺人可爲賢矣。余頃以罪謫伊犁。不半歲。蒙恩釋歸。甫抵安西。卽允玉門令嵇君承裕之請。爲張烈女作傳。今又得紀吾賢母行事。往返三萬里中。甫得傳一烈女。紀一賢母。然後知貞固之操。瑰奇之行。在世間亦不能多得也。凡作竹栢樓詩者。共若干人。而舊史氏洪亮吉爲之記。

### 錢大令維喬詩序

余幼耽吟詠。未成童日。卽識里中詩人三。曰陳蕤賓。曰湯遵路。曰錢季木。時三人者。詩名已噪。余甫學噍。

未敢遽定其優劣也。三十後，交道漸廣，學識亦粗進，因悉取三人者之詩而合觀之，蕤賓能頌習古人矣。顧自爲詩，反不能學古人，遵路能學古人矣，而未能盡化古人之蹊徑也。獨季木才最高，五言法魏晉六朝，歌行則自初唐以迄北宋諸家，無不涉歷，近體則尤近大歷十子，雖心摩古人，而于古人之外，別有一種幽奇靈秀之氣，耐人尋味。余尤心折之。年益長，交益深，季木所爲詩亦益富，及四十後，季木已以名孝廉出宰浙中數縣，遷有日矣，忽謝病歸，築室邗溪之北，名曰半園之半，乃過從未及數月，余卽入都，嗣後官京師者十年，季木之音問時至，詩顧不多觀也。歲戊午，余以弟喪乞假歸，在里中八閱月，與季木過從尤密，亦時時觀季木之詩，季木亦時時言欲綜理前後所作，乞余訂定之，而余又以奔國卹入都矣。不半歲，以語言愚戇，部議殊死，聖天子寬其要領之誅，戍之絕域，卽日押出國門。時余在請室中，縲繼徧身，役車又敦促上道，匆猝未暇念及妻子也。獨割讞案紙尾，疾作書寄季木與孫兵備季仇，與之訣別，聞季木得余書，痛哭失聲。時時走余家問消息，及余抵戍所甫一日，卽得季木書于患難中，申之以婚姻，所以慰戒之者無不至。在戍所三閱月，凡三得季木書，而余已蒙恩旋里矣。季木于友朋死生離合之際，不忍相負如此，然後知季木詩之工，季木性情之摯爲之也。烏乎！人惟性情不摯，故遇事輒持兩端，甚或幸人之急而排擠之，訕笑之，以自明涉世之工，否則自詡爲深識遠見，以爲固早慮其有此，此其人亦何嘗不爲詩文，然要皆揣摩世故之談，與影響游移之語，求其能頌習古人者，已十不得一矣。況能學古人而得其

似乎學古人而得其似。又百不得一矣。況能于古人之外別具心手乎。此季木詩之所以可貴。而予之序季木詩。綜覽平生。不禁其悲喜之交集也。季木近頗學釋道兩家。他日所爲詩。或稍雜道流禪悅之語。然此非季木詩之至也。故予序季木詩。亦以己未以前爲斷云。

復臧文學鏞堂問通俗文書

昨頌到通俗文輯本。披閱之下。知足下好古之殷。網羅載籍之博。與亡友任君大椿所輯字林。均爲小學家不可少之書矣。亮吉幼亦嘗從事于此。故尊集跋語內。欲足下于所引原書下分別開載。以存古人之實。足下或不以爲然。而又垂詢及之。用敢粗次所知者以復焉。此書自劉昭續漢書注後。徵引者不下十餘家。然惟李善文選注。及太平御覽所采最夥。攷文選注引通俗文不著服虔者。如上林賦注。水鳥食謂之噉。長楊賦注。骨中脂曰髓。登樓賦注。暗色曰黮。江賦注。髮亂曰鬢。髻等是也。有引通俗文而明著服虔者。赭白馬賦注。天子出。虎賁伺非常。謂之遮迺。長笛賦注。營居曰鄔。洛神賦注。耳珠曰璫。琴賦注。樂不勝謂之嗚嗷等是也。御覽引通俗文不著服虔者。唇不覆齒。謂之齧。卷三百八十八。乳病曰庀。三百七十一。噴導曰簪。六百八十八。障牀曰幃。六百九十九。等是也。引通俗而明著服虔者。剡葦傷盜。謂之搶。三百三十七。毛飾曰毳。三百四十一。七百。劍屬。其頭類匕。故曰匕首。短而便用。三百四十六。矛長八尺。謂之稍。三百五十四。大杖曰楮。三百五十七。所以制馬曰鞮。三百五十八。凡勒飾曰珂。第鞮尾曰鞞。三百五十九。等是也。至若他書所引。有止言服虔。而文法絕似通俗文者。史

記禮書裘鬮集解引服虔云。簣謂之第等是也。有變文言通俗篇者。文選琴賦注引服虔通俗篇是也。又有止言服虔俗說者。顏氏家訓書證篇。殷仲堪常用字訓。亦引服虔俗說之類是也。至杜預左傳注。多用服虔舊說。今通俗文與杜注可相發明者極多。又如亭水曰汪。腋下謂之脅。頭創曰瘍。遮取謂之抄掠。自蔽曰庇。財帛曰賄。覆蓋曰葺等。疑皆服氏注左傳舊說。又互見于此編也。若左傳文三年。螭魅罔兩。周禮家宗人正義引服虔注云。魍魎。木石之怪。而一切經音義引通俗文。木石怪。謂之罔兩。益可爲服氏著通俗文之證。至襄十四年。射兩鞬。詩小戎正義引服注云。鞬。車輓。而御覽<sup>七百七</sup>引通俗文云。軸限者謂之枸。枸。鞬。古字同。又可知義訓無不合矣。至前人疑此書出李虔者。不過因晉中經簿所無。又引初學記器物部舟第十一。引李虔通俗晉曰。舩一語。以證梁阮孝緒之說。不知器物部舩第五。先引服虔通俗文云。舩。三尺五曰榻板。獨坐曰枰。八尺曰舩。近在一卷之中。且舩第五。引服虔之說。緊次說文。而舟第十一。引李虔之說。則次于廣雅之後。明通俗文係服虔所作。而李虔續之名。既相同。阮孝緒等。遂混二書爲一。如許慎淮南王書注。半淆入高誘注中。亦賴有御覽係北宋初年所輯。尙分標二人之名。後人則亦混爲一矣。唐書藝文志。固明標李虔續通俗文。言續。則非始自李虔可知。君家先人經義雜記。又以隋書經籍志。次此書于沈約四聲等書後。而證其爲李虔。不知隋志亦唐人所修。與徐堅釋元應相距不遠。今徐堅所引。則次于說文一切經音義所引。則皆在三蒼釋名之上。則唐人亦皆以此書爲服虔所造也。至若反音。

不妨爲後人所補入。或專係李虔續書中語。與通俗文之爲服虔注無礙也。又輯本中亦尙有脫漏處。如御覽人事部二十二引通俗文。容麗曰媠。形美曰媠。容美曰媠。南楚以好爲娃。肥骨柔弱曰媠娜。頰輔妍美曰媠媚。容茂曰媠。不媠曰媠。可惡曰媠。大醜曰媠。醜稱曰媠。媠等語。足下引其半而遺其半。未審何故。得暇尙示知之。

### 三山僧詩合刻序

三山僧者。乳山方丈古巖。攝山方丈慧超。焦山方丈巨超。三山者在江寧鎮江之間。相去不越一二百里。山旣近。而三僧者。以詩相切礪。無閒晨夕。余不識古巖。而識巨超。又因巨超識慧超。二超者。又時時爲余道古巖遺事。旣而讀三僧詩。其清遠絕俗。若出一轍。又加以性靈。焚香掃地。椀飯杯茗。撞鐘擊磬。梵聲佛號。佈施之雜沓。經懺之繁瑣。入則一蒲團。一龕。出則一瓶。一鉢。經府歷縣。蹈山蹠水。千險百怪。億態萬狀。一一見之于詩。而未已也。值俗家父母兄弟之疾痛。所居所遊歷之州縣。水旱疾疫。皆于詩見之。非尋常縑素者流。貌守戒律。以口頭禪爲五七律者比。或以謂三僧者。旣逃乎方之外矣。而又拳拳于一世。拳拳于一世。若此。于彼道爲過。余獨謂不然。三僧者。惟遊于方之外。而尙能拳拳于一世。拳拳于一世。以視士大夫受倚畀之重。而遺棄一切。不肯任事。反侈說因果。縱談天釋。以驚世而惑衆。彼其心。或以爲置身事外。則人莫能窺我之際矣。又豈知卽談空說法。而不能任事之實。已百喙莫辨乎。則何如此三僧者。雖以

空虛爲主。寂滅爲宗。而尙不忘天性之親。與食毛踐土之德。有所觸而卽動。至于如此也。余性不佞佛。而未嘗不與方外交。方外之交。又以二超爲最。因二超而復有以知古巖。然後知方外之詩亦未嘗不以性情爲重也。陽湖洪亮吉序。

重建新塘鄉文成橋碑記

自城而鄉。橋之石者以千計。大率剏始于本朝者十之三。剏始于明者十之七。十之七中。其在宏治以前者。又居大半焉。蓋其時世漸坦夷。人皆務實。工作之事。董厥成。供厥役者。一切無苟且之心。濬之欲其深。培之欲其廣。鎔之欲其固。築之欲其堅。縱歷三四百年。偏旁偶有傾塌。而視其內。則鑿之不能入也。斧之不能裂也。卽一橋之成。而人事之慎密。物力之充裕。均可見焉。明中葉以後。則不然。斂錢非不多。工作非不久。而視其石。則薄以裂。視其罅。則滲以壙。視其灰與土。則淋而不周。掩而不實。故稽其所歷之歲月。嘗不及宏治以前之半云。新塘鄉之有橋。俗呼曰雪堰。卽方志所爲文成橋也。其上爲南北之孔道。其下爲吳越之要津。又爲太湖之隘口。旱潦宣洩之所經。嘉慶五年六月。甚雨水漲。橋忽崩圯。橋洞之碑出焉。云建于成化二十年。考之方志。則又曰成化十三年。要不出成化中近是。逾年。本鎮募錢得五百餘千。復興築之。拆視其下。基址深固。層復一層。惟樁以松木。則已朽壞。于是某某司其事者。益不敢艸率卒工。而排基則易以徑尺老杉。長約七尺餘。老杉以上。均用大石博砌。復錮以石粉。自水盤石而上。約深十餘層。計

深丈有零。某等皆廢其本業。日夕監視。稍不如意。輒改作之。以視成化年之所造。蓋有加焉。夫橋之成。必書其歲月及司事者之姓名于石。此陳例也。若歷久而不壞。則里之人必追頌之曰。是某某之所督司也。某某之所營造也。費不浮而工歸于實。是以能歷久若此。若夫成而遽毀。或不及百年。不及數十年而遽毀。則里之人亦必竊竊議之曰。是某某之所督司也。某某之所營造也。斂錢雖多。中飽者若干。浮費者若干。某某又慢于其事。以致如此。則豈不爲一方之大戒哉。橋成。乞亮吉書日月于石。因樂爲記之。并垂以爲後來式云。時嘉慶六年九月望日。

### 董太恭人晚翠軒遺稿序

晚翠軒遺稿者。吾友董君心牧母莊太恭人所製也。亮吉與心牧同歲生。心牧日月差長。亮吉六歲孤。心牧九歲孤。又值兩家中落。貧苦之況亦略同。憶亮吉服喪甫闋。心牧尙未居憂。舅姑董安人。莊太恭人從姑也。暇日偶攜諸姊及亮吉。訪太恭人于玉梅橋里第。時太恭人一子一女。女甫及笄。里第向北。太恭人居屋南向。屋中設幔一。臥榻二。南壁鑿楹。層疊貯書。一琴在北几。甕盎四五。列西牖下。董安人知太恭人之善琴也。拂絃以請。太恭人轉以命女。鼓竟一曲。乃止。復與董安人語兩家事故甚悉。亮吉時與心牧兒戲堂皇下。閒聆太恭人語。雖年尙少。無甚識解。已肅然敬之。殆成童日。復與心牧訂交。益詳審太恭人之所以撫孤。所以教子。所以貧而自立。幾幾至于子之有成也。與吾母太安人一無以異。以是兩人交益親。



學亦益苦。及亮吉與心牧先後成進士。官京師。而兩家之母已不及見矣。聞中與心牧過從。談及先世事。往往對泣不已。歲戊午。亮吉時蒙恩侍學三天。以弟喪乞假歸。適心牧亦以戶部郎出守。廣西潯州。兩人者又同時出都。同時抵里。里中諸父老與知舊讌客。兩人者亦無不偕。心牧則時時言欲爲太恭人刊遺稿。而以序屬亮吉。亮吉敬諾之。然心牧行甚急。不暇報命也。後一年。亮吉以奔國卹入都。半歲復乞假歸。瀕行奏記三府。以語言愚戇。罪至不測。今上赦其死罪。遣戍伊犁。行至涿州。始聞心牧廣西之訃。于役車中。東向以哭。不暇爲位也。烏呼。亮吉與心牧交三十年。心牧則可以不死。而遽死。亮吉則可以死。而卒不至于死。以至復荷聖天子不次之恩。放歸田里。距與心牧別僅二年。距心牧之死僅一年耳。方其荷戈萬里。冒大雪出關。行無人之境者。至六十日。墮傳車不死。陷雪窟不死。又豈知生還有日。復能訪太恭人舊日之居第。并亮吉童年與心牧嬉遊之所。一再展故人之殯。又敬序太恭人之詩乎。蓋吾兩家三十年來。死生離合之故。無不畢備。序太恭人詩。一一根觸及之。涕不知何從。又因太恭人而轉傷吾母太宜人之先亡。與太恭人皆不逮子之祿養。繼又念亮吉流徙遷轉。瀕于萬死之狀。幸太宜人不及見之。見之而或悲其愚。悲其愚而又或慮其死。則太宜人必憂傷成疾。是又益重亮吉之罪也。太恭人遺稿一卷。詩凡若干首。上者無愧漢魏閒人。次者亦不作尋常閨閣語。雖一編寥寥。其傳于後。已無疑義。若夫守志撫孤之大節。前仁和盧學士文弼撰常州府志。已與吾母太宜人並編入賢母傳。無俟亮吉複述。時嘉慶五年。歲

次庚申、歸自伊犂之次月。

與宿松文學書

遠承足下渡江過訪、慰甚幸甚。坐次足下述及宿松本漢之松滋、并言漢晉時有五松滋、分屬廬江、安豐、南郡、南河東、及僑立之松滋郡。其言甚辯。然實不如足下所云也。今攷松滋之名、始于漢昭帝始元五年、封六安共王子霸爲侯國。漢書地理志、廬江郡有松滋。注云、侯國是也。今廢縣在宿松縣北。後漢無松滋縣。至晉初復立。又移屬安豐郡。縣治亦移至北百餘里。圖經、故城在今霍丘縣東十五里。沈約宋書州郡志、稱晉太康地志、松滋縣屬安豐是也。安豐郡本分廬江郡立。是安豐之松滋、卽廬江之松滋無疑矣。至晉成帝、又于尋陽僑置松滋郡。安帝又省松滋郡爲松滋縣。皆遙隸揚州。晉書地理志所載是也。圖經、廢縣在今九江府德化縣東。此松滋僑縣之一矣。若荊州南郡之有松滋縣。晉書地道記云、咸康三年、以松滋流戶在荆土者、立松滋縣。沈志亦云、疑是有流民寓荆土、故立。今湖北荊州府松滋縣、尙承晉僑縣舊名。此松滋僑縣之二矣。若南河東郡之松滋、則沈志又云、晉成帝咸康三年、征西將軍庾亮、以司州僑戶立南河東郡。而圖經則云、咸康四年、于南郡所屬松滋僑縣、立南河東郡。是南河東郡之松滋、卽南郡之松滋。非有二也。然古今地志、每好立異說以亂真。如松滋之改名高塘、高塘之改名宿松、在隋開皇十八年。而樂史太平寰宇記乃云、晉武平吳、以荊州有松滋縣、遂改爲宿松。夫晉武平吳、卽漢松滋舊縣。立尙

未久。何容卽有荊州之僑縣。則豈非瞽說乎。又古今地名。復云廬江郡松滋。卽古鳩茲地。攷左傳襄公三年。子重代吳。克鳩茲。杜預注云。鳩茲。吳邑。在丹陽蕪湖縣東。今皋夷也。圖經。今訛作勾茲港。在縣東四十里。是鳩茲在江以南。何容越江七八百里。移至今霍丘縣境乎。此又可不必辨者矣。總之。瓜分豆剖。以僑戶占實土之名。以後起變厥初之號。遂至一縣之名也。而領之者四州。揚。豫。荆。司。統之者五郡。廬江。安豐。松滋。南郡。南河東。而地志之好爲異說者。又不一。何怪足下之致疑乎。足下能以漢晉宋地志爲據。而稽其道里。驗其沿革。不爲異說所惑。則善矣。

呂廣文星垣文鈔序

吾里中多瑰奇傑出之士。其年相若而才足相敵者。曰孫兵備星衍、楊戶部芳燦、暨君而三。三人者。皆肆力于詩古文辭。而各有所獨到。孫君能爲說經辨駁之文。以匡稚圭。劉子政爲宗。楊君能爲梁陳初唐之文。尤以徐孝穆、王子安爲宗。君之文。則不名一體。其上者。則敬通問交。士衡辨亡也。其次。則皇甫持正之寺碑。孫可之之書壁也。至義關懲勸。旨寓抑揚。則灑灑千萬言不止。此又君之自命。而人亦以此推君者矣。三人者。負其才。各不相下。馳騁名場者。及三十載。然或立勳邊徼。或著績河防。皆卓然有所樹立。君獨窮老不遇。僅以名諸生貢入胄監。出而秉鐸數縣。所遭益無聊賴。則自命益不凡。自命益不凡。則所爲詩文。益放而不可捉摸。今之白雲艸堂文稿。至數十百篇。大半皆秉鐸時之所作也。余二十後。與三人交。于

孫君尤密。次則君。又次則楊君。猶憶丁酉春。余居憂。授徒里中。楊君者。買舟百里相唁。時君與孫君。皆落拓居里。因約至舍。作竟夕談。余時賃廩在白馬三司徒巷側。貧甚無几榻。三人者。相與就余苦次。鱗比而寢。夜半月出。談亦益縱。顧饑甚。無所得食。君獨敲石火。撻旁室中。得敗壘及麥屑。升許。就三隅竈作餐。競以手掬食至飽。天破曙。生徒以次進。三人者始散去。是時年少氣盛。讀書多不甚知世事。各負其兀傲之志。視古今無不可及之人。天下無不可爲之事。以爲他日當各有所建豎。不負知己也。乃忽忽數十年。各更事故。各歷艱險。齒髮日益頽。意氣日益減。而議論亦日益持平。雖後此所成就。尙未可知。而三人者。明歲皆已五十。余則又過之。爲可歎也。余前歲遣戍出關。楊君適官滿候代。餞余于皋蘭河橋。昨歲蒙恩旋里。時孫君居憂。寓居江寧。先訪余里第。獨君以職守不獲相見。而書問時時來。均可爲死生患難之友矣。然則今之序君文者。豈僅爲君文而設哉。他日序孫君楊君之文。亦當如是而已。

### 諸氏族譜序

有西北之著姓。有東南之著姓。西北之著姓。如宏農之楊。聞喜之裴。河東柳。薛。涿郡崔。盧之類是也。東南之著姓。則延陵之吳。義興之周。琅邪之王。南昌之熊。以及吳都則顧。陸。朱。張。浙西則范。全。姚。沈之類是也。又有姓雖稀而不可不謂之著姓者。西北則太原之祁。廣平之閻。東南則丹陽之荆。昆山之諸。丁戶不甚繁。然自春秋迄今。二千年中。常聚族而居。或占一鄉。或占一鎮。卽小有遷徙。亦不出數百里之外。閒數代

必有聞人。是以譜系修明。侶儂畢舉。洵可謂土著之名族矣。考諸姓出自越大夫諸稽郢。其見于春秋左傳者。有諸鞅。見劉向說苑者。有諸發。見應劭風俗通者。有洛陽令諸於。今按其譜系。雖自越而吳。自蕭山而昆山。自昆山而無錫。自無錫而陽湖。要皆不出四五百里。自唐宋以前。則閒有可攷。元明以來。則世次秩然。瞭如指掌。非子孫之賢而有學。世世克承其先志。而能如此乎。且諸氏歷世以來。官閥雖不甚顯。而亦無極不肖子弟。獲罪家國。爲世所指。名著于史冊。如沈氏之充。柳氏之璨。熊氏之曇朗。崔氏之允昭。緯其人者。謂非名宗之大幸。抑亦家法修舉。而能然歟。是則講求譜系。所以上紹祖宗。條舉家規。卽所以下貽孫子。亦名宗賢士大夫之責矣。嘉慶六年。歲在辛酉。某某等將重修族譜。以余之粗辨氏姓也。乞爲識其始末。余故樂爲序之。

釋璽一篇示及門呂璽

說文字皆从本訓。獨璽字說文云。王者印也。則本秦漢之制言之。非璽字本訓。何則。璽字从土。古人制璽。蓋皆以土爲之。呂氏春秋適威篇云。若璽之于塗也。抑之以方則方。抑之以圓則圓。淮南齊俗訓同古燒土爲璽。此云抑之以方抑之以圓者。未入火以前。璽之坯也。秦漢以前。尊卑共用之。周禮地官司市。凡通貨賄。以璽節出入之。鄭康成注云。璽節。印章。若今之斗檢封矣。掌節。貨賄用璽節。鄭注亦云。今之印章也。月令。孟冬之月。固封璽。高誘注。呂氏春秋云。璽。讀爲移徙之徙。封璽。印封也。誘注。淮南子亦同。左傳襄公二十九

年公在楚。季武子使公治問。璽書追而與之。按玉海引世本云。魯昭公作璽。今此杜預注。璽印也。戰國策。

欲璽者。段干子也。史記楚世家。懷王置相璽於張儀。是上下通名璽之證。籀文璽字从玉。此籀文出當在

後。秦以來。璽無不以玉爲之者。故字又从玉耳。孔穎達正義引衛宏云。秦以前。民皆以金玉爲印。惟其所

好。宏此語亦但以意言之。如秦以前。卽以玉爲璽。而因製从玉之璽。則宏言金可爲璽。何又不制从金之

璽字乎。玉篇有璽字云。堅正也。奴頰切。義與此別。至說文王者印也。下又云。所以主土。蓋因字本从土。上王者印也。四字。恐與

土義不相涉。故又足此四字。然究非此字本訓。玉篇以下。又皆承許氏之說。玉篇玉部下璽字。又云。天子

諸侯印也。義亦不該。若在秦以前。則稱璽者。不僅天子諸侯。若在秦以後。則諸侯亦不得稱璽。蔡邕獨斷

所言。皇帝六璽。續漢書輿服志。璽皆玉螭虎紐。文云。皇帝行璽。皇帝之璽。皇帝信璽。天子行璽。天子之璽。

天子信璽。百官志。符節令下。有尙符璽郎中四人。本注云。舊二人在中主璽。是也。按霍光傳。光召尙符璽郎。其制耳。然則璽字本訓當若何。曰當云璽。以土爲印也。秦以來。王者始稱璽。并以玉爲之。義方諦耳。至釋

名云。璽者。徙也。封物使可轉徙而不可發也。則又以同聲之字爲訓。與高誘注讀若義同。

釋珠乙篇示及門李珠

說文玉部珠云。蚌之陰精。亦非珠字本訓。攷珠字从玉。古人之珠。皆以玉爲之。周禮天官玉府。掌共王之

服玉佩。玉珠玉。若合諸侯。則共珠盤玉敦。是也。鄭注及孔穎達疏。以珠玉爲贖。珠亦承許氏之說。殊無別據。續漢書輿服志。孝明皇帝

服玉佩。玉珠玉。若合諸侯。則共珠盤玉敦。是也。鄭注及孔穎達疏。以珠玉爲贖。珠亦承許氏之說。殊無別據。續漢書輿服志。孝明皇帝

服玉佩。玉珠玉。若合諸侯。則共珠盤玉敦。是也。鄭注及孔穎達疏。以珠玉爲贖。珠亦承許氏之說。殊無別據。續漢書輿服志。孝明皇帝

永平二年。初詔有司采周官禮記。尙書皋陶篇。乘輿服。從歐陽氏說。公卿以下。從大小夏侯說。冕皆廣七尺。長尺二寸。前圓後方。朱綠裏。元上。前垂四寸。後垂三寸。係白玉珠。爲十二旒。按此卽周禮弁師之玉十有二旒。三公諸侯。七旒。青玉爲珠。卿大夫五旒。黑玉爲珠。所謂白玉珠。青玉珠。黑玉珠。皆琢小玉之白青黑者爲之。歐陽夏侯。皆承周秦以來先儒舊說。明三代之制。冕旒所垂之珠。皆琢玉爲之。非蚌珠矣。按蚌珠亦無青黑等色。珠亦有出于天然。不須琢者。山海經。歷山。楚水多白珠。揚雄子虛賦云。赤玉玫瑰。琳璿昆吾。注引倉頡篇云。玫瑰。火齊珠也。張揖云。琳。珠也。左思蜀都賦云。江珠瑕英。又云。青珠黃環。注引博物志云。江珠。琥珀別名。青珠。出蜀郡平澤。玉篇。蜀郡平津縣出青珠。此皆玉珠之天然不須琢者。且卽以說文證之。瑰字下云。玫瑰。一曰珠圓好。又云。璣珠之不圓者。又云。琅玕似珠者。亦可知珠皆玉爲之矣。若蚌珠亦名珠者。以其形之似名之。然古人亦不單喚爲珠。必加字于上。以區別之。禹貢。淮夷蠙珠暨魚。是矣。若古人所用之珠。果皆係蚌珠。則字當从虫。不必从玉也。又考說文玼字下云。玼。珠也。宋宏云。淮水中出玼珠。字又作蠙。云夏書玼从虫。寶。玉篇。玼。又作璆。此則專指蚌珠而言。是知蚌珠之珠本別有字。玼是也。蠙是也。璆亦是也。不必更以玉珠之珠移屬于蚌也。況物之有珠者。又不獨蚌。山海經文。鮑生珠玉。又云。激汝之水。其中多蜃。郭璞注。玼。亦蚌屬。是蚌有珠。鮑蜃亦有珠矣。他若鼉。鼉魚。龍。蛟。蛇。龜。龜。亦皆有珠。埤雅采舊說云。龍珠在頷。蛇珠在口。魚珠在目。蛟珠在皮。鼉珠在足。龜珠在腹之類是也。明百物之珠。皆借玉珠之字爲義。輿服志又

云建華冠。貫大銅珠九枚。是五金皆可以製珠。然但能同其名。不可卽奪其義。人之呼之者。必當曰銅珠。或曰龍珠魚珠。不得僅目之爲珠也。然則珠字自有本訓。何得獨屬之于蚌乎。孫強等著唐韻。稍知其義。于珠字但注云珠玉。不專屬之蚌。最爲得解。夫余爲許氏之學者也。非敢規許氏。但欲以輔其不及耳。餘尙有十數字。不从本訓者。辯已見曉讀書齊雜錄。不贅。



此  
页  
空  
白

# 更生齋文甲集卷第二

## 春秋十論

壬戌歲、在旌德洋山書院課徒、因作此以示及門。

### 春秋時以大邑爲縣始于楚論

春秋時、楚始以大邑爲縣。按秦本紀、孝公十二年、并諸小鄉、聚集爲大縣、縣一令、凡四十一縣。商鞅傳作三十一縣。

漢書百官表、縣令、長、皆秦官、萬戶以上爲令、秩千石至六百石、減萬戶爲長、秩五百石至三百石、皆有丞

尉。商鞅傳止言置令丞。

然其制實自楚創始之。左傳宣十一年、楚子入陳、殺夏徵舒、因縣陳。十二年、鄭伯對楚莊

王曰、使改事君、夷于九縣。杜預注、楚滅九國以爲縣、願得比之。正義言、楚滅諸國、見于經傳者、哀十七年、

稱文王縣申息、莊六年、稱楚滅鄧、十八年、克權、僖五年、滅弦、十二年、滅黃、二十六年、滅夔、文四年、滅江、五

年、滅六、又滅蓼、十六年、滅庸、凡十一國。蘇氏、沈氏、以權爲小國、庸先屬楚、除二國外、爲九也。襄公二十六

年、伯州犂言、穿封戌、方城外之縣尹。此見于左傳者也。其見于史記楚世家者、則子革對靈王曰、且入大

縣、而乞師于諸侯。又惠王之十年、是歲也、滅陳而縣之。是也。此外、則晉自文襄以後、大邑亦名縣。左傳僖

子欲復椒舉。謂令尹子木曰。晉人將與之縣。以比叔向昭公五年。遠啓疆。謂楚子曰。韓賦七邑。皆成縣也。又云。因其十家九縣。其餘四十縣。云云。二十八年。晉殺祁盈。及楊食我。分祈氏之田。以爲七縣。分羊舌氏之田。以爲三縣。是也。蓋春秋時。已有改封建爲郡縣之勢。創始于楚。而秦與晉繼之。至戰國。而大邑無不爲縣矣。又考楚文王縣申。在魯莊公六年。史記秦本紀言。武公十年。伐邽冀戎。初縣之。十一年。初縣杜鄠。晉語。公子夷吾對秦使公子摯曰。君實有郡縣。皆當在楚文王縣申之後。廣韻又言。楚莊王縣陳。縣所自起。亦非。當云自楚文王縣申息始。後世置小州。其制亦始于楚。左傳宣公十一年。莊王復封陳。鄉取一人焉歸。謂之夏州。史記蘇秦傳。楚東有夏州海陽。集解引徐廣云。楚考烈元年。秦取夏州。今按楚世家又云。緄州。子秦徐廣又此不同。未知誰是。又引車允撰桓温集云。夏口城上數里有洲。名夏州。張守節云。州在大江中。

春秋不諱娶同姓論

春秋時娶同姓者不一而足。穆天子傳有盛姬。是天子以同姓之女備後宮也。列國則晉獻公有大狐姬、小狐姬、驪姬。其娣生卓子。亦姬姓。故莊公二十八年傳。惟二姬之子在絳。平公則內有四姬。傳襄二十六年。衛人歸衛姬于晉等是也。國語富辰曰。聃由鄭姬。韋昭注。聃。姬姓。文王之子。聃季之國。鄭女爲聃夫人。同姓相娶。大夫則齊崔杼娶棠姜。東郭偃所云。君出自丁。臣出自桓。是也。慶舍以女妻盧蒲癸。慶舍之士以爲子不避宗。是也。哀公十一年。太叔懿子娶晉悼公子懿女。亦同姓。晉則羊舌氏爲晉公族。而亦娶同

姓論衡叔向之母姬姓是矣。廣韻鄭公子有食采于徐吾之鄉。後以爲氏。是子南子皙又爭娶同姓之女也。獨昭公以吳孟子貽譏者。以魯爲秉禮之國故耳。又世皆譏漢惠帝娶魯元公主女爲婦。以爲妻外甥女。不知春秋時卽有之。左傳僖公二十四年。晉侯逆夫人嬴氏以歸。史記晉世家。文公夫人。秦女也。服虔云。穆公女文嬴也。又傳稱秦伯納女五人。懷嬴與焉。晉語稱不敢以禮致之。懼之故也。韋昭注。懼愛此女之故。是懷嬴亦穆公之女。于晉文公皆外甥女也。

春秋時晉大夫皆以采邑爲氏論

晉大夫皆以采邑爲氏。除韓趙魏本係建國。不必更論。後趙氏別子趙同。食采于原。故又稱原同。屏括食采于屏。故稱屏括。又稱屏季。邯鄲氏食采于邯鄲。故稱邯鄲氏。元和姓纂。邯鄲氏。趙穿之後。魏懿之孫魏錡。食采于呂。復食采于廚。故稱呂錡。亦稱廚武子。國語。錡之子亦稱呂宣子。又魏顓子魏頡。食采于令狐。故國語又稱爲令狐文子。地理志。河東郡猗氏。樂史云。春秋時令狐也。韓獻子元孫康。食邑于蘭。又稱蘭氏。地理志。西河郡蘭縣。廣韻。蘭姓。亦出西河。韓獻子元孫康。食邑于此。因氏焉。外若欒氏。食采于欒。故欒叔以下。皆稱欒氏。左傳哀公四年。國夏伐晉。取邢任欒鄆。杜預注。欒在趙國平棘縣西北。按卽今趙州西北。故欒城與正定府欒城縣接界。地理志。常山郡關縣。後漢改爲欒城。是矣。卻氏。食采于卻。故父曰卻豹。子曰卻芮。一切經音義引聲類云。卻鄉在河內。是也。後又食采于冀。故亦稱冀芮。水經注引京相璠曰。今

河東皮氏縣有冀亭。古之冀國所都。左傳僖公三十三年。命卻缺爲卿。復與之冀。是矣。其後卻釅食采于苦成。故又曰苦成叔。潛夫論。苦成。城名也。在鹽池東北。豹之孫楊。又別食采于步。故稱步楊。世本。豹生義。義生楊。楊生鵠。居廣韻。晉有步楊。食采于步。因氏焉。楊子鵠居食采于蒲城。故稱蒲城鵠。居見周語。韋昭注。鵠居子至。食采于溫。故亦曰溫季。按廣韻。唐叔虞之後。受封于河內溫。因以命氏。是晉又有公族溫氏也。胥臣先食采于胥。後又食采于臼。故稱胥臣。亦稱臼季。左傳僖公二十四年。取臼衰。水經注引京相璠曰。桑泉。臼衰。並在解東。博物志又云。臼季邑在解邑西北。先軫食采于原。故曰原軫。杜預釋例云。河內沁水縣西北有原鄉。是矣。至先且居。則又稱霍伯。當亦以采地名。郡國志。河東郡永安縣。有霍太山。按山側有霍城。水經注。汾水又南逕霍城東。是也。韋昭又云。先且居。先軫之子。蒲城伯也。後受霍爲霍伯。是未受霍以前。又嘗食采于蒲城。故云蒲城伯。蒲城卽重耳所居。在漢河東郡蒲子縣。其後先穀又食邑于蕘。故曰蕘季。地理志。河東郡蕘縣是也。悼公時。士魴亦食采于蕘。故亦曰蕘恭子。狐突食采于狐。故稱狐氏。其子狐毛。狐偃。亦然。左傳。僖公十六年。狄侵晉。取狐廚。杜注。臨汾縣西北有狐谷亭。又云。狐廚。受鐸。昆都。晉三邑。偃之子。又食采于賈。故又稱賈季。韋昭晉語注。賈佗。狐偃之子。射姑。太師賈季也。食邑于賈。字季佗。劉昭引博物志曰。臨汾有賈鄉。賈伯邑。又圖經。蒲城縣西南亦有賈城。卽古賈國。古今地名亦同。苟息。食采于苟。潛夫論。苟亦作郇。杜預注。解縣西北有郇城。水經注。汾水下。古水又西逕苟城。古苟國也。汲郡古

文。晉武公滅荀。以賜大夫原氏。桉竹書紀年。晉曲沃滅荀。以其地賜大夫原氏黯。是爲荀叔。是荀叔本姓原氏。以食采于荀。始稱荀叔也。又紀年于桓王二年云。莊伯以曲沃叛。伐翼。公子萬救翼。荀叔軫追之。此荀叔軫。或卽息之先。始受采地者也。後荀首別食采于知。故自營以下。又稱知氏。劉昭引博物志。河東解縣有知邑。是也。呂甥先食采于呂。劉昭引博物志云。河東永安有呂鄉。呂甥邑。後又食采于陰。故稱陰飴甥。左傳哀公四年。國夏伐晉。取陰人。後又食采于瑕。故亦稱瑕甥。郡國志。河東郡解有瑕城。桉後詹嘉亦食采于瑕。故曰瑕嘉。文公十三年。晉侯使詹嘉處瑕。以守桃林之塞。是也。士會之先隰叔。食采于隰。郡國志。河內懷縣有隰城。至士會先食采于隨。後又食采于范。故稱隨會。又稱范武子。至文子。宣子。獻子等皆然。韋昭晉語注。食邑于范。爲范氏。又云。隨。范。晉二邑。潛夫論。食采隨。故氏隨。左傳隱公五年。翼侯奔隨。杜預注。隨。晉地。圖經。隨城在介休縣東。春秋時爲士會食邑。地理志。東郡范縣。圖經。春秋時晉大夫士會邑。號射父。食采于號。梁由靡。食采于梁。梁號本皆舊國。陽處父。食采于陽。箕鄭父。食采于箕。郡國志。修武有陽樊。攢茅田。杜預注。太原陽邑縣南有箕城。是也。圖經。又云。陽邑縣。晉大夫陽處父邑。邢侯。食采于邢。雍子。食采于雍。地理志。河內郡平臯。應劭曰。其地屬晉。號曰邢丘。郡國志。山陽縣有雍城。董氏。食采于董。左傳。文公六年。改蒐于董。杜注。臨汾縣有董亭。又有董澤。在聞喜縣東北四十里。古叅龍氏董父所居。故名。解揚。食采于解。郡國志。解縣有解城。張老。食采于張。潛夫論。河東解邑有張城。有西張城。史記。又有東張。

城。今在虞鄉縣西北。輔果食采于輔。鐸遏寇食采于鐸。左傳宣公十五年。秦伐晉。次于輔氏。杜注。輔氏。晉地。十六年。晉滅赤狄。及留吁。鐸辰。苗賁。皇食采于苗。杜注。食邑于苗地。梁餘子食采于梁榆。水經注。梁榆水出梁榆城。桉在漢上黨郡涅氏縣。圖經。春秋時晉梁餘子養邑。王官無地。食采于王官。左傳。文公三年。秦師濟河。取王官及郊。夏陽說食采于夏陽。桉夏陽卽豳舊邑。高粱伯食采于高粱。故曰高粱伯。杜注。高粱在平陽楊縣西南。莢成僖子食采于莢成。廣韻。姓。出平陽。世本有晉大夫莢成僖子。閻氏食采于閻。元和姓纂。唐叔虞之後。公族食采于閻邑。因氏焉。今考昭公九年。周廿人與閻嘉爭閻田。是閻嘉亦以食邑爲氏。故曰閻嘉也。柏氏食采于柏。晉語。韋昭注。柏。晉之舊姓。地理志。趙國柏人。注。本晉邑。叔向稱狐續慶伯。古伯柏同。當卽此也。陘氏食采于陘。廣韻云。陘。晉邑也。大夫氏焉。今爲井陘縣。以至祈氏食采于祈。桉辛亦食采于祁。地理志。祁。晉大夫賈辛邑。蓋是時祁氏已滅。與鄆銅鞮之屬。司馬彌牟。樂霄等同。楊氏食采于楊。劉昭引地道記。又云。楊縣有梁城。去縣楊晉大夫傑安之邑。蓋傑安食采于楊。亦在羊舌氏滅後也。鄆氏食采于鄆。孟丙食采于孟。銅鞮伯華食采于銅鞮。太康地志。銅鞮。晉大夫羊舌赤邑。又未食銅鞮以前。又嘗食邑于羊舌。左傳正義引世族譜。羊舌。其所食邑也。邯鄲午食采于邯鄲。蒲城午食采于蒲城。則又皆漢河東河內上黨太原趙國所屬之大縣。人所共知者矣。更有異者。地理志。上黨郡余吾。通典作徐吾。桉左傳昭公二十八年。晉大夫有知徐吾。又河東郡襄陵有讎氏鄉亭。水經注。襄陵縣故城。晉大夫卻讎之邑也。故其地有讎氏鄉亭。是又以采邑命名矣。亦他國所未有也。

春秋惟秦不用同姓而喜用別國人論

春秋時列國皆用同姓。惟秦不然。見于經傳者。亦不過數人。公子紮、小子憇、公子鍼、公子士雅等。是也。至好用異國人。則亦自穆公啓之。秦本紀所云。求百里于楚。迎蹇叔于宋。取由余于戎。求丕豹。公孫枝于晉外。又有內史廖。隨會等數人。若孟明視。西乞術。白乙丙。則又百里奚及蹇叔之子也。降至戰國。而孝公用商鞅。惠文君用公孫衍。張儀。司馬錯。樂池。魏章。武王用甘茂。陳軫。齊明。周最。昭襄王用田文。樓緩。壽燭。向壽。白起。任鄙。呂禮。蒙武。尉斯離。客卿胡傷。客卿竈。王齕。司馬梗。張唐。范雎。蔡澤。將軍摎。莊襄王用呂不韋。蒙鶩。及始皇用庶公。王齕。茅焦。尉繚。桓齕。楊端和。王翦。李斯。羌瘃。昌平君。索隱昌平君楚之公子。昌文君。王賁。李信。王綰。馮劫。王離。趙亥。隗林。馮毋擇。王戊。趙嬰。楊樛。蒙恬。辛勝。類皆異國人也。骨肉中惟樗里疾最用事。然疾中間又嘗相韓。明用之亦無商鞅范雎之專矣。且公子虔。同姓之親。又太子之傅也。鞅一言而卽劓。涇陽君。高陵君王之同母弟也。唯一言而卽出之關外。公子十二。公主十。皆二世之親昆弟也。趙高一言而同日伏尸于市。明秦于骨肉之恩本薄。故人人得而間之。惟遊士則不然。能西行入秦。無不各得所欲。有不幸者。僅韓非。鮑丘等一二人。遭羅讒謗以死耳。其他則皆立談取卿相者也。此非穆公之留貽家法然乎。然秦之霸以此。秦之并天下。以此。秦之士崩瓦解。亦以此。迨二世之亡。項羽殺子嬰。及秦諸公子宗族。疑其子姓已無復有矣。此則雖貴爲天子。而易姓之後。尙遠不如齊之諸田。楚之屈昭景等。猶能布滿天



下。謂非立法不善之故哉。吾故曰。春秋時惟秦不用同姓。而喜用異國人。其法自穆公始。烏乎。穆公家法之不善。又豈僅殺三良而已哉。

春秋晉比楚少恩論

春秋時。晉國待大夫最少恩。左傳昭公三年。叔向對晏子所云。欒、郤、胥、原、狐、續、慶伯。降在阜隸。是也。至二十八年。而祁氏、羊舌氏族亦滅。夫狐、胥爲從亡之臣。欒、郤、原皆有勞于國外。如伯宗、祁奚、叔向之賢。又皆傳所云。猶將十世宥之者也。況所坐之罪。又均非叛逆。狐、續則坐尊殺。先穀則剛愎。三郤則驕侈。胥童則從君子。昏、欒、祁則又以家事至于滅宗。最爲無罪。若伯宗之被讒。羊舌之從坐。又不待論矣。楚則不然。伯、欒之惡。至于攻王。門懷之悖。至于欲弑君。然莊王則曰。子文無後。何以勸善。命其孫箴。尹克黃復其所。昭王則復國之後。賞大功九人。門懷亦預焉。子西請舍懷。王曰。大德滅小怨。道也。夫一家之中。兩犯叛逆之罪。門氏即若敖氏而不及其身。與子孫。楚報功之典。可云厚矣。卒至戰國之末。而屈、昭、景三族。亦究與楚相始終。謂非立法之厚。遂獲享其報乎。若昭公二十七年傳。言盡滅郤氏之族。則令尹子常爲之。非王之意也。又攷春秋于叛臣篡弑之臣。其子孫之食祿居位。亦並如故。并有不忍絕其後者。夫鄭之公叔段。可云叛臣矣。然左傳莊公十六年。公父定叔出奔衛。杜注。公叔投之孫。三年而復之。曰。不可使共叔無後于鄭。又使以良月入。何其用法之寬乎。至夏徵舒親弑其君。可云罪大惡極矣。然左傳昭公二十三年。其孫陳夏鬻復見

于經世本徵舒生惠子晉。晉生禦寇。御寇生悼子鬻。是又生則爲卿大夫。死則賜諡。與立勳諸臣亦無以異。至漢時。而法已漸嚴。有罪之家。不得入宿衛。其後并不得官京師。是也。然究當以漢法爲善。

春秋時君臣上下同名不甚避諱論

春秋時禮法尙疎。雖云諱以事神。名終將諱之。然君臣上下同名者甚衆。如周穆王名滿。而周有王孫滿。厲王名胡。而五世孫僖王亦名胡。齊鄭世家。武公名掘突。而其孫厲公亦名突。簡公名嘉。而同時卽有公子嘉。左傳史記並同宋殤公名與夷。而一傳卽有公子目夷。衛世家。穆公名遫。而裔孫成侯亦名遫。靈公時又有戲陽漱。襄公名惡。而臣又名石惡。是又祖孫上下同名。左傳宣十七年經。蔡侯申卒。至哀公四年經。盜殺蔡侯申。是元孫與高祖同名。齊世家。武公名壽。而春秋時齊有公子壽。曹世家有夷伯喜。而後又有公子喜時。有幽伯彊。而數傳又有宣公彊。又有大夫公孫彊。陳世家有幽公寧。而後又有大夫孔寧。有武公靈。而裔孫平國又諡靈公。晉世家。唐叔子晉侯燮。而范文子亦名燮。定公名午。而同時大夫有邯鄲午。蒲城午。又文公昭公子皆名雍。宋微子啓。爲宋始祖。而春秋傳。宋景公所養子亦名啓。楚靈王名圍。而一傳卽有王孫圍。聘于晉。見楚語。至若魯武公名敖。至廢敖山。可云諱之嚴矣。然文公時卽有公孫敖。他若晉曲沃桓叔名成師。而晉官有太師。魯幽公名宰。而魯官有太宰。楚共王名箴。而官不廢箴尹。晉獻侯名籍。而晉不廢籍氏。魯魏公名濫。而魯邑之費不改。陳莊公名林。而陳地之株林不改。此類益多。不能枚舉矣。又

如以國號爲名者。衛宣公名晉。成公名鄭。魯定公名宋。陳惠公名吳之類。當時赴告于諸國者。又豈能連他國之號而諱之耶。用春秋時雖以諱事神。而禮法闕疎。尙有諱有不諱。非如漢以後禁忌日甚。并同聲之字而亦諱之也。

春秋時楚國人文最盛論

春秋時。人材惟楚最盛。其見用于本國者不具論。其波及他國者。蔡聲子言之已詳。亦不復述。此外。則百里奚。霸秦。伍子胥。霸吳。大夫種。范蠡。霸越。皆楚人也。劉向新序。百里奚。楚宛人。吳越春秋。范蠡。楚宛縣三戶人。大夫種。亦楚人。他若文采風流。楚亦較勝他國。不獨左史倚相能讀三墳五典八索九丘也。史記楚世家。析父善言故事。楚語。共王傅士亶。能通訓典六藝。觀射父能辯山川百神。蓋楚之先鬻熊。爲周文王師。著鬻子二十二篇。其後卽諸子百家亦大半出于楚。史記。老子。楚苦縣厲鄉曲仁里人。老萊子亦楚人。漢書藝文志。道家老萊子十六篇。楚人。又文子九篇。班固注。老子弟子。並與孔子同時。今讀其書。有與平王問答篇。蓋楚平王。班固以爲周平王。誤也。又有蜎子十三篇。班固注。名淵。楚人。老子弟子。鶡冠子一篇。注。楚人居深山。以鶡爲冠。楚子三篇。不注姓名。又孔子墨子皆嘗入楚矣。史記孔子弟子列傳。公孫龍。任不齊。秦商。鄭康成注。皆楚人。藝文志。公孫龍十六篇。卽爲堅白之論者。儒林傳。澹臺子羽居楚。至莊子雖宋蒙縣人。而蹤跡多在楚。觀本傳及越世家等可見。孟子列傳。載環淵。楚人。著書上下篇。卽蜎子也。又云。

楚有尸子、長盧、劉向別錄、楚有尸子、張守節正義、長盧、楚人有長盧九篇、孟子內篇言、陳良、楚產也、悅周公仲尼之道、又爲神農之言者許行、亦楚人、鬼谷子、皇甫謐注、楚人、荀況則嘗爲楚蘭陵令、藝文志、儒家有楚蘭陵令荀卿三十三篇、是也、其他在七十子以後傳經者、易則楚人馯臂子弓、禮則東海人孟卿、春秋則楚太傅鐸椒、藝文志有鐸氏微二篇、詩則毛魯二家、春秋則左氏皆出于楚、蘭陵令荀卿、是矣、至詞賦家、則又原始于楚、屈原、唐勒、景差、宋玉諸人皆是、蓋天地之氣、盛于東南、而楚之山川、又奇傑偉麗、足以發抒人之性情、故異材輩出、又非僅和氏之璧、隨侯之珠、與金木竹箭皮革角齒之饒、所得專其美矣、

### 春秋時諡法詳略及美惡論

春秋時、于秦楚吳越諸臣、皆不著諡、蓋以戎蠻外之、何以知皆有諡而不著也、蓋以他書攷之、楚有魯陽文子、見國語、吳有辛文子、見范子、疑皆諡也、宋大夫亦無諡、或殷人尙質、宋尙仍殷之舊、故卿大夫皆無諡、至齊、晉、鄭、衛、則大夫無不有諡矣、然亦有不可解者、齊大夫則高、國、陳、鮑、無不有諡、而管夷吾、晏嬰之諡、反不著、攷之世本、管莊仲產敬仲夷吾、夷吾產武子鳴、鳴產桓子啓方、啓方產成子豫、豫產莊子盧、盧產悼子其夷、夷產襄子武、武產景子能陟、陟產帶、以上下例之、則敬卽仲諡、章昭國語注、管仲諡敬、則平亦當卽晏嬰之諡也、晉大夫無不有諡、而狐偃、郤穀、先軫、胥臣等諡、獨不著、又叔向、祁奚等、亦不知其諡、或曰、卿有諡、大夫無諡、然士彌牟、韓无忌等、亦大夫也、彌牟諡景伯、韓无忌字穆子、國語、新稚狗諡穆子、章昭注、晉

大夫是也。鄭大夫如馮簡子等，亦皆有諡，而子產、子太叔之諡獨不著。賴有晉語，而始知子產之諡爲成。衛大夫無不有諡，且有生而賜諡者矣。而史鮪、蘧伯玉等諡反不著。賴有高誘呂覽注，而始知伯玉諡成。又春秋之例，雖出亡及被刑戮者，亦皆有諡。晉卻至諡昭子，欒盈諡懷子，知瑤諡襄子，魯邠孫諡昭子等是也。此或事定之後，時君所追諡，否則其家臣等爲之。然亦可以見風俗之厚矣。夫靈、厲、悼、諡之惡者，今攷亦不盡然。周靈王以生而有神靈，故諡靈。晉悼公以降年不永，故諡悼之類是也。有似嘉諡而實非者，周穆王以周行天下，故諡穆。周懿王以王室始衰，故諡懿。史記蒙恬傳，秦穆公殺三良而死，罪百里奚而非其罪也，故立號曰穆。論衡引儒家董無心之言，近而以秦穆晉文言之。繆者，誤亂之名。文者，德惠之表。又云，晉文之諡，美于穆公。云云。按此，則繆字皆讀如謬。所謂名與實爽曰繆也。蓋春秋時懿穆皆非美諡。衛懿公及身失國，齊懿公楚穆王皆及身篡弑。宋穆公舍子立姪，至數世不靜。晉穆侯名少子曰成師，而至國亂十世，晉卒併于曲沃是也。

春秋時以隱疾爲名論

春秋時以隱疾爲名極多。左傳魯成公名黑肱，晉成公名黑臀，周語單襄公云，成公之生也，其母夢神規其臀以墨，曰，使有晉國，故名之曰黑臀，是矣。又傳文公十三年，邾子蘧蔭卒，晉語蘧蔭不可使俯，韋昭注蘧蔭直者，謂疾是邾文公亦當以疾名也。成公二年傳，楚襄老之子黑要，十年經，衛侯之弟黑背，襄公二

十二年傳。鄭公孫黑肱。二十七年傳。楚公子黑肱。昭公三十一年。邾黑肱以濫來奔。並是矣。又或有肖己之形爲名者。襄公二十二年。鄭游販。說文。販。多白眼也。春秋傳曰。鄭游販。二十六年。宋太子痤。說文。痤。小腫也。二十八年。齊慶筭。說文。筭。頭衰飢態也。昭十六年。鄭子齧。說文。齧。齒差跌兒。春秋傳白。鄭有子齧。今本作齧。說文云。齒參差也。義亦通。推之。楚子名頽。鄭伯名論。當皆以形似名之。說文。頽。面目不正兒。論。大目也。史記老子列傳。名聘。說文。聘。耳漫也。張守節云。耳漫無輪郭也。又說文。聒。字引春秋傳云。秦公子聒。聒者。其耳垂也。其見于他書者。尙不止此。蓋春秋時人尙淳樸。故生子或卽以隱疾及形似名之。後世文多于質。故每取嘉字及吉祥善事爲名。如戰國時孫子之名臚。漢昌邑哀王之名膊。僅見于書傳。不能多矣。

### 春秋時仲尼弟子皆忠于魯國并善守師法論

春秋時。惟孔子之徒。皆忠于魯國。哀公十五年傳。仲由謂齊陳瓘善魯以待時。子貢責公孫成以周公之孫而喪宗國。其尤著矣。又同師而學者至三千人。卒未聞有起而相軋者。其敬師如此。待友又如此。語有之。同志爲朋。同學爲友。洵可謂同志同學者也。夫龐涓。孫臏。未嘗不共師也。蘇秦。張儀。未嘗不共師也。韓非。李斯。未嘗不共師也。及各仕一國。卽起而相軋。幸則爲張儀。不幸則爲孫臏。尤不幸則爲韓非。然此非數人之過。學術不正之過耳。當其學陰謀。學縱橫。捭闔之時。殺機早已暗伏。其乘間而輒發。勢所必然。然

豈特于同學之友然哉。使其師尚在。與共處一國。共事功名。亦必起而爲逢蒙之反刃。是學術使之然也。荀卿雖彼善于此。然言性惡。而以堯舜爲僞。且又訾毀及子思。孟子其心術已槩可見。夫心術者。學術之源也。心術不正。而欲其學術之正。不可得也。學術不正。而欲其徒之必無背其師。不可得也。然則使荀卿而果入秦。能保李斯之必能相容乎。曰。必不能。非僅必不能而已也。亦必以所以待韓非者待其師。不至于死而不止。或曰。何以見之。曰。卽觀其所以待韓非者見之矣。夫斯非不知韓非有過人之材。并材之十倍于己也。其心悅誠服者。亦未嘗不與待其師者同也。何以見之。曰。于非之死後見之。方二世之時。斯以丞相爲趙高所間。恐懼上書。此時畢生之學術。苟可以求免者。當無不用之矣。然其書中惟兩引韓子之言。一則曰。慈母有敗子。而嚴家無格虜。云云。二則曰。布帛尋常。庸人不釋。鑠金百鎰。盜跖不搏。云云。未又云。雖申韓復生。不能加也。是斯之心悅誠服于非者何如。然必殺之而後已者。懼其勝己也。是卽逢蒙殺羿之意也。是卽戎夷弟子忍死其師之意也。況荀卿之材。又過于非。而謂李斯之能容之乎。吾故曰。心術不正。則學術不正。學術不正。則師弟亦不能相保。勢使然也。烏乎。安得仲尼之徒布滿斯世。以救天下之學術。卽以正天下之心術乎。若陳相之于許行。其咎不過見異思遷。非有反戈之意。此亦由陳良學周公孔子之道。學術本正。故不至破敗決裂耳。是則學術可不講哉。

跋汪大令輝祖所撰二節母行狀後

亮吉年二十餘。從吾友邵學士晉涵處讀雙節堂詩文。卽知二母之賢。學士并述君至性過人。其闡揚二母也。力惟恐不及。益心敬之。憶曾爲雙節堂詩。脫稿後卽爲友人挈去。未識得達左右否也。今忽忽三十年。蹤迹南北。究未克與汪君相見。而學士則已謝世矣。昨歲亮吉蒙恩自塞外歸。汪君又介同里臧文學鏞堂以請。烏乎。以二母之賢。暨君之孝如此。亮吉亦何足以表揚萬一哉。及讀君所爲二母狀。其零丁孤苦。疾病顛蹶。與吾母太宜人無異也。其奇節苦行。百死一生之狀。與吾母太宜人無異也。遭家難而幾幾不獲自全也。亦與吾母無異。又讀狀中所云。君幼時出塾。二母令覆背日所讀書。至齒棘舌蹇處。二母怒。輒欲呼杖。烏乎。又何與吾母之教亮吉如出一轍乎。然君性淳謹。以是數呼杖。數中止。若亮吉之少也。性旣暗劣。又寄居外家。外家男女兄弟至十數人。出塾後或相聚以嬉。輕則言語無狀。重則碎服折筭。是以太宜人必一夕數呼杖。乃稍稍斂抑。迨少長。補博士弟子。或出豫讌會。太宜人恐亮吉之過飲也。必先嚴飭之。歸必視其面無酒容。言語不失度。方命歸寢。亮吉三十以內。未嘗敢有酒失。太宜人教之嚴也。善乎。呂不韋之言曰。家無怒咎。則豎子嬰兒之有過也立見。亮吉又嘗謂聖人所云小杖則受。大杖則走者。亦謂父母壯盛之時。盛氣之下。或至有錯失耳。若父母年已就衰。則愛子也益甚。非萬不得已。何忍用大杖。卽用大杖。而以年力就衰之父母。杖壯盛之子。杖亦必不能有所損。如是。亦何忍走而避之乎。亮吉又嘗憶年二十九時。太宜人年已六十一。時長子飴孫生已二年。太宜人愛之甚。一日亮吉因其啼不止也。扑



之。太宜人見而盛怒。呼杖杖亮吉。至六七乃已。亮吉起。就暗處淚涔涔下不已。姊怪而問之。則泣語曰。以太宜人杖之不能重也。知氣力之衰憊甚矣。甫及二年。而太宜人卽已棄亮吉等。烏乎。亮吉今日卽欲復求吾母之杖。其可得乎。三復君狀。不忍卒讀。非君至性過人。又何以語之沉痛。一至此乎。自此以往。君與亮吉。倘時時思賢母之訓。則末路或可以不至差跌。他日亦庶可見兩家之母于地下矣。

誥授通議大夫內閣侍讀學士陸鴻臚寺卿加三品銜特贈光祿寺卿賜祭葬胡君墓志銘

烏乎。吾又何以銘吾友哉。憶歲乙卯。余方視貴州學政。時君以兵部郎隨大學士福康安貝子。在銅仁軍營。以戇直屢與同輩鬪。余作書規之。越月。得君書遜謝。若深有感於余所言者。自後不通音問者五歲。迨己未十一月。余以罪謫戍伊犁。道出甘陝。值同歲生今四川布政使司楊君揆。同里今邠州知州莊君忻。並自漢中軍營回。極道君近日行事。有人所不能及者。云君從經略額勒登保公贊畫軍務。屢以事忤經略。經略顧能容之。每日拔營。必首跨一馬。與領兵節將偕。節將或沿路逗留。君必大聲叱之。遇賊。則務當賊衝。節將或前卻。君必慷慨獨進。怒目視節將。節將不敢不前。至弁兵之不進者。輒以馬策撻之。以是屢得勝仗。回營後。凡徑路曲折。山谷奇險。與糧運斷續。兵弁或一日二日不食。以及雨零日炙。器仗敝敗。衣履破碎。猝遇賊匪。狡詭萬端。出沒不定之狀。又諸將若者有功。若者戰不力。若敢出賊前。若僅尾賊後。必一一與經略言之。經略知君不欺。卽據案定賞罰。將弁輕則褫責。重則奏請行法。以是軍營之畏君也。與

畏經略等。然其憚其公正。卒無以間也。夜臥不半刻。卽燭治官文書。凡屬草及繕寫。皆出一手。辨色已出營。促視諸帳中。蓐食。食畢。輒躍馬數步外以待。或大營中會語。視將弁之畏蒞不前者。氣必凌出其上。或以持重說進。君必叱之曰。汝安知持重。直逗撓耳。且畏死無過書生。我不畏死。汝轉畏死。是不欲死于賊。欲死于法耳。聞者咋舌。君不顧。君時已得疾。瘦骨立。日食不及半升。自湖北軍營中。須髮已畢白。見者不知其爲五十人也。余不待二君語畢。惕然起曰。如是。胡君死矣。未幾。余蒙赦還。又未幾。而君訃至。烏乎。祀典所謂以死勤事者。君庶無愧乎。按狀。君諱時顯。字行偕。一字晴溪。先世爲江西奉新人。五代時。遠祖瓊。官常州路刺史。遂家武進之安上鄉。明禮部尙書諡忠安公濬。其後也。君爲忠安公十一世孫。祖□俊。父用嘉。兩世皆封贈如君官。君又嘗出嗣季父直隸高陽縣知縣文英後。季父有子。君復歸大宗。君少而穎異。讀書數行並下。弱冠出試。顧數屈於有司。年二十二。遊京師。名公鉅卿。咸禮異之。歲壬辰。適大兵進勦金川。倉場侍郎劉公秉恬奉命辦理西路糧餉。奏君自隨。是時君已從國子生考取臚錄。遂馳驛偕往。凡文移案牘。無一不出君手。侍郎才之。奏請給中書。或國子監學正學錄銜。得旨賞給中書科中書職銜。越歲。侍郎又以君遇事奮勉。入奏。特旨遇缺補用。及入都。引見。擢主事。計君以軍功得官。由主事擢員外郎。中。皆在兵部。三次京察。一等。嘗擢選廣東雷州府知府。以親老乞留。繼以隨大學士福康安貝子勦湖南貴州紅苗功。賞戴花翎。以隨參贊額勒登保公勦湖北教匪功。賞給內閣侍讀學士銜。嗣參贊以功授經

略君又以隨經略歷陟湖北川陝屢次奏捷功加三品銜實授內閣侍讀學士尋擢鴻臚寺卿及以勞瘁卒又贈光祿寺卿此君所歷官也君前後在軍營十數年勦川陝教匪獨至五年日日走獫狁烏道人跡所不到之處饑未及食渴未及飲夜枕未及貼中間雖屢荷渥恩然究未嘗一見天子雖歷官九卿侍從卒未嘗一日得立於朝人或以爲君遇合之奇而余以爲君數之奇亦已至也烏乎人生二十以內大都在長者膝下其得展尺寸之效爭竹帛之名者不過二十至五十卅年內事耳此卅年中君叠遭封君及兩繼母憂官兵部者不及十載餘則皆短衣匹馬奔走勞苦之日也勦金川酋勦苗匪勦教匪其間又嘗隨大學士福康安公一至安南國界經畫邊務凡國家有征勦諸大事君無一不預遂至一人之身與軍事相終始以迄窮老盡氣致命遂志乃獲已焉且又不止於此方君之以主事入值軍機也純皇帝悉君才行大用矣忽以言語忤要人卽日斥出要人所以擿君者不遺餘力而君之所以抗要人者亦幾不留餘地焉卒至不安於位東西走軍營而其以公事抗貝子抗經略者復如故也君亦可謂百折不變者矣君與人交不設城府亦之苟爲言語以悅人與余同官京師蹤跡亦不甚密然大節所在未嘗不交相勵余以此重之爲文移箋奏頃刻立成曲折如意同輩雖精思不能易一字也尤善書官京邸日踵門求者不絕名轉出館閣諸公上君未卒前數月尙力疾條奏十事其請增隨征兵役口糧及令巡道稽查轄下營伍二事尤蒙俞旨焉君生於乾隆八年以嘉慶六年八月二十四日卒於興安軍營年僅五十有九有

旨照三品例賜祭葬。子之富。四川潼川府經歷。服闋。以知縣陞用。皆異數也。君娶於楊。爲同里山西壺關縣知縣。楊君宸女。前封恭人。例晉淑人。之富將以今年十二月□□日葬君於某鄉之某原。銘曰。得官於西。卒官於西。君之遇奇。朝入軍機。夕出軍機。君之數奇。雖然。人皆以爲是。而君獨非。槐里之折東海兮。君或庶幾。我荷戈而出塞兮。不獲殺賊。君持力而行陳兮。乃屢克敵。雞頭之關待君塞。燕然之山待君勒。生爲蠹臣兮。死毅魄。烏乎。君魂不歸。僅歸骨。魂待西川大功訖。我知君心兮。鐫墓碣。

### 開沙于氏族譜序

于氏近支凡五。皆元末自杭州而分。曰滁川。曰徐州。曰徽州。曰金壇。其在丹徒者。曰開沙一派。又自金壇近徙者也。自元末迄今。幾五百年。其在杭州者。以功業顯。卽明贈太傅忠肅公是也。其在金壇者。以文章著。而析居在丹徒者。獨以孝友稱。洵可云望族矣。今天子嘉慶建元。詔天下守土官舉孝廉方正之士。縣不過一二人。甚有無以應詔者。丹徒爲江以南大縣。而守是土者。獨以于君宗林應詔。督撫大吏核實。皆以爲允。上之朝。特旨賜六品頂帶。以備召用。于是鄉人皆曰。此于氏孝友之報也。又二年。徵君以其族姓之繁。謀于其宗。欲重修譜系。而屬序于余。夫于氏之以功業顯者。旣煊赫于前代。以文章著者。又昭灼于近時。獨以孝友稱者。名若不甚彰然。吾嘗過其里居。在京江以西。子姓之讀書者。皆愿而能文。力田者皆勤。而無外事。父訓其子。兄勉其弟。若嚴師之于門弟子焉。而子弟之所以奉父兄者。亦惟恐不及。歲時伏

臘漿酒豆藿善氣凝于一門。以次蒸及鄰里。推至一鄉一邑。皆視其家法以爲準的。俗奢者以之儉。俗薄者以之淳。以視功業之在一時。文章之僅在一家者。其有禪于世道。或過之焉。則豈非孝友之澤。積之者愈久。則報之者愈綿。又非十世二十世之所可量乎。況族譜之修。所以敍一本之親。卽所以垂百年之法。事無有善于此者。吾願于氏之宗。世世克守其家法。俾世之推族望者。爲于氏以功業顯。以文章著。又以孝友傳也。則江以南之氏族。非首屈一指者乎。余與徵君交。其弟淵。又受業于余。知之詳。故序之如此。

# 更生齋文甲集卷第三

## 新修寧國府儒學碑記

秦分天下爲三十六郡。而江以南得大郡三。曰鄣郡、會稽、豫章。而鄣郡最大。都尉分治。東至山陰。錢唐。西又雜出。豫章郡界是也。次則會稽。又次則豫章。今江寧、安徽、浙江三布政司所屬。半皆秦鄣郡地。漢改鄣郡爲丹楊。今寧國府治。卽漢丹楊郡治。是寧國之爲大府。自秦漢以來卽然。地大物博。與會稽、豫章皆爲江外都會。其人物足以弁冕當世。其文采足以藻麗東南。三歲中春秋兩試。士獲雋者。恆倍他處。夫程功速則報本必隆。師儒多則學校益重。而寧國府儒學。乃曠及百年不修。非所以嚴祀事。植士氣也。守茲土者。亦時以爲憂。然輒以工重費繁中止。府所屬涇縣、黃田、有淳德君子。曰朱武勳。借其從子慶彩。于雍正乾隆中。嘗以修學宮爲己責。而一府之人。無議及此。朱君亦不能違衆議。遽自興作也。乃自乾隆中葉後。宛陵春穀。秦漢以來。素號文藪者。至是實學漸稀。文采漸落。科第亦漸不振。于是一府人士。皆歸咎于學舍之不修。俎豆之不肅。以至此焉。官于此者。始不得已而諷其所部之人。君之孫曾某某。遂亟承先志。毅然請獨任之。鳩工庀材。皆飭子弟督其役。越歲工竣。視其舊。則煌偉堅實過之。凡用銀七千有奇。出于君之孫曾者六之五。出于慶彩房者六之一。費不外求。而工皆歸實。是又善之善者。朱氏之先。徙自婺源。于

宋時爲徽國文公近支。今科第之盛。甲于縣中。蓋皆君崇尚學校。尊禮師儒一念。有以啓之。君曾孫理瑋。與余皆同詞館。遂屬爲文以紀之。夫學校之在今日。咸視爲不急之務。而君獨若饑之于食。渴之于飲。一日不可廢者。以視漢之文翁。唐之韋珪。或不多讓。況國家至治。翔洽一百六十年矣。純皇帝創辟。雖刊石經于壁。與今天子。皆數幸學。講求典禮。孳孳如不及。而朱氏之修建學宮。適承其後。其所以佐右文之治。樹正學之幟者。又豈規規焉爲利百年。爲德一方者所可比乎。吾知江以南十數大府。必有聞風而起。踵行而不倦者。卽以爲創始于朱氏也可。

全秦藝文錄序

全秦藝文錄者。吾友階州邢君澍。官浙江長興縣時所著也。長興于東南爲最繁。君蒞事數年。刑清政簡。乃以其暇。裒輯宋會要及金石劄記等書。又以關中自唐宋以來。疊經兵燹。昔賢述作。淪佚者衆。復以二年之力。精心撿采。爲全秦藝文錄一書。始自三代。迄于有明。共若干卷。脫稿後。卽郵以示余。余讀之。歎其搜羅之廣博。類例之嚴整。大致仿歷史藝文志等書。而參以近人朱檢討彝尊經籍考之例。分別門類。條舉遺佚。而後知君不特能于其官。卽著一書。而其取材之博。用心之審。又如此也。夫全秦爲天下之首。從古載籍。無不權輿于斯。易則文王上下篇。詩則周南召南。書則秦誓秦誓。又且言禮則河間獻王。言春秋則劉向劉歆父子。皆號專門之學是也。史則司馬遷班固。皆三輔人子。則道德經二篇。老子入關時爲關

令尹喜所著。其所入關。昔人或以爲大散。或以爲函谷。類皆不出秦地。班固作漢書藝文志。凡詩賦一百六家。而以高祖歌詩二篇。武帝所自造賦二篇。弁其首。是則經史子集無不權輿于秦。舉全秦藝文。而天下之藝文已探其原。舉全秦藝文。而天下之藝文又居其半。君之此書。所以爲不可少也。抑余又有進者。關中地勢極高。水之停注者少。自秦漢以後。無不引河渭涇洛數大水以溉田。三輔之鄭白渠。廣通渠。龍首渠。寧夏之漢延渠。唐來渠。大河渠。皆是。他若漢中興安。則引褒水。漢水。蘭州則引阿干水。灘水。甘州則引弱水。羌谷水。涼州則引谷水。土彌干川水。涇州則引涇水。汧水。安西則引南藉端水。肅州則引呼蠶水等。以是溝渠之在甘肅陝西境者。不下數百。然百餘年來。故道湮廢。水泉擁遏。反足爲田畝之害者。蓋十居其九焉。地勢瘠而民氣愁。職是故耳。以君之學識。官事之暇。倘復能仿班氏志溝洫之例。于關中渠瀆所在。勒爲一書。名全秦溝洫錄。他日州縣長吏。有能舉其職。及實心爲民者。案圖籍而疏濬之。則有益于鄉里者。又豈在元虞集京東水利。明王恕漕河通志書等下乎。余又拭目俟之矣。

### 重修明太常少卿凌公祠墓碑記

吾嘗作續吳地冢墓志。載黎里鎮有明太常寺少卿凌信墓。其旁有菴。名寶綸。卽凌公祠屋也。舊藏宣德時所給勅命。及成化時賜諭祭葬之文。故菴以名焉。厥後子姓凌替。日益傾圮。一修于萬歷丁巳。同里胡居士元嶽。再修于崇正辛巳。龔居士濟寰。并爲置祠田。繕庖廡。迄今又一百五十年。田鬻于住持僧某。碑



磨于遊方僧某。其僅存之子姓，亦無有過而問者。徐待詔達源見而慨然謀于里人，并太常之父明工部虞衡司主事凌顯祠墓，亦並修葺。工始于嘉慶六年，至七年秋甫竣，將立碑以永其傳。以碑文屬亮吉，亮吉攷明史暨一統志、江南通志、凌公事蹟，無所著錄。惟吳江縣舊志載凌顯黎里鎮人，字彥光，考授大興縣丞，欽給勅命，陞工部主事。後以子信貴，贈尙寶司丞。凌信，字尙義，以楷書授中書，仕至太常少卿。及閱明史安南列傳，載憲宗踐阼，命尙寶卿凌信，行人邵震，賜王黎灝及妃彩幣。灝遂遣使入貢，是凌公未官太常以前，又嘗爲尙寶卿，並出使遠國也。夫宣德成化，爲有明極盛之時，公以善書，遂得致位卿貳，與華亭之沈度及弟粲，皆以楷書選入翰林。凡金版玉冊，皆令書之。其致身通顯，亦與太常等稱雲間大小沈學士云。以是知士生承平，凡有一藝之長，無不可濯磨自見。太常與二沈，均可云遇其時矣。又嘗憶今天子嘉慶四年，亮吉尙在翰林，適琉球國王以嗣位乞封于朝，掌院事者將舉亮吉以往。後值他事不果，亦可知當國家重熙累洽之時，持天子節，越大海，使萬里遠國，得以紀其風土人物，備一代掌故，亦有命存其間，固不可幸致耶。凌公之由尙寶卿得擢太常，或卽以出使故，未可知也。總之，凌公之生，獲以才自奮，其沒也，歷數百年，祠與墓又頻見修于里中之後進，使人過太常之阡，訪寶綸之菴，尙流連往復不置，謂非身前後之遭際，均有過于人者乎。亮吉旣重待詔之能，表章先哲，又慮凌公父子事蹟久而就湮也，故樂爲記之。

萬刺史廷蘭重校刊太平寰宇記序

太平寰宇記二百卷。宋太常博士直史館樂史所撰。史事蹟見子黃目傳首。所著又有坐知天下記。掌上華夷圖等。今不傳。史官至商州刺史。判留司御史臺。傳列其生平所撰述。不下數十種。蓋史官商唐及宋初。其時漢晉以來載籍尙未散佚。故太宗修御覽等三大書。及史撰此志。徵引繁富。多南宋以後所未見。本卽以地志論。晉太康土地記。宋永初山川古今記。闕駟十三州記。顧野王輿地記。魏王泰括地志。賈耽李吉甫十道志。以迄輿稱。譙周。鮑堅。李克。周處。陸機。晏謨。張勃。鄧基。任昉諸人所劄錄者。多至百數十種。史雖不善決擇。然零篇斷簡。藉是書以存者實多。此其所長也。至若地理外。又編入姓氏人物風俗數門。因人物又詳及官裔及詩辭雜事。遂至祝穆等撰方輿勝覽。寧略建置沿革。而人物瑣事。必登載不遺。實皆濫觴于此。此其所短也。甚者佛胥叛之中牟。在河北。而此於開封所屬中牟。載入佛胥墓。並云墓有二所。漢書地理志。雲陵。雲陽。並左馮翊縣。而云雲陵卽雲陽。至以宋蒙門富漢蒙縣。以唐陵當楚棠谿。蓋以譌傳譌。多不參攷如此。性願嗜雜家小說。于洛陽下。則載樊元寶爲洛水神。附書潤州下。載高驪山海神。以酒醴聘外夷女等事。意在徵奇。罔知傳信。是又非史例矣。乃自序反譏賈耽之漏落。吉甫之缺遺。不知己之病適與之相反也。然地理書自吉甫以後。藉以考鏡今古。聯綴前後。實無踰此書。宜其傳之久而必不能廢矣。自元以來。雖刊本不一。然皆不甚精審。此刻自宋影鈔本外。能彙集諸舊本。補其遺亡。校其譌

舛于近日刊本中。最爲完善。則先生之有功于樂氏爲不少也。刊成。屬爲之序。爰書其得失。卽以質之先生。

送巨超僧自焦山移主山陰玉笥山方丈序

余自辛酉歲六月。始識焦山僧巨超。與之久處。知其心性明澈。雖不涉世事。而于世事無不周悉。與世人交。亦不離不合。而皆得所以自處。余心識之。今歲春。巨超以其鄉賢士大夫敦請之殷。將自焦山移主山陰玉笥山方丈。適余亦自洋川書院移講席于揚州梅花嶺。巨超來謁別。并乞一言以贈其行。夫巨超。浙人也。今歸主鄉山方丈。與昔人之官鄉郡無以異矣。余家陽湖。距邗上亦咫尺。今之移講席于梅花嶺也。與宋士夫之乞就近宮觀亦無以異。不知實則有不然者。昔人之官鄉郡。或委政上佐。或責成判司。類皆食其祿而不預其事。至宋人之乞就近宮觀。亦不過資其祿糈。雖有提舉點檢之名。實亦無一事也。而主方丈則不然。今玉笥山雲門寺。爲浙東勝地。寺以內焚修諷誦者。率不下數十百人。其禪律之精進。梵誦之嚴整。均視一人爲統率。脫聚數十百不守戒律之人。而彼教中不能檢押。適有一破度敗律者。則將誰任其咎矣。主書院講席者亦然。揚州爲東南名郡。四方之士來肄業者。亦不下數十百人。其學業之勤惰。品詣之純雜。亦視一人爲步趨。脫聚數十百不知勤學。不識立品之人。而爲其師者。不能訓化。適有一踰閑蕩檢者。則又誰主其責矣。然則不知者或以方丈爲高僧習靜之區。講席爲士大夫養閑之地。又豈知

各有專責。與爲所必當爲者。余與巨超。又何得不彼此相勗哉。然余居山中久。疎懶益甚。驟居南北衝要。酬應紛沓。心實苦之。或不久卽當謝去。而巨超之歸主鄉山也。會稽之松栢。鑑湖之魚鳥。禪定之後。顧而樂之。其所得又豈余所可希其萬一哉。其行速。因率書所見。以爲之敘。

### 跋新唐書馬周傳後

余讀馬周傳。至周亡。帝思之甚。將假方士術。求見其形。不覺泣數行下。曰。君之于臣。益至此乎。漢書外戚傳。孝武李夫人卒。上思念不已。方士齊人少翁。言能致其神。令上居他帳中遙望。見好女如李夫人。云云。及唐白居易作長恨歌。有臨邛道士爲明皇求致貴妃楊氏之說。此不過情志溺惑者耳。世猶傳爲美談。乃漢武明皇用之于私昵者。文皇帝則用之于賢臣。且不特此也。魏徵傳云。帝夢徵。若平生。及旦。徵薨。杜如晦傳亦云。夢如晦。若平生。虞世南傳云。卒後數歲。夢進讜言。若平生。是太宗之精神意氣。無一刻不與賢臣往還。不以生死移。不以久暫易。不以上下隔也。夫殷高宗之夢傅說。或尙神其說。以服衆心。而太宗則實因悲成憶。因憶成夢。歷歷不爽。若此。此而欲不度越百王。直接三代。得乎。三代以下。推令主者。莫不曰漢文帝。唐文皇。賈生之才。又過馬周。而文帝之所以待之者。視文皇。顧遠不及也。然則百世之下。才如馬周者。或尙不乏。讀周傳及諸人傳者。吾知亦必有忽然而悲。忽然而泣。如吾之今日者矣。

### 後蕭陶氏重修族譜序

作史者不可以不明譜系。不明譜系，勢必據各族之單詞，以上亂歷朝之舊牒。矜門族則有餘，徵信史則不足。其流弊豈特新唐書世系表等然哉？又上而唐初所修晉書，又上而沈約、李延壽所修宋書及南北史，亦皆有此失。請卽以陶氏論。淵明集有贈長沙公詩，其序云：長沙公子余爲族祖，則明與長沙桓公房非近支矣。淵明又嘗爲外祖父孟府君傳，言嘉娶大司馬桓公陶侃第十女，亦非所以稱曾祖之辭。國初太原閻詠曾著論辯之，余又得顯證二云：其一則稱長沙公爲族祖，若淵明果係侃曾孫，則襲長沙公者于淵明爲曾祖之子，當稱從祖，于五服之次爲小功五月，不得降稱族祖明矣。又晉書陶潛傳：祖茂，武昌太守，今攷侃傳，子十七人，惟洪、瞻、夏、琦、旗、斌、稱、範、岱九人見于舊史。若茂亦係侃子，則旣見于前傳，又嘗官武昌太守，不可謂不顯，及不見舊史矣。或又以命子一篇詳述長沙勳德，遂以爲淵明祖，侃顯證不知古人重官閥，凡同族有位望高、勳業重者，雖非本支，悉得備述。如史記司馬遷自序，載人殷、王司馬、卬、班固、漢書自序，詳及侍中班伯事蹟，皆非本支，無礙稱述。蓋漢晉以來，文士皆然，非獨淵明也。顏延之與靖節同時，所爲陶徵士誄，亦不言系出于侃，此明徵矣。總之，誤始于沈約宋書陶潛傳，而梁昭明陶靖節傳，以及南史晉書本傳，遂並承其誤也。夫使淵明果爲侃後，則此襲長沙公者，與淵明服屬甚近，何得云昭穆旣遠，已爲路人哉？此又不待辯而知者矣。九江陶氏舊譜，明知其誤，又強移侃十七子中岱爲淵明祖，是又與本傳祖茂武昌太守之文牴牾，益不足辯。夫淵明爲晉世賢者，其人與詩，皆足千古，又豈藉長沙

之勳業始傳者哉。是欲表章淵明而必非淵明之心也。今後蕭陶氏世譜云。出自晉康樂伯回。則與長沙彭澤二支皆系遠派。考康樂以後。自梁及宋。代有達人。固無藉遠引二支以爲門望。且茂爲侃子。不見于侃傳中。夫家之有譜。所以信今而傳後也。今旣無傳信之書。義當在闕疑之例。是又亮吉之欲與名宗賢士大夫共商之者矣。又況今日之家譜。卽他時國史之所憑。一失其實。則後人何述焉。今之序陶氏族譜。非僅爲凡爲族譜者舉例。兼欲告後之作史者。慎無信單詞而失其實也。

### 長流水關神武廟碑記

人有代謝神亦有代謝神。代謝者。若周之杜主。漢之城陽景王。漢末蔣子文諸人是也。惟忠義之氣塞天地者。則歷百世如一日焉。神武與唐之張許。宋之岳忠武。是矣。而神武廟尤徧天下。己未歲。余以罪戍伊犁。出嘉峪關。抵惠遠城。東西六千餘里。所過鎮堡城戍。人戶衆者。多僅百家。少則十家六七家不等。然必有廟。廟必祀神武。廟兩壁必繪二神。一署曰平。神武子也。見裴松之注所引蜀記。一署曰周倉。則宋以前悉無可考。僅見于元人所作演義。神其說者。或云。近世山西人掘地得周墓。有石碣焉。亦附會不足信。吾鄉有里儒。撰神武世繫。據吳志魯肅傳云。爭荊州日。坐有一人。云云。遂定爲周倉。夫陳壽固未嘗標姓名。則百世下何由知之。此真里儒之見矣。余前奉使貴州。過鎮寧州關索嶺。嶺有廟。香火極盛。土人及方志皆云。神武子也。正與周倉事相類。並不足信。神本謚壯繆。本朝定謚神武。余蒙恩赦回。過長流水。值里人

欲新神廟。乞爲記其壁如左云。

法式善祭酒存素詩序

一代之興。必有碩德偉望。起於輦轂之下。官侍從。歷陟通顯。周知國家掌故。詩文外復能著書滿家。以潤飾鴻業。歌詠太平。如唐杜岐公佑。明李少師東陽者。庶幾其人焉。少師雖家茶陵。然其先世卽以成籍居京師。與生輦轂下無異也。若余所見。則今之國子祭酒法時帆先生。殆其人矣。先生二十外卽通籍。官翰林。回翔禁近者及三十年。作爲詩文。三館士皆競錄之。以爲楷式。先生又愛才如命。見善若不及。所居淨明湖。外距黃瓦墻僅數武。賓客過從外。卽鍵戶著書。所撰清祕述聞。槐廳載筆等數十卷。詳悉本朝故事。該博審諦。人有疑。輒咨先生。先生必條分縷晰。答之。不以貴賤殊。不以識不識異也。先生性極平易。而所爲詩。則清峭刻削。幽微宕往。無一語旁沿前人。及揣摩名家大家諸氣習。校懷麓堂集。似又可別立一幟。不多讓也。余爲詞館後進。承先生不棄。前後倡酬者五年。今余以弟喪乞假歸。先生曰。君知我最深。序非君不可。余因曰。先生之所居。李西厓之舊宅也。先生采擇之博。論斷之精。杜君卿之能事也。然則他日撰述益多。位望益通顯。本學識以見諸施行者。視二公又豈多讓。詩文特其餘事耳。余行急。請卽錄。是言以爲序。

釋毫

髦見于詩栢舟者曰。髡彼兩髦。見于禮記內則者曰。子事父母。雞初鳴。咸盥漱。櫛縱筓總。拂髦。鄭康成注云。拂髦。振去塵著之髦。用髮爲之。象幼時髻。其見儀禮既夕者曰。主人說髦。鄭注云。今文說皆作稅。兒生三月。剪髮爲髻。男角女羈。否則男左女右。長大猶爲飾。謂之髦。所以順父母幼小之心。至此尸柩不見。喪無飾。可以去之。其見于禮記喪大記者。亦同。孔穎達正義云。髦。幼時剪髮爲之。至年長。則垂著兩邊。明人子事親。恆有孺子之義也。若父死。說左髦。母死。說右髦。二親並死。則並說之。玉藻云。親沒不髦。是也。髦之形象。則鄭康成及孔穎達。賈公彥。皆云未聞。今攷其制。人子幼時髦。蓋剪髮爲之。今之幼童。髮覆及額。是也。及長大。則或編髮爲髦。以象幼時之狀。鄭注及陸德明釋文可證矣。鄭云。髦者。用髮爲之。象幼時髻。陸云。子生三月。剪髮爲髻。長大作髦。以象之。是也。其制當如婦人之假髻。今吳俗。并有不用髮。或結絲爲之。以覆小兒之首。前垂至眉際。後垂過腦。于其上設二角。俗名曰髻髻。又譌曰多梳。亦有祇結半邊者。或卽古人垂左垂右之別。其形狀當卽古之髦也。孔鮒小爾疋。亦以弁髦爲太古之冠。杜預左傳注云。童子垂髦。按弁與髦雖二物。皆可以覆首。杜注似合爲一。亦非。髦知非盡真髮者。蓋一則曰飾。二則曰象。又曰用。則非天然所有可知。況髦而曰說。說又作稅。皆爲說除之義。與左傳襄公二十八年。稅服而入內宮。孟子不說冕而行一例。毛詩禮記正義又云。若父母有先死者。于死三日說之。服闋。又著之。是明其可說可著。非真髮明矣。然雖非真髮。古人亦必以髮爲之。說文。髻。髮至眉。从髟。我聲。引詩。髻彼兩髦。是也。蓋髦本作



髻。又作髻。義並同。釋文。髻。冒也。覆冒頭頸也。則翦髮。編髮。義並可通。詩之干旄。秦之有髻頭虎賁。漢之有髻令。皆注髻于首。又皆取覆冒之義。其形象蓋皆做髻爲之也。爾疋髻。選也。髻。俊也。皆因文生義。非髻字本訓。郭璞注。士中之俊。如毛中之髻。說亦可通。

後魏書音義敍

十三經皆有唐陸氏釋文、宋賈氏音辯、以迄歷朝所著音釋義訓、及古音古字補音補義等、無慮數十種、獨史則不然、惟史記有集解、正義、索隱三家、前漢書有十三家音義、三國志有裴松之補注、後漢書、續漢書、有劉昭、李賢等注、晉書有何超音義、此外若新唐書、董衝釋音、既不載所引書名、五代史、徐無黨注、又寥寥無幾、更非何超等可比矣、嘗以爲隋唐以來之史、得失參半、且卷帙浩繁、爲音義者、尙可緩、獨沈約宋書、魏收後魏書、成於一手、文旣奧衍、義例亦嚴、尤不可無音義、中歲以後、補三國東晉、疆域志等、竣、卽思爲之、顧服官於朝、凡三館纂述、皆預名其中、未暇及此也、旣又以罪戍邊垂、雖不久赦還、而精力漸短、不耐煩瑣、今春以事過宣城、值同年生凌君廷堪、以名儒教授此地、坐次出近所撰魏書音義四卷見示、余受而讀之、而以爲實獲我心也、顧此書音義、亦有數難、一則代北複姓及命名等類字、或半出六書、一則地形志、眞君以後所改、西北諸郡縣名、義例亦難槩悉、一則釋老等志、俗字極多、又多引浮屠氏等書、非精通彼教者、不足紬繹其義、君則經史之外、於道釋二藏、本所素諳、凡諸訓義、證以中經、參之內典、又

自方言、說文、釋名、廣雅以降、凡訓詁之在唐以前者、無不旁掇畢采、徧旁字畫之正俗、亦一一抉摘其原、蓋數閱寒暑乃成、且能以其暇爲伯起辨評、洵屬史家所不可少之書矣。夫唐沙門元應等注一切經音義、既半引儒家、而君注此書、又旁資二氏、又可謂不拘一法、及無礙著書之例者也。余雖衰陋、然宋書音義、亦粗有類例、他日當付兒子飴孫足成之、或可附君此書以傳耳。

### 西圃記

西圃者、余所居西偏隙地、歲戊午、自京師乞假歸、以廳事隘、因卽其地構屋三椽、隨牖之南北而六之、前疏爲小池、環以峭石、牖之北、則列竹焉。今澹香斜月西堂是也。未落成、卽入都、又遠戍絕域、往反者二年、既歸、杜門省愆、不更遠出、鄰有廢圃、友人復爲購得之、距堂北僅數武、遂築樓三楹、樓之後架平臺、以眺東北隅巽宮樓、玉梅橋、及楊園陸園諸勝、名臺曰曙華、名樓曰卷施閣、名樓以下曰紅豆山房、樓前皆疊石爲小山、石徑曲折、蒔古梅及紅豆金粟青桐紫微共十數株、春秋二時、可慰岑寂、左有廊、通西堂、發曙卽乾鵲噪其上、遂名乾鵲廊、迤西南得平屋二層、因其舊而新之、名其北曰更生齋、齋有後楹、列架藏所著地理書、木刻于內、名曰墨雲軒、墨雲軒之右、複道以通于南、亦二楹、名收帆港、蓋于驚濤駭浪中得歸藏息于此、是以名也。嗟乎、人生不過更蜡臘數十、此數十蜡臘中所居、又已三徙、卽云定居此矣、而衣食奔走、去十之五、仕宦又去其二、戍所往來去其一、則得居此者亦暫耳、然惟其暫、益不可不記、況屋無定

主。吾子孫不能有。則他人居之。他人居之。亦不可不知本末。爰書以揭于壁。俾後之居此者。得以覽焉。敕封承德郎翰林院待詔加三級徐君妻吳安人墓志銘

余以壬戌十二月道出黎里。始識翰林院待詔徐君達源。并聞其哲配吳安人之賢。復素嗜吟詠。所著有寫韻樓詩若干卷。恩猝別去。未暇授讀也。今年三月。余授徒徽寧兩府界之箬嶺。地居萬山中。忽見有冒雨至者。則徐君僕也。發君書。始知吳安人已于又二月二十三日謝世。瀕危。屬徐君轉乞余志墓之文。徐君諾之。乃瞑。嗚乎。余與徐君交僅半年。何兩人者。前後悼亡。若出一轍耶。按狀。安人姓吳氏。名瓊仙。字子佩。一字珊瑚。吳江平望鎮人也。年二十。始歸徐君。性婉淑。能得翁姑歡。翁卒。哭泣盡禮。所以事兩姑者益謹。徐君耽讀書。不甚問家人生產。凡會計出納。皆安人主之。規畫井井。暇輒助徐君校書。或分韻。至漏三下。乃息。顧體弱善病。又疊遭父母憂。益衰毀骨立。今年春。忽患痢不止。竟以是疾卒。年甫三十六。病方劇。適余與徐君書。并所贈詩。安人尙令兩婢扶起。讀竟乃臥。其性嗜翰墨。如此。余嘗謂女子不可有才。才過人。則不寡必夭折。否則或遭危險。困阨有非可以常理論者。漢徐淑。晉謝道韞。唐封絢等十數人。特其較著者耳。余並世所見。亦已五六人。今安人得歸徐君。相莊者幾二十年。徐君負時名。膺清秩。中間惟官京師半年。與安人別耳。餘則皆彈琴賦詩。焚香讀畫之日也。卽此半年中。從郵筒寄安人詩。前後至二十餘首。伉儷可云篤矣。安人年縱未四十。然子若女已林立。蘭茁桂挺。其長者讀書已有聲。則安人不可謂夭。

居江南浙江之間。東鶯脰。西虎阜。山水清絕。時奉太夫人出遊。則境不可爲困。徐君家有桑三百株。粟田五六頃。安人經理之。歲入常有餘。則家不可謂貧。倡隨得徐君。不可謂非嘉耦。性又聰穎。詩文外繪事無不工。暇卽發揮煙雲。摩寫花鳥。十餘年中。得寫韻樓詩至數百首。不可謂非奇福。然則安人雖未永年。亦可以自慰于地下矣。若徐君。則又何悲焉。余妻蔣宜人。亦以客冬謝世。雖齒長于安人二十年。然早困米鹽中。更憂患。未又苦疾病。處境無安人之逸也。安人子三。長晉錮。年十二。次晉錮。年七歲。次晉銘。年三歲。女三人。徐君將以此年四月十六日。厝安人于南冑阡。其走千里乞銘于余者。安人之志也。銘曰。

恆娥抱魄。天姬織絲。女子有才。非云福之。楚蒙悼亡。茱苒傷病。女子有才。兼妨乎命。禽魚花鳥。畫奪化工。煙雲月露。思與天通。三絕是嬪。百憂亦攻。蘭芳而鉏。苗秀而握。凡似此者。均不白髮。斷炊寒食。云以寄哀。續命上已。魂兮倘來。三層之臺。百尺之榭。定有吟聲。出乎良夜。

崔上舍金南覆車懸鑑引

天地之氣薄。而後有豆疹。蓋自唐末後五代始。唐以前。無有犯豆疹而麻者。名醫著書。亦未有詳及豆疹者。蓋天地之氣薄。而人之嗜欲益煩。五齊六和。皆醞釀。雨露日月之精華。以成。氣薄者不能勝也。于是。一人之身。先天後天。皆預儲其病。以待時而後發。有不發者。特千中之一。百中之一耳。近世又有種豆之法。皆病未萌。而先以藥劫之。往往至于破敗決裂。余嘗譬之。其病自至而死者。令終者也。其病未至。而矯揉。

造作以猝至于死者。無異于兵殺者也。然則爲父者卽愛其子。爲祖者卽愛其孫。不妨時其飲食寒暖。以待其氣機之自發。何必矯揉造作。使可以死。可以不死者之必至于死。且必至于速死乎。太平崔君金南。患其里俗信種豆之說。罹其害者不一。爰爲覆車懸鑑一書。條列其利害于前。洵可云救時之苦心。保赤之要術矣。以其立論多有與余合者。爰爲之弁其首云。

跋新修廬州府志後一寄張太守祥雲

一方之志沿革最要。漢廬江郡無江以南地。其證有五。漢書地理志。廬江郡故淮南。明建郡在淮以南。非江以南一也。廬江郡所統之縣至十二。無一在江以南者。人或以尋陽縣爲疑。不知尋陽舊縣本在江北。晉南渡後。溫嶠始移至江以南。是以地理志尋陽縣下原注云。禹貢九江在南二也。試以沿江州縣計之。今自池州府東流縣以上。爲漢豫章郡彭澤縣地。又上爲漢柴桑縣地。東流以下。今貴池銅陵諸縣。爲漢丹楊郡石城陵陽二縣地。又下爲蕪湖縣地。并無隙壤可以建置廬江郡三也。新志所依據以爲廬江郡在江南者。僅因漢書淮南衡山濟北王傳。廬江王以邊越數使使相交。徙爲衡山王。江北以爲徙。王江北則郡必舊在江南。故依此立說。除此則別無明證也。不知廬江九江之地。秦漢以來。皆稱爲江西。蓋大江自今安慶府以下。勢皆斜北而東。故江至此。又有東西之名。史記項羽本紀。江西皆反。揚子法言亦云。楚分江西爲三國。三國志魏武帝紀。進軍屯江西郝溪。吳主傳。民轉相驚。自廬江。九江。蘄春。廣陵。戶十餘

萬皆東渡江。江西遂虛。孫瑜傳。賓客諸將多江西人。晉書武帝紀。安東將軍王渾出江西。元帝紀。時戴淵在江西。時淵以司州刺史鎮合肥。晉書地理志以廬江、九江自合肥以北至壽春。皆謂之江西。郗鑒傳。拜安東將軍。兖州刺史。都督揚州。江西諸軍事。鎮合肥。是古無以廬江諸郡爲江北者。廬江王徙王衡山。正自江西而徙江北。蓋衡山王舊都。見史記項羽本紀。郗卽今湖北黃州府黃岡縣。漢故城卽在縣城西。北一百二十里。正在大江以北。四也。晉書陶侃傳。侃在武昌。議者以江北有郗城。卽其證。若漢書地理志言廬江出陵陽縣東南。北入江。卽山海經內東經。廬江出三天子都。入江。郭璞注。彭澤西水經。廬江水出三天子都。北過彭澤。西北入于江。此彭澤卽地理志宛陵縣下之彭澤聚。非豫章郡之彭澤縣也。水經注轉寫衍一縣字耳。何以見之。彭澤縣在漢陵陽縣西南幾四百里。如果至彭澤縣入江。則當云西南斷不可言西北。言西北者。水本從蕪湖界入江。于陵陽正西北也。三天子都在陵陽東南。或言陵陽。或言三天子都。其實則一。廬江郡本兼山水以名。廬山旣界江之中。廬水又自南而北。正當廬江郡東境。爰取以名郡。五也。今新志于首篇沿革下。言漢初爲淮南國。統四郡。兼有江南。又云。漢時廬江郡。江南之地。不知于何時割去。數語似未審諦。爰書此以質之。

跋新修廬州府志後二

又閱新志山川下云。廬江有冶父山。云卽左傳桓公十三年。楚羣師所囚之地。巢縣東三十里有梅山。云

卽左傳襄公十八年右回梅山所在。又古蹟下府城同食館。云卽左傳文公十六年自廬以往振廩同食之處。以迄無爲州之有漢陰陵故城。廬江縣之有何晏等墓。此皆誤自昔人者也。漢書地理志。汝南郡有慎縣。故城在今潁州潁上縣西北。至合肥之有慎。係東晉僑立。今以爲東晉分遂適縣置。又慎縣。宋紹興三十二年。避諱改爲梁。是宋之梁卽晉之慎。今列作二處。是又今日之未及訂正者也。其尙有漏略者。如巢縣西北有橐臬故城。又有僑斬縣故城之類是矣。又有古今方名可以類推者。漢縣類皆以山水得名。今無爲州北境有襄河。與全椒縣界。則漢襄安之名。蓋取襄水安流之義可知。地理志。廬江出陵陽東南。北入江。而丹陽郡下又引桑欽言。淮水出陵陽東南。北入大江。所出同。所入同。是淮水卽廬江水。又淮水下流名魯港。又名魯明江。至繁昌縣境入江。廬魯音同。魯港當卽廬江音之轉。是千餘年來地理家所不能悉者。今以源流道里驗之。歷歷不爽。旣足破昔人之疑。又可以補今志之缺。想足下亦必助我稱快也。再攷新唐書及十國春秋。唐文德元年。楊行密遣廬州將孫瑞。攻趙錕于宣州。錕將屯褐山。斷行密糧道。瑞因築五堰于魯港。塞通江之水。又可知淮水出江卽抵廬江郡境。道本徑便。故漢初取此水以名郡耳。

明周恭節公文集序

文章之傳。以其工也。乃有無意求工。亦不必求工。而其傳卽極天下之工者。亦遠不若焉。則豈非文章之外。又別有維繫于人在乎。有明嘉靖中。以文章名者。王元美。李于鱗。歸震川。唐應德等。不下十數人。可

云刻意求工矣。然而八編四部、以及震川類稿、白雪樓集等、人或閱而置之。其愛憎、又或隨風氣轉移焉。獨至楊兵部椒山集、沈錦衣青霞集、雖寥寥一編、而人之尸祝之、俎豆之者、無知愚賢不肖之異也。則其故又何哉。太平周恭節公之集、亦猶是而已矣。公得罪與楊沈二公同。在請室歷五年、所稍幸者、僅僅不死耳。然當其伸紙握管、叩心泣血、又豈有死不死在其胸中耶。又豈知死之在他人、而不死者、或在一己耶。蓋其激發于忠義者、非一朝一夕之故、而其洞燭于古今成敗興衰、利害得失者、亦豈小儒淺學之所能讀公之文、亦可以得其槩矣。余嘗數至太平、訪黃山三十六峯、卽山海經水經所云三天子都也。又嘗尋陵陽江之源、卽桑欽所云淮水、班固所云清水、其下流卽李吉甫等所云青弋江也。山水之奇如此、意其鍾靈毓秀、必有大異于他處者。顧太平自唐天寶四載分縣以後、其能挺名臣之節、著循吏之聲者、實惟公一人。與天都青弋競勝焉。則魁士畸人之在世、又豈易覯乎。公裔孫先登、從余遊、曾導謁公遺祠。祠正在山水間、松栢林立、百載後尙有生氣、偉矣哉。洵足與天都青弋共著不朽矣。余昔在京師、暨過保定、亦曾謁楊沈二公祠、其傾慕禮謁、與拜公祠無異也。旣退而讀公之集、有不能已于言者。爰書之以爲序。

誥授朝議大夫山東濟南府知府改補京員徐君家傳

君諱大榕、字向之、一字惕菴、先世由江陰馬鎮遷武進、呂市橋、遂世爲武進人。五世祖夔、州府通判、東旭。以次子元珙貴、贈都察院左副都御史、高祖龍、游縣知縣、元璞、曾祖縣學生、允容、祖國子生材、父瓚、乾隆



癸酉舉人。四川新繁縣知縣。乾隆三十八年。大兵勦金川。曾將軍溫福于木果木營失事。攢拒賊不屈死。贈兵備道。兩世皆贈如其官。君。兵備君長子也。性開敏。自幼時讀書。卽曉大義。受業同里檢討李君英之門。盡傳其學。稍長。補博士弟子。兩應省試。不售。遂入都。以辛卯舉順天鄉試。壬辰。成進士。分部以主事用。尋補戶部浙江司主事。明年。以父難奔喪歸。服闋。擢本部員外。尋轉郎中。其間隨原任大學士三品銜李公侍堯。至湖北審辦事件。君條分縷晰。務得實情。以是知名。京察一等。選授山東萊州府知府。萊州邊海。俗刁悍難理。及君蒞任。民情翕然。未幾。以州民張子布事。落職繫獄。子布性闕。娶羅女爲婦。子布外出。婦弟有良。將姊轉鬻他所。子布歸。詢婦所在。有良無以對。遂相與毆詈。有良強毆子布斃。時有良母在側。有良恐母漏其事。因并毆斃母。有頃。子布復蘇。有良遂以母死誣子布。知州事郭某。卽據原報申轉。君廉知情實。駁令改正。郭某堅執不從。一方大吏爲郭所蔽。反以失出罪君。立奏削君職。繫濟南府獄。事且不測。君割案牘尾作訴狀。令所親赴刑部控告。有旨令尙書胡公季堂。侍郎吉慶公赴平度讞其獄。讞日。忽非時雷電大震。一府官吏失色。有良不待刑詢。卽將弑母狀盡情供吐。事乃大白。卽日復原官。旋調泰安府知府。尋又有泰安縣民張承宣夫婦一案。承宣爲張培嗣子。素不爲父母所喜。培與妻朱氏及張成文等共商。將承宣夫婦勒死。移屍一里外桑園內。以自縊報縣。又誣縣學生薛枝與承宣婦姦。爲培夫婦猝遇。遂羞愧自盡。君細核情節。不符。移獄府中親讞之。逾月。始得其實。縣亦堅執原讞不從。別請委官檢驗。

迨發棺日。傷痕與君所指。一一不爽。乃抵張培等罪。君在山左。屢平大獄。益有聲。遂調濟南。凡諸府有疑案。必委君覆訊。無不得其情而止。君見地明決。又善揣度情理。遇疑難事。他人血膚不能決者。其真僞曲折。君輒以談笑誘勸得之。平反凡數十起。傳者以爲神明。同官屬吏亦自以爲遠不及也。任首府。遇事無所讓。又素戇直。屢以事與大府爭執。大府雖以計典薦君。心勿善也。及君入覲。純皇帝尙憶君平度州事。卽命記名。遷有日矣。大府忽撫君他事。鐫君數級。迨事白。得開復。君遂以母老呈請改京職。得旨以部員補用。尋卽乞假歸養。逾年。母楊太恭人始卒。君居喪盡禮。服闋未及赴補。今歲春夏。忽患瘡疾。至冬。病益劇。遂以十一月十九日。卒于里第。年五十有七。君居家孝友。坦懷無城府。與人交。不擇流品。人皆樂其平易。然素持繩檢者。亦以是少君。尤工書。生平作詩至數千首。類皆直寫胸臆。不拘拘古人格律。至其歷落可喜處。一如君之爲人。今所存百二十硯齋集是也。平時遠觀過人。里居日常賃地一廛。卽料量竹石。位置亭館。然賃券實不過二十年。人或泥君。君笑曰。吾以寄興耳。二十年後。豈復有所謂徐大榕哉。余嘗舉以告人曰。若徐君此言。則士大夫之求田問舍。規規爲身後計者。可不必矣。君娶于姜。封恭人。子三。維馨。國子生。早卒。維賢。世襲雲騎尉。仍準生員應試。維翰。年甫二歲。女二。長適陸某。次字歛。縣程氏。尙幼。余與君同歲。甫出塾。卽訂交。自居里中。及京邸。君處事或失當。未嘗不規君。君不以爲忤也。今其遺孤以家傳爲請。爰不辭而爲條係如左。烏乎。余自成童日。里中之友。與余同歲者。至十數人。十年來。相繼殞謝。惟余

與君在耳。今君又卒。而余復悼亡日近。濡筆述君。不自知其涕之何從也。

禮社薛氏宗譜序

黃帝二十五子。一任姓。其先奚仲。居薛。爲夏車正。禹就其地封之。于漢爲魯國薛縣。今爲山東兗州府滕縣地。縣東南六十里。尙有奚仲山。李吉甫云。奚仲造車于此。是以名也。薛之先最顯者。于商爲仲虺祖。已于周爲文王外家。武王克商。復封于薛。春秋時薛伯是矣。于漢爲御史大夫廣德。于魏爲鎮東將軍安都。于唐則曰訥。曰稷。曰超。皆爲宰相。曰仁貴。曰嵩。曰平。或爲大總管。或爲節度使。並見新唐書世系表。而其支分派別者。則又有南祖北祖西祖分地徙居者。則又有河東新蔡。沛國高平。此薛氏唐以前之大略也。然以余攷之。周秦以來。以薛爲氏者。亦不盡皆任姓之裔。戰國時齊田氏封于薛。再傳爲孟嘗君。後子孫亦以薛爲姓。又字書無薩字。攷菩薩二字。皆以草受名。說文云。薛。艸也。唐釋元應一切經音義云。菩薩。本作扶薛。宋張有復古編又云。薛。別作薩。非是。今之以薩爲姓者。又本皆姓薛。或得姓于草。或得姓于二氏。取扶薛爲義。是又與任氏田氏之薛判而爲三矣。且卽以吾鄉論。有義興之薛。有江陰之薛。有無錫陽湖分界五牧之薛。姓雖同。而宗派別。亦不可強而同也。今禮社之薛。實由江陰而分。自宋以前。世次雖缺。略無攷。而元明以來。則條分縷晰。昭穆秩如。謂非名宗之多賢士大夫。而能若是乎。夫略其所疑。而詳其所信。作譜之法。與著史同。今之序薛氏之譜。不敢定其爲出于何姓。與析于何房。蓋其慎也。卽所以爲禮社

之辭傳信也。時嘉慶八年、歲在癸亥秋孟。

此  
页  
空  
白

# 更生齋文甲集卷第四

## 書文成公阿桂遺事

文成公阿桂滿洲正白旗人。其勳簿官閥。生卒歲月。具載國史。茲特錄遺事數則。方公之爲定西將軍。勦金川。曾索諾木也。已百戰。抵其巢。索諾木震懼。業約別日盡室出降。其木城木柵。悉已毀撤。是日晚。參贊以下謁公曰。事機叵測。今日必生縛索諾木。致帳下方。可安枕。公不答。亦不待語。竟已入帳中臥。諸將弁待命。不敢退。而公已鼻聲如雷。徹帳外矣。諸人者。旁皇達旦。甫日出。索諾木已自縛。率諸酋。跪帳外。公次第以屬吏。因進參贊以下告曰。諸君昨日之語。蓋懼索諾木他竄。或畏罪先死耳。我已據阨要。竄將何之。渠若能死。又豈待今日哉。吾故以爲不若高臥待旦。日當自來也。諸將弁諾諾。皆曰。非某等所及。又木果木失事後。公代統大軍。一日。日欲暎。公忽率十數騎。升高阜。覘賊屯扎處。不知阜數折。已逼賊砦。賊望見。卽率獷騎數百。環西南阜。馳上。公顧從騎曰。下馬。復曰。解衣。衣不足。復曰。解裏衣。解畢曰。衣悉寸寸裂。急分走高阜。雜挂林木上。挂畢曰。無衣者。悉束帶。曰。上馬。曰。向阜南。緩轡下。適賊騎已馳至。距向所立阜。僅二十步。時暝色已上。忽見岡缺處。旗幟飄忽。絡繹不絕。疑援騎從山後至。勒馬不遽進。方遣騎四出覘伺。而公已率從騎回大營矣。公曰。此兵機也。不爾。則賊馬十倍于我。寧得脫耶。前一事。余值內廷日。成親王

爲言之後一事。在文淵閣石經館。公自言之。純皇帝末年。和珅橫甚。公業知不能制。凡朝夕同入直。必離立十數步外。和珅知公意。故就公語。公亦泛答之。然卒未嘗移立一步。公嘗病臥直廬。吾友軍機章京管君世銘入省之。公素所厚也。忽呼語曰。我年八十。可死。位將相。恩遇無比。可死。子若孫皆已佐部務。無所不足。可死。忍死以待者。實欲俟皇上親政。犬馬之意。得一上達。如是死乃不恨。然竟不果。余登第日。公爲讀卷官。擬第一進呈。余素不習書。公獨賞之。嘗謂吾友刑部郎孫君星衍曰。人皆以洪編修試策該博。不知字亦過人。余首拔之者。取其無一毫館閣體耳。

書劉文正遺事

劉文正公。名統勳。山東諸城人。其行事在國史。生卒年月在家乘。不更述。述其遺事數則。信而有徵者。乾隆二十六年。河決開封楊橋。公以太學士奉命臨視決口。久不得塞。一日。日昃。公張秋氈笠。御大繭袍。微行出公廡。至決河口。見數十步外。稽料山積。牛馬雜遝。繫車轆下。人則或立或坐。或臥復起。皆戚戚聚語。甚有泣者。公訝之。招老成者問故。則並云。來已數日。遠或四五百里。二三百里不等。一車或四牛。或三兩牛。或雜羸馬。一日口食。及牛馬麩草。至減得銀兩許。日久費無所出。復不知何日得返。是以懼且泣耳。曰。何不交官。則雜曰。此岸稽料。某縣丞主之。每車索使費賒。衆無以應故也。公怒甚。回廡。卽諭傳巡撫。恭請王命。并縛某縣丞。限時刻至決口。諭一出。河堤使者亦失色。夜將半。巡撫倉皇縛某縣丞來。踞轆外。公怒

甚。出坐堂皇。受巡撫禮謁。因大聲曰。口一日不塞。則聖心一日不安。河南北萬姓亦一日不寧。塞口所恃者。稽料。今稽料山積。某縣丞以勒索不遂。稽留要工。罪死不赦。今先斬若。徐專摺參撫司道耳。巡撫股栗。叩首堂皇下不止。天且曙。不解。伺公出。使滿尙書某起爲緩頰。久乃釋。卽命褫縣丞職。枷示決口。甫半日。南北岸稽料車無一在者。又二日。而決口塞。公臨事剛斷不假借。若此。猶憶乾隆四十二年。睢州河亦決。時余客河南。以事數至河上。見老柳下一蒼白叟。歎咤不止。旁繫兩牛一車。叟滎澤人。距決口三百里外。問其故。曰。十日前以兩牛一車駝稽料抵工所。某主簿監收。索重費不得。遂痛抑稽料斤兩。云止九十七斤。余不敢爭也。叟故談諧。因指二牛曰。象養若數年。日食料數升。稽數束。不意恇弱至此。駝不及百斤也。蓋河員之肆橫藐法至此。而重臣視河。及河隄使者。又類皆養威重。不輕出一任。其慘肆荼毒。及糜費國帑。以爲固然。甚或借以漁利。老人年七八十者。述文正視河時事。爲余泣也。公屢奉使遠出。所挈祇二奴。用驛馬不過六七匹。抵行館。卽使二奴居後廨。公處其前。臥亦如之。公食畢。呼二奴食。奴退。徹者乃入。不使見一人。有所需。則州縣之承應者傳以出入焉。乾隆中葉後。親信重臣出使。無有逾公者。然究未嘗于令甲外有所加也。厥後奉使者不然。空驛馬不足給之。遂有役民羸民馬者矣。有數州縣津貼一縣者矣。有跣規有門包。有鈔牌過站禮。州縣官惴惴惕息。謹厚者。費以千計。稍厲威嚴。及侈輿馬廚傳者。以萬計。以數萬計矣。大率一方倉庫虧缺。多由驛站。驛站糜費。多由重臣出使。州縣官窘急無計。則大吏爲調劑。



法以救目前。于是調腹內州縣。叠處衝途。又告乏。則又調員。不十年。而州縣倉庫。無有不虧缺者矣。使皆如公。挈二奴。用馬六七。又事事不過令甲。則民生吏治。困壞豈至此哉。方金川之用兵。每召對。公屢主撤兵議。純皇帝領之。然不遽撤也。一日。純皇帝在熱河。公留京辦事。兼上書房總師傅。上行走。天暑甚。公適在三天中。檢視諸皇子日課。忽廷寄至。令公一日半馳詣熱河。公至澄懷園。索肩輿。即行。馳到。日已過午。即時召對。曰。昨軍報至。木果木債事。溫福已陣亡。朕煩懣。主意不定。用兵乎。撤兵乎。公即對曰。日前兵可撤。今則斷不可撤。復問曰。誰可任。公又對曰。臣料阿桂必能竣事。乞專任之。純皇帝良久曰。汝言是。朕意決矣。留京事重。汝即日回可也。蓋公晚年。純皇帝眷注益隆。信任益篤。事或有待公而決者。即此一事可見。公自奉極儉。所服朝珠。無值十金以上者。故綆斷即弃之。不更拾取。卒之日。肩輿已詣東華門。忽悶而仆。額駙福隆安以聞。純皇帝急臨視之。及門。聞已卒。哭而入。蓋始終倚畀之厚。朝臣無有過者。實公之蓋誠。有以致之也。公之前爲大學士者。高安文。端公朱軾。最著立朝大節。多人所不能及。以采聽未審。敢俟異日。次則協辦大學士興縣文定公孫嘉淦。大學士海寧文勤公陳世倌。文定公每事必廷諍。純皇帝輒曰。汝又以古大臣面目對君矣。文勤公每值民間水旱疾苦。必反覆具陳。或繼以泣。純皇帝輒霽顏聽之。必笑曰。汝又來爲百姓哭矣。亮吉敬釋二語。純皇帝禮貌大臣。及二公之忠。蓋抗直均有古君臣所不能及者。國家重熙累洽。億萬斯年。職是故耳。紀文正事。因并及之。文正前一事。河南人皆能言。後一事。亮吉

在上書房行走得之餘則同里貴西兵備道趙翼以中書值軍機最久以目所觀者爲亮吉言用敢錄人焉。

### 書裘文達遺事

裘文達公名曰修。江西新建人。余入詞館。距公卒已二十年。不及見也。然余所蒙識拔者。皆文達所識拔之人。時時告語曰。裘文達某事某事。云爾。公賜宅在內城石虎胡同。購一軒。名好春。退直所憩。賓客門下。士往來者。于闈人悉不關白。徑入此軒。若已退直。則公必坐軒左右。若待客矣。一日。值歲小除。諸人者咸詣軒。與公餞歲。忽司闈者至。公側耳語。公大笑曰。戶部堂官歲盡分飯食銀兩。亦不可告人耶。卽命挈一囊至。瀉出之。皆庫貯大定兩五十。公數坐中。客若干。令各懷其一。曰。諸君年事大窘。聊以分潤耳。數不足。復命入取之。徧給乃止。公食指旣廣。又賓客常滿坐。值窘乏。亦時時斷炊。一日過午。尙未具食。坐客有慍者。公規知之。卽出語曰。諸君他日皆飲天廚。頌克食之人。豈矜矜于裘某之一餐乎。且主人亦尙未食。不獨客也。客意乃解。純皇帝眷公。時得召見。公奏事畢。則必言各衙門人材。曰某人勤。某人幹事。某人擅文筆。是以公在部及掌院日。翰林諸曹司遷轉最速。由公推轂勤也。時公房師大學士蔣文恪公溥亦極愛士。肯爲寒素地。有揭薦牘來者。悉館門下。未嘗拒一人。其掌書記者。卽公所引入。一日。公入朝。遇文恪公。公曰。有一孝廉。在都候選。所學極優。師留之乎。文恪唯唯。公知文恪性闊達。賓客多寡。皆不甚措意。明日。

遣一僕徑送孝廉入文恪邸第。屬僕曰：第送詣某書記廳。云：昨已面語相公。相公屬留客耳。僕致公命出。書記某卽挈孝廉巡歷聽事側兩廊。見屋比櫺。悉客館內一室。門獨啓。遂徑入。見榻上亦有臥具。遽命僕撤出。貯聽事中。語孝廉曰：君行李至。卽安置此。但出必須鍵戶。慎勿啓也。又一要語相屬。君雖館此。實無一事。不妨日出游衍。然必須飯畢始出。日兩飯。亦無邀客者。但聞長廊口有高喚者曰：飯具矣。卽速詣聽事食。遲則不及。孝廉遵其約。每日飯畢。卽鍵戶出遊。約計復當飯。則又歸。歲值五日。中秋日。及歲盡。前數日。卽有老僕從三四輩。挾巨囊至。徧入客館。見一臥榻。卽置朱提一封。標其函曰：歲脩。爲數五十。若旁有臥榻。則貯一小封。爲數四。以犒從者。孝廉居文恪邸二年。選湖北一縣令。始去。在邸日。未嘗爲一事。亦未嘗一面文恪。蓋疎節闊目如此。然無礙其爲太平宰相也。故因文達連類及之。自數公以後。風氣又變。非鑽營競進之士。及以賄交者。不開閣款客矣。前一事。袁布政鑒爲言之。後二事。皆畢宮保言之。宮保自言愛才已不及公十之一二。余識公子及孫。好春軒者。亦曾一詣焉。

書李恭勤遺事

李恭勤公。名世傑。貴州黔西人。自少以父官江北鹽場大使。遂入貲爲巡檢。由巡檢官至四川及江南江西總督。內擢兵部尙書。加太子太保。純皇帝屢欲以爲大學士。有尼之者。言公不由科目。例不可官內閣。乃中止。然治行實有絕出流輩者。以此欽純皇帝知人。余素不識公。歲戊申四月。在河南巡撫畢公沅幕。

府值畢公病亟。公適自江南總督調回四川。道出開封。素厚畢公。欲入省之。畢公知余與公次子爲同歲生也。屬余迓公入。坐牀側數語。畢公體甚。余遂延公入。就近聽事。將飯。公坐次。余頌公江南治績。公蹙額曰。子過矣。余爲江南總督。非所長。爲四川總督。庶可耳。請其故。則曰。兩江地大事劇。主持者非一人。三巡撫。一漕督。一河督。兩織造。一鹺使。巡漕權關復在外。動皆可具摺上達。以一人居十數大吏中。遷就不可。徑情直行。又不可。余故不能爲也。四川不然。舉十一府。九廳。九直隸州。與諸邊內外事。皆一人專之。事權不分。號令畫一。故可爲也。余又請其故。公曰。飯未至。姑爲子述一二事可乎。余唯唯。曰。四川自兩金川用兵以來。又承制府福康安後。徵調賦斂無藝。倉與庫皆若洗。譬若中落之家。非有一人率先蚤夜操作。減省衣食。哀聚絲粟。則元氣不復。余旣與司道以下設厲禁。凡府州縣無事不得入成都。卽以公事來者。不得過日限。不得畜音樂。侈讌會。不得飾輿馬衣服。朝珠之香楠犀碧。蟒服之刻絲顧繡者。皆有禁。余官總督數年。未嘗讌一客。成都將軍者。新蒞任。不爲置酒。則太愬。置則破例。乘其家口抵任日。饋一烝豚。一燒羊。使標下守備婉告曰。本欲屈入署。適聞眷屬至。謹以此佐家讌。屬吏自布政司以下。亦未始爲具一飯。惟屆歲除。則先飭子婦及婢媪。爲餽饌至十數斛。歲首五鼓。朝賀畢。布政司以下。皆集轅門。督撫制嚴重。屬吏至。恐不卽見。自正印以上。解左右。皆有官廳。余因遣巡捕官遞告曰。汝曹爲朝廷出力久。行且遷擢。今總督爲汝發兆也。遂令佐雜官坐州縣官廳。以次上。令府廳坐司道官廳。皆食以餽饌。余則出延司道。

至署共食。食畢出堂。皇先受司道謁賀。卽令府廳州縣等遞謁。司道府廳禮畢。告曰。元日俗例。上司同官。雖不接見。亦必肩輿到門。道有遠近。必日昃始歸。徒苦僣從。無益也。況若曹亦有父母妻子。歲首例得給假。諸君何不早歸。令若曹亦放假半日乎。皆應曰。諾。于是元日虛文往來俗例始革。迨調任江南日。倉庫缺額者。漸已填補。布政司王站住力亦居多焉。公尙欲語。而飯適至。遂飽餐去。後六年。余奉命視學貴州。嘗道黔西。公先以病告歸。足疾不得行。然入州境後。見書院學舍。義田義冢等。無不井井。李氏先隴封樹。亦倍修整。詢之。皆公歸里後。一一所繕造也。未抵城數步。公令兩僕扶掖。出迓于道左。余急下輿揖曰。何敢勞公。公笑曰。非迎學使。迎不徇情面之賢者耳。余遜謝別去。試竣。復過公。留話半日。時公相福康安由四川調督雲貴。將入境。語次。公頻蹙曰。聞近日辦督撫行館。竟有以顧繡貼地者。侈風一啓。他日伊于胡底耶。因歎息執手別。未幾。公亦謝世矣。書此以爲官大吏者勸。

書朱學士遺事

朱學士名筠。大興人。以乾隆辛卯視學安徽。延余及亡友黃君景仁襄校文役。先生學不名一家。尤喜以六經訓詁督課士子。余與黃君亦從受業焉。時先生請于朝。乞刊三字石經。并求校明永樂大典。由是特開四庫全書館。搜采遺佚。校正缺譌。凡宋元以來所亡之書。于永樂大典編韻中輯出者。亦不下數百種。實皆自先生發之也。先生以讀書必先識字。病士子不習音訓。購得汲古閣許氏說文初印本。延高郵

王孝廉念孫等校正刊行。孝廉爲戴吉士震高弟。精于小學者也。工竣。令各府士子入錢市之。先生性寬仁。不能御下。校官輩又借此抑勒。并于定直外需索。以是不無怨聲。然許氏之學。由此大行。先生去任後。二十年中。安徽八府有能通聲音訓詁。及講求經史實學者。類皆先生視學時所拔擢。夫學政之能舉其職者。不過三年以內。士子率教。及文風丕變而已。而先生之課士。其效乃見于十年二十年以後。若此。先生每試一府畢。必進多士教之。值發放日。辨色卽坐堂皇。日不足。或然巨燭畢事。蓋先生本口吃。諸生自一等至三等十名以上。加以歲科兩試新進者。不下數百人。必一一呼至案前。舉卷中得失利鈍。詳悉告語。又視其質之所近。復教以讀何經。習何義訓。其初坐堂皇也。轅門奏樂畢。重門洞開。學校各官。巡捕官。以及唱名抱案書吏。各色雜役。無不依次入。肅立左右。久之。倦。又久之。飢。遂稍稍散去。日昃後。惟學使及唱名者一人。諸生執卷以聽者三四人。餘則窺學使仁。且不較細故。去已無可蹤跡矣。一日。始過午。學使與諸生方講藝。忽有戴笠策杖據案旁。箕踞聽者。學使回顧愕眙曰。汝何人。何自至此。曰。余貿易者。過署外。值重門洞開。無一人。故聊入散步耳。語竟。復曳杖去。聞者無不傳以爲笑。課士日。亦必終日坐堂皇。令一童子饋食。食竟。童子卽飛步去。所與談者。惟監試校官耳。一日。語校官曰。昨作一詩。饒有古意。諸君幸正之。因頻呼童子。不應。笑曰。童僕不可恃如此。余獨不能入取之耶。其簡率皆此類。其降調入都也。亦爲門下士大興徐瀚所誤。瀚卽司刊說文者。蓄厚資。後以飲博蕩盡。先生仍錄入門下衣食之。卒不念前事。

云。

書畢宮保遺事

畢宮保名沅。鎮洋人。以湖廣總督辦理湖南紅苗。復接辦湖北教匪。往返籌餉。及銷核軍需各項。嘉慶二年六月。以勞卒于辰州軍營。有旨加太子太保。諭祭葬。其遺孤乞錢詹事大昕。王侍郎昶。立傳及墓道碑。本末悉具。今特錄遺事數則。得之翰林同官。及公所自言。與余所親見者。公生平之學。其得力處。在能事事讓人。然公遭際實亦半由此。乾隆庚辰。公會試。未揭曉前一日。公與同年諸君重光。童君鳳三。皆以中書值軍機。諸當西苑夜直。日未昃。諸忽語公曰。今夕須湘衡代直。公問故。則曰。余輩尙善書。倘獲雋。可望前列。須回寓偃息。并候榜發耳。湘衡書法中下。卽中式。詎有一甲望耶。湘衡者。公字也。語竟。二人者徑出不顧。公不得已。爲代直。日晡。忽陝甘總督黃廷桂奏摺發下。則言新疆屯田事宜。公無事。熟讀之。時新疆甫開。上方欲興屯田。及殿試。發策試新貢士。卽及之。公經學屯田二策。條對獨詳核。遂由擬進第四人。改第一。諸君次之。童君名第十一。蓋是年讀卷官秦尙書蕙田。奏殿試佳卷獨多。故進呈有十二本。非故事也。在翰林六載。以久次充補日講起居注官。值上耕籍田。講官惟籍田侍班與御座最近。先是勵編修守謙侍班日行立欹斜。特旨申飭。是日復應勵侍班。勵窘甚。知講官中惟公易制。先一夕走公寓曰。明日必須君代我。我業語君。卽歸閉戶臥。倘誤不任咎也。公亦不得已代之。翌日。上三推畢。回坐御幄中。諸大臣

依次出耕籍田。在上前者，僅講官四員耳。上忽語曰：布穀、戴勝，一耶二耶？公立班在前，卽出奏曰：布穀卽戴勝，上是之。因詢甲第，又知爲第一人。因諭曰：汝能詩乎？對曰：翰林職也。上喜，卽以戴勝降于桑命題。公頃刻成五言八韻詩呈進。上稱善，遂有意嚮用矣。及已官巡撫，復值上耕籍田，語諸大臣曰：朕于此曾拔擢一人，蓋指公也。公性寬平，官陝西久，諸細事或弛廢，適上命原任大學士李公侍堯，以三品銜署理陝甘總督，駐西安，久不去，意欲翻駁數案，及鈎考諸屬吏，公以李故相也，不敢與鈎禮。每日平明，卽撤儀從上謁，到皆在司道前。李知公之敬己也，厲威嚴不得發，留數日，意不懌，馳去。于是諸惕息者始安。嗣李以重罪逮入都，公送之獨遠，復執手流涕，乃別。李在刑部獄，語人曰：一路來，愛我者惟畢公耳。公之處同官友朋，類皆若此。然人不能學也。公愛士尤篤，聞有一藝長，必馳幣聘請，惟恐其不來。來則厚資給之，余與孫兵備星衍，留幕府最久，皆擢第後始散去。孫君見幕府事不如意者，喜慢罵人，一署中疾之若讐。嚴侍讀長明等，輒爲公揭逐之。末言，如有留孫某者，衆卽捲堂大散。公見之不悅，曰：我所延客，諸人能逐之耶？必不欲與共處，則亦有法。因別構一室處孫，館穀倍豐于前，諸人益不平，亦無如何也。公軍旅非所長，又易爲屬吏，欺蔽卒以是被累，身後田產資畜皆沒入官云。

### 書杭檢討遺事

杭檢討名世駿，錢唐人。少舉于鄉。乾隆元年，以鴻博科官翰林院檢討。先生性伉爽，能面責人過，同官皆



嚴憚之。乾隆中葉，上思得直言及通達治體者，特設陽城馬周科試翰林等官。先生預焉。日未中，已得數千言，語過戇直。未又言滿洲人官督撫者過多，觸純皇帝怒，抵其卷于地者再。已復取視之。時先生試畢，意得甚，方趨同官寓邸食，忽內傳片紙出，言罪且不測。同官恐，促先生急歸。先生笑曰：「卽罪當伏法，有都市在，必不污君一片地也。何恐？」尋得旨放歸。先生家故不豐，以授徒自給。主揚州安定書院者幾十年，以實學課士子，暇卽閉戶著書，不預外事。又疎懶甚，或頻月不衣冠，性顧嗜錢，每館俸所入，必選官板之大者，以索貫之。積牀下，或至尺許。其么麼破碎及私鑄者，方以市物，兩手非墨污，卽銅綠盈寸。然先生雖最有錢癖，嘗見一商人獲罪，齏使非先生莫能解。夜半走先生所乞救，并置重金案上。先生擲出之，不顧。最不喜讀邸報，里居二十年，同歲生或積官至大學士，尙書總督，先生不知也。歲戊子，劉文定綸適服闋，特旨以吏部尙書協辦大學士內召，過揚州，訪先生。先生見其冠服，詫曰：「汝今何官？」曰：「不敢欺，參預閣務者已數年矣。」先生諱之曰：「汝吳下少年耳，亦入閣辦事耶？」闕堂笑，乃別。余年未二十，省從叔邗溝，始識先生。先生見所擬樂府及古賦，奇賞之，留語數日。曰：「汝後必入翰林，不可不知掌故。」因日舉翰林故事十數則告之。及余入翰林，而先生所言規制已大半不可行，蓋不及三十年，風氣之變如此。先生一歲必兩歸錢唐，歸後無事，或攜錢數百，與里中少年博。左近望僂橋下，時吾鄉錢文敏維城視學浙中，詞館後進也。一日盛暑，張蓋往訪先生，頭踏過橋下。文敏已從輿中望見先生，短葛衣，持蕉扇，與諸少年博。正酣，文敏卽

出輿揖曰。前輩在此乎。時先生以扇自障。業知不可揜。卽回面語曰。汝已見我耶。文敏曰。正詣宅謁前輩耳。曰。吾屋舍甚隘。不足容從者。文敏固欲前。先生固却之。始尋道反。文敏去。諸少年共博者。始從橋下出。驚問曰。汝何人。學使見敬若此。曰。此我衙門中後輩耳。遂不告姓名去。書至此。客適有過訪者。見而笑曰。不修邊幅。與博徒戲。若此尙足記耶。余曰。誠如若言。然以視士大夫罷閑後。日飭章服。出入官廡。干預公事。並修飾輿馬僕從者。以檢討視之。不尙勝耶。客尋思久之。曰。是當記。是當記。

### 書提督花連布遺事

提督花連布。滿洲鑲白旗人。以世職歷官貴州南籠鎮總兵。余視學此方。始識之。公性質直。與人交。有肝膽。自言少時讀書。曾習論語左傳。襲職後。乃輟讀。學政例歲試武生童。必移文所轄總督。乞派副將以下一員。監視騎射。蓋立法之始。恐文臣不諳弓馬。故余試南籠。所派適公。標下參將。余核定制。正坐演武廳。而參將及提調之知府左右坐。公聞不悅。日晚。會讌公所。尙慍見于色。余笑曰。非妄自尊大。實向例若此耳。況公不讀左氏乎。王人敍諸侯之上。語未竟。公意頓釋。後兩人者。意氣合。遂約爲兄弟。時從弟顯吉留太守署中。一日見公。以公之官稱之。公不悅。曰。吾與若兄交。汝何外我耶。因拉入署中。令妻子出見。歲時饋問。若骨肉焉。歲乙卯。公當入覲。半道。適銅仁紅苗殺官吏反。貝子福康安以總督進勦。檄留公隨營。素稔公勇。令結一營。當大營前禦賊。悉以勦事委公。大營日宴會。或雜以歌舞。公則晝夜巡徼。飢不及食。倦

不及寢。苗匪又獸駭豕突。或一日數至。公竭力堵禦。賊已退。乃敢告貝子。如此百晝夜。須髮畢白。余時報滿。將入都。以書別公。復書曰。事勢至此。與君永訣矣。他日史館中爲余作佳傳可也。時公已擢提督。加太子太保。後半歲。公禦賊山梁上。轉戰益奮。中巨礮一。鳥鎗三。旋墮入深澗中。詬罵不絕口。賊欲鉤出之。乃自力轉入巖石下。折頸乃死。事定。諸將弁百計出其屍。則顛骨皆寸寸折。兼失一臂。特旨賜祭葬。并建碑墓上。余時正派撰進擬文字。碑文卽余所擬進也。公死事曲折。亦彙括爲敘入云。

又書三友人遺事

汪中、江都人。少孤貧。事母極孝。家無書。因日往書肆中繙閱。卽十得六七。補博士弟子後。肄業安定書院。每一山長至。輒挾經史疑難數事請質。或不能對。卽大笑出。沈編修志祖、蔣編修士銓皆爲所窘。沈君本年老。後數日卽卒。人遂以爲中致之。共目之曰。狂生狂生。中議論故抑揚。以聳衆聽。時僑居揚州。程吏部晉芳、興化任禮部大椿、顧明經九苞皆以讀書該博有盛名。中彙中語曰。揚州一府通者三人。不通者三人。通者高郵王念孫、寶應劉台拱。與中是也。不通者卽指吏部等。適有薦紳里居者。因盛服訪中。兼乞鍼砭。中大言曰。汝不在不通之列。其人喜過望。中徐曰。汝再讀三十年書。可以望不通矣。中談諧皆此類也。然不沒人之實。有一文一詩之善者。亦贊不容口。余弱冠後始識中。中頗以有用之學相勗。余始愧勵讀書。今之有一知半解。未始非中所激成也。歲甲午。余館揚州樞署。以貧故兼肄業書院中。一日薄晚。偕中

至院門外。各跨一石狻猊。談徐東海所著讀禮通考得失。忽見一商人三品章服者。肩輿訪山長。甫下輿。適院中一肄業生趨出。足恭揖商人曰。昨日前日。並曾至府中叩謁安否。知之乎。商人甚傲。微頷之。不答也。中憤極。從石狻猊下。潛往拍商人項。商人大驚。回顧中大聲曰。汝識我乎。商人逡巡曰。不識。曰。識向之趨揖者乎。商人曰。亦不識也。卽告之曰。我爲汪先生。趨揖者爲某先生。汝後識之乎。曰。識之矣。中曰。汝識之。卽速去。毋溷吾事。商人大驚。然度不能奈何。喪氣以去。及余登第一月。中致書曰。足下與量殊。淵如。皆吾弟也。而前後登第。名次悉同。老兄不出。豈欲虛左以相待耶。量殊者。江侍御德量。淵如者。孫兵備星衍。皆中所素厚。中三十後不事科舉。以選拔貢生終。中爲文及詩。格度皆謹飭過甚。余怪問之。中曰。一世皆欲殺中。倘筆墨更不謹。則墮諸人術內矣。其譎又如此。

武億。偃師人。生而長九尺。要腹偉甚。善讀書。成進士後。常居京邸。假朱學士筠。程編修晉芳兩家書讀。幾徧。與人無款曲。嘗欲學不動心法。因時詣菜市口觀決囚。冬月大決。亦必早詣焉。觀者數百人。亦有蹙額隕涕者。億獨色不變。翁學士方綱。與億有淵源。億顧不喜之。殿試日。對策保和殿。日晡。學士派收卷。亦至殿中。語億曰。汝爲我小門生。汝知之乎。億忽怒。抵几起曰。此豈認老師太老師處乎。欲拳毆之。監試諸大臣呵禁。乃止。官博山縣知縣。民愛之。若父兄。嘗以公事至濟南謁大府。大府無心詰之曰。聞君兄弟行居。二億疑以稗官中事相誣也。拂衣起曰。知縣已無兄。欲徑出。大府婉謝失言。乃止。其罷官也。大府亦知其

枉欲爲入鍰捐復。億不願也。博山民固留居縣中。亦不願。然實貧不能歸。因歷走諸鄉郡縣。修方志。授學。徒以卒。卒之三月。余自伊犁蒙恩赦還。道出偃師。見西郭外武氏先隴。有新土阜。心固疑之。入縣問。則億果先卒。昨見者卽其新壠也。億及汪明經事。吾友孫君星衍爲作傳。已詳列之。茲特記傳所無者。

汪蒼霖。錢唐人。少卽走京師。以國子生客寧郡王邸數十年。工詩及書。王甚重之。晚始得官。爲江南句容縣縣丞。歲乙未。縣中大旱。赤地數百里。縣民無食者。研石屑及糜土以食。名石屑曰觀音粉。後又掘蘆根。食適大府勘災入境。蒼霖裹數物示大府。大府怒。命跪行轅外。一日。晚復召入。斥曰。汝何官。狂惑若此。蒼霖伏曰。卑吏誠狂惑。然實不敢隨諸貪黠者病民。欲于中流中作一砥柱耳。大府笑曰。汝誠砥柱。但砥柱太短也。叱出之。又嘗奉檄運米賑淮安水災。終日立泥淖中。分撥已盡。賦災民謠三章。乃反。爲丞。氣必凌出。令上蒼霖年故長。遇本縣令及他令。率以弟呼之。不拘俗格也。賑災銀有餘。令私分餉之。大怒。欲舉實令恐。并入己者。捐置公所備添賑。以勞調江寧縣丞。丞廨在雨花臺側。余以事至江寧。必過訪之。值蒼霖據案決事。必命僕先引入內署。決事畢始入。曰。吾不敢以友故妨民事也。性佞佛。余故斥毀之以博笑。蒼霖必歷述因果。及毀佛者所得惡報。以相懾。余亂以他語。乃止。嘗以公事赴吳門。回舟與汪明經中同載。二人者性並傲。且其始皆歛產也。泛論世次。忽謂中曰。余長君兩世。中曰。君誤矣。余實君曾大父行也。蒼霖恚甚。欲縛中擲揚子江。以救獲免。後余官京師。聞蒼霖攝本縣事數年。甚有聲。時兒子飴孫歸試。因札

之得報書極言爲令之難。與雪冤獄數事。未幾聞蒼霖死矣。以不得大府歡。歷四考究不得遷。跋簡州知州毛大瀛所致書及紀事詩後。

此手書一紀事詩二。毛君守簡州城時所寄也。君名大瀛。寶山縣諸生。善屬文及詩。試輒不利。五十外以薦舉得官。教匪起湖北。蹂躪陝西河南四川諸處。大府奏君隨營。以功擢知縣。尋又擢簡州知州。土賊復起。君城守踰時。援不至。城陷。罵賊不屈死。距發書時僅五月耳。君爲幕府牋奏最工業。此者二十年。其在山東巡撫國泰幕幾十年。國泰者君在京邸時素識。約爲兄弟者也。出官山東。卽挾之以行。國性暴戾。妻子僕隸。皆若不可一日共居。獨重君。始終無纖毫芥蒂。君質直。嘗面數其過。國受之不校也。國盛怒時。或至撲妻子。刃僕隸。獨得君數語卽解。以是署內外事。君如神明。國亦飭所親下人奉君若奉己。君或赴試。則一府中環以泣。阻其行。若勢不可留。則各囊金爲贈。君一入試。則所獲無筭。君亦隨手輒盡。不餘一錢也。在幕府日。國四鼓卽促君起。然巨燭與分棧治官文書。日出事始竣。國讀書不甚分句讀。顧酷嗜作制舉文。日必拈一題。強君共作。方御史錢澧之特糾國及山東虧缺庫項也。上心動。特命親信大臣偕御史晨夕馳往勘實。其弟國霖覘知之。募善走者。先半日馳抵濟南。國倉皇喪魄。時署中積金實無數。因乘夜運入司庫。及運司首府首縣各庫。以補缺項。然存金尙壘壘。公解後有珍珠泉。深丈許。遂昇至泉側。沉之後。撫臣明興濬池。尙得金數十萬。蓋國贖賄如此。事大露。逮國入都。下刑部獄治罪。君亦隨入。時以諧語。

寬解。一日國檢衣底。出一大珠。圓徑寸。授君曰。留此無用。以遺兄。君曰。弟事解後。此即可充貢。僕無用處也。居久之。國忽得妄耗。謂君曰。事可無慮。兄處此已久。可暫出洗沐。君乃出。然國卽以其夕賜死。君偕其弟入哭。檢所爲珠。已失之矣。余識君在武昌總督署。時同署復有吳門項君。字直菴。忘其名。項君故浙江巡撫王賈望客也。方王遭母憂。擁妻妾居會垣。并日事讌會。爲人所發。王亦知罪。且不測。而積重貲至多。因闔門召幕客散給之。數或三萬五萬不等。屬曰。若無事歸我半。事不測。則諸君盡留之。時項適省親歸。不及預。後數日至。王嗤之曰。日前少有分餉。而君不來。何運蹇若此。項固寒士。又極知足。則對曰。暴得重金。不祥。前日卽在。亦不願預。王笑置之。居數日。王甘肅匿災冒賑。及監糧案併發。卽日逮入都。諸幕客竄已無影。項獨送至鎮江。王強項曰。必送我清江浦。俟登陸乃返。項允之。同舟渡江。王忽慨然曰。幕中某某。吾待之極厚。竟無一送我者。今走千里。反在君。吾愧君甚。因懷中出一硯。曰。此宋蘇文忠公物也。籍沒時。獨寶此。不忍舍。故尙在耳。以贈君。倘入都後。蒙恩不死。異日必措萬金贖硯。復賦詩一章贈項。王入都卽伏法。後項幕囊稍裕。感王意。別購一室。貯此硯及所贈詩。不一歲。室毀于火。硯及詩並煨燼。後幕客得王重貲者。五年內。不病死。卽子嗣夭絕。無一終饗其利者。余嘗謂毛及項曰。二巡撫者。谿壑可謂不易滿矣。至谿壑一滿。而要領復絕。徒使己受惡名。而人饗其利。計亦大左。甚至饗其利者。不身死卽嗣絕。是貪吏之金與酖毒。又何以異。癸亥三月。暴書得君此札。跋竟。復書此。以爲服官者戒。

# 新修鑄嶺道記

鑄嶺界宜歛間。爲歛休寧。太平旌德要道。其高徑二十里。逶迤倍之。大約道險澁。南北合百里。行其間者。秦莽塞天地。藤葛翳日月。澗水礮石之礙路者。隨地皆是。且不特此。陰翳晦莽。則蛇虺穴之。狼虎窟之。盜賊奸宄竊發者。亦必于此焉。統計一歲中。顛而踣。以迄遭援噬攫網利刃白梃殞斃者。常接踵。兩府皆視爲畏途。然舍此則無別道。程君光國。自爲諸生時。由歛縣赴會城鄉試。道常出此。君貧甚。一囊一繖。恆自負載。蓋自上嶺以至平地。凡數百休。乃得至焉。目見行道者之難。心竊憫之。自諸生時。已立志修嶺上下道。然力不及也。後五舉不售。遂儒而兼賈。生計稍裕。卽決意爲之。薙莽鑿石。剗峯填塹。危者夷之。狹者闊之。幾及百里。以歛石易泐。不可用。本山石不足。復自新安江輦載浙石青白堅久者補之。長七八尺至四五尺不等。皆隨道之廣狹築之。咸自履勘。不假手于人。蓋蓄數十年心力。甫得就焉。卉莽去。則搏噬者無所容。道路夷。則奸宄亦無可托足。于是行者始不避晝夜。不慮霜霰霖雨。往反百里。均若行庭宇間。又慮道渴力乏之無所憇也。嶺半本有舊刹。狹陋過甚。復興工庀材。築樓數十楹。自此行者有所憇。渴者有所飲。暮夜者有所棲宿。而君之心計亦瘁矣。嘗讀宋史。南康軍有大庾嶺。道尤險阻。宋嘉祐八年。蔡挺提刑江西。兄抗漕廣東。乃洵土爲璧。各斃其境。仍夾道種松。以休行旅。又立梅關于嶺上。以分江廣之界。夫同一嶺也。抗挺兄弟。以兩路持節使臣。集十數州之力。發官帑。驅遣民夫。然尙數歲始成。人猶詫爲盛舉。今



程君以一諸生不假人力數百年來兩府人所欲爲而不敢爲不克爲者竟以一手成之其智勇又豈抗挺兄弟所可同日語哉語曰活千人者當封率計一歲中行是嶺者不下十數萬人嶺道之成其堅久可垂四五百年則程君之所活者人數又不可以億兆計矣君儒者固不祈報然天之所以報君者必有在也君卒後四年余始自旌德以事赴歙道出于此感君德在人而又恨不及識君也爰爲記修築歲月以貽來者云君之子文選郎振甲在京邸時與余善亦能隨時修整此道不使圯壞庶幾能承先志者

洋川毓文書院碑記

洋川毓文書院者旌德縣洋川鎮人譚君子文所創建也君以勤苦起家有貿易在廬州府之雙河距家五六百里君徒步負行囊數日輒往返以爲常五十後家稍起卽割其資之半創書院于鎮之洋山費白金二萬有奇縣固多富人十倍數十倍于君者不下二十家倍君及與君等者不可數計始皆笑君所爲及書院旣成走數百里延師儒之有名者主其事而折東招江以南四府一州之士肄業其中購橫舍百間各有床几各置戶牖庖湏負笈至者若家焉規畫井井與江南北都會之地所創建者無異君又節嗇衣食時市珍異以饋師及生徒之勤學者簡省日用購經史子籍各書以貽多士之能讀者于是始之笑君者亦均遣子弟受業焉君自幼時已棄學爲賈然性酷嗜書一日輒兩至院中聽諸生讀書聲以爲樂院中自講堂及橫舍外又就岡阜之高下曲折建爲亭館廊廡有塔焉以備遠眺有樓閣焉以備文讌游

息。蓋勝于君所居室遠甚。余自戊午歲。以弟喪乞假歸。君卽請于大府。欲乞爲課士師。然未久。余復入都。又以罪戍伊犁。不果至也。及自伊犁歸之二年。君又遣家孫來。以前約請。余感君之意。又以地居萬山之中。可借以避纒謗。遠塵雜也。館于是者二年。君暇日請曰。書院之成。不可無記。記又非先生不可。余諾之。君名廷柱。年已七十一。次孫正治。已補博士弟子。亦勤學有聲。蓋君能爲人所不能爲。又使數府士子。藉此以知實學。勤踐履。則君之有益于其鄉者。又豈僅賑饑卹患。葺橋梁。施醫藥。一時之事而已哉。行且食其報矣。嘉慶八年。歲在癸亥。三月望日。陽湖洪亮吉記。

此页空白

# 更生齋文乙集卷第一

## 天山贊

自涼州以西抵伊犁。凡七千餘里。地勢積高。天形轉下。其橫亘南北。界畫中外。戴雪萬仞。排雲百重。半嶺以上。靈禽不飛。百步之外。晴霞尙炫者。皆爲天山。亦名雪山。北人所呼爲祁連山也。夫天者特積氣耳。今祁連諸峯。尙有出積氣之上者。又況外則磧鹵。中藏秀靈。檣松芝菌。延年養生之藥。無一不備。寒暄晝夜。風雨晴晦之節。與外適殊。縣溜飛瀑。高逾石門。雲液石乳。百倍天目。而世人不之知。逸客不之訪者。豈非以徑路絕遠。逾流沙瀚海。火山風穴之險。始足以盡其奇耶。且漢世雖嘗通西北國矣。然票騎浞野。挺劍持戟。旣無意于搜奇。博望定遠。鑿空進孰。亦不期于攬勝。是則天地之奇。山川之秀。寧不待千百載後。懷奇負異之士。或因行役而過。或以遷謫而至者。一發其底蘊乎。夫太華太室。僅中土之奧區。南條北條。又此山之支絡。爰爲之贊曰。

積高惟天。誰能企焉。抗不相讓。實惟祁連。首沐塔里。足排居延。萬古積雪。無人及巔。其標挺外。其秀貯腹。松檣撐拄。高出若木。我登支峯。意欲濯足。洪流洶洶。斜出飛瀑。

## 瀚海贊

自嘉峪關以外。皆屬戈壁。古所云瀚海。亦曰流沙。亦曰大漠。亦曰鹽磧。今略計之。玉門、敦煌、安西、哈密、巴里坤、奇台、古城、薩木濟、阜康、烏魯木齊、瑪瑙斯、呼圖壁、綏來、精河、伊犁之頭台、二台、三台。以迄鎮堡。所在三道溝、疏勒泉、格子墩、長流水、松樹塘、菩薩溝、肋巴泉、三箇泉、木壘河、安濟海、滋泥泉、四十里井、蘆艸溝等。有水艸者。不過二十餘處。餘皆戈壁也。平沙漫漫。寸土不入。極目千里。殊無遁形。陰陽未分。霜雪不積。禽畜則四足二足以上。艸木則一寸二寸以下。飛鳴杳然。萌蘖頓絕。水泉則遠至三百里五百里。方可負汲。程途則久至二十日三十日。亦皆露宿。甚則怪火時出。光逾日星。陰風倏來。勢撼天地。鳴沙逐人。則迅雷無其厲也。飛石擊客。則霜刃無其銛也。烏乎。此亦天之所以限中外而域南北乎。蓋凡不火食而露處。前後至六十日。方抵戍所。爰爲之贊曰。

沙行如龍。欲出天表。昆侖束之。怒氣猶矯。冥冥日月。有暗無曉。人行著沙。如蠓之小。一風排空。車軸競飛。十里五里。愁無據依。白氣周匝。元雲盪摩。時出丈火。曾無勺波。

冰山贊

伊犁之南。渡渾河五六百里。有冰山焉。俗名八達坂。爲適葉爾羌西藏要道。其冰一日數坼。亦終古莫解。高撐層霄。下絕九地。能分軫陰陽。回轉日月。過此坂者。必以子夜。人馬半道。亦輒聞天傾地裂之聲。或竟有陷入無閒者。開合旣條。孰窺神奇。呼吸未周。已判人鬼。每星郵羽檄。取道于斯。雖蚊行蠓步。蛇枉魚孽。

咸震慄失形。回皇墮魄。然舍此以往。別無他道。若天風不鳴。月魄晃朗。涉其巔者。又輒聞百丈以下。弦管絲竹。嘈嘈並舉。聆其清聲。絕肖子夜。或以爲流澌沙石。上下搏擊。其幽咽吞吐。響或類斯。亦卒莫究其奇矣。主宿頓者。必日撥回戶二十。鑿冰棧冰梯。以通過客。余偶隨將軍至此。既訝其靈異。又莫測幽隱。爰爲之贊曰。

陰陽顯晦。條爾萬變。飛仙失足。亦墮無閒。冰梢燦日。波末閃電。清商夜聆。奇鬼晝見。危茲達坂。高乃百盤。南馳于闐。北走大宛。洶洶隆隆。地軸半坼。熇熇爍爍。天宇五色。

### 淨海贊

未至三台數里。有水焉。廣闊可五百步。深至無底。有島嶼。無委輸。不生一物。不染一塵。投以巨細。頃刻必漂流上岸。土人稱爲西方淨海。譯名賽爾謨。淖爾是也。余自烏魯木齊以來。盥沐久廢。又欲休馬力。日步行半程。足亦繭粟。驟聆此名。殊愧塵垢。爰稅駕路側。餐白雪以洗心。藉行潦而盥手。然後進焉。則見百樹之葉。隨雲外馳。四山之禽。擘叢東邁。若有所避。不容稍遲。心始異之。及抵其境。則西南北三面。盡皆雪山。中波外沙。儼欲分界。流旣百折。綠若再染。怪石林立。頽峯斂容。晷刻已移。心形並澈。歸途則又值仲夏上旬。涼風蕭蕭。弦月欲落。攜此枕簟。坐臥岸側。不復就舍館矣。山寡別木。惟松之竦而上者。岸乏雜艸。惟莖之翠而圓者。塊坐無事。因歷數字。內靈川秀壑。笠履所至者。或同茲幽奇。實遜此邃潔。誠西來之異境。世

外之靈壤矣。爰爲之贊曰。

雲分電壁。山空月華。中有綠海。旁周素沙。奇峯倒影。幽艸舒芽。時飄遠磬。時墮空花。百步之外。靈禽不棲。十里以內。驚塵詎飛。赤日縱炙。元霜不墮。庶幾成連。抱琴來過。

與崔瘦生書

瘦生足下。昨攜屐過訪。足下已遊吳門。過梅里。布帆東飛。悵望不及。屈指歸棹。尙無期日。高閣雨坐。益難爲懷。整理故書。因得足下南潯之詩。鄂渚之札。諷誦往復。詞旨悱惻。不報足下久矣。足下得無恨乎。然僕與足下形跡意親。貌遠神近。前在絕域。尙時時貢夢左右。況今得暫同里閭乎。足下此歸。寄居密親之所。僕不喜詣人。足下所知也。然僕亦有性所樂者。嘗以爲黃金可求。難者素友。白壁尙碎。況乎浮生。故每逢良遊。或值勝侶。覽晝不足。續之以夜。又遭罹憂患。悟徹生死。妻子田宅。均非挂懷。惟遇一竹一石。一花一艸。苟有賞心之境。皆存沒世之想。況春社以後。上巳以前。江南水鄉。景尤奇麗。花始破萼。禽皆出巢。天浮淺青。水作深綠。梨桃萬樹。紅白競放。薺麥百里。青黃雜鋪。時時獨行。故擾野鷗。往往高詠。多穿白雲。或輒遇知舊。縱眺幽遠。行童攜壺。每挂深樹。埜老布席。偏臨曲波。摩挲花朝。睥睨寒食。溪魚煮綠。園笋鋤青。酒白風簾。蔬紅雪徑。當午讀史。凌晨注經。攜朋日昃。語鬼宵半。竊晝夜之觀。極淋漓之致。其樂本可以忘死乎。頃歸田以來。被服粗陋。惟于滋味。尙不盡忘。然而霜前斫脍。人效其方。雨後墊巾。世傳爲法。每至塵市。

兒童隨之。伺其語言。競相傳播。則亦不知其何意也。自念身歷九死。足踏百險。而筋力尙健。神明不衰。徒步之遊。尙可百里。又回顧同輩。年齒相若。尙有應童子試者。而僕轉憶疇昔。已忝擢上第。回翔禁林。出則握節方州。入則侍經帷幄。雖年未至老人。皆以輩行尊之。且少耽訓詁。粗識吟詠。執贄之驚。盈于軒墀。問奇之酒。充塞庭棟。訪竹別墅。多留劇談。尋花東鄰。咸喜過望。雖灑掃應對。教非西河。而磨礪切磋。士半北面。亦何幸哉。亦何幸哉。伏念前之所歎者。生平好遊。宇內靈境。十祇臻七。以爲當待之來世耳。昨歲忽發狂愚。當斷腰領。聖恩高厚。宥之以遠。單車疲羸。卽日上道。有司不知。敦迫萬狀。遂以十二月六日。北出嘉峪關。奚奴脫逃。死友訣別。長城以外。復判人鬼。天地改色。星日不耀。積雪百丈。流沙萬里。汗血之馬。兩斃于道。僅抵戍所。沙同海飛。冰與天接。又或怪火四出。燒雲皆紅。狂風歷時。衝斗盡黑。龍蟄成陣。飛如豸獠。山魘出遊。勢挾風雨。念所不到。目能逢之。夷堅志奇。曾未及此。顧肩背所荷。戈猶未溫。赦書星馳。已過百驛。天地之德厚矣。日月之照普矣。行路感泣。又況身受。若乃一出一入。里歷三萬。顛而復起。僵而復活者。正不計數。然宇宙荒遠之態。人世訝謬之境。無怪不搜。無險不歷。方得稍弛負擔。歸臥林壑。賓朋驚呼。妻子雪涕。百日之後。神理始定。欲求良工。圖所經歷。午枕初貼。爰成臥遊。宵魂不寧。尙歷關塞。杜門省過。沒齒戴德。暇卽約束子弟。課以耕讀。冀同齊民。時納井稅。期于未死之日。不辜國恩。奄忽之餘。無忝生我。願斯足矣。嗟乎。自非親愛如足下者。亦何敢剖肺附出心曲。以相示哉。足下哲昆二人。亦舊相識。仲爲婚姻。



伯則同歲。然皆馳騁皇路。雅志用世。束帶終日。腰嫌其疲。文書滿前。手倦于寫。與僕雅趣不同。亦各行其志也。獨足下既精楮墨。不事科舉。終日靜坐。時而讀書。陳編朽腐。輒得奇趣。又性非泛愛。交必擇友。如僕之外。投分絕少。每與相對。輒至歷時。言笑宴宴。信誓旦旦。僕之所絕心折者。僕又何嫌于足下哉。俟足下歸。尚欲綜生平所著書。其旨趣意向。有子弟所不及知者。一一告之。足下庶後世知其本末耳。穀雨既屆。庭花亂開。歸期若遲。恐值風雨。

遊京口南山記

余自返遐荒。卽思屏跡。徒以邱壠在望。松楸未盈。縹緗滿前。讎校待畢。以是尙局跡塵市。偶影妻孥。然比之再蘖之木。對林樾而顏慙。拔心之艸。值樵蘇而志惕。勢使然矣。杜門省愆。遂已閱歲。今夏六月。始近爲百里之遊。避暑焦山者。旬有六日。此山產于江心。四面遼絕。東瞻海門。百里而遠。晴雨昏旦。心焉樂之。獨恨無奇石峭壁。可以跨凌星辰。隱顯日月。且半山以下。土氣純濕。蛇虺入波。黿魚上岸。幽翳荒遠。非能久居。初秋復泛太湖。遊洞庭東西山。往返浹日。然石公奇矣。而巖壑殊淺。林屋邃矣。而奧窔太深。一則參居半天。易盡一覽。一則深入九地。回皇萬端。蓋絕幽鑿險之方。非養性樂生之境矣。若地近而勢阻。迹幽而心逸者。其惟京口南山乎。夾山招隱。鶴林皆六朝以前舊刹也。益之以蓮洞之幽奇。獸窟之雄峭。八公之清邃。九灣之曲折。山不甚高。而石脈萬竅。水不甚廣。而泉靈一盂。林壑之美。無心自呈。日夕所需。不求已。

給。升山采菌。便可盈斛。沿境拾果。先能滿懷。故人馳書。時貽京口之酒。同學問字。頻饋新洲之魚。此則京峴。左右實包良積書之巖。瀟湖東西。爲龐公上冢之路。不亦去住兩使。心形俱逸哉。夫人生恒幹七尺。有所自來。浮蹤百年。倏焉已往。而必欲于闔闔之中。房闔之內。奄然待盡。識者惜之。此昔人所以寓悲于鐘漏。寄興于駒隙也。遊凡三日。同遊者。僧三人。焦山方丈巨超。攝山方丈今退居放生池靜室慧超。夾山首坐恆讚。導遊者僧一人。吾鄉天寧寺知客耨雲也。是爲記。

### 右竹林寺贊

前惟竹林。此則經藏。百盤斯陡。八牖以曠。披帷孤眠。攀樹遙望。沙日以飛。江日以漲。金焦兩丸。如流岸上。

### 右藏經閣贊

松濤驅雲。竹屋披霧。花纔破暝。石已斷路。如古畸人。中含盛怒。嶽崎歷落。底蘊悉露。一寸靈臺。湛然可覩。

### 右獅子窟贊

桑下三窟。松間屢來。崖虧日漏。樹劈門開。花光作鏡。香霧成臺。雲心頓剖。石脇疑摧。人方躑躅。鳥亦徘徊。

### 右蓮花洞贊

雖無樵踪。時有墮果。雲從東來。影赤如火。幽禽欲出。密葉深鎖。蒼蒼八公。終古常坐。庶惟淮南。配此江左。

右八公洞贊

良朋雨絕。飛鳥星散。攢峯霧隱。突谷霞爛。我思古人。夜半始飯。裁紅爲羹。剪玉作饌。山僧製秋海棠玉簪花作羹殊有風味

風鈴乍歇。星閣已旦。

右深雲菴贊

初陽上山。行客下嶺。縋幽匪奇。恍墮智井。青蒼既合。日月斷影。披帷一僧。意若修省。殘燈熒然。蜥蜴據頂。

右招隱寺贊

飛仙故址。選佛名場。山頽以曲。徑削而長。千年花朽。六代泉荒。猶餘紺壁。都帶斜陽。瓜花繞屋。復此深黃。

右鶴林寺贊

遊消夏灣記

余以辛酉七月來遊東山。月正半圭。花開十里。人定後。自明月灣放舟西行。涼風參差。駭浪曲折。夜四鼓。甫抵西山。泊所爲消夏灣者。橘柚萬樹。與星斗並垂。樓臺千家。共蛟蜃雜宿。雲同石燕。竟爾回翔。天與白鷗。居然咫尺。舟泊水門。岸來素友。言采蒹芡。供其早餐。頻撿魚蝦。酌此春酒。奇石突戶。乞題蟲書。怪雲窺人。時現鱗影。相與縱步幽遠。攀躋藤葛。靈區種藥。往往延年。暗牖栽花。時時照夜。晚辭同人。獨宿半舫。蓮葉千榦。遊魚百頭。怪響出波。奇香入夢。蓋至夜光沉壑。湖浪衝霄。悄乎若悲。默爾延佇。此又後夜漁而燕。

息先林鳥而過征者焉。是爲記。

遊城北清涼山記

夫兼葭盛則唵蟲集矣。雲霞生則爨煙絕矣。猶復紺宇斜出。敞臨流之舟。青藤上緣。接過嶺之樹。于是縱睇幽遠。悼歎今昔。連山青而百里。夕陽紅而萬狀。艸露炫目。天風振衣。聲搖鵲巢。影入雉堞。蓋曾不半日。而城北之勝。已俱覽焉。菴名隱仙。樓則掃葉。北登翠微之亭。西泛莫愁之艇。升阜陟岡。遊禽輸其捷。鳴榔鼓棹。潛鱗訝其狂。陰谷蔽日。流螢已飛。長林無風。密葉自下。金粟數樹。與松花競香。秋棠千株。共玉蘂比潔。冷泠瑟瑟。涼生秋初。寥寥蕭蕭。境出塵表。興盡而返。途窮乃歸。經黃公之酒壚。亡友黃仲則寓瓦棺寺最久。指徐君之墓樹。謂袁大令子才。卽葬清涼山下。歡悰方延。哀緒忽振。蓋數君者。靈爽尙接。笑言如生。而墳土已三尺矣。旣傷曩遊。復念逝者。同行孫君星衍。汪君爲霖。陶君渙悅。亦並有懷舊之感。相與彈琴賦詩。盪此哀鬱。迨至白日入地。紅燈燭天。始復聯騎以前。接坊而過。臻于快園。復預雅集。亦庶幾曩哲投轄之旨。古人秉燭之義焉。是日也。孫君等各賦詩。而亮吉爲之記。

仙桂兩樹。吟廊四周。中有道士。翛然寡儔。沉沉冥冥。夢與天遊。臨春結綺。幻境都收。四山歸雲。琴出樹頭。右隱仙菴贊

萬樹蔽谷。朝曦不通。青苔緣塔。直至閣東。僧飯一盂。案有鳴蟲。秋燕睇之。低飛竹叢。誰開西窗。天風掃空。

右掃葉樓贊

清涼之西。壁實陡絕。一亭橫空。揖日及月。高攀雲衢。下俯石窟。松杉千樹。沿逕蒙密。人行既難。鳥亦數歇。右翠微亭贊

樹杪見水。行殊周遮。入門登樓。東西采霞。斜陽新月。分照十家。白鷺之渚。偏棲晚鴉。古情乍鬱。回路方賒。右莫愁湖贊

遊幕府山十二洞及泛舟江口記

余以辛酉秋仲。送客白門。事畢欲歸。吾友孫君星衍。送我臨江之渚。時日乍過午。相與舍舟登陸。攜一僮一童。徧歷幕府山十二洞。厓層岫衍。川虛谷靈。雲浮景沉。林隱花顯。遂爾心遊于虛。神會于默。光景倏忽。遊蹤回皇。蓋僕行天下多矣。川陸之勝。寓目八九。巖壑之美。羅胸萬千。顧茲賞心。久失交臂。未嘗不歎江表之境至此極焉。其峭也。如斜行升天。遽握斗柄。其邃也。如再轉入壑。先聞鼙輪。其紆也。如蝸角已出。仍盤羊腸。其險也。如熊檜甫離。更入虎坎。又或石頂裂穴。形如彈丸。厓旁闢扉。削若永巷。衆壑既美。層田亦奇。其高低不齊。赤白閒出。如墮星而圓。怪火而裂者。名曰榴田。其入地而紫。逼天而青。懸厓挂壑。五色濛冥者。名曰薜田。其榦虛而員。節厚而錯。叢生水眉。迸出石腹者。名曰竹田。虬枝雀蓋。兩兩夾擊。不風而吟。聲出金石者。名曰松田。隨波離離。影界水陸。下拂魚尾。上憩鳥足者。名曰葑田。以此五田。間茲十洞。遂復

隱顯不測。涼炎互殊。削壁萬仞。腹背裂而通樵。浮雲數重。中央虛而過鳥。樓臺東西。以雲氣爲界畫。巖岫曲折。準鳥巢而升降。梨桃多于粟米。魚蟹富于蔥韭者焉。晚日。汪君爲霖。孫君星衍。接踵而至。于是蠟屐旣停。蒲帆又舉。載酒涉險。並舟浮江。霞采極于新洲。風棧生乎瓜步。激電撥海。魚皆上潮。寒星點波。豚不拜浪。螢光浮沉。沿岸遠近。飛羽啁嘶。隨波上下。半圭之月。倏爾西行。雙漿之舟。逝將東邁。小史羌笛。長年吳歌。矢晨露之詞。衣夜行之錦。樂且無極。舟行不停。視謝公之于牛渚。供奉之在采石。殆又過之。蓋較量絲竹。所以陶寫性情。指揮煙雲。亦以跌蕩山水。古者之樂。旣不讓夫有逢。後來之遊。庶可貽于無盡。此又山靈鑒之。江水司之者矣。是日三鼓。遂濡筆而爲之記。

陰房不晨。夜壑無晝。莓苔中滿。蝙蝠四走。巖腰偶開。日腳忽漏。危泉爭涌。怪石獨瘦。人行無聲。龍蟄其右。右三台洞贊

四山流雲。競入一門。貯之不盡。時復吐吞。巖巒積勢。藉此作根。幽扉半開。上有掌痕。風泉夜朗。煙景晝昏。右流雲澗贊

一石作壁。孤凌青天。衆峯西來。意態亦閒。山腰出樵。禽訝其仙。危轉百級。無能及巔。誰于幽絕。嵌此華軒。右永濟寺贊

天與水泊。曠無端倪。一峯將頽。四壁絕依。如鳥而翼。亭亭欲飛。再轉翠壑。孤升丹梯。月露渥頂。天風灑衣。

右燕子磯贊

青芝山下卜鄰圖記

夫煥館涼軒。可以適體矣。而必委心于邱壑。佩玉垂組。可以章身矣。而或寄意于樵漁。是以朱門之內。奇石因而磊砢。丹楹之旁。珍鳥于焉翕集。杞梓構室。必名之曰艸堂。檀欒斲窗。爰號之曰竹屋。于以知宇內之榮觀。必參以塵表之遐想。始足盡幽奇歷落之致乎。然其道亦有二焉。山陰若邪。鄭公采樵之里也。襄陽峴首。習氏種魚之宅也。或因彼故廬。創爲新構。釣遊所在。鱗羽因而改觀。桑梓之邦。魂魄以之生戀。此則仁人懷土之思也。抑或齊國男子。忽遠占乎富春。平陵高隱。乃借廬于吳下。東嶽道士。至西嶽而幽居。南山丈人。或北山而訪宅。以彼勝懷。未妨隨地。則達人夷曠之致也。若賓谷先生。青芝山下卜鄰圖之作。倘亦是乎。雖然。先生嘗雅意于西谿矣。就萬樹之梅。于焉築室。擘千枝之藕。遂以蕩舟。亦實極左江右湖。背陰面陽之勝覽焉。未幾。斧斤不戒。名勝久虛。孤山之鶴。倏爾移巢。靈渚之魚。從而徙窟。而必欲就十畝之桑。爰構百人之舍。識者以爲過矣。此青芝山下之所以改卜也。其地也。環之以笠澤。拓之以吳淞。極之以巨浸。有海飛天盡之觀焉。其山也。引之以天平。扶之以硯石。達之以包山。有雲興霞蔚之槩焉。又且土膏之沃。畝或數鍾。山木之饒。枝皆十丈。采蛤之港。通于螺田。撈蝦之渚。閒以蟹籩。香成海而百步。魚跳波而十里。此實海濱之奧壤。山側之幽構焉。樂子蓮裳。萬子廉山。鄉里素心。漁釣之舊侶也。心期有年。結鄰

此日子是衡宇在望。笠屐互通。分明月于檐前。合湖光于鏡裏。如欲學道飛舉。則靈威之丈人。如欲泛宅浮家。則天隨之逸客。有不應念而至。招手以來者乎。況自湖而西。卽僕蓬茅之宅也。挂席甫竟。已抵乎溪橋。芒屨一攜。便通于竹徑。絜中冷之泉。煎顧渚之茗。市南潯之酒。烹平望之魚。相與登穹窿。陟縹緲。看雲半起。眺月初升。讀畫崇朝。鳴琴中夜。述燕臺之軼事。則耆老咸驚。創吳下之新聞。則儒流過訪。蓋紀事之筆。與垂綸之竿。雜投。學仙之書。共經驗之方。兼貯。洵可償塵勞于夙夜。生神智于俄頃者也。是爲記。

### 姚春木萬里圖序

夫志在用世者。朝辭衡門。莫睨魏闕。徘徊九衢之上。躑躅三殿之側。倘十上書而不遇。則以君門爲萬里者矣。志在出世者。冠星冠。服羽衣。餐日月之始光。蘊陰陽之宿火。倘丹九轉而未就。則又以碧霄爲萬里者矣。若是者。希難得之遭。冀未來之遇。霑體甫竟。卽雅意于遷除。齋心不能。遽縈情于沖舉。其爲萬里不愈遠乎。若夫羈旅行役之萬里也。悠悠我思。熒熒在疚。卷回風而逾迅。見曉月而亦怨。嵩華儻面。不賞其奇峭。而厭爲紆回。滄溟在目。不覘其汪洋。而畏彼危險。秦髮元于越地。楚足繭于燕郊。此則朝吁莫愁。月恍歲惕之萬里也。至若放臣逐客之萬里。則又可言焉。縲紲未除。出國門者數驛。薪爨旣絕。距沙漠者百程。天非敢呼。而蒼蒼者目已極。地豈能縮。而莽莽者脛已疲。山鬼一足。同其步驅。妖禽九頭。引爲弔客。此僕之所身歷者也。若足下萬里圖之作也。無前之覬倖。無後之艱辛。英偉絕特之槩。于枕席便安遇之。驚



心動魄之觀。于眺覽從容得之。此則奇福種子生前。而壯遊成于俄頃。爲古人所絕無僅有者焉。蓋足下齒未及毀。譽已起于門庭。冠甫可加名。先降于遠邇。從宦則瑯戈元甲。洗兵于峨眉。遄歸則赤米白鹽。裹糧于梁楚。秋賦南北。恣其遨遊。趨庭東西。藉以登涉。果下之馬。行遲速而靡計。楚南之艇。泛晴雨而不常。綜而論之。黔靈劍閣。足下陸行之萬里也。長江洞庭。足下水行之萬里也。太華之巔。岷山之麓。足下夢遊之萬里也。東海之靈奇。南雲之浩渺。足下神遊之萬里也。足下貯四萬里于胷中。又且目之所及。心能寫之。心之所及。手能達之。是則嶽有五不足。罄其奇懷。瀆有四不足。殫其逸趣。竦肩之侶。庶有盧敖。繼踵之儔。或惟禽慶而已。僕之遇足下也。在明聖湖之側。足下之望僕也。在祁連山之西。遇亦可謂奇。而交亦可云雅矣。然則萬里圖之序。非僕之屬。而誰屬哉。今日者。杜門閒居。飛鳥絕迹。溝水旣斷。舴艫之舟不來。園蒿怒生。輓轡之屨亦朽。去者如夢。來者如塵。亦惟借足下此圖。以爲臥遊之具云爾。

三益齋銘及跋

持訪祕籍。攜遊名山。藜鐙校閣。松明掩關。秦鏡號齋。漢瓦製硯。鷗吻尙張。龍蹲倘見。

右漢瓦硯銘

其圓若升。其陷若井。殉茲口腹。幾斷要領。過期不貳。悔或可追。庶幾昕夕。視此雲雷。

上有雲雷文。

右漢銅蠡銘

虹飛知姓。墨潤識晦。覘天月日。視鏡向背。剖文周郭。古意在鼻。星仍暈綠。字尙流漆。

右漢漆鏡銘

三器皆漢物。並二十年前于西安故市上得之。自此常挈以自隨。未嘗暫捨。己未秋。獲譴。自請室出。戊伊犁。行旣迫促。衣履皆不獲具。可云無長物矣。而瓦硯漆鏡。尙攜以共行。惟銅奩則時已戒飲。獨付兒子。賚歸。庚申正月望日。行未抵烏魯木齊五十里。猝中寒疾欲死。僕人已布籐條。斂手足矣。殘喘未絕。尙屬從者以二物爲殉。嗟乎。可云嗜之癖矣。夫古人患難生死之際。妻子僮僕。一不克自隨。而杜伯山獨拳拳于黍書古文。趙臺卿又諄諄于四賢之畫象。何所見之不廣歟。然古人亦有念微時之敝。篋敗筥遺簪墮珥者。或亦仁人不遺舊之一端也。是年九月旋里。三物旣已合并。因繫卷施閣北楹貯之。并名曰三益齋。而各爲銘。因以自做云。

擬小言賦

壬戌八月旣望。有觴主人于西堂者。薄醉。偕諸生暨兒子輩。升山椒。穿石廊。憇乎風雲之閣。時酒渴思飲。主人適遊九華歸。攜霧露之茗。因謂諸生曰。有能爲宋玉小言賦者。沃以巨甕。諸生欣然。略一構思。卽歷級而進。汪瓚曰。體無形之妙質。乘野馬以遨遊。結廬燕螟之睫。馳驅針穎之頭。百離朱兮莫見。寧象罔兮可求。兒子符孫曰。托迹飛塵之末。遊覽秋毫之端。偕童冠兮並往。猶馳騁而厭寬。堵繆楠曰。細過輕塵。萬

物莫可方象。眇逾毫末。秋陽無以鑒形。呂偉標曰。馳萬馬兮秋毫巔。嘆寥廓兮杳無邊。呂培曰。以芥稗爲乾坤。騁蟻穴之萬里。行於其中。茫乎百年。莫得其止。呂夔曰。極邊之國。有么小之人。統六軍以出戰。渺一隙之纖塵。揚旌拂天。離婁莫覩其影。大響振谷。師曠未聞其聲。譚正治曰。駕舟蠅髓兮。若博望之探天河。馳騁蟻腹兮。若章亥之窮地域。猶恨宇宙實無窮。怪其前者馳不疾。諸生賦畢。主人亦曰。揚一塵于螻睫兮。兀若昆侖之丘。噴微噓于蠓鼻兮。浩如滄溟之流。析百分之芒穎。建九層之危樓。眇眇乎新生之毳末兮。上已具乎山海九州。而未已也。以遊絲之莖。貫七曜與列星。以鍼鋒之所值。書廿史與九經。黃帝所不能識。以咨杳冥。杳冥茫然。時睽其睛。自少迄耄。晴晝月午。究未嘗一見其真形。諸生皆曰。善。因以玉川之數。前爲長者之壽。諸生亦並得啜之。譚正治。呂夔。復得倍飲焉。方欲抽奇思。各賦大言。日方半辰。天忽晝晦。塵鷗鼓其前。雷霆出其內。童豎股栗。或向或背。懸流百尺。響若列碓。皇然懷然。因不敢賦大言而退。

勸學銘

友人構兩齋。分授其二子。并屬爲銘以誥之。

焯掌刺股。其塗本分。一以希聖。一思徇人。氣食萬牛。力馳六驥。吾何所師。蚓用心一。

力田銘

朝作夜輟。志在闢壤。帶經而鋤。念已涉兩。思收拙効。巧所不務。布穀布穀。耻學鸚武。

陳姬吳荔孃壙志銘

吾友陳明經蔚、有別室、曰吳荔娘。歸明經甫一歲而卒。明經傷之、乞余爲志壙。倉猝未果。壬戌九月雨夜、偶檢案頭、得荔孃所作蘭陂剩稿、讀竟、憮然曰、是其慧業、或可傳矣。曰、據明經所作傳略、爲之志曰、荔孃、福建莆田人、父農家、粗識書義。荔孃幼卽喜從父讀、年八九卽學作五七言詩。秦室之智、可云無師。椒盤之詞、是曰夙慧。然性絕愛潔、每獨處一室、其窗櫺几榻之屬、光可鑑也。香焚篤禱、日必數周。米飯桃花、晨無半合。尤異者、閩俗尙鬼、荔孃獨不然。歲時自展敬祖先、無所拜也。姚江幼女、不事婆婆之神。清源小家、尤嚴腹臘之祀、其智識有過人者焉。年十四、問名者踵于庭、無適從也。明經獨以後至得之、迨結褵之夕、卻扇之辰、明經方賦詩催粧、而荔孃荅詩、卽有嫁得江南詞伯之句、可云識所歸者矣。時明經以將軍之殘客、得仙遊之麗人、慕之者旣多、妒之者亦衆。于是遂挈以歸江南。度仙霞之嶺、則嬌鳥助其清音。泛嚴陵之溪、則潛鱗訝其明艷。望鳳山而弔古、過虎阜以聯吟。樂事賞心、于斯爲極。歸青陽數日、明經卽有秣陵之行。而荔孃遘疾遽卒。年僅十六、未及與明經握手訣也。嗟乎、繁欽定情之詩、士林方播、庾信傷心之賦、鄉里已傳。春甫半而先凋、月未圓而遽隕、亦可謂悽愴傷情者矣。明經葬之于九華山側、原樹東向、不無情于故鄉。唐蒙孤寡、尙有懷于高格、重爲之銘曰、

生于海浦兮、嫁于江沱。降年何促兮、賦才何多。事君子兮、別所親。志懾懾兮、甫經旬。一棺旣闔兮、詩亦焚。

以松爲壠兮桂作墳。庶靈光之不闕兮。吾知其不爲九峯之月而卽釀五溪之雲。

# 更生齋文乙集卷第一

## 平生遊歷圖序

夫有用世之心者。上壑既難挂懷。抱濟人之具者。間適亦乖本念。蓋務其所急。而置其所緩也。是以少翁仕而百畝荒。元卿歸而三徑治。前喆所爲。卽後事之師也。予幼孤貧。然亦嘗有大志。又湔磨師友。飽飫慈訓。冀得稍展尺寸。以報所天。中年入官。而心性迂拙。言語戇直。又加以不識趨避。動乖事機。思之慨然。時有退志。至己未。奔國卹入都。遂以語言文字。致罹大辟。幸聖天子全之耳。遠戍絕域。未及半歲。遂蒙赦歸。製寬博之服。以代銀章。種青蔥之蔬。漸忘肉食。又生平性嗜山水。蹤迹所至。幾徧寰宇。絕鑿幽險。冒犯霜霰。若飢之于食。渴之于飲。未嘗暫離。自奉明旨。不令遠出。于是登涉之志。巖壑之願。亦遂輟焉。壬戌長夏。以暑疾臥。更生齋。年家子陸生過訪。生固奇士。尤工染翰。稔予之好遊。又陟歷廣也。乞爲道生平之奇。與怪偉錯愕。可一不可二者。留兩晝夜。余隨所記憶。絡繹告之。生歸。自以其意。爲余作十六圖。圖竣。并乞詳本末于後。遂各繫以贊。前八圖爲及侍太宜人時內外所陟歷。則腸肥腦滿。志壯氣盛。俯仰八埏。凌厲一世之志概也。後八圖則皆太宜人見背後事。是又淒風苦雨。震雷激電。千態百狀。萬死一生之境。地無不備焉。嗟乎。以壺丘待死之年。敍高密畢生之事。其達也。亦嘗召對麒麟之閣。持衡龍虎之方。錫讖而入承。

明抗言而驚三殿。其窮也。亦嘗受誣牖上之業履。致窘里中之墨尿。感异品于園蔬。泣奇温于襖絮。其動也。亦嘗登五嶽。歷九藪。渡駭浪而百重。越龍沙而萬里。其靜也。亦嘗插架萬卷。十旬而卒業。傍舍半畝。崇朝而畢功。蹤跡不可爲不奇。耳目不可爲不廣矣。況身縱閒退。而一世尙不吐棄。陳幣者接于戶。問字者踵于庭。名位已盛。求弁首之一言。穹碑旣磨。乞銘幽之數字。親戚藉其餘潤。妻子因而不饑。出覽百里。則道釋欣從後車。閒登一丘。則童叟歡爲撰杖。又寧非再造之後。更生之餘。蒙覆載之德。宗祖默祐。而能若是乎。他日歸魂而上。岱宗含笑。而依親隴。尙當爲泰山主者告之。并述于吾父母及素所親暱者也。午臥乍起。作此報陸生。并以爲序云爾。陸生名伯才。

少而孤貧。日祇一食。言依外家。大母之德。紡牀左側。毛詩魯論。幼不力學。身餘杖痕。烏乎。杖痕雖平。兮學未就。安得吾母兮再篝燈而口授。

右南樓課讀圖第一。主人六歲孤。從母育于外家。雖間出從塾師讀。然毛詩魯論爾雅孟子。實皆母太宜人所親授也。又極爲外王母龔孺人鍾愛。以樓後廡居之。時給其缺乏。圖中後樓二楹。正瞰雲渡。太宜人坐紡牀中。旁列矮几一。密排丹墨。主人卽讀書其側。几左復一巨磚。光黑可鑑。課讀暇。卽蘸墨習書其上。以爲常。前後凡四年。歲乙亥。舅氏始以塾滿遣歸。後雖頻至南樓。起居外王母。間或留宿。然不復有課讀之事矣。

雨頽我瓦。水嚙我門。解樞繩而縛筏兮。疑童性之猶存。句不見日出兮。竈已上樓。池魚窺我闥兮。願烹之以進羞。從中河而屢徙兮。或經歲而一至。摩挲老桑兮。庶知我之三世。

右北屋泛槎圖第二。主人十一歲。自外家遣歸。卽從太宜人居中河橋南賃舍。其北屋卽主人始生處也。旣歸而北屋已爲季父所居。遂別賃小樓二楹。大池踞其後。三四月後淫雨。則屋中水先盈尺。主人以意製木爲槎。可旋轉出入。圖中老桑一株。半枕池上。爲繫槎之所。樓俯逼鄰翁王氏宅。翁老病。不欲聞人聲。以是主人之書常默誦焉。弱冠授室。及補博士弟子員。皆在賃屋中。至癸巳秋。始奉太宜人移居城東白馬三司徒巷。計居賃屋共二十六年。

蠡河之東。無有岡與陵。市聲嘈雜。土氣鬱以蒸。間有隙壤兮。闕不可以登。伊誰築居。無山而山。有亭有塢兮。終日掩關。侍親遊兮。白露節。中外羣從兮。訖臧獲。折名花兮。盼新月。惟茲遊兮。冠曩日。

右山墅訪秋圖第三。圖中所繪。爲城北之青山莊。敞者爲翡翠堂。高者爲麥浪軒。曲者爲煙雨橫塘。邇迤而折者。爲新月廊。皆園中最勝處也。先是園屬京江張方伯适。公子某能詩。曾大會大江南北諸名士于此。園中諸勝。皆有詩紀事。歲丁丑。主人年十二。曾隨太宜人與從母暨外家諸姊妹訪桂。一至其地。時主人已受四經。甫學吟。太宜人與從母曾命賦新月廊詩。不十年。園凡屢易主。續後園主以逋官錢折毀迨盡。今里中無復有勝所矣。



東迎春。南顧唐。一曲路。風花香。五月五日。千舟百輿。龍有五色。東西以趨。采船南來兮。月正皎。盈前白髮兮。不敢稱老。假辰良兮。祝壽考。燭光如山兮。一川曉。

右雲溪讌月圖第四。雲溪五日競渡最盛。歲甲申。外王母龔孺人。始自江西官廳就養回。年已越八十。五月十日。太宜人暨諸舅氏從母。爲外王母補祝。合宴于畫船歌舫中。余時年十九。與外家諸兄弟姊妹均得執樽俎侍側。時笙管咽岸。燈光塞河。里中人正爲競渡勝會。徹曉始罷。太宜人與諸舅氏從母。年並過五十。酒半。疊起奉觴上壽。外王母亦甚樂。親串觀者。咸詫以爲名家盛事云。

巢禽不起客先起。竹杖棱棱注坡底。蓮花高。天都高。天都望蓮花。始覺平眉梢。一日不食。一夕不食。望之不來。疑值鬼與蜮。我入門。驚同人。手足旣已僵。不復吟與呻。酌一瓢。餐數黍。顏雖活。氣尙阻。我雖堅強不莽鹵。我遊山。愧爬山虎。土人陳某登山如飛。俗號爲爬山虎。即兩次導遊天都蓮花者。

右黃山雲海圖第五。主人壬辰年四月。隨安徽學使者朱先生筠。歷遊黃山齊雲九華諸勝。黃山視二山尤奇。天都蓮花二峰。則奇而又奇者也。嘗憶偕諸同人。自慈光寺抵文殊院看雲海畢。卽留宿山頂。夜半。知學使者不能更上。遂曳杖獨行。先陟天都之半。道梗塞。不得上。至戊戌歲四月。又從座主劉先陟峯頂。以補王辰年之缺。復回從間道至蓮花絕頂。久憩乃下。學使已不能待。先從文殊院下山矣。主人凡一日半。夕不食。方追及于雲谷寺。履已穿決。衣爲荆棘所刺盡裂。學使及吾友邵學士晉涵正色規曰。君遊山

亡命至此。獨不爲太夫人地耶。余悚然。自此始不敢冒險獨行。佩師友之規也。

日不赤。山乃赤。曦輪著山。淡無色。我今得遊真定識。同人搖手我獨前。瀑布千丈懸山巔。快覽人世方升天。自朝兮及夕。月初升兮日輪旻。金庭不死兮。吾豈爲所惑。我之嗜山兮。若飢者之食。雁蕩欲遊兮。除用此策。

右赤城煙月圖第六。歲丙申。主人在浙江學使者王先生杰幕府。以八九月歷試溫台處三府。因得遊天台雁蕩兩山。雁蕩恩遽不獲窮歷其勝。天台則會上赤城。并一宿國清寺。學使性謹飭。又不嗜遊山。以是值名勝所在。皆約束幕中人。不令登陟。余得遊二山。實破格之事也。嗣學使爲主人庚戌禮闈座主。主人性戇直。屢以事與座主執爭。座主每曰。此人當格外容之。仍談及浙中遊天台雁蕩舊事。以爲笑樂。

忽升天。忽入地。湖光瑒。燈影細。龍爪畫沙。童膽裂。入以已。出以申。湖風狂。不渡人。挈帆行。帆破幅。漁師顛。柁工哭。詣何所。莫釐宿。波如山。不見船。出險語。驚枯禪。我裏龍腹。君蛟纏。

古湖風破浪圖第七。歲癸巳。趙舍人懷玉。率弟姪讀書于穹窿山之茅篷。主人以十月訪焉。因約爲東西洞庭之遊。翊日。挈茅篷僧一。自胥口出湖。日昃。至西峰包山寺宿。侵曉。棹小舟。沿山麓。至石公山飯。飯畢。卽訪林屋洞。洞逼窄且直。下數十級。勢已在湖底。舍人有難色。主人因獨挈舍人一僕勝元。束炬。

入洞。怪偉巉刻。千門萬戶。然祇可匍匐入。百步悉不得仰。歷金庭。玉柱。迄隔凡。壁削不得進。剔炬小憩。忽大聲從石罅中出。勝元又于沙水中躡三爪巨跡。闊可徑尺。怖絕。始尋路回。抵洞口。日已西下。主人興正劇。欲徑抵莫釐峰宿。風急波暝。茅篷僧及柁工堅止之。不可自挂帆幅以行。至湖心。則舟覆者已屢。茅篷僧及柁工並哭。然勢不獲止。三鼓。僅抵東山。舟中人面已無色。惟主人尚談笑自若。

崖紅壁紫。澗黑渚綠。青爲宿霧兮。白則飛瀑。一川之窈窕兮。忽五色以班駁。似出天地之外兮。乃墮入山水之腹。頂孟而覆谷。釜而仰。或猿獠之數擲兮。或蛇螻之屢枉。潮猛而帆劈兮。江已盡而入湖。方出屏障兮。又置我于畫圖。平湖之水兮。八月已凍。越三十年。而秋潭紺碧兮。搖搖而尙入春夢。

右江艇劈潮圖第八。此圖亦癸巳七月杪。在新安學使行廨。意有不合。卽買舟同汪助教端光。從新安江東下。一路分風劈流。蹈壑凌澗。青嶂四合。紅林萬株。愴怳幽奇。與宣歙台處諸山水迥別。過七里瀧。上東西臺。助教不能登陟。皆在山半以待。將抵錢唐。忽海潮猝至。舟倒退三十里。五鼓稍殺。始劈潮而下。泊候潮門。陟萬松嶺。至西子湖。遊覽竟日。夜卽宿湖心亭。寒甚。與助教咏瓊樓玉宇之章。徹曉不寐。瀕行。復從湖頭買菱角芡實歸里。爲太宜人壽。以上八圖。皆主人及侍太宜人時所遊歷。此後雖亦嘗登五嶽。涉四瀆。然與負米時之意緒如出兩人矣。

平生耽奇。惜乏天上梯。欲陟落雁身。與北斗齊。三更乍交。天海頓赤。滄溟洶洶。如釜底上突。雍青充豫。地

脈遽縮。千奇萬怪。炫此心目。巨響出海。紅輪曠天。杳杳冥冥。一世尙眠。

右蓮峰日出圖第九。主人以壬寅七月。自朝邑潼關。西抵華陰。卽馬行十五里。宿華山之麓。曰玉泉院。將曙。卽乘竹輿行二十里。抵青柯坪小飯。復舍輿行三十里。歷千尺幢。媼神洞。仙人砭。日月崖。蒼龍嶺。諸險。抵所謂三天門者。自以上。東爲玉女峰。補爲蓮花峰。中爲落雁峰。皆以此門爲限。晚由東峰趨山後。尋希夷厓。秦皇博臺諸勝。始至金天宮宿。道士云。宮至落雁峰尙五里。是夕早臥。三鼓。卽束炬行。昏黑中。百轉方至峰頂。華池及老君鐵殿在焉。四鼓。日已出。青齊海水畢露。金碧萬狀。天水一色。紅氣久久始融。成日輪。而下方濛濛。尙不見指掌也。辨色。乃取道蓮花峰。觀巨靈蹠山處。始下。往返共兩日。各以詩紀事。而復爲之圖。

蒙嶺望岱尙隔一程。雷電雪月。交乎四更。崔莊驛北兮。遺誥始布。岱宗之有神兮。先已縞素。

右岱宗雪霽圖第十。歲戊午四月。主人以弟喪。乞假南歸。不更思北上矣。己未正月。恭值純皇帝大事。以曾值內廷。奉文奔赴。二月望日。行抵羊流店。距泰山不百里。海月正升。遽爾大雪。夜半疾雷迅風。震撼山嶽。次日。行抵崔莊驛。始敬讀純皇帝遺誥。蓋泰山有靈。先一日已相告也。日昃。過山下。已積雪。不得上。圖中縞衣素車。與林巒岡阜一色。時年家子劉孝廉嗣綰。亦以急欲就試。隨行。少讀書長出遊。迨通籍。歲已周。惟茲一名。敢望先執。祿不逮親。受糈以泣。

右雲呈五色圖第十一。此記庚戌年登第事。主人祿不逮養。本無作記。然性素嗜書。通籍後。值國家校刊石經。命主人預司其事。兼詳覆官。藉得會萃漢唐宋諸石經。異同。讐正字體。惜未及半載。卽奉命視學黔中。不獲始終厥事爲歎。統計前後官京師僅五年。歷充純皇帝實錄及內三館纂修。又嘗爲咸安宮總裁。及教習庶吉士。並掌進擬文字。得以恭讀九朝日歷。周知掌故。并泛覽新疆外域圖書。不可謂非厚幸矣。圖中恭紀臚傳日拜恩訖。一甲三人。隨殿試榜自午門出。雖自開國以來。沿爲故事。然實異數也。

幼孤貧。作塾師。急就篇誦不輟。今官清華。進教胄子。六經盤盤。兼課奇字。人言三天中三島。悉不如節。頌內府金日叨大官廚。午餘退食沙堤畔。紫翠樓仍插天半。澄懷園觀光樓爲寓直所樓上恭貯仁皇帝宸翰云半天紫翠

右日麗三天圖第十二。圖中黃墻碧瓦。爲海澱澄懷園。恩賜入直諸臣退食之地。計一歲侍學諸臣直乾清門內北廡者。僅新正十日。及十一月。餘皆在海澱。每日辨色。卽自賢良門東紅左門入。從軍機直事房東行約半里。方達三天。碧波環之。以法瀛洲三島。惟一橋得通。天章煌煌。署曰。前天垂祐。中天景運。後天不老。卯正巳正。兩頒食于西廡。申正始畢出。蓋歷代家法之善。無有過本朝者。自親王以下。均與入直諸臣抗禮。侍學之暇。卽商榷經義。間或周詢世事。亮吉管窺蠡測之見。以爲庶惟漢之河間東平。唐之鄧康王曹成王。或可同日語耳。

十驛五驛兼程以馳。俟我瞑目。云何敢遲。中條西去兮。隨雨奔波。飢不及食兮。掬盈懷之餅餠。鬼伯催人兮。倏不及待。一書纏綿兮。尙附棺蓋。蠡河之東兮。妥此旅魂。遺經而可讀兮。庶以期夫愍孫。

右蕭寺哭臨圖第十三。亡友黃君景仁。體素癯。又不善珍攝。二十內。卽自知年命不永。每以後事見屬。主人初以爲戲也。及壯歲遊燕趙。歷秦晉。遇益窮。疾亦益甚。先是君以天津召試二等。在三館繕寫。當得官。以費無所出。癸卯三月。遂力疾出都。將遊西安。至運城沈運使業富官廨。疾已亟。飛書達主人。促急行。以屬後事。主人聞耗。卽借馬疾馳。日走四驛。而君已不及待矣。運使已移君殯古寺中。入門而遺篇斷章。零墨廢紙。尙狼籍几案。哭奠後。主人日三臨。并爲文告殯。始偕其柩以歸。葬之于黃氏先壠之側。烏乎。主人與君交二十年。不見者又二年。竟不獲執手以訣。亦命也。劉刺史大觀。趙大令希璜。已兩刊君詩。楊方伯揆。又刊君詩餘入叢集中。嗚乎。君亦可以傳矣。

伏地不起。時時叩頭。狴牢夜半。傳呼重囚。煌煌天語。汝不得活。汝爲詞臣。摺乃不密。公然萬言。移副三府。傳聞影響。疑謗君父。囚罪萬死。敢置一辭。得免拏戮。猶銜聖慈。琅琅貫索。不詣西市。再造之德。感實沒世。右園扉待訊圖第十四。主人以己未八月。乞假將歸。臨行。上書三府。卽日軍機處傳旨訊問。覆奏入。卽褫職。下刑部獄治罪。刑部獄有南北二所。主人所下。卽南所獄也。獄旁窄屋二間。凡官吏待罪者。例得居此。以別于衆囚。初。涖獄。司事者不測上意。令兩吏夾持以寢。四鼓。卽喚起。嚴加桎梏。押至御史臺嚴

審。嗣軍機刑部。照大不敬律。擬斬立決。蒙恩減死。發戍伊犁。自下嶽至出獄。共三日夕。每夕提鈴喝號。及重囚繹絀桎梏之聲。徹曉不絕。雖隔一巷。亦嘈雜不得寐。

室可無梅梨楂。菜不可以不花。菜甲之花。春光始華。青菘紫莧。綠葵紅蓼。有客入門。餐之至飽。主人之鋤。與戈並懸。荷戈既畢。鋤此廢廩。太常之齋兮。非欲妄託。經旬累日兮。案竟可以無肉。

右閑廩學圃圖第十五。主人蒙恩赦還。道過哈密。見少司馬伍彌烏遜。于廨旁闢圃。親課園僕種菜。晚日。卽以圃中所有飯客。主人見而慕之。回里後。閉門謝客。不涉世事。適鄰左有隙地一廩。友人爲購得之。爰闢作菜畦。暇日卽自力作。稍有功緒。迺命雖童。竟其事。圃中凡春夏秋諸種之菜。靡一不有。以爲常餐。殊有至味。他日并當命少子幼孫。于讀經之暇。卽入此圃。力作習勞。或亦前人抱甕運甃之遺意耳。

六齡卅齡。黍下日少。庶歸魂之有日兮。尙可以娛我二老。吾家先隴兮。前橋之村。因伯姊而闢地兮。近外氏之墓門。子孫而賢兮。不望封植。惟三松而五梅兮。毋或使中道而瘞。

右疊港種梅圖第十六。余在伊犁日。于渾河左側。置地一區。已屬同戍之友張太守鳳枝。韋大令佩金。他日奄忽。卽葬我于此。蓋虛罪釁甚重。不能歸骨也。今旣蒙恩釋回。則歿後祔葬先人壠側。已無疑義。稍暇。當于旁近擇一隙地。種梅五樹。松數株。爲他日歸休之所。大灣橋水。至吾家墓前。凡數折。層岡疊

港間之極夷曠幽遠之致。夫生寄死歸。又得從先人于地下。所謂魂魄猶當樂此也。此一圖不繪人。但三松五梅。層岡疊港。境極寥寂。主人或先已休神于地下也。蓋生平之事。畢于此圖。故取爲殿云。

琴高溪夜遊記

夫長川不回。非必歸海也。而潛鱗避之。危嶂無極。非必接天也。而迅羽違之。是則魚鳥也。亦畏天地之高深乎。非也。逶迤而上。則飛鳥巢其巔矣。紆徐而赴。則遊鱗萃其中矣。宣州之山水。迨皆逶迤而上。紆徐以赴者乎。獨琴高之溪。與嶺則不然。拔地矣。不遽千仞。而旋螺如可級也。赴壑矣。不及十尋。而頰蛤如可拾也。此則幽隱之外宅。動植之奧藪乎。主人以壬戌七月。再過此谿。日昃不行。炎歎轉甚。相與挈竹簞。持坐具。憩于橋陰。適客有就主人乞書者。攜精筆良墨。甘水苦苳。以至。主人亦出姑溪之蔭。洞庭之蓴。以佐之。橋廣十步。長及半里。青峰四圍。白石千級。主人與客占其半。餘則以資行人。走驛騎。尙各不相涉。輕塵旣淨。矮几徐設。相與拈毫搆思。揮筆振紙。歸鳥合隊。覘其苦吟。潛鱗一雙。噴此餘墨。未幾赤日墮嶺。涼颼出林。客導主人。復陟隱雨之巖。歷垂竿之徑。石竇半豁。凝神而有光。藤牀倒欹。冥坐而自得。遵彼幽遠。試筋力之捷。愛此清冽。淨肌膚之塵。殘漏客去。而主人亦不歸逆旅矣。暘北斗之星。繩下弦之月。行及十里。天始逼曙。回顧曩處。煙籠霧隱。纔隔半黍。幾疑兩塵然。而五色之露。猶霑苧衣。一鉤之雲。尙滯竹笠。未始非琴溪崑山之所得也。七月二十六日發曙。是爲記。



自下洋川取道由九華山記

壬戌八月。自下洋川將遊九華。梯峰礪川。蹈險蹠暗。凡百有六十里。甫至山麓。過嶺四。九峰。三折軻。沖樾嶺。越水三。洋河。麻川。舒溪。洋河合于麻川。麻川合于舒溪。下不十里。石溜灘險。卽青弋江也。穿縣三。太平。石埭。青陽。均不及城郭。或遠至半程。或近在百步。時瞰閭井。輕煙間之。遐瞻浮圖。飛瀑又隔。途次望名山二。黃山。則天都蓮萼。近接眉睫。陵陽則洪嶺旋溪。不越肩背。又沿路可觀覽者。蓮心之亭。石柱之灣。烏林之社。黃華之岑。金光臺笠。洞盡穴脅。舒姑黃雀。波悉鑑心。初七日。宿汪王岑。月方上弦。天若覆笠。候蟲入枕。蝙蝠拂衾。鵝鴨上樓。牛羊下穴。數寐數起。猝不能臥。披霧入嶺。追雲過橋。依乎杉櫺。飯止梨栗。日未昃。已至南陽灣。樓臺破空。厓壑頓遠。是夕初八。宿陳氏溝清園。主人明經蔚他出。其弟爲呼網師。捕此溪鯽。山筍裂徑。秋菱溢池。烹鳴旦之鷄。漉隔宿之酒。子弟聚立。多于鳧鷖。房廊散空。盡逼星斗。飛雨適至。煩襟頓除。休乎北窗。愜此清夢。翊日。筍輿竹籠。已布門外。自屋後上嶺。復四十里。迺抵所屆。陳氏子弟之雋者。二人偕行。度澗越壑。能言其名。躡履撰杖。過愜所望。石屋木柱。危橋蔓支。舍輿而行。憩一陟兩。回皇峯巔。屏息樹杪。飲泉一甌。未抵雨汗。休磴百級。纔平喘聲。徑逾精廬。遠跡危巘。山僧出迎。忽訝素識。披薜讀碣。則壬辰年石刻在焉。是夕初九。宿捨身厓之東牖。霖雹怒飛。松櫟雜響。雷斧劈牖。雲光閃窗。披衾驚寒。穴竇望曙。逼殘漏。冒宿霧。復與二生。拉一老衲。尋所爲轉磨之峯。摩空之嶺。木獸猛而若蟄。雲峰奇而欲飛。

時絕幽深。時漏光影。蓋半日始徧歷焉。洞外獨支房廊。別一天地。足力既乏。凝神久之。仍臻來途。復飯故處。始悉呼僦從下嶺。時主人已自江北回。余少日同學也。來迎山輿。笑關水榭。盤羅川陸。話匝今昔。又命少子塾。猶子壤。執經于余。卽偕行之二生也。天曙。別取道陵陽鎮。以避柯沖之險。過沙澗。復飯于及門曹汝賢宅。乃回。是遊也。往反共五日。上距壬辰年。偕諸同人。隨學使者大興朱先生筠。過此信宿。已萬一千一百七十餘日。嗟乎。回眸未周。云已一世。申臂俄頃。先逾卅年。以至昭昭笑言。落落指顧。珠玉之氣。久幽于泉扃。雲霞之光。不升于天闕。蓋前遊十二人。墓木拱者。已十有一。均未臻徂年。隕以半道。摩挲讀碑。嗚咽話舊者。僅後死之一人耳。以視棲澗之鶴。頂仍未丹。蟠庭之松。蓋初欲偃。人之不能與植物動物等也。一至此哉。又怪乎山水顯晦。各自有時。陵陽棲真。神仙窟穴。今則磴道棘梗。厓谷晦霧。而梁陳以前。輿地不紀。如九子峰者。金碧蓋地。丹青燭天。赤松不遊。白足斯集。居者若聯房之蜂。來者若赴垓之蟻。相隔數里。間有所謂仙人子明與弟子安者。已不能舉其姓氏矣。不又重可歎哉。道中及登山所歷之境。各繫以贊。共十六篇。以貽明經及兩生。

乙川倒流。波捲白電。礙眉萬竹。霧隱不見。石亭當空。樵徑四叉。山童關門。曉日正華。

### 右蓮心亭贊

山旣百盤。谿亦百曲。山水旣窮。天浮榛綠。層巖疊嶂。厭客入井。晴陽穿空。時漏鳥影。

右石柱灣贊

萬峰陰陰。突出古廟。褰裳入門。綠竹如笑。客夢正熟。秋蟲上牀。雲光露影。意與之涼。

右汪王岑贊

千步石嶠。下有怒溪。時長時落。倏無端倪。雲噓谷咽。石阨澗沮。老蛟窺人。或以月午。

右千尺嶠贊

中水小水。咸輸大川。山漏白道。灘轟響泉。斜穿數縣。直下百丈。四山彈琴。合此清響。

右舒姑泉贊

石上戴石。危如累碁。黑白未判。仍思出奇。如古畸人。長劍左佩。雨零日炙。臺笠破碎。

右臺笠洞贊

黃禽白雀。背負山雨。穿松北來。翅濕不舉。陵欺谷壓。賭勢競高。一風吹空。萬木怒號。

右南陽灣贊

過橋飛電。正值天笑。入門稜稜。奇石礙帽。新雨瞥下。魚梭亂飛。意欲上樹。藤爲作梯。

右湛清園贊

古之陵陽。神仙所都。時移世易。競築浮圖。靈蹤沉埋。梵宇凌逼。我登經樓。東望太息。

右九華山贊

羣峰東傾。一徑東突。下視佛樓。陷同蟻垤。萬愁蒼蒼。蓋此九野。摩挲石碣。行感逝者。

右石舟厓贊卽東巖

秋氣集谷。鳴蟲不驕。露白于月。光凝九霄。三更中峰。謂天柱峯霞采明滅。飛仙人來。讖此佳節。

右摩空嶺贊

截峰成佛。剉石製虎。一松千年。栽作木主。大石自轉。枯僧不驚。謂磨盤峯半黍出定。初疑耳鳴。

右伏虎洞贊

履危無梯。怪蔓作索。緣邪瞥下。如石投壑。秋隼攬笠。飛瀑搏頰。神光驟離。骨節競響。

右金光洞贊

千盤升天。勢不獲仰。飛泉灑松。反出雲上。嶺僅三折。人經數休。林鴉笑客。多端逗留。

右三折嶺贊

黃葵離離。布滿一谷。斜暉戀之。不忍西落。白龍升天。陵陽不還。巖扃窅然。頽光若山。

右陵陽峪贊

雷欲劈樹。不知有人。電母入谷。如按驚魂。兩厓出泉。陡落萬丈。幾葉竹舟。浮來天上。

右九峰嶺贊

黃山浴朱砂泉記

余授經洋川。距黃山七十里而近。欲續舊遊者屢矣。類待良友不至。八月杪。余適有抑搔之疾。昕夕不寧。因決意往焉。攜兩門生一僕。由雲嶺西南行。蓬顆蔽路。愁霖積塗。日入甫屆湯口。又曠黑行五里。抵紫雲葦。葦據湯泉。上百步。住凡三日夕。計七浴于湯泉。而所患若失。人皆异焉。蓋溫泉有三種。曰朱砂。曰礬石。曰硫磺。礬礬皆能捐夙痼。除積垢。而氣實酷烈。久之不能堪也。惟朱砂性溫而和。涼暖適中。浴之久。可以濟神明而益年壽。然世苦不多。非地近而與山水有夙緣者。或畢世不一值焉。余得三涉于此。幸也。至浴之候。或以曙朝。或以子夜。雲埋去跡。谷斷來轍。衆響盡歇。池光自明。于是清氣溢澗。溫香出谷。芬凝髮膚。砂沁肌骨。相與涵濡久之。心志愈定。則神光屢回。此則蟬蛻之境。證而益明。羽化之期。樂無逾此。洵靈區之祕蘊。延景之上藥也。屢浴之後。神清體疲。不復更能遠陟。又念天都蓮萼。奇險之處。昔已畢歷。因與門生北歷紫峰之麓。南瞻白龍之潭。訪藥鑪藥竈遺跡。并西眺飛瀑澗。半道尋狎浪閣故址。均不出五里以外。卽返屐焉。實則今昔既殊。勤惰頓異。嶺雲瞰客。弔此衰容。山鷗蕩林。掃彼陳迹。人殊曩時之勝侶。僕亦乏往者之逸興焉。及回憩所。爲紫雲葦。則亦茅齋平而復移。石屋傾而屢築。砌蘚增綠。林花減紅。窺林之虎。深夜仍來。飲澗之猿。舊時已徙。均無復昔時之境也。門生呂培。譚正治二人。各得詩十數篇。而余僅

綴贊四首。聊以紀事云。時壬戌九月初四日也。

地之寶。龍所守。浴者褻。湮厥寶。乾隆二年。江北飢。逃荒男女。踰至。雜浴于池。未幾。大雨數日。僧有道。泉

復歸。雲青紅。池上垂。西湯嶺。東湯口。飲泉人。無下壽。

### 右朱砂泉贊

紫雲蒼。無鼓鐘。風水石。聲成宮。泉彎環。嶺壁立。夏堪浴。冬可蟄。禪志定。夢亦無。氣清明。天所都。葦背即天都峯。

### 右紫雲葦贊

石何奇。長半里。飛濤來。石或起。濤光青。潭氣黑。雲漫漫。雨工宅。霆爲索。雷爲鞭。呼龍起。雨大田。是年夏秋。徽寧數府。

旱。皆苦。

### 右呼龍室贊

雲門開。日正晝。雨霏霏。訝天漏。泉腹斷。石脇摧。迤東峰。勢益危。瀑四飛。厓半鑿。頭正仰。樵斧落。

### 右飛瀑厓贊俗名珍珠挂簾。

此页空白

## 更生齋文乙集卷第三

### 金秀才學蓮三李齋詩序

夫傷心之士。吾知之矣。于四序爲秋。于六時爲夜。爲西日之光。爲下弦之月。爲零雨。爲飄風。爲啓明之星。爲先集之霰。皆先事而生戚緒。轉境而鬱悲懷。危苦之語。出于豐腴。蕉萃之情。根于髣髴。烏乎。沉湘投汨之後。代不乏人。于宋得一人焉。曰鮑參軍。照于梁。得一人焉。曰江光祿。淹于北。周得一人焉。曰庾開府。信。唐得二人焉。曰李協律。長吉。韋常侍。莊。雖顯晦不同。通塞異致。其情一也。若吾友金生學蓮者。以功名之士。期之。而渺爾不顧。以承明著作之才。望之。亦夷然不屑。惟以傷心之士。目之。而翮爾來斯。啜其泣矣。嗟乎。是豈所望於生者哉。而生若舍此。卽無所位置。其故亦可得言焉。生饒于才。而富于情。甫當弱冠之年。兩抱中閨之感。定主簿之情。先傷療疾。就樊姬之館。已染沉疴。屢悼童烏。仍傷金雀。永朝兮永夕。銜恨無窮。九地而九天。埋愁何所。遂使霞晨月午。露晚星初。花亦寓愁。草皆銜怨。精衛有未填之海。蜀鵲無可望之鄉。駕言出遊。愁思之嶺千折。挂席以往。惶恐之灘百重。憂能傷人。事可知矣。故其所爲詩。類皆黯爾銷魂。淒其動魄。沉憂入骨。無可瘦之腰。清淚盈眸。多欲彈之血。言其格。則晨風穉黍。無其悲也。飛蓬杲日。無其怨也。白雲黃竹。無其清也。錦衾角枕。無其豔也。境地若此。又何三李之足言乎。烏乎。嗟紅萬古。化碧三年。



我倘知君誰曾解此。覓忘憂之草。庶永今生。續傷心之銘。用爲茲序云爾。

貞壽堂記

貞壽堂者。陸孝廉繼輅奉母林太孺人娛老之室也。太孺人家本閩海。世傳神繫。勝衣之歲。于焉施衿。汝南出獵。蔚此周宗。泉工慕廟。以祥孟氏。于時太夫人在堂。女君見背。服粟之饋。踵寢門而陳。蘋蘩之采。闕影堂而祀。于歸之日。女君之子均已授室。結翰之詠。邦人以謠。晨風之操。伯奇罷作。自居中閨。卽董家政。如願趨事。與紫姑均勞。便了立約。偕長鬣分役。以迄誓晝。主夜露翼掉尾。凡在鳴吠。各就準繩。冲和外施。嚴肅內秉。及大令罷歸。素持廉聲。并乏長物。文具紫蛤。無海南之珍。紡牀績筥。有鬱林之石。里門旣歸。座客嘗滿。執經問字。闕牖已盈。束脩之羊。執贄之鵝。嘗溢軒棟。爰有隙地。遂營簡園。列竹半畝。以供春盤。種魚千頭。日備文讌。怪鳥之舌。儻于笙簧。軒禽之羽。潔比雪霰。客至不速。輒呼治具。一語之外。無他及焉。儒人酌量燥濕。平進豐儉。山雌水母。珍極水陸。梁溪會稽。酒門吳越。宴本卜晝。時而徹宵。生果數種。備醉客解醒。華燈十盤。與蒼頭夾侍。客號夜半。筵移月中。非時之需。不求已具。大令及客。樂可知矣。費之所從。不復問也。蓋大令里居二十年。此樂一月。輒數舉焉。袁吉士枚。與大令爲同歲生。每詫大令家烹飪爲吳中第一。職是故矣。服髮之後。一意教子。時孝廉甫及毀齒。罄此薄產。以延名師。宵供魚殮。晨饋梁肉。十稔于茲。心力已瘁。孝廉遂以孤童。鬱爲偉器。甫及壯歲。卽升巍科。東方諸侯。招作上客。北海太守。呼爲小友。鮑

叔知我時而分金。林宗異人。庶可拜母。太孺人顧而樂之。適春秋之序已七十矣。奉觴北堂。開宴東第。亮吉與孝廉兩世交也。嘗讀後漢書范滂傳。滂母云。既有令名。復求壽考。今太孺人壽考若此。而孝廉復名滿士林。以方古人。過之遠甚。今之記貞壽堂者。非僅以祝賢母。亦一爲孝廉幸。一爲孝廉勗也。

### 題襟館記

題襟館者。賓谷先生樵署中退食之地。亦公讌之所。其地也。踞四達之衢。半塵不入。處三江之會。百舫咸通。稍離聽事之廨。別構精思之軒。仿漢上之名。據邗水之勝。奇石三面。回廊四周。高棟接乎層雲。危垣隱于修竹。無須館僮。有候門之鶴。不蒔雜木。留掃廳之松。晝接賓友。夜染篇翰。蓋官事之暇。無不居於此焉。維時海宇承平。名流輩出。由庚無塞。旁午不驚。以公事及攬勝至者。置鄭莊之驛。盈孔融之坐。李邵覘象。識西行之星。何公審音。聆南下之棹。夜半之客。寧惟逸甄日中之期。不爽前范。以是西北之彥。東南之英。有不登先生是堂者。咸若有所缺云。先生亦愛養人材。傾意賓從。有周朗之逸朋。無敬容之殘客。寒素庸至。視比于麟鸞。恢奇博收。愛同於彘鼎。執經之彥。多于三伏之星。臨書之池。仿彼半規之月。分韻卽就。劈牋若飛。振鄴都之聲。貴洛下之紙。仕宦之地。有神仙之目焉。自癸丑以來。十年於茲。先生以政舉尤異。當膺節旄。于是高齋賓僚。橫舍弟子。恐盛事莫傳。高會不再。尉亮吉爲之記。亮吉百里來遊。三宿生戀。居山謝客。草木頗諳。泛海陶生。鷗魚並識。茲不辭而爲記者。亦以誌賢人之集。上比景星名篇之傳。後成故實。

云爾。

遊天台山記

天台山者。山水清深。靈奇棲止之所也。其徑路迥殊。卉草亦別。霜霰異色。風霜態岐。山最幽者爲瓊臺。沈埋滄溟。凌歷世宙。金碧之影。見屑霄之中。雲霞之光。衣九地之表。山花抽藍。圓葉疑扇。林翼接翠。和聲同琴。樵蹤蛇紆。升降數十石。脊猱奮。回皇半時。礮果潤肺。作朝霞之紅。靈泉清心。漾夕澗之綠。雙闕峙其前。絕壑振其表。霜同剝蘚。偶印來蹤。雲與昔賢。難停去影。登陟旣疲。久坐石屋。作華陀五禽戲。乃返。最奇者。爲石梁。長不計丈。狹僅盈咫。潛蛇窺而甲悚。飛鳥過而魄墮。余齋心旣空。往志益奮。青苔十層。去履不嚙。飛瀑萬仞。來目未眩。遂休神於藍橋。嘯詠於碧澗。飛花積衣。重至盈寸。驚笋礙帽。長皆及尋。至魚鼈啖其影。而步不移。猿猱攝其神。而坐不返。蓋渾渾乎身世兩忘焉。最高者。爲華頂。此山本斜侵東溟。高壓南嶠。烏兔重疊。交輝於其巔。魚龍萬千。出沒乎其趾。于是山棲谷汲。餐松餌柏之士。無不萃焉。結茅以居者。至七十二所。類皆委形神於土木。冀壽命於金石者也。靈雨界山。春霰迷谷。余與清涼僧振屣欲往。笠飄于上。衣裂于下。隔歲櫛葉。橫來嚇人。經時颺風。險欲飛客。土人云海霧至重。卽上亦無所覩也。重以松檜拔地。振龍鸞之唵。塵霾蔽天。現蛟蜃之影。凜然瑟瑟。半道乃返。距頂尙百步耳。最麗者。爲赤城。水復注水。雲頭已穿。山仍戴山。日腳亦礙。途經百盤。望乃咫尺。施丹埤堦之上。煥采乾坤之中。晴日墮而轉紅。凍雨洗

而逾赤。遊客十憩。方臻松扃。巢禽百飛。乃屈石竇。一捨冠斗。雙橋冒虹。絳萼萬樹。疑飛仙之飯桃。元宮一區。云化人之委蛻。心神激澈。視聽凝一。而遊遂止於此矣。凡居山者五日。耳疲於聽。而鴻濛之響。萬劫不停。目倦於觀。而恫恍之形。六時屢變。手勞於牋記。而腕不欲休。心瘁於揣摩。而興不可遏。遂至揭藏經之紙。競寫紀遊。坐團蕉之僧。願傳詩訣。亦可謂方外之勝遊。塵表之奇福矣。凡宿清涼寺。方廣寺。桐柏宮者。各一夕。雨阻國清寺者二夕。所歷者爲騰空嶺。萬年嶺。寒風嶺。桐柏南峯。北峯。赤城上寺坡。下寺坡。共得詩三十首。時嘉慶□年二月十一日也。

### 遊廬山記

出九江府南門。行十五里。至新橋塘。霜花已零。湖水尙漲。又十五里。抵東林寺。樹雜絳紫。畦分青綠。峭雲盤鶴。零霞埋雅。水聲琮琤。人境淒瑟。寺殿圯已久。僅存虎谿橋。三笑堂舊址。有二斷碑臥道。則元至正中重刻唐開元二年李邕碑記。及元至元中虞集所撰寺碑也。堂基丈寬。碑石寸裂。雲去不停。客來難駐。過西林寺始飯。青浮七層。黑壓半嶺。所謂香爐峰繙經臺。及東晉舊塔也。日甫過中。渡虎谿。沿山行。林禽若梭。水碓如織。十里。度石門澗。抵報國禪林宿。僧名去凡。略有元解。本能仁寺方丈退閒者也。小憩。復陟山後鉢盂峯。峯有數巨石。徑七八丈。獐狎拒客。歷落笑人。積勢欲頽。支以弱木。漏下。返寺。堂敞延月。窗虛受風。清夢未沈。曙光已徹。去凡僧欲從至天池。千磴百回。五里九折。過白雲亭。甘露亭。諸遺址。瞰北峯九奇。

菴儼嵌眉睫。大砂磊砢。細石瑣碎。間以飛瀑。無時無聲。舍輿而步。過半天峽。徑益險澁。峯峯倒垂。石石悉立。巖號試心。洞纔駐足。復入一石門。門刻廬山高三字。明王守仁所署也。益歷九十一盤。至峯頂。有平地半畝。爲披霞亭故址。仍高低百餘步。至天池寺。舊峯頂寺也。入寺先頽天池。朝瞰上樹。殘月在潭。林花雪花。競門開落。寺西數武。爲廬山神享殿。外突出一坡。爲文殊臺。稍高。爲聚仙亭。舊所云凌虛臺矣。飯後。由寺北約行三里許。至佛手巖。掌紋羸旋。爪削犀利。巖泉從石竇中出。嶺指九天。泉蟠九地。洵奇景矣。由寺後西北。尋訪仙亭遊仙石故址。出壑森峭。沈雲鬱興。其陽則春花成團。其陰則冰柱垂尺。涼暄分於一谷。寒暑變於俄頃者焉。小憩。復上嶺。至白鹿昇仙臺。與去凡僧揖別。肩輿復東上一嶺。峻折一二里。甫至地。坪。卽殿封寺門外也。別逶迤上一嶺。較前益陡。嶺半已洶洶作聲。卽黃龍澗。自此至黃龍寺一里許。皆行深樹中。空翠沁骨。寒風襲肌。低行坎塹。恍隔人世。寺門甫開。山勢乍拓。門上卽藏經樓五間。正面西日。以境地幽曠。爰下榻焉。金輪森轉。玉宇嚴凝。非復人境矣。樹皆娑羅。高出山頂者。尙數百尺。山僧云。祖師自西域攜種來。非所詳矣。入夜奇冷。寺僧燒松明徹旦。始得就枕。五鼓起。飯數盂。迎日東上。寺僧以竹筧接泉。長至五里。泉響旣斷。峯形轉高。歷金竹坪五里。陟上霄峯。躡含鄱嶺。嶺勢直下。肩輿幾殆。又十里。逕三峽澗。入棲賢寺。山谷中紅紫眩目。波濤聳耳。憩方丈飯。又歷登影堂。舍利閣。空曠之致。與巢禽共分。幽深之景。隨潭鯉浮出。沿澗百步。至普門橋。旁卽普門菴。山與澗深。谷同雲轉。十五里。至萬杉寺。寺僧引至寺

後觀臥石上。龍虎嵐慶四帚書。旁注槐京包一行。僧指爲宋包孝肅。非也。又二里。至秀峯寺。舊名開先。卽詣黃龍潭。觀千尺瀑布。宇宙之觀。至斯而極。台蕩之勝。曾何足奇。臥以代坐。晝遂至暝。石上前明。迄本朝。人題字極多。半皆俚鄙。半復漫滅。惟正德八年李夢陽題名。尙可察識。夕卽止宿。七佛樓下。晨仍堅坐。潭側。久乃出寺。循金輪峯趾。行空翠中。十里。抵歸宗寺。則金輪峯乃寺後鎮山也。方丈僧復導至晉右軍將軍王羲之故宅。前有墨池。池測南壁。嵌宗鑑堂石刻。自宋黃庭堅。至明董其昌。共十數家。並尙完好。飯後。至寺北五里。訪玉簾泉。泉亦出山頂。與開先瀑布同。覺微瘦耳。峯同玉燭。吐燄及天。水漾珠璣。流影匝地。從官道。至南康十五里。星子縣令廣西周君吉士。已遣人遠迓。遂入城。憩一行館。周君爲甲寅舉人。來謁。久談乃去。夜將半。南康太守霍丕寶君國華垂訪。知已臥。乃去。翼晨復來。余已欲出城。塗次相值。立談一晌。始知太守乃庚子北闈同歲生也。十五里。逕回流山。至白鹿洞書院。周君已候道左。相與登洞前。眺石橋飛瀑。諸生在院者。亦鵠立相迓。并聞私語云。蘇內翰去。洪內翰來。不知可相敵否。諸生大半皆豐城人也。遂升講堂。并謁禮殿。夫子暨七十二賢。均有塑像。蓋仿曲阜孔廟所作。文翁西蜀壁繪聖賢。李渤中唐室陳俎豆。蓋山惟此一隅。不爲佛刹所占。云。飯罷。與周君及諸生別。八里。至土樓。又三十里。至吳障嶺。圓月已上。團蕉可棲。覺籬籬之席。華莞無其安。蠶鹽之餐。牲牢遜其潔矣。未曙。卽度嶺。回車與匡君揖別。十二里。至八里坡。始出山。是日雲氣陰翳。日出復沒。又八里。至九江城。前後計遊六日。若文殊臺之峭。佛

手厓之奇。黃龍寺之古樹。開先寺之瀑布。則又廬山之四絕也。所未遵者。亦黃厓及三疊泉。與蘇文忠等耳。共得詩二十六首。嘉慶□年十月望日。

青山莊訪古圖記

余以丙申之歲。奉母家居。衡門授徒。往往多暇。時則孫子伯淵。以婦病就醫里舍。相與譚讌。時時出遊。典架上之書。市樽中之醪。鄉閭憎其跌宕。鄰里目爲狂生。有佳城菴焉。爲北郭叢葬之所。王生秉玉。吳生公珍。讀書其中。亮吉樂此清幽。頻與過從。老圃相就。譚皆無稽。殤鬼分遊。客同不速。俗名三一日者。秋雨初霽。晴陽不驕。忽憶故侯之莊。爰求漁父之楫。于野謀食。無須兼珍。從僧假衣。不避百衲。笠屐之影。高參鴉巢。唵哦之聲。下駭牧豎。未及三里。則青山莊址在焉。老鶴旣蛻。青松亦僵。潛鱗已殲。溝水盡黑。萋稗生於寢室。禾黍裹其窗軒。狐兔作窟。昔爲藏嬌之區。牛羊來斯。前經宴客之所。猶憶六七歲時。園未毀之日。曾隨太宜人及親串遊焉。翡翠作屋。晴紅四周。瓊瓏斷窗。膩綠千疊。新月半缺。回廊百盤。風花過樹。鳥亦裴徊。烟雨壓簾。魚會睥睨。此一境也。旣而秋蛇緣樹。臺已漸傾。野獺瞰梁。池皆半涸。分香故姬。展夜臺之鏡。織屨遺僕。晞冬日之陽。林鶡有聲。梁燕無影。此又一境也。百牛銜索。連此奇峯。十斧臨門。摧茲怪樹。以鴛鴦之碎瓦。填魚鼈之空池。劈山榴以代薪。析海桐而作櫬。傷遊客之心。裹漁樵之足。此又一境也。遂使天山戍客。尙夢橫塘。余戍西海時蘭亭舊友。欲模曲水。平原草木。盡作勞薪。南皮主賓。半爲異物。時王君及菴僧並已

物。此又悽愴傷心之一境矣。孫君撼懷舊之念。作訪古之圖。千里寄書。屬爲之記。嗟乎。園成百歲。毀祇片時。揆厥所由。誰職其咎。聞向生之笛。慘不成聲。聆雍門之琴。泣何能已。今之援筆作此者。亦以志前遊難。再去日苦多。病叟出橘。已迷滄桑。仙人爛柯。難詳塵劫云爾。

戒子書并詩

余以年迫遲暮。不復能傭力於外。又念女曹漸已成長。回憶畢生之事。冀弛日暮之肩。郭外有薄田二頃。城東老屋三十間。使四子一嗣孫分守之。以爲寡也。則廉吏之子。尙有負薪以爲多也。則翁歸之家。或餘賜。女曹能刻苦自持。當衣食。足耳。又余本中材。不敢以大賢上哲祈女。惟早承先訓。門有素風。易衣而出。并日而食。疊遭家難。齷齪世情。忍餓讀書。先大夫之遺語也。財不歆非義。福不歆非分。處則孝於家。出則忠於國。太宜人晨夕之面命也。慎之哉。惟儉可以立身。惟恕可以持已。儉則無求於人。恕則無忤於物。況以單門而處侈俗。涼德而承世業乎。無昵宴朋。無染薄俗。無是古而非今。無陟前而忘後。毋愛尺璧而不愛修名。無畏疾雷而不畏清議。窮達本之於命。豐嗇任其所遭。如是而已。飴孫年過三十。處事尙不克平心。是女之短也。惟編校故書。尙知條理。他日或當傳吾記誦之學耳。余幼嗜六書。長而不倦。今符孫弱冠已過。涉筆便譎。又更歷十師。難成一技。學之不修。亦已焉哉。其餘幼子弱孫。則尙爭梨栗。無辨菽麥。顧念菡菊之子。縱非同生。樹蘭之門。亦均共氣。他日兄率其弟。父課其子。庶幾寒宗。毋墜先緒。夫功名之



士以身殉時。勤學之儒。以身殉古。各有所好。強之不能。在立志何如耳。形質不能與天地爭久。姓名則克與嵩華競高。植足疾流。學金石之止。鑿影巨壑。師江海之寬。勤則王霸之子。蓬頭而不慙。惰則任昉之裔。衣葛而莫恤。女曹慎之哉。夫陶令達者也。不忘於戒子。魏收涼德也。亦眷眷於遺言。吾上不敢望泉明。下不致同伯起。是在女曹成吾之志耳。又況承恩返里。已屬更生。憂患備嘗。庶謀行樂。每當朝暉入座。夕月灑窗。春樹欲花。秋林未蕓。何嘗不攜阮孚之屐。泛漁父之舟。東眺郭門。西尋村墅。南湖樂其浩渺。北阜陟其高寒。挈伴以出。行歌以歸。但使入曾元之室。酒肉尙陳。過言子之廬。誦聲不輟。願斯足矣。樂何如之。今雖聞雞而起。尙擬著書。秉燭以遊。仍書細字。然墓草已綠。鬢絲不元。素心之友。蔭鬼燐而見招。同氣之親。出柏根而相望。鬼者歸也。歸其真宅。庶有時矣。自念生雖無似。然不見屏於里閭。不見譏於長者。蹤跡徧於九州。姓字鐫於五嶽。官不達而齒胄以之爲師。祿不加而問字豐其所贄。詩文至五千首。撰述至三十種。門生義故百人。著錄弟子三百。窮老盡氣。韜精斂魂。終此天年。從親地下。以此貽女。不亦多乎。伊維我祖。於歛始遷。中河之橋。賃舍在焉。我之始生。賃廩之左。水何清命。桑亦婀娜。他時築樓。署曰生我。其生也瘁。其死也休。下壽六十。吾又何求。或有所求。厥惟允嗣。後望百年。上承奕世。墜緒茫茫。曷哉小子。九垓之內。人同蛾多。不自僂力。資生則那。東鄰歌鐘。北寺擊鼓。嚴霜入門。響亦淒楚。人以爲歡。我以爲苦。欲貽子金。我不爲盜。宦而巧取。較盜尤暴。鑿楹有蠹。穿徑有螢。益人神知。照我汗青。療貧之術。不出戶庭。

# 更生齋文乙集卷第四

## 遊武夷山記

夫五嶽之外。復有勢凌星辰。氣絡垓宇。規重溟以爲郭。蓄滄海以爲池。智計之士。思慮所不及周。濡豪之儔。摩擬所不克肖。其惟閩之武夷乎。山之得名最早。重嶺未闢。奔鯨避其威。八神乍萌。乾魚肅其祭。而且圓則九重。不足包其外。苗裔百世。不足盡其緒。圓則不包。則煉石以補之。苗裔不盡。則張樂以讌之。蓋巨山喬嶽。未有天象昭著。神理嚴肅如此者。余以□寅八月。得成茲遊。沿塗雨零。到日雉霽。以月之十八日。鼓棹入山。謁沖祐之觀。禮幔亭之神。而魑魍據其宮。灌莽沒其脊。陰翳荒寂。有足感者。偕此勝侶。憇乎頽垣。金粟一樹。豔侵銀河。羊燈百盞。光導兔月。是日沿嶺望大青師。小青師。玉女峯諸勝。暝色已上。遂泊舟第一曲。之水光厓宿焉。蒲帆接天。桂棹沒水。響礮碾而磴磴。夢蕭蕭而寥寥。疑登天中。非復地上。夜色未殘。枕與雲接。零露欲下。波同雨飛。蓋明霞未殮。而蠟屐又御矣。舟移至第二曲。振鳥上嶺。盤石磴百級。凡歷數佛刹。正望天樞峯。無路可上。爰易棹而進。則玉女峙其前。虹橋亘其後。虎嘯突其裏。香厓裂其中。經松緯杉。背魚面鳥。目鉤奇於雲表。心索幻於瀾際。挾奇而來奇。迥出於素念。抱虛以往虛。更廓於靈臺。是日或舟或步。徧歷仙人橋。釣魚臺。接笏厓。仙人掌。雲寮泉諸勝。或上征而絙絕。或下瞰而波騰。裂石藏霧。

奔厓礙斗陰巖百盤。頑仙積其遺蛻。陽谷萬仞靈霄暴其神丹。見所未見者。亦元之又元矣。斜景炙衣。絕  
 壑當面。飛鳥礙跡。遊踪忽騰。百步黝黑。疑穿黃泉。一成朱丹。已上赤巘。途披兩厓。亭號一覽。捫舌指暖。餐  
 飈腹寒。卽土人所謂天遊菴也。是晚舟宿第六曲。復緩步至金雞社。則缺月已上矣。明發更早。澄波愈寬。  
 山光慘青。天宇淡白。不愁霖而霧。不閃電而雷。昏霾三折之嶺。墨染九回之水。逮聞齋鐘。方抵星塢。五方  
 之語。雜出蜃墟。八垓之形。錯浮蜚舶。九曲蓋至此畢也。回棹甫發。玄雲轉暝。壁日慘慘。弔影叔圭之厓。黃  
 雲離離。匿跡仲晦之室。然復賈餘勇。臻乎茶坪。訪避秦之源。覓季宋之蹟。草黑百步。花明七盤。疑浮邱之  
 再來。歎季札之觀止。憩錦雞嶺。桃源洞。伏虎厓。司馬泉。及乘臯禪林者久之。復迴棹至第一曲。晦谷復明。  
 霧徑稍霽。遂沿嶺至止菴。復古菴。紫雲洞。並久坐大王峯下。峯蓋武夷主峯也。鴻濛未開。元氣仍鬱。絕  
 巘冠斗。危峯瞰霄。栢檜蟠其根。風雲出其腹。蹤皆斜行。目怯正視。山僧汲寒泉之英。烹蒙頂之葉。并出繭  
 絲。以索蟲篆。二鼓。移棹出曲。宿盤珠巖下。夜半卽起。顛蹶上嶺。涼飈揭冠。暗水冒袖。十步五步。鷗鼻搏影。  
 前岡後岡。蟋蟀攢響。夜氣沈澗。涼蟾滿山。破曙。甫抵盤珠。上征之途已窮。下嶺之石悉起。僧宇未闢。頽然  
 臥階。日月交影。金碧炫乎層霄。山川霽顏。林嵐聳其殊態。俯仰偃息者久之。遂復高下石折。石腹之鐘。甫  
 聞。東西屢迷。天心之菴乃出。盤巨石。歷奔澗。已往而復。似續忽斷。目迷乎曲折。口倦於咨詢。逮夫途窮。適  
 與舟合。則已離原泊處十里。出九曲之外矣。是遊也。遵途者百程。居山者四日。晴雨晝夜。條呈眉端。幽深

靈奇。疊嵌方寸。桂棹所入。代筇屨之疲。風帆旣懸。無雨笠之苦。入波愈深。升嶺益峻。此則五嶽四鎮。無由兼川陸之奇。八域九州。獨此擅燥濕之勝。爲人外之靈境。域內之大觀。蓋蹤迹所至。足冠乎平生。而東南之遊。亦止於此日矣。是日行抵建溪。是爲記。

### 遊南湖記

南湖者。南江之委也。自漢以來。南江不能至。山陰入海。遂匯爲此湖。與丹陽石臼湖等通。桐水亦入焉。潏洞千里。微茫百重。蘋蓼荇藻。青浮一州。梅梅棕櫚。綠積萬狀。巢波則盈丈之鱗。細至徑寸。南湖出針魚穴岸則百斛之蚌。微而么麼。五色之鳥。時浮鏡中。同聲之禽。或囀雲外。圓浪衝漢。驅凌日星。方波撼山。振動林木。魚鼈層累。以淪漣爲梯。麤螺沈浮。藉瀉沫作屋。游鱗東西。或生世而不值。水族巨細。亦恃強而互吞。雲霞朱丹。時出波底。雷電赤白。咸飛水心。或夜半金碧。知朝暾之升。或日中青黃。識靈雨之集。衣食於南湖北湖者。至數千家。然詢其層湖之深淺。壩岸之廣狹。卽終老於此者。亦不知也。蓋陸有定界。州縣以之區分。波難割圓。蛟蜃因而越軼者矣。余以丙寅三月中旬。偕友人來遊。食宿於湖者二日。晴雨雜出。風雲杳冥。絳蘂白絮。爭飛一林。黃麗紫剪。雜囀百步。釣岸有得。卽供晨餐。傍舟所撈。云待夕膳。兒童驚其嘯詠。鹿豕訝其淹留。距岸十步。狂思揭衣。離橋數尋。響已拍枕。不速之客。無算之爵。日之夕矣。夜如何其。穿徑出筇。足供朵頤。驚濤落魚。助此饗餐。飛雨踵至。將沉席帆。殘蟾忽升。時颺竹笠。神燈翔乎影外。鬼語出於橋心。

忘世之侶。能全其性。天朝宗之魚。以此爲渤海。有聲無形之禽。怪響時出。由波達岸之獺。跛形可嗤。雖止二日。而晴雨晝夜之景。罔不備焉。迨乎回舟。已接新霽。童冠之樂。云當暮春。祓除之期。剛展十日。鬪草船尾。湔裳水濱。萬鱗窺蒲。百翼映樹。雖皆遠人。疑若送客。於是泛山陰之樽。摘水陽之稻。櫻桃紅而餉客。玫瑰豔而登席。叩舷而歌。擊楫以往。有不知儀度之脫略。神致之飛越者焉。同遊者。爲涇縣胡孝廉世琦。宣城貢州倅。及門旌德呂文學培。而亮吉爲之記。

答章徵君天育書

西台徵君足下。昨歲比屋而處。每一念及。欣然過從。及相隔百里。此樂遂不可再。庶幾稽亭之龍。行雨至彼。江岸之鯉。沿流及斯。或得藉申契闊耳。又聞足下遭伯兄之戚。值邱嫂之喪。辦當篋笥。以襄窀穸。儉不廢禮。哀至則哭。足下之境。何其戚歟。獻歲發春。麻衣似雪。想更匿跡里門。弔影蓬徑也。然益恩雖逝。小同漸長。家本義門之冑。室有禮堂之書。中閨雍穆。無敬通之悍聲。童稚笑歌。饒粟里之樂事。秋燈課讀。春花助裝。歌北門之詩。夫豈交謫。闕南向之牖。欣然含飴。亦足以慰岑寂。忘世態矣。來書云。小學六書。時時從事。懾何如之。足下旣下董生之帷。專沮誦之業。精心字惜。留意聲詩。僕又恨近日學者。呂登陸譔。字林無新舊之別。子慎李虔。通俗味正。續之殊。甚至雍熙新附。混作召陵之編。安南釋名。淆入祭酒之籍。則聲音訓詁之不講。未有甚今日者也。足下昆季。才皆過人。但吹壺之暴。曾少逝梁之遊。鼓瑟之點。偏饒舞雩之

樂一則面壁百日。方烝烝而皇皇。一則鼻亭一隅。轉泄泄而杳杳。嗜好或不同也。秋仲聞鼓鵲洲之棹。鹿鳴而來。老蚌出珠。光先照乎百步。鰕生剖玉。價迺逾於十城。得之者無心。賞之者有目矣。又承詢兒子。飴孫近狀。已令索金門之米。寫蘭臺之書。微祿尙需。衰親可養。然老不自量。顧欲受童蒙之書。壯而欲行。轉使謀升斗之糈。足下得毋笑其老諍乎。比作六書轉注錄。及比雅聲類等。均已告成。不日返延陵之臯。觀弔屈之舸。榴火塞徑。蒲英蒲觴。海燕拂檐。江魚入饌。惜不獲與足下共耳。飽食讀書。相見不遠。此啓。  
奉政大夫刑部河南司主事候補員外郎李君墓表

嘉慶十二年七月日。刑部河南司主事候補員外郎崑山李君。以疾卒於里第。越□年□月。將葬。遺孤存厚等。以表墓之文爲請。余與君同舉順天試。知君最悉。爰不敢以不文辭。謹按狀。君諱以健。字建人。一字淞漁。晚又號蔭薌。先世出宋忠定公綱。十三傳至字愛泉者。自無錫遷居崑山留暉門外。繼遷縣東南之尙書浦。遂世爲崑山人。曾祖國學生緝熙。祖歲貢生惇。皆以都轉君貴。並贈中憲大夫。長蘆都轉鹽運使。父都轉君世望。自爲諸生已有名。由辛卯科進士。歷官刑部郎中。雲南迤南湖南岳常澧分巡兵備道。調鹽法長寶道。擢長蘆都轉鹽運使。所至咸有循聲。人以爲君之學行官位。均可以繼起云。蓋君之幼也。爲大父贈君所賞。而外大父配京君有知人之鑒。亦奇愛之。出通德之里。爰名小同。授彭祖之經。先知大義。時都轉君尙爲諸生。家計甚窘。君時隨母夫人寓外家。距所居數十里。歲時省覲大父母。以買舟多費。常

徒步往還。曲渚鼓棹。時遇西陵之風。危塗褰衣。或阻北嶠之雨。君不以爲苦也。少卽嗜學。長而益純。百氏  
 旁通。五行並下。片善可紀。卽服伯淵之膺。三時或疲。先焯子若之掌。其勵學又如此。君之長也。色養則無  
 間。晨昏程藝。則有聲學校。時都轉君已舉本省鄉試。主淮安麗正書院。未幾卽成進士。官京師。君並隨侍。  
 靈輒之餓。翳桑宦遊不輟。卞和之別楚國。獻玉益勤。蓋君是時已省試。連報罷矣。遇旣滯留。業益精進。至  
 乃屏絕人事。寄居蕭齋。披衣搆藝。則每趁晨鐘。升屋讀書。則時隨落月。至庚子。甫舉順天試。其失之也。人  
 呼趙壹之冤。其得之也。衆賀公孫之第。蓋爲諸生時。已爲海內所屬望如此。逾年。卽聯捷禮部。歸進士班。  
 銓選。時都轉君以特膺簡在。出任監司。由六詔而三湘。自分巡而都轉。其在長沙及天津也。君皆隨至。任  
 所。喬卿之在親署。不見一人。掌武之侍節樓。克襄百度。人以爲君經世之略。馭衆之才。並權輿於此云。君  
 之服官也。始選山西汾陽縣知縣。爰以書生。遽膺劇邑。然而彼汾一曲。譽已播於三河。此水東流。化偏敷  
 於西土。君尤嚴誣告。時警奸徒。赤口不騰。墨尿歛迹。縣東鄉地勢洼下。每遇夏潦。輒成巨浸。君以禹貢行  
 河之法。師叔敖泄水之方。水患遂絕。巡撫蔣君肇奎。於屬吏中尤契重君。遂奏調鳳臺縣。薛宣無害。官從  
 粟邑而移。魏戍不貪。獄上梗陽而定。蓋君至是治聲益著云。未幾。入爲刑部河南司主事。君旣佐爽鳩。尤  
 嚴害馬。然豐下之相。本殊乎削瓜。持平之心。不嫌乎刺骨。時值辦首逆劉之協一案。殲厥鉅魁。寬其脅從。  
 蜀郡之平米賊。蔓不使支。典午之勦水仙。波難再沸。大學士尙書並契君。擬令總辦處行走。而君以都轉

君年邁。遽爾引歸。朝野惜之。以爲未竟其才也。及君之居里也。始則承歡。繼而奉諱。哀毀過禮。藝祭竭誠。營大夫之廟。籩豆恭嚴。過京兆之阡。松楸益整。而且薛焚債券。仍無市義之心。周集哀鴻。爰動哲人之譽。讌宗之什。升自風詩。寄妹之書。傳於雷岸。加以元伯死友。留須巨卿。子敬積貲。先推公瑾。蓋自君居里。而一方頌德。百廢俱興。文翁之修禮殿。像亦顯圖。魯郡之發懸書。壁難暗竊。他若修神廟之檐楹。創講堂之灑掃。尙不在此例也。余所見士大夫居里。能爲一方實心任事者。黔西李恭勤公世傑。無錫秦都轉震鈞。與君而三云。秉命不融。斯人長逝。春秋僅六十有一。嗚乎哀哉。存厚等將以明年□月□日。葬君於某鄉之某原。君配顧宜人。子四人。存厚。國子生。候補光祿寺署正。培厚。附貢生。候補太常寺博士。徵厚。早卒。皆顧宜人。生。增厚。尙幼。妾周氏。生君。所著詩文集若干卷。並藏於家。嗚呼。昆岡之玉。遭炎火而焚。秦柱之雲。值疾颺而墜。遂使巴湖減色。虞浦無聲。過南武而傷懷。逕北山而隕涕。草沒亭林之塢。傷耆舊之云亡。兩荒傳是之樓。悵藏書之誰讀云爾。

繡餘近草序

若有人兮。夢落雲中。居懸海上。偶拈愁句。輒寄三天。不畫修娥。迥如初月。掩卷靜思。念鸞鶴之侶。啓戶遙矚。挹龍魚之奇。繡餘近草者。非復尋常女士所及矣。憶其生自海虞。來歸滬瀆。王謝家世。烏衣悉知。童蒙賦詩。青鳥代誦。臨水鑑影。媪嫗知其不凡。當春詠花。尊親嘉其明悟。蓋高世之格。有見於生初者焉。又生



擅奇福。獲配嘉耦。有林下之風。無天壤之歎。相莊之下。時復歸寧。迢迢七夕。既無阻於星期。明明百里。曾未憂於河廣。此其所以幸也。然而高明之室。鬼瞰其貧。多女之門。盜屏其迹。罄倉中之粟。雀鼠生愁。遊釜底之魚。魴鯉聚泣。熊羆之夢不兆。鷓鴣之翮仍斂。此其所以愁也。若其詩格。則又可言焉。夫中閨之所云才者。不過椒花一頰。柳絮片言。卽以名滿古今。豔傳中外。今則萬言述志。百首抒懷。早已軼彼士流。并不慙於作者。又且衿室之女。殊抱隱憂。丹山之禽。時揮奇采。颯颯乎有身世之感。具民物之憂焉。暇日一編。屬爲之敍。夫僕也。早交臣叔。忝據輩行。曾主騷壇。雅同臭味。授而讀之。未嘗不歎其語之奇。采之麗。不覺爲心折也。他日言旋言歸。永朝永夕。賭圍棋於別墅。侍絲竹於東山。得值晏閒。置之几案。則僕也。雖無擲金之聲。庶可質安石之坐云爾。

答胡孝廉世琦書

得手書。知別後訪六朝之山。過百花之巷。隨潮東去。逐雁南來。尋香佛樓。采藥僊徑。幽居一句。蠟屐欲碎。曲巷半夕。驚梭忽投。可云豔播白門。韻流金屋矣。繼又聞無知故鬼。亦愛新人。挈此楮錢。來趨錦被。足下此時。得無作長人之前導。爲土偶之蹇修乎。此則花開夜合。定許同遊。詩唱秋墳。或當聯句。此事得之於施上舍。未識信否也。自僕之歸。既悼遺簪。復遭竊鐵。窗扉半折。篋笥一空。青氈不留。金粉零落。所謂燎原之後。加以焚林。嚴霜之餘。復此密霰。嗣以出弔東郭。遂遊北山。過漁父之居。陟樵風之徑。西墅讌客。南屏

訪僧紅林薰天晴碧涼醉素月下嶺環蒼若眠持螯歷句黃綻指爪鬪茗百度青浮眼光甫乃返棹本州憫災故里盈前赤地絕不生禾滿眼青蟲偏能害稼僕縱傾篋中之俸搜甕頭之粟無濟於事稍竭厥誠然而晨無糶粒鷄不來前暮乏積儲鼠皆遠竄蓋已從事枵腹難快量飽矣急欲抵貴郡者了文史之案免素殮之譏但空齋兀兀絕少讎朋深閣迢迢并無巢燕短狐射影來自鳩茲妖禽顛聲半出鵲岸泮林之梟未變蒙楚之葛堪憐如是而已回憶壁浪挂席浮觴上巘元暉故宅銀杏巢鳥謫仙危樓畫壁匿魅士龍笑疾險墮急灘樂天醉吟無畏狂樂蓋三十句之內六百里之中似此樂者亦罕矣何時合并方快紆鬱彼此諒同不更多及

志事將竣與寧國太守及諸同事書

不晤足下者越一年矣此回僕抵宣城志事已刊至十分之四聞底本皆自蕪湖發來改竄處極多未知盡足下所定否竊有未喻者數事敢更質焉一則府縣次序本朝憲綱與前代不同宣城附郭下卽次以南陵者元明兩代之憲綱也宣城下卽次以涇縣者本朝之憲綱也元明之憲綱以元明二史地理志爲據本朝之憲綱以本朝大一統志爲據若康熙中府志以及吏胥文移案牘尙沿勝朝舊例未經改正者固截然不紊者也今以南陵縣生員一訴呈遽移南陵在涇縣上矣是曲畏刁生之健訟不難移昭代之章程此未喻者一也人物如懿行宦蹟數門不輕采錄最爲得體然事必慎之於始未有今日批准明日駁回批准者旣或由私囑駁回

者亦未盡叶輿評。徒使朝令而夕更。未必昨非而今是。此未喻者二也。冢墓中同一贈將軍也。乃登耿宗元而刪葉遇時。二大一見府志。一見縣志。同一侍郎也。乃登張守道而刪徐沛如。以爲采訪冊不足信。則乾隆十八年之志。亦由采訪而來。況又有非采訪冊而亦刪者矣。又入本朝以來諸臣冢墓。旣載及梅氏兩代封翁矣。而諭祭賜諡之梅文穆。卽不葬本鄉。亦須注明所在。而今亦略之。此門按語有云。自乾隆十八年以後。采訪冊悉不足憑。是因現在之生人。讐及冢中之枯骨。且此次續修者。續修乾隆十八年以後事也。今自職官選舉諸門以外。一切槩從其略。則新修府志何爲乎。此未喻者三也。循史中載寧國令范傳眞。是矣。然何以令寧國而得修南陵之堰。則唐宣城郡之地理與名宦傳不可不合勘也。文苑中欲登唐詩人張喬。是矣。然何以家南陵而又附入池州之籍。則唐武德中之沿革及人物志不可不並校也。此皆近在志傳。而亦懶於搜稽。此未喻者四也。山水諸門。係僕所纂者。頗欲正前人之失。不致傳後代之疑。其考證各條。略具苦心。皆還實據。今乃不察由來。半從刪改。執筆者旣以不狂爲狂。主修者亦遂將錯就錯。是同事欲泄一時之私忿。竟忘其爲六屬之官書。此未喻者五也。學校之金石。有登有不登。官廨之廢興。有載有不載。甚至宣城缺新建之祠。旌德削俞公之廟。涇則縣丞廨宇亭脫見山。旌德則主簿衙齋堂。斐景呂。升降任心。去留隨意。此未喻者六也。祥異各志。營建諸門。於舊志皆照本抄謄。甚誤者亦略無改正。何貴重修。是名爲愛古而薄今。實則儉安而自便。此未喻者七也。封建則挂七而漏三。大事則記一而忘兩。流俗之

傳疑則信之。正史之明備則略之。此未喻者八也。刊工雖集於宣城。而底本則來於樞署。局中總修分校諸人。皆若有不得預聞者。遂至一卷之內。前後逕庭。半部之中。各相矛盾。而奉行者又復過當。以爲自蕪湖來者。無一字之可更。自局中定者。無片言之足信。此未喻者九也。虛設總修之號。翻爲衆怨所歸。況足下旣取獨斷而獨行。又何須羣策而羣力。加以官事孔繁。高齋少暇。足下旣假他人之手。以代辛勤。他人亦卽假足下之名。以逞威福。以致物論沸騰。人情駭阻。此未喻者十也。他日告竣之時。尙望於編纂內削去賤名。何敢於弁首中復加拙序。倘以爲微勞可錄。片善必登。卽希將鄙人此書。及與同事諸君書。附入卷末。備芻蕘之獻可矣。

此页空白

# 更生齋詩卷第一

## 萬里荷戈集

八月二十七日請室中始聞遣戍伊犁之命出獄紀恩二首

暫離三木卽身輕。忽綴元戎後隊行。那彥成尙書奉命往陝西軍營參贊亦于是日率京兵啓行。天上玉堂虛想像。道邊金甲尙縱橫。

預知前路應長往。從此餘年號更生。穩臥側輪車畔好。員扉幾夕夢難成。

已作孤兒三十春。道旁今更泣孤臣。全軀自感君恩厚。對簿偏忘獄吏尊。人笑冷官權法網。天教熱血灑

邊塵。受知兩度真逾次。未散館卽簡任學政及入直內廷皆屬異數。敢向閑中惜此身。

蘆溝橋口占贈張吉士惠言并寄同館諸君子

張君本同里故交。今歲五月余蒙恩派教習庶吉士。張君適在其內。執弟子之禮甚恭。余不敢當也。其

餘諸君亦竝絡繹出送致贖。故作此致意云爾。

春明門外駐征輪。簪笏同來唁逐臣。我視黃州已僥倖。綴行相送較情親。

出嘉峪關僱長行車二輛。車箱高過于屋。偶題一絕。

持燈行三更。鞭屋行萬里。削雪正欲烹。一星生釜底。

出關作

半生蹤跡未曾閒。五岳遊完鬢乍斑。卻出長城萬餘里。東西南北盡天山。

抵玉門縣

萬餘里外尋鄉郡。

余家郡望敦煌

三十年前夢玉關。

余弱冠時在天井巷汪宅課甥。曾夜夢至天山。詳見所著天山客話。

絕笑班超老從事。欲從遲

莫想生還。

安西道中

萬古飛難盡。天山雪與沙。怪風生窟穴。戰地絕蓬麻。野戍年將換。穹廬日不華。仍從候人問。恐有路三叉。疏勒泉

一水懸天上。遙知疏勒泉。浴波童類鶴。剗岸屋如船。齒髮衝冰墮。功名煮弩傳。從戎本吾願。前路莫澹然。安西至格子墩道中紀事

我行發安西。十日五停軸。疲蹤本思憇。所苦乏室屋。兼之山萬仞。不貯水一掬。狂風飛牛羊。往往集空谷。三更寒霧重。馬足植如木。乞火爇束薪。言依囊佗腹。

此日風候嘉。殘漏行百里。荒荒紅一綫。日出土囊底。嚴程原有限。沙磧從此起。來從天山頭。去向天山尾。沙深行旅斷。見客心輒喜。泥漿藏破匱。到口甘若醴。飲馬投百錢。喧聲尙難已。

偶逢陳世昌。曾令楚邊邑。殺賊爲賊縛。荷戈來百驛。三歲得減徒。庶幾歸有日。班荆相慰藉。反致淚嗚咽。一妻前被殺。兩子致殘疾。生還雖可樂。奈已乏家室。東望嘉峪關。中懷慘如結。林鳥大如犬。兀傲不避人。攫肉翔道旁。足蹴十丈塵。居民半焦黑。人鬼固不分。出穴競往來。半雜鷄與豚。樸被何處棲。爬抉沙石根。不然升高原。廟古依土神。

### 天山歌

地脈至此斷。天山已包天。日月何處棲。總挂青松巔。窮冬棱稜朔風裂。雪復包山沒。山骨峰形積古誰得窺。上有鴻濛萬年雪。天山之石綠如玉。雪與石光皆染綠。半空石墮冰忽開。對面居然落飛瀑。青松岡頭鼠陸梁。一一競欲餐天光。淞林弱雉飛不起。經月飽啖松花香。人行山口雪沒蹤。山腹久已藏春風。始知靈境迥然異。氣候頓與三霄通。我謂長城不須築。此險天教限沙漠。山南山北爾許長。瀚海黃河茲起伏。他時逐客倘得還。置冢亦象祁連山。控弦縱遜粟騎霍。投筆或似扶風班。別家近已忘年載。日出滄溟倘家在。連峯偶一望東南。雲氣濛濛生腹背。九州我昔歷險夷。五岳頂上都標題。南條北條等閒耳。太乙太室輸此奇。君不見。奇鍾塞外天奚取。風力吹人猛飛舉。一峯缺處補一雲。人欲出山雲不許。

### 進南山口

一峯西來塞官路。峯頭一峯復回互。人疲馬嬾亦少休。雲外飛橋落無數。山坳路古盤如綫。卻向林梢瞰



遙甸一片伊吾曉日華。黃金世界中現。

下天山口大雪

危峯北去高無際。過嶺風聲水聲異。鞭梢拂處險接天。風勢吹人欲離地。千峯萬峯迷所向。意外公然欲相抗。雲頭直下馬亦驚。白玉闌干八千丈。

松樹塘道中

馬定知人意。穿松屈曲行。漸忘遷客感。足慰看山情。閱世心俱寂。聽泉夢亦清。林威丈人約。何日許將迎。松樹塘萬松歌

千峯萬峯同一峯。峯盡削立無蒙茸。千松萬松同一松。榦悉直上無回容。一峯雲青一峯白。青尙籠烟白凝雪。一松梢紅一松墨。墨欲成霖赤迎日。無峯無松松必奇。無松無雲雲必飛。峯勢南北松東西。松影向背雲高低。有時一峯承一屋。屋下一松仍覆谷。天光雲光四時綠。風聲泉聲一隅足。我疑黃河瀚海地脈通。何以戈壁千里非青葱。不爾地脈貢潤合作天山松。松榦怪底一直透。星辰宮。好奇狂客忽至此。大笑一呼忘九死。看峯前行馬蹄駛。欲到青松盡頭止。

菩薩溝道中

天山南北口。百里積冰雪。歲晚不逢人。牛羊伴除夕。

山隅一兩家。早已閉門宿。空明北斗光。穹廬代然燭。

齒髮能旋里。應知亦主恩。時值有江西減徒回里者帶同戍人齒髮歸里仍憐異鄉久。魂怯玉關門。

此水酌一滴。永清人世心。臨流莫相照。聞說鬢毛侵。

廿八日抵巴里坤

南山高瞰城。下復裂深谷。巉巖千丈堞。排齒入山腹。晴天飛雪霰。卽已沒車軸。陰寒中人深。肩背苦瑟縮。千年留戰地。往往鬼夜哭。年殘風益暴。客至裹重幄。燈火集一城。宵驚燭光綠。

除夕巴里坤客帳祀先

昔日公孫瓚。臨岐祀北邙。澗然感先德。忘卻在殊鄉。燭借穹廬火。牲求牧澤羊。荒寒一甌雪。聊抵奠椒漿。除夕夜坐

世緣應已盡。夢亦不還家。別有關心處。偏忘去路賒。幾行墳樹影。千疊隴雲遮。他日能歸骨。從親傍水涯。鎮西元日

兩日松塘走急程。亂雲開處出邊城。奔馳萬二千餘里。來聽鄰雞第一聲。殊方都喜說新年。板屋斜欹彩勝偏。一事暫教鄉思緩。家家門巷有秋千。

逢人入關卽寄胡安西紀謨楊靈州芳燦莊邠州斫錢華州拈四刺史

何處能尋遷客蹤。車箱眠已過三冬。聊烹太古荒寒雪。盡洗平時磊落胸。人說更生同子政。我慚行殯學山松。心交海內今餘幾。呵凍裁書手自封。

覆車行

風漫天。雪逼夜。匹馬隻輪。馳至山下。驚沙撲馬。馬忽奔。削徑倒下。先摧輪。車箱壓馬。馬壓人。馬足祇向人頭伸。身經竄。逐死非枉。只惜同行僕。无妄。驚魂乍定。忽自疑。奔車之上。無伯夷。

肋巴泉夜起冒雪行

北風排南山。山足亦微動。寒光亘千尺。壁立雪若衝。車箱沁肌骨。清絕無一夢。更殘欣出穴。飛白壓衣重。百里僅數家。山房疊成蝨。相將依爨火。漿濁感分送。人氣亦少蘇。無如馬蹄凍。

人日白山道中

三載逢人日。驚心客鬼方。謂在貴州學使任。今來遷客夢。仍阻亂山旁。莽莽沙如雪。勞勞鬢已霜。居人能尙義。猶

饋束脩羊。逆旅主人子將授經。屬余爲分句讀。

自白山至噶順

嚶嚶蕭蕭徹五更。狗亦不吠雞不鳴。車箱縮項凍欲死。誰復料理征人行。忽然破屋晴光出。湧得天山一輪日。疲羸嘶風馬亦奮。踏雪兼程到噶順。

發大石頭汛

天山界畫分半空。白雪自白雲光紅。馬蹄斜上雪飛盡。衣袂飄入雲當中。連峯中斷郵亭壞。此是奇台鎮。西界平沙日午捲。北風數點牛羊落天外。

烏蘭烏素道次

烏蘭以北地不毛。極視千里無秋毫。窮荒鳥亦拙生計。啄土飲雪居無巢。居人覲面能欺客。獸復欺人占居宅。健兒彎弓射不得。空手歸來氣填臆。

初八日乘月行四十里至三個泉宿

人煙百里何渺茫。疲羸獨行古戰場。高天下地總一色。明月白雪分清光。拂眉時有山禽過。清歎聲高野禽和。三泉屈指尙半程。我倦欲從雲外臥。

古城逢立春

短轅車逐短衣人。萬里來尋塞上春。識路未應呼老馬。岐塗先已泣孤臣。雲邊一笛驚殘夢。天外三山伴此身。肯把障泥容易澣。就中猶有帝京塵。

鷹攬羝行

一山巉巖忽裂口。千羊萬羊出其竇。羊羣居前牛在後。鷹忽飛來攬羝走。羣羊哀鳴牛亦吼。北巷南村集

羣狗鷹攫羝飛勢偏陡。雲中健兒弓已拓。一箭穿雲覺雲薄。羊毛灑空鷹爪縮。天半紅雲尙凝鏃。牛觸冰行

天山十丈冰稜大。牛角觸冰冰欲破。牛向冰稜窟中墮。馬車西來不能過。三馬曳牛牛尙坐。道旁田夫添十個。索曳牛蹄角先挫。須臾冰陷牛方出。一角已從冰上折。牧童驅牛不敢叱。更裂氈裳裹牛血。夜抵木壘河

到得山村夜已迷。窗櫺全不辨東西。狼馴似馬憑鞭策。鵠大于雞共樹棲。穴鼠岸然欺客睡。墜猿時復雜兒啼。峯峯塞路誰能究。只覺檐前北斗低。

早發四十里井寒甚。路人有墮指者

極天惟有雪。萬古不開山。祇覺雲生滅。從無鳥往還。路人傷墮指。遷客屢摧顏。倘有攀躋處。思排虎豹關。元夕過阜康縣七十里宿黑溝

君恩應已重。不敢更思鄉。卽此逢元夕。先忘在遠方。話愁惟對影。與僕互傾觴。兒女雖相憶。何由識阜康。黑溝步月

邊庭昨日已東風。寶鴨頻添雪乍融。一晌春人夢魂賦。焉支坡上月先紅。五家村裏獨裴回。奇絕峯巒面面開。三百橐它燈一盞。夜深偷渡黑溝來。

安濟海夜起

夜闌安濟海。波焰燭天紅。迥異雲霞色。都疑神火烘。松杉開嶺末。烏鵲繞圍中。待得雞頻唱。關門日始東。

自烏蘭烏素至安濟海雪皆盈丈十餘日不見寸土因縱筆作

烏蘭烏素迄安濟。十日見天不見地。有時天亦被雪遮。天與雪光原不異。惟交日午與月午。日月破空光獨麗。阜雕如鵬排齒舞。黑蜨象龍交角戲。雙峯獨峯駝背闊。三角乙角羊頭細。家牛漣乳酪尤厚。犍雉作羹膏過膩。冰厓條爾超百仞。雪窟不須分四季。狹哉豎亥東西步。笑絕唐虞朔南暨。漢家亦僅開張掖。惹得控弦益無忌。何如聖世中外一。并斷匈奴左邊臂。南庭北庭幕已空。陽關玉關門不閉。二千餘年方拓壤。三十六國皆請吏。尤欣棲畝盡軍食。不爾闢疆虧國計。溫都斯坦布魯特。退木爾沙哈拉替。修眉羅刹久作汗。戴角博羅都號比。羣驅羊馬作互市。從此番回悉衣被。賜之瑰麗手加額。日以酋豪頭戴髻。昆侖去天纔咫尺。日月藉此相隱蔽。金銀臺殿誰得過。我欲乘風縱遊轡。渾河入地波乍洌。熱海逼冬泉亦沸。山傾西北悉破碎。河界天人此分際。張騫鑿空乃得到。伯益蹠實何其諦。荒寒近始遭抉剔。神妙誰能復思議。元霜更在昆岡外。手握龜蛇出人意。只憐我亦老史臣。振筆欲增西域記。會看拓地過西海。不使羣生有殊氣。閩船已具千百艘。宛馬益多三萬騎。寒門銅柱親勒銘。功德高于百王帝。

贈呼圖壁巡檢沈仁澍

如何遠宦經三徙。君從闢展調署濟木  
薩丞又調署呼圖壁僅比流人近十程。同向瞭高臺上立。欲從何處望江城。

三臺阻雪

北風吹雪入鬼門。風定雪已埋全村。村人鑿穴透光景。百尺稜稜瞰樓頂。燒松作炭雪不消。反使石穴全身焦。征人停車已三日。雪穴驚看馬牛出。平明一綫陽光開。烏鵲就暖皆飛來。征人欲行馬瑟縮。冰大如船復當谷。

發二臺

看山不厭馬蹄遙。笠影都從雲外飄。一道驚流直如箭。東西二十七飛橋。

行至頭臺雪益甚

天山雪花大如席。一朵雪鋪牛背白。尋常雞犬見亦驚。避雪不雷雷與霆。幾家房廊陷成井。百丈青松沒松頂。警驚一騎去若飛。雪不沒髀風生蹄。東風乍停北風起。驅雪松濤十餘里。松柴燒赤老瓦盆。奇冷更變成奇溫。

蘆草溝

蘆草溝邊路。茫茫日欲昏。堅冰截南北。空白合乾坤。馬避千人集。雅啼獨樹村。車箱夢疇昔。聊足慰羈魂。伊犁紀事詩四十二首

城西乞得暫勾留。到日將軍派居城西別墅中。何止逃喧亦避讐。只覺醫方有奇效。閉門先學陸忠州。

橐筆頻年上玉墀。虎賁三百笑舒遲。書生亦有伸眉日。獨跨長刀萬里馳。廢員見將軍例佩刀長蹕。

環碧軒中祟不迷。僅餘風柝雨淒淒。固知此老迂難近。絕勝宵分咒準提。余寓齋相傳有魅。全太守士潮居之。每爲所翾。夜分輒誦準提。

咒。然不能禁也。余未至前。數日鄰童夢魅已移去。

到日先傳領督催。無端堂帖復追回。余到日初派督催處行走。後又改派册房。閒心檢點流人册。根觸西川御史臺。余檢點舊

李玉鳴年貌册。故及之。

熟客先驚問姓名。記曾躍馬入咸京。當時書記疎狂甚。親屈元戎作騎兵。謂張總兵廷彥。余辛丑歲客西

導至曲江。鎖看花。

誰跨明駝天半回。傳呼布魯特人來。牛羊十萬鞭驅至。三日城西路不開。布魯特每年驅牛羊及哈拉

已分從公老牧羊。門生家世本敦煌。金丹五百題容緩。臨行屬篆金丹五百字。先獻麻姑禁酒方。房師王荔園先生

以軍興法先遣戍伊犁。在將軍署課讀飲酒時或過量。故末語規及之。

畢竟誰驅澗底龍。高低行雨忽無蹤。危厓飛起千年石。壓倒南山合抱松。伊犁大風每至飛石拔木。

日日衝泥掃落苔。一條春巷八門開。鼓樓北有八家巷。屋宇街道極修整。外臺自有蕭閒法。謂廉使德泰乞余書

說餅來。方兵備受疇製餅極佳。與廉使對門。每邀余飯。則兩人合治具。



坐來八尺馬如龍。演武堂高夾路松。謫吏一邊三十六。盡排長戟壯軍容。四月一日。隨將軍演武場。角射時。廢員共七十二人。  
鑿得冰梯向北開。陰厓白晝鬼徘徊。萬叢燐火思偷渡。盡附牛羊角上來。冰山為伊犁。適葉爾羌要道。常撥回戶二十人。日鑿冰梯以通。

人行

古廟東西關廣場。雪消齊露粉紅牆。風光穀雨尤奇麗。蘋果花開雀舌香。

城隅兩日霽寒威。韋曲詞人尙下幃。謂韋大令佩金。趁得南山風日好。望河樓下踏春歸。惠遠城南有望河樓。面伊江為一方之勝。

幽絕城西半畝宮。古垣迤北盡長松。危樓不用枯僧上。罔兩時時代打鐘。西城外有古廟。常白晝見罔兩。迷人無敢入廟者。

百輩都推食品工。剪蔬饒復有鄉風。銅盤炙得花豬好。端正仍如路侍中。同里趙上舍炳。先以事戍伊犁。今館于綏定城。食品最工。燒花

豬肉尤美

甌脫宵寒忽異常。行轅門外橐它僵。堂期縱過天中節。明日仍冠骨種羊。將軍一月內以二五八為堂期。諸廢員咸入辦事。又伊犁夏日

即換季後每天寒則仍帶暖帽。

遊蜂蛺蝶競尋芳。花事初紅菜甲黃。只有塞垣春燕苦。一生不及見雕梁。春燕皆巢土室中。

一卷平臺紀事功。十年循吏說宏農。楊廉使廷理。曾官臺灣。知府。預平林爽。文等著平臺紀事二卷。時屬余。點定廉使在閩中。最有政聲。便同海外奇書讀。

腹痛還思邴曼容。內有紀晉友湯大令大奎死節事。

城西連日雨昏黃。急溜先傾羊馬牆。夜半老兵驚起叫。阜鵬如虎撲人忙。

萬死方來西海頭。別司鎖鑰領兜牟。時張太守鳳枝南中老守疎狂甚。尙憶東風燕子樓。太守有一妾留及之。

將軍昨日射黃羊。親爲番王進一湯。時哈薩克王子以承襲王爵來謝因照例設宴百手盡從空裏舉。更憑通事貢眞香。外番以藏香爲

貴有所敬則獻之。

芒種才過雪不霏。伊犁河外草初肥。生駒步步行難穩。恐有蛇從鼻觀飛。伊犁南山下有異蛇一種遇騾

腦髓馬遇之無不立死。

黃泥牆北打門頻。白髮來辭喜氣新。謂開鎮臺九紘以前四月奉恩旨釋回至四川軍營効力卻買鮮魚飼花鴨。伊犁鵝鴨必以鮮魚飼之乃肥商量

明日餞歸人。

伏流百尺水潺湲。地勢斜衝北斗垣。高出長安一千里。故應雷雨在平原。伊犁地形高出西安八百餘里。

生羌一月病彌留。夜半魂歸戶不收。忽變驢鳴出門去。郭橋何似板橋頭。二月中有生羌居北關外將死忽變爲驢惟一足未化人皆見之。

偶選龍媒貢上方。萬蹄如鐵剖河梁。驂騑盡解如人立。環拱將軍下角場。

鶉鴣啼處卻東風。宛與江南氣候同。杏子乍青桑甚紫。家家樹上有黃童。伊犁桑甚極美白者尤佳。

疊臣百計遣秋光。學圃年來寢有方。蒔得菊花三百本。歸家亭子宴重陽。歸方伯景照善蒔菊每

窮荒連月有恩綸。邊雨初晴塞艸春。昨午北郊迎詔使。分明捧日兩黃人。純皇帝升附詔使到日。雨霽。余隨將軍出北郭恭迓。

怪風時起撲燈蛾。舊燕巢欹鼠作窠。蒸得春蚊大如斗。南山溼霧入簾多。

老饕到此已無緣。且減常餐汲井泉。十日齋廚冷于寺。故應蔬味勝腥羶。

達板偷從宵半過。箏琶絲竹響偏多。不知百丈冰山底。誰製齊梁子夜歌。夜過冰山者。每聞下有絲竹之聲。又聞有唱子夜歌者。莫測其

奇也。

籬豆花紅薜葉班。時時約客話更闌。齋廚百品多嘗徧。惜少山雌入食單。陳巡撫淮食品絕精。聞秋冬間燒雉尤美。惜不及食之。

山溝六月曉霞蒸。百果皆從筵上升。買得塔園瓜五色。温都斯坦玉盤承。果子溝至六月百果方熟。伊犁北郭外滿洲駐防塔章京園內

有五色瓜。温都坦製玉盤盃等極精。伊犁亦有之。

偶向尊前學楚歌。天涯誰識故人多。郎官湖水清如鏡。絕憶三更放棹過。癸卯秋。余自西安歸。過漢陽。族姪聖也。邀余夜遊郎官湖。時廉

使德泰為漢陽守。亦在座。余已不記憶矣。及至此。廉使話及之。

五月天山雪水來。城門橋下響如雷。南衢北巷零星甚。卻倩河流界畫開。四月以後。即引水入城。街巷皆滿。人家間作曲池以蓄之。至八

九月始涸。

戟門東去水潺湲。山色周遭柳作垣。日昃馬行三十里。納涼須駐會芳園。會芳園在綏定城。總兵署後極幽爽。

待得城樓月欲升。竟攜茶具就書燈。九朝舊事無人聽。只有西廳老郡丞。同知哈豐阿性嚴冷。與滿漢官無一合者。惟最重余。又留心

國朝舊事。以余歷直內廷諸館。頗諳掌故。每夜輒撓果餌等物。就訪乞。余爲說九朝事蹟。恒傾聽不倦。

結客城南緩步回。水雲寬處浪如雷。昨宵一雨渾河長。十萬魚皆擁甲來。

伊犁河魚極多。皆無鱗而皮厚如甲。陳巡撫寓齋。獨盛有五色如盤者。蓋江西所攜來之種。疑

一句胡蝶已成團。便擬開筵宴謫官。攜得百花洲畔法。種來鬻粟大如盤。

分日宴客。

積雨冥濛路不開。巉峴歷盡始三臺。萬松怪底都相識。曾向童年入夢來。

雪深纔出玉門關。三月君恩已賜環。贏得番回道旁看。爭傳李白夜郎還。

行抵伊犁追憶道中聞見率賦六首

嘉峪關前夕霧收。布隆吉後曉星浮。馬毛作雪明千里。龍氣成雲暗一州。冰谷對床聲乍噤。火山當戶汗

仍流。平生每厭塵寰窄。天外如今一舉頭。

黃羊如織馬如梭。託命三更有駱駝。關展尾疑通地穴。巨靈手竟握天河。松杉條爾垂行幄。魍魅居然避

荷戈。行到路歧偏認取。卅年前記夢中過。

背可施鞍鼻可牽。衆生疑鬼亦疑仙。地幽古佛皆穿耳。月朔新蟾已抱肩。

初一日即見新月。

厄魯特魚紅有影。俄

羅斯馬白無邊。流沙萬里傳書少。且續夷堅海外篇。

總是非非想處來。見聞無用更驚猜。人如混沌何嘗鑿。天似鴻濛乍欲開。日月偶搏空外影。塵沙都認劫

前灰山魍獨足蛇岐首。盡咒征夫去不回。

烏弋烏孫視陝西。九天九地判高低。下飄鬼國須浮楫。上瞰神霄若有梯。湯谷沸波今未改。寒門標柱古誰稽。流聞何止征和碣。伊犁相傳有張鶩石碣徧訪未之見尙詡倉公四目題。

莫笑書生一召弓。置身十萬健兒中。雲烟氣總歸西海。弧矢音皆中北風。跡隸伍符慙百戶。階崇都護壓

三公。

將軍位在蒙古王公上

逐臣自問難酬德。且學張騫事鑿空。

附題萬里荷戈集諸友人詩。以得詩前後爲次

黃聘三閩縣

忠言讜論壯朝班。能得君心忽解顏。臣罪當誅寬斧鑕。聖恩過厚賜刀環。賈生猶待三年召。韓愈何曾百日還。青簡留題光奕奕。明良聲問重如山。

韋佩金江都

莫作逐隊鴉。百千爲羣散風花。須爲鳴岡鳳。忠孝會使文章重。投書樞府帝曰吁。容臣愚。不殺軀。覽書丙夜帝曰俞。鑒心孤。戌名除。嘉慶五年閏在夏。擊鼓鞞鞞詔書下。將軍轅門馳匹馬。趨跪當階聽宣赦。西海九死臣。伏地不起放聲悲。堯仁覆載廣。舜哲日月輝。遭逢如此隕無恨。豈在一人留與歸。作餞不爲君設酒。折贈不爲君折柳。聖人解網羣生宥。中外騰頌主恩厚。道旁感嘆泣稽首。

陳 淮南丘

結托十載前。已識才如斗。何期故鄉人。翻遇雪山口。諫艸動萬言。樸誠真不朽。直有回天力。堪稱救世手。鎔經與鑄史。莫不欽抱負。荷戈來伊江。閉門斷詩酒。雷霆間雨露。總沐主恩厚。既不受人憐。豈肯隨人走。委心任去留。東歸瞻馬首。煌煌天語頒。一德洵非偶。以上三人同在伊壘成所。

顧 掞金匱

天祿藏書幾費詮。逍遙暫作地行仙。先憂早裕昇平業。後會都成歡喜緣。域外扶輪推大雅。馬前揮筆著新編。銘留御座輝煌甚。片札應同刀劍傳。

張騫碣下拜恩殊。聖德如天重碩儒。文字直堪追漢魏。遭逢更喜邁韓蘇。吟懷朗映三秋月。飲量汪涵萬頃湖。他日廬陵訂詩史。可容祕演學浮屠。時成烏魯木齊

楊芳燦長洲

蘭山話別各傷神。浩蕩冰天逐雁臣。幸免若盧收杜衆。還愁樂浪竄崔駟。孤蹤判作長流客。溫語旋迴絕塞春。開盡桃花消盡雪。兩行紅柳送歸人。雞竿詔向九天頒。鄭重君恩特賜環。傳到好音先破涕。懸知小別未催顏。朝搜斷碣窮沙磧。夜聽清笳度雪山。萬里只如庭戶近。軺車聊當採風還。

上書慷慨豈沽名。願效涓埃答聖明。宣室舊曾徵賈傅。讜言今已念班生。親知預擬聯裙屐。邊徼行看洗甲兵。見買夫須營釣艇。滄江穩臥頌昇平。

湖山佳處儘相羊。蟹舍魚邨認故鄉。築室且教泥水蔽。著書合付子孫藏。羈魂恐尙依銅柱。溫都斯坦有堯時銅柱。相傳塞外人死者皆歸之。如中國之岱宗云。歸夢時應到玉堂。愧我浮沉銷志節。白頭顏駟乞爲郎。

莊 旻武進

聖主由來宥直臣。投荒旋見作歸人。重逢隴首飛黃葉。此去江南采白蘋。飲酒無多消歲序。吟詩何益費精神。扁舟我亦如張翰。相訪城東月色新。

曾 燠南城

聖主求言量獨宏。謗書宣示舉朝驚。竟將忠愛憐蘇軾。不許公卿害賈生。絕塞烏頭三月白。歸裝駝背一編輕。旁觀猶感君恩重。何況親爲雪窖行。

孫星衍陽湖

秉燭論心已有期。尊前霜鬢認依稀。我傷駒隙三年速。君自龍沙萬里歸。折檻風流成盛節。埋輪心事有危機。曩在山左。幾爲附朝貴者所中傷。不知此後方元白。可仗文章定是非。前尊詩有偶讀開成太傅詩七年。我亦長微之之作。故此句及之。

趙懷玉武進

青楓林外擬招魂。此日居然入玉門。詔下已聞伸士氣。身留何以答君恩。可能詩酒捐狂態。想見妻孥拭淚痕。氛祲未消雲漢皎。時久幾人封事爲時論。早

錢伯坻武進

山峻嶒兮薊劣。雪瀰漫兮際天白。朝不見日出兮。暮胡然而止息。荷戈者誰子。度沙漠兮。不知其幾萬里。莽寥廓兮寄生死。落彼大荒。竄跡牛與羊。大府特兀凌穹蒼。旌旗雲日。刀劍光。將軍使相曰中堂。中堂屹然坐堂皇。叱聲階下走。小臣帖身受。汝何獲罪聖天子。天子宥汝以不死。但當蟄伏窮三冬。敢擧詩酒號寒蟲。翰林卑躬執廝役。帶刀跨馬前趨風。皇輿隆覆載。此日西域界。是罪人所徙。西盡日所矚。張騫鑿空疑不到。鄒衍空談九州外。間搜聞見落中華。地志山經補其隘。忽然中堂宣拜舞。丹詔煌煌奉天語。賈生仍遣洛陽歸。小臣涕泣紛如雨。是能先幾翊萬幾。且將座右箴其辭。大哉王言詔中外。八荒共慶天無私。昔年身向圖中去。關門一閉入朝天路。今日生還作畫看。謹誌君恩不忘處。歷聖相承二百年。吾鄉清節幾人賢。妙筆生涯拓君手。畢幼安高士也。實寫此圖。壯哉斯圖洵不朽。

楊嶠谷武進

六合誰能賦。千秋獨占難。高岑纔塞上。燕許只臺端。更關詩中界。還馳域外觀。書生空胸縮。武士但糾桓。健者今詞伯。風騷主敦盤。臚雲登上第。起草擬如干。葑菲辭誠過。芻蕘慮畢殫。無私天鑒近。不殺聖



恩寬慷慨行何畏。頭顱亦早拚。壯懷輕萬里。祖帳揖千官。遠戍提長戟。輕裝衣短襦。雄關出嘉峪。中土隔騰蘭。赤陂陰常饑。平沙井亦智。大風掀濤濤。古雪積巒岈。險阻勞筋骨。荒涼沁肺肝。只疑天欲盡。不道路猶漫。所仗惟忠信。如飛得羽翰。烏孫傳舊部。虎將築新壇。乍到名編籍。先驅背負簫。空房鎮宵魅。軍府對南冠。履尾凶將唾。吞羶強勸餐。愆尤悔山積。感激涕洟瀾。舞劍霜華滿。聞笳月魄闌。敢懷歸井邑。長夢侍金鑾。豈料烏頭白。真嘯黍谷寒。炎峴分玉石。集泮別鴛鸞。特旨從原宥。危言策治安。賜環裘葛換。匹騎往來單。雙足重添跼。千山慣據鞍。自來原鐵漢。服食謝金丹。定遠生仍入。終軍吏不攔。眼中風景舊。歸後髮膚完。慈訓三遷里。才名百尺竿。胸全羅列宿。腹稍露琅玕。威鳳終巢閣。孤鴻已漸磐。菱荷裁野服。桑梓結清歡。庭草觀生意。漁磯息怒湍。親朋爭問訊。尊酒話團圓。佛國追成紀。荒經好補刊。若非身自歷。誰信語無譚。博異前賢少。瑰奇後代看。惠潮皆內地。小謫笑蘇韓。

楊元錫陽湖

黃沙莽莽無行迹。玉堂仙人碧霄謫。天山積雪沒馬蹄。一萬里去陽關西。長鞭搖搖入雲去。繞袖濃雲若披絮。怒龍鬪雷騰半空。蒼鶴攫人飛上樹。二事皆集中記所見一峯行盡復一峯。奇句題徧峯峯松。松濤嵐翠蕩胸臆。咳唾珠玉隨天風。天山盡處軍容重。曉謁轅門氣先竦。投筆能教壯士驚。請纓都訝文人勇。山中魍魅怒侮人。鍵戶瑟縮潛悲辛。同時遷客皆開讌。問訊爭來誠君面。邀月空憐太白杯。微吟欲築望

鄉臺楓林青塞雲黑。五更笳管腸千迴。殊方寧望生還路。玉門不信春風度。一道恩綸天上來。萬人感泣成甘澍。羨君出關復入關。匹馬仍復過天山。峯峯松雲若相識。馬首青山向君揖。添得長刀短後衣。川集生向玉關吹笛入。折檻曾憂直節難。賜環旋荷主恩寬。桂叢未老黃華綻。待得歸人酌酒看。故人握手驚且喜。快讀新詩搔首起。天生奇境待奇才。抉透靈光筆端使。吾謂才華學問雖絕倫。不若獨乘至性歸貞純。機聲燈影少年事。比鄰早羨樓頭人。君少時隨太夫人居外家樓上。與余比鄰。曾作機聲燈影圖。萬言伏闕直聲震。必于孝子求忠臣。一時風骨如君少。孤隼凌秋羽毛矯。長安冠蓋去復來。諸君袞袞奚爲哉。崐崙山高接西極。妙手圖成挂齋壁。和君萬里荷戈詩。醉臥牕前看山色。

莊宇達陽湖

雨露雷霆次第過。閒身始得返山阿。故園快把初衣遂。小謫榮於畫錦多。寫入丹青傳大漠。編成詩卷當章莪。直開邃古鴻濛界。那數陰山敕勒歌。萬里輪蹄疲雪窖。孤臣心事挽銀河。履危欲坦顛軫道。出險迴思灑瀨波。噩夢儘教游汗漫。壯懷難仗酒消磨。請纓畢竟書生志。不是封侯使荷戈。

孫詔上元

身到金鰲最上峯。人間還種碧芙蓉。三年使節歸雙闕。一疏危言動九重。才子文章原慷慨。聖朝進退自從容。抽簪不比長沙謫。閒拄仙山綠玉筇。

黃郁章 題昌

去歲長安中。說經當破屋。請業席縱橫。過午啜齋粥。仄聞罪言上。衆口譁不足。晨趨視行李。空庭烏啄木。追送踰國門。聞已單車促。驚沙翳盧溝。佇立傷遠目。男兒得罪去。身在已爲福。不知途路遠。寧惜毛髮禿。絕漠事耕種。揖讓非殊俗。行矣甘白頭。飽餒太平粟。而乃高厚恩。矜全天語獨。投荒未百日。歸及塞草綠。竄死固踰分。生還竟何速。海內幾交游。感嘆同一哭。我行到江南。問訊屢躑躅。昨逢曾大夫。示我書累幅。塞外天蒼茫。鐙前墨滲漉。又見先生筆。措目再三讀。定知再造身。安心侶樵牧。村童及鄰叟。招要趁秋熟。嗟余迫行路。未共離樽續。寄詩隔江湄。遠勝招魂玉。

陳文杰 錢唐

青海西頭咽暮笳。詔書萬里許還家。行周地角輕秦隴。赦出天恩陋漢槎。小謫夢隨金闕遠。生歸魂悸玉關遮。閉門自有名山業。珍重文章蔚國華。

陶渙悅 上元

卿月光照草萊。桂花迎客已全開。自攜塞北新詩至。爲訪江南舊雨來。落紙雲煙多古趣。驚人著作本仙才。秣陵佳味葍鱸美。好對秋風共舉杯。

已治安求益治安。賈生獻策瀝忠肝。桐孤眞比臣心直。海闊何如帝量寬。諫艸傳來荒服遍。封章收上

御屏觀聖朝。赦過開言路。似此遭逢古亦難。

霜冷窮荒草盡斑。身騎匹馬出重關。獨由絕徼難行路。飽看中原未見山。一片丹心昭盛節。九重恩詔許生還。江湖切莫耽閒放。轉瞬除書紫禁頒。

積水潭邊荷滿池。秋藤花下酒盈卮。京華春好詩中記。悅在京師屢陪讌集有詩紀事塞外風寒別後思。蘇軾愛君膏史重。朱雲折角聖人知。望公丰采還如舊。萬里行歸鬢未絲。

張問陶送寧

無詩無酒氣縱橫。誰指伊吾問死生。萬里風沙悲獨往。舊時李杜愧齊名。是非終向平心得。毀譽徒勞衆口爭。落日安西凝望遠。浮雲難掩故人情。此首送出關作

窮荒一夕返驚魂。天遣春風度玉門。有詔傳觀褒諫草。無人申掾見君恩。全焚詩筆留心血。重製儒衣想淚痕。小別經年歸未晚。殘秋高枕夢江邨。

徐鏞慶金匱

才名落拓誤儒冠。醉著新書擬治安。抗疏已招時輩忌。謂平邪教疏投荒還幸聖恩寬。龍沙地古人煙少。虎帳天寒道路難。絕塞寄書愁不達。朔風涼雪祝加餐。

遭逢堯舜際昇平。忽謾狂譚四座驚。甚欲致君嗟乏術。須知涉世忌孤行。萬言書本違時用。三代人原

戒好名。他日朝廷思汲黯。春雲回首鳳皇城。

劉嗣綰武進

一紙書來笑絕纓。班超已復動歸程。龍鱗肯恕孤臣死。馬角終邀絕塞生。天上本無私雨露。山中還有舊柴荆。歸時好濯江流足。聞道銀河昨洗兵。  
惠遠城西萬里鞭。主恩到處總如天。長沙漫泣遷來傅。太白真呼謫後仙。聖世漁樵原戀闕。清秋蟹稻好歸田。登高准備茱萸酒。便有洪厓共拍肩。

蔣業晉吳縣

諤諤昌言動九霄。平生風義士林標。羅胸列宿窮三史。抗疏孤臣答兩朝。荒徼賜環天子聖。家山拄笏碩人遙。好賢不待蒲輪賁。有客欣開石室招。謂寧國府譚君設學仿紫陽書院幣聘相招。

汪爲霖如皋

談笑天山匹馬馳。讀書不愧是男兒。十年我見先生晚。一片心惟聖主知。塞月蒼涼隨遠夢。秋笳斷續入新詩。生還復恐除書到。未許江干理釣絲。

王豫丹徒

語罷月沉水。江濤忽怒飛。不緣明主詔。那許直臣歸。白髮悲青鏡。丹心戀紫微。朝廷留正氣。吾道豈終

非。

荷戈君遣後。近覺直言稀。君遣後。上諭廷臣曰。自洪某遣戍。無以君德民隱。上陳者。得毋以洪某爲戒乎。卽下旨放回。天語真堯舜。王心判是非。直教臣節愧。不負布衣歸。正值憐才日。終難臥釣磯。

吳嵩梁建昌

一疏居然動聖明。同時申救少公卿。窮荒天許重磨盾。請室心猶望洗兵。正氣三更銷鬼燄。邊愁萬里入笳聲。孤臣垂死恩難報。不願人傳敢諫名。

春風吹入玉門關。天上金雞詔特頒。五月雷聲傾雪水。一梯雲影度冰山。神魚擁甲隨潮滿。龍馬如人立仗閒。留得新詩光萬丈。夜郎爭看謫仙還。

陳蔚青陽

侃侃陳詞迴不羣。高岡鳴鳳振朝曛。上書自謂同劉偉。移副何嘗異李雲。此日更生逢聖主。當時欲殺有將軍。荷戈萬里詩篇富。西域江山盡助君。

釋清恒焦山

一棹乘風過海門。千秋事業喜重論。長歌絕塞詩人福。卽賜刀環聖主恩。不殺眞能容直道。忘身始可得危言。而今暫與焦仙約。只恐天書下九關。

釋達瑛攝山

目窮西海歸東海。到處名山已盡探。正恐欲閒天未許。不妨暫借與茅庵。

又以下及門

呂培旌德

古人求忠臣。是必于孝子。讀書苟有得。家國一理耳。先生起孤貧。中歲乃筮仕。思親不能報。盡瘁供職使。詞臣兩抗疏。惜不作御史。刑官據成律。奏上擬殊死。巍巍聖人恩。幸免肆都市。出門卽荷戈。去去行萬里。先生愛遊山。崑崙插雲裏。先生校輿圖。絕域接天尾。何須博望槎。海已過安濟。長吟猿夜啼。慘淡塞烟起。洪河文思闊。葱嶺筆峯峙。冰雪悟餘光。風沙闡名理。盥誦每一過。孤懷緬朱李。

陳壤青陽

萬里輪臺縹緲間。迢迢車馬出秦關。探窮星宿源頭水。題遍崑崙界外山。諫草至今留御座。詩篇自昔滿人寰。盤根錯節寧無意。大任將肩豈等閒。

譚正治旌德

一片金戈鐵馬場。挺身原不計冰霜。詞臣舊慣鸞坡直。謫吏今趨虎帳旁。萬里外圖時勘校。卅年前夢未荒唐。此行敢爲先生惜。只斲天山債已償。

黃沙四起朔風吼。萬仞雪山迎馬首。批鱗不殺投新疆。狂直緣知聖恩厚。書生此去學荷戈。天語傳來誠耽酒。手疏猶縈聖主心。頭顱豈落將軍手。崢嶸壯志銷不得。搖筆精神益抖擻。黃沙青海入唵鞍。毳帳旂牆歸墨藪。嶺海欣逢吏部韓。沅湘快得儀曹柳。百日方周卽賜環。選秀剔奇愁未久。暫從西域歸東海。小挫亦知終大受。君不見。丈夫勳業高星斗。豈獨文章垂不朽。

陳 塾青陽

呂 璽旌德

似此遊方壯。身危氣不磨。夷堅窮地軸。博望溯天河。鳥道千山折。龍沙百日過。從今校圖說。時辨古人說。

汪 瓚旌德

月朔先舒月一鉤。望鄉客上望鄉樓。投荒漫作中原夢。此是西南天盡頭。莫作烏孫戍卒看。十年長見侍金鑾。天山百丈冰和雪。尙念瓊樓玉宇寒。

呂偉標旌德

奇山奇水酷相思。勘徧方輿卅載時。應恐較圖遺塞外。天教萬里走焉支。中壘文章冠漢京。石渠天祿校讎精。先生前後相輝映。不愧齋名號更生。



于澗丹徒

昨返南湖棹。來尋西海菴。先生昨從洋川書院回。卽至焦山避暑。要隨雲共宿。不與佛同龕。蓬島頻年住。河源一昔探。讀公詩百首。何異啓瑤函。

譚時治旌德

已束傳經帳。何期出漢都。歲已未。家祖延至書院。課經。後以入都奔國。卹不果至。心惟天子諒。詩創古人無。鏡硯藏行篋。關山入畫圖。喜今趨鹿洞。一一指前途。

譚貴治旌德

萬里沙場外。孤臣匹馬過。死生冰雪裏。呵凍尙高歌。探遍天山境。詞人幾輩迎。生還恩渥厚。足慰著書情。

曹景先績溪

平生學業尙淹通。解詁居然並馬融。聚米圖知詳地域。生花筆更奪天工。萬言削牘人爭誦。謂征邪。教疏。五字堅城客敢攻。文苑儒林兼獨行。問誰能繼此宗風。

# 更生齋詩卷第二

## 百日賜環集

庚申又四月廿七日特奉恩命釋回感事紀恩四首

出關無別念。止有首邱願。何期聖人恩。特敕返鄉縣。將軍塔下九叩頭。微臣之命天所留。上慙螟螻下螻蟻。百計無能報天地。

壘臣七十人。臣罪最不赦。寧知未旬日。先已詔書下。一人泥首百衆隨。塔下鼓德聲如雷。命輕恩重無所惜。挺劍終南殺殘賊。

虞翻作逐臣。一世未賜環。縱有骨肉親。不敢期生還。聖恩直與天地參。投畀有北仍歸南。鶴鷓怪啼魍魎笑。此客入關真再造。

五月始生魄。送者盈北關。捆載戚友書。代致閭里問。入關一日走一驛。計到江南上三月。茲還夢想所不及。到日閉門先感泣。

將發伊犁留別諸同人

如天聖主沛殊恩。料理投荒未斷魂。一體視猶同赤子。十旬俗已悉烏孫。詎留齒髮歸銅柱。西去卽鄂羅斯。相傳有唐羅

堯時銅柱上鐫寒門二字西域人死者魂氣皆歸于此如中國之岱宗云真戴頭顱入玉門他日荷耒農事了築廬先畧海西村

嚴鼓三聲曉漏收將軍營外引纍囚此生不料能歸骨萬死無言祇叩頭常擬帶刀同佩犢何曾投筆學封侯渾河橋畔春波闊一輩羈人望未休

別惠遠城

下馬步出城百步屢駐腳長刀短後衣未忍卽拋卻  
逐客縱已歸猶念未歸客今宵路岐夢分道向南北

瑪瑙斯龍鬪雷行

雷欲飛出山石忽逼雷住龍神復驅石橫截雷去路龍施水法雷火攻水影火影懸當空水火燄燭星辰宮忽然雷奔龍亦走龍旁小龍突張口奪得雷輪大如斗雷神歸山訴失守

綏來縣

十里一戍樓無異畿緊赤山城忽橫亘云以界西北關門白髮吏日昨適上值椽微襄要務奸宄亦專責車旁勤問訊藉以驗名籍其餘童僕馬無不視清冊長吏出郭迎吏驚竄無迹招邀驛亭坐先已具朝食官賢誠念舊一一訊遷客不知經年來添得幾相識離家萬餘里百事宜自適諄諄意良厚共話移晷刻客去始閉門林陰正西直

呼圖壁

一日渡百河馬力亦已疲。星光瀉空灘。懸溜復四飛。豈惟乏纖鱗。波急草亦稀。渡旁茅屋中。燈火已出扉。騎馬入土城。夙與仙尉期。佇聽鄉井談。藉以慰渴饑。兼聞徐南昌。時同年徐大令午亦納贖將南歸先時理征衣。倘得合

伴歸。百驛庶不迷。語盡夜已闌。當窗警晨雞。

二十日抵烏魯木齊那靈阿州守顧揆熊言孔徐午三大令頻日致餞即席賦贈三十韻

我為東海臣。罪重謫雪嶺。前行望西海。祇隔八達頂。聞言潮洶洶。已備閩越艇。窮商咸裹足。此道實荒梗。

來時冰萬丈。去已孕桃杏。投荒雖百日。屈指萬千幸。疊臣先未到。幕府業奏請。國書三百字。引例悉嚴整。

狂愚乃至此。不殺不足警。余未到時總統將軍已具清字摺密奏稍蹈故轍即一面入奏一面正法磨刀營門前。到日即延頸。鼓嚴方喚入。長

跪氣先屏。厲語若震霆。官皆上持梃。歸來荒屋下。閉戶匿形影。時時語僮僕。恐不待朝景。皇恩寬厚往。

返不俄頃。倘非如天德。未免汚湯鼎。同官接踵賀。喜極代咽哽。珍羞羅中丞。陳巡撫方伯邀說餅。歸方伯微

生仍懼禍。觴至代以茗。離城三十里。馬尚不敢聘。旬時經精河。庶獲保要領。脫身豺虎穴。足甫踏人境。自

來以東方設郡縣與軍台稍異明明天與日。再得見公等。前時覆尊罍。前至此斷飲今此復酪酏非云肆荒宴聊記受恩

立時徐亦奉文將歸況聞寬大詔。悉欲洗尤眚。昨讀諭旨以京師甘霖普遂令九死客。一一返鄉井。兵先清隴蜀。

盪滌到河穎。災黎都踊躍。羣盜命合併。巖廊固無論。耕鑿亦清靜。東歸理春田。彌覺化日永。此意告故人。

故人應早省。

將至滋泥泉汎雨

未來滋泥泉。風色忽十丈。南山青數點。龍已抉雲上。排頭盡如瓮。勢欲穿疊嶂。須臾雲腳下。牧豎指所向。冥濛半犁雨。谿水未及漲。洶洶南溝頭。牛羊尙奔放。沿村拾新麥。打鼓雜俚唱。車箱徐徐眠。北斗挂客帳。四十里井汎。

四十里井間。祇有十家住。十家汲井過。併向麥畦注。麥肥如野菽。飽食耐征戍。耕餘了無事。間或插桑苧。遂令半里間。夾屋無雜樹。南山團作障。三面塞去路。時有歸墟人。穿雲白如鷺。

三臺夜宿

峯巒南北途千曲。天半亂霞烘馬足。山程九十到未遲。覓得山村最西屋。綠莎窗開波影搖。酒渴我尙餐山桃。夜闌殘月僅一綫。紫燕白鴿爭歸巢。

未至吉木薩二里見賽神者絡繹不絕時劉二尹之芳亦出城相迂因作此以贈

彩旗彩勝從空墮。滿屋春人賽神坐。賽神已畢跨馬忙。十里紅袖沿春塘。城東出城愁不及。爭上城樓向西立。鐘魚聲中角聲響。馬上人皆避官長。

廿九日發古城巡撫伊江阿大令阮曙竝馬送至水磨閣茶話乃別

出城聞泉聲。到閣復數里。逶迤岡四面。雲向水中起。濛濛萍藻綠。水鳥浴未已。曲處響始奔。驚流出潭底。人栽沙果好。都入北窗裏。板屋止兩層。高瞻忽迢遞。殷勤相送客。門外尙餘幾。揮馬去不停。林長久延企。奇臺訪同里。張縣尉潮海。

一刺字半滅。長鬚方叟叟。縣尉赤足來。窺門忽呼號。前月流人來。今月流人返。聖恩真如天。來去僅旦晚。飯我屋正中。浴我堂北箱。百斛塵土盡。陡然餘清涼。主人雖至誠。留客已不及。三更出東城。持燈上車急。道白山口取小南路往哈密。

一山傾欹一山斷。宛轉前行入螺旋。山頭雲氣復四飛。人行忽如蝨綴衣。行完百里無一家。荒宗井乏棲林鴉。黃羊上嶺客登樹。相望遙遙徹天曙。是夕人馬依高樹下宿。

道中遇大風避入山穴半响乃定

白山之東絕椽瓦。間有土房人亦寡。雲光裹地亦裹天。風力飛人復飛馬。馬驚人哭拚作泥。吹至天半仍分飛。一更風頽樵者喚。人落山頭馬山半。

將至七箇井宿

日腳欲下雨腳酣。半嶺草色同江南。山坳一道去如綫。卅里外人皆覲面。霞光天半色若頰。新月竟與斜陽爭。星光延回日光暝。一道彩雲生斗柄。

朝發七箇井雨

初陽甫出山。絕壁忽挂雨。馬行益奮迅。踏破雲萬縷。濛濛戈壁暗。行及卅里許。我僕穿徑來。提壺挈筐筥。陰厓巢老鶻。猛志欲攫取。征人思暫佇。我意仍未許。空翠落不完。欣同僕夫語。

初四日至節節草店露宿

新雨乍傾飛瀑溜。一尺水深疲馬瘦。雙鞭齊舉馬忽騰。傾刻已過坡三層。駝蹄峯前祇一家。新月欲出峯攔遮。車箱兀坐夜忘永。腐齒猶能截堅餅。

早行四十里至一間房小憩

大風搖天山。旬日不出屋。茅舍縱一間。寥寥雞犬足。昨宵天始霽。雞犬屋頭宿。尤欣飛溜急。潭水綠如玉。心空聊酌水。小坐傍車軸。亭午尙一程。搖鞭出林曲。

瞭臺三老柳行

自根及頂僅二尋。老榦橫披忽千丈。稍稍幸遇坡陀轉。不爾居然勢奔放。驅車覓路尤盤曲。騎馬入林時俯仰。風飄羊角忽迅厲。枝撼鵲巢頻震盪。排空欲攫雷電影。入暝爭言鬼神狀。土人所言如此。清泉竟爾流根窟。飛瀑無端挂枝上。半晴半雨勢乍分。一榦一枝形不讓。近看十戶民居繞。遠與萬株松翠抗。鍊形或是倚丹井。相近有丹井。挺榦終須挾青嶂。距村十里復掉頭。攔路青葱尙堪望。

至蠟子泉雨驟大

戈壁無端雨。先愁急溜衝。電低偏嚇馬。雲薄不藏龍。躑躅千盤磴。低迷萬樹松。時南山口尙在望。前行及山寺。剛

打午時鐘。

宿沙棗泉

伊犁三月三。哈密六月六。風日固自佳。其柰客幽獨。今宵宿沙棗。馬病擾心曲。時一馬中醫病五日不食矣。揮扇急出

門。臨流看飛瀑。林長久延佇。石喜可容足。鴉巢厭人影。月出競相逐。雙燕獨有情。更殘導歸宿。

余發伊犁日理事。同知哈豐阿贈一白馬。性極馴謹。行抵白山。改道由小南路。馬忽中暑。五日不食。至三

堡汛。勢垂斃矣。詢于逆旅主人。主人以爲尙可救。余卽留以贈之。并作一詩寄意。

視爾如新僕。相期返故鄉。艱難同所歷。寒暑忽違常。魂豈招中野。年疑等下殤。頻行亦何意。偏一傍車箱。

自三堡至頭堡。一路見刈麥者不絕。多回部所種土人呼回部爲纏頭。

三堡至頭堡。畝畝麥新刈。咸攜薄笨車。往返數難記。伊吾節候晚。已及三夏季。纏頭何辛勤。風雨所不避。

全家挈筐榼。兒女在旁戲。一歲祇一收。倉箱已云備。窮荒無天時。祇復收地利。今看戈壁外。沃壤庶無棄。

尙書膺大任。本裕經國計。時覺羅長麟爲甘陝總督。秦隴多流民。移來就邊地。邪教近又滋擾秦隴一帶。并突至靜寧安定間。

抵哈密日。誠毅伯伍彌烏遜招飯。署東蔬香圃。



屋中書繞屋。堂下水周堂。清絕無餘事。時聞薜荔香。  
昔聞東陵侯。今見安山伯。皆種五色瓜。偏能餉行客。  
蔬圃雖一隅。百種花皆具。成團胡蝶來。成團胡蝶去。

相公眞薰臣。

俟爲大學士  
伍彌泰子

司馬習邊事。哈密土魯番。十年勞臥治。

長流水題壁

短流頭。長流頭。長流水。流不休。黃蘆關。格子墩。二百里。無軍屯。黃塵燒。赤日炙。聲如雷。裂山石。

自哈密至苦水鋪作

兩車一馬裝亦華。後乘滿載敦煌瓜。一旬戈壁苦無食。幸與瓜時適相值。日昨長流河。今日苦水泉。不復置茗椀。惟應進瓜盤。兩旬遙遙入關口。縱剩數瓜常亦朽。卽以車藏酒泉酒。

十三夜三鼓抵星星峽

天上星。白皚皚。地上星。黑纍纍。星星峽中十五夜。天星地星光激射。一屋皆支一星罅。須臾天晦地忽明。地星卻比天星青。北斗黯黯雞初鳴。聲三號。眠一眨。炎炎火。星星峽。

月夜自馬連井至大泉

入夜程偏好。微茫大小泉。鵲巢雲外突。馬影月中圓。達板驚斜下。征車偶倒懸。林梢瞭房近。已有角聲傳。

度赤金峽

茲山多赤雲。石石悉靈異。冥濛當月午。寶氣燭天地。丹砂亘南北。碧澗分巨細。絕頂闢石房。玲瓏逼天際。青羊及馴鷄。一一向空睇。稍南盤一徑。石古路如砌。森森女媧廟。客戶競私祭。兒童聚鄉塾。帥出盡兒戲。黯黯神燭昏。脂車作行計。回坡何雜沓。足滑沙石膩。出峽月已高。驚聞鼓聲沸。是夕村人賽神。

入嘉峪關

瀚海亦已窮。關門忽高轟。風沙東南驅。到此勢已縮。候門餘數騎。駿足植如木。風遞管籥聲。巖扃忽然拓。城垣金碧麗。始見瓦作屋。羌回分畛域。中外此樞軸。曉日上北樓。長城莽遙矚。平衢馳若砥。雪嶺俯如伏。天形界西域。地勢極南服。數折向郭東。泉清手堪掬。尤慙關令尹。來往餉芻牧。駐馬官道旁。生還慶僮僕。示關吏

詔許南回理釣磯。寄聲關吏莫訶幾。書生萬里歸裝內。添得長刀短後衣。

涼州城南與天山別放歌

去亦一萬里。來亦一萬里。石交止有祁連山。相送遙遙不能已。去年荷戈來。行自天山頭。天山送我出關去。直至瀚海道。盡黃河流。今年賜敕回。發自天山尾。天山送我復入關。卻駐姑臧城南白雲裏。天山之長亦如天。日日出沒相回環。朝依山行莫山宿。萬里不越山之彎。松明照徹伊吾左。隆冬遠藉天山火。安西

雨汗揮不停。酷暑復賴天山冰。天山天山與我有夙因。怪底昔昔飛夢會相親。但不知千松萬松誰一樹。是我當時置身處。茲來天山樓。欲與天山別。天山黯黯色亦愁。六月猶飛古時雪。古時雪著今楊柳。雪色迷人滯杯酒。明朝北山之北望南山。我欲客夢飛去仍飛還。

古浪縣七夕

古浪縣邊逢七夕。天河橋外說雙星。夜深偶憶小兒女。遮夢遠山無數青。昨來三伏差快意。飽啖甘瓜過肅州。留得一枚如碩果。夜涼聊與薦牽牛。

過枝陽渡

危樓在天上。天半一橋橫。清絕枝陽渡。平番只半程。水如天上來。欲冒四山出。四山如覆釜。東北口微缺。

自武勝驛抵平番

萬重山險忽已收。又轉百曲羊腸溝。前行正愁途愈窄。對面乃復來車牛。馬行攢蹄牛怒目。百計方能挽牛足。牛人咨嗟馬夫歎。半日誤程時已宴。南行噪鵲北喚鳩。晴雨亦如風馬牛。

客歲在請室中。崔大令景儼頻入問訊。就道時又送我獨遠。今歲余奉恩命釋回。大令適官蘭州。先飛札道中。急待把晤。因率占一律以寄。

纔辭獄吏仍低首。乍見交親卽解顏。杜甫預悲成死別。虞翻偏幸得生還。含辛客路犇馳速。旁午軍情措

置艱。

崔時理軍  
需總局

爲我急沽桑落酒。與君先話祝期山。

祝期山卽  
火燄山

十五日過車道嶺時尙留一巨瓜。因分餉僮僕及同行伴侶。并以瓜皮飼馬。

西域餘一瓜。剖餉及童馭。瓜皮兼飼馬。人畜皆悅豫。

征車方下嶺。雲已沒車轍。風向西北來。天空雨絲白。

### 荅楊文學夢

我前訪子梁溪北。鯉魚如龍相對食。昨君覓我黃河邊。北風如虎吹出關。出關入關止三月。意外訪君君不測。君前寄我詩一篇。令我回環誦難綴。君今五十道在躬。遊歷幕府寧終窮。布衣欲作車丞相。文教先布船司空。我今欲行爲子留。攜手且上黃河樓。黃河洶洶欲歸海。我屬河流少相待。海上先人敝廬在。

七月杪道出西安費大令濬邀集同里二十餘人。宴我于署齋之海棠小舫。卽席賦謝。

短衣昨日過咸陽。故舊都憐鬢髮蒼。赤汗馬驚來異域。

余乘一大宛馬入關。是日贈莊刺史炬。

素心人喜盡同鄉。尊羹鱸膾

秋皆具。

是日饌皆鄉味。

雪窖冰天夢未忘。蘇武廿年臣百日。

坐中客以蘇武牧羊圖見贈。

感恩眞欲罄千觴。

八月十五夜中牟旅次邀李巡檢宜春及逆旅主人共飲待月作解餉回。

李自甘肅

居然一斗鄭州酒。復有雙尾滎陽魚。秣陵醉尉興不淺。逆旅主者言非迂。秋花叢叢入檐隙。眉上都飛一

輪月回汀風勢疾轉徐。出水月光凹復突。酒行千巡客將起。頭上玉簫吹不已。主人長嘯客亦呼。秋燕驚飛鵲巢裏。官漏亦已絕。車鐸又復喧。明晨醉眼上鐵塔。飽看萬筆揮如椽。時值秋試

十六日抵祥符與蔣表弟青曜話舊

十年又向祥符過。把臂故人無一個。祇餘髯蔣住北頭。貧病亦憐豪氣挫。我行萬里歷七州。腹痛屢過元

規樓。昔遊西安開封皆依畢尚書節署主人蛻去巢已毀。我正荷戟天西頭。前遊轉悔耽書誤。風月梁園等閑度。嚴長徐

聖王復邵晉約客頻。只我書堂日扃戶。此時豪興忽復來。無意更上城南臺。土街嘈雜棚巷窄。且擇隙地

同徘徊。三更開筵四更歇。望後清涼一輪月。與君歷落論盛衰。逐客亦厭遊天涯。

十八日杞縣東郭阻雨

兩日兩夕秋雨大。杞縣東頭不能過。疲羸顛蹶泥土中。雨衣不完油轎破。水深一尺村農喜。東陌西阡麥

苗起。鄙人拚得三日留。只恐灌頂黃河流。

商丘作

三日愁霖大。黃河欲倒流。魚蝦成水市。鵝鴨占城樓。久戍兵纔返。時守兵牛隨經時麥未收。儒生半投筆。

土人云今歲應試者最少爭欲事兜牟。

廿三日將至江南境大雨

堪憐海西客。纔聽江南雨。迢迢萬里來。海西十日五。雨行何稽。八窗檐漏無時歇。寒甚燭光青欲裂。愁中  
淮岸三尺風。夢裏天山萬年雪。

過宿州

鶉鴝聲裏轉西風。秋色江南倍不同。夢醒鄉心覺棖觸。瓜花黃過宿州東。

宿州東阻雨

州南飛鷺絲。州北富葑草。茫茫葑草高逾屋。白鷺絲多部民少。州城正當決口衝。三板不沒天回風。扶攜  
老幼向何處。江北民戶逃江東。高田出水曾無幾。卻慮河流更東徙。河魚驕盛不畏人。白日城牆曝腮尾。  
東西路斷已經月。門外水泥皆尺一。投荒客到且不愁。飽飯魚蝦待晴日。

道中無事偶作論詩截句二十首

偶然落墨竝天真。前有寧人後野人。金石氣同薑桂氣。始知天壤兩遺民。

早年壇坫各相期。江左三家識力齊。山上蘼蕪時感泣。息夫人勝夏王姬。謂吳祭酒偉業爲江左三家之一。

筆底居然絕點塵。卅年大雅藉扶輪。爭傳北宋南施好。恰與邊徐作替人。

蠶尾山人絕世姿。聆音先已辨妍媸。何應一代才名盛。只辦唐臨晉帖詩。王尙書士正書

藥亭獨漉許相參。嶮苦時同佛一龕。尙得昔賢雄直氣。嶺南猶似勝江南。

只辦人間時世粧。名姝未稱古衣裳。查編修不凡作事惟龍子。拍手先驚斛律光。陳檢討

校刊存疑信可嗤。近人刻吳天章集于一字二字同昇皆注存疑後先相距不多時。名家往往無全集。贏得人傳選本詩。謂吳

等。

窘于篇幅師王孟。略具才情仿陸蘇。學古未成留偽體。半生益覺賞心孤。

晚宗北宋幼初唐。不及詞名獨擅場。辛苦謝家雙燕子。一生何事傍門牆。朱檢討

茶烟縷縷出山廚。遼左名家竝不如。一事枉拋心力苦。欲將尙史比藏書。豸青山

長慶老郎人不識。開元宰相帝先知。試看甲秀樓頭句。不愧名同諸葛祠。鄂文端爾泰有紀功鐵柱在貴陽府南門外其旁有祠傍諸葛

忠武享堂亦名丞相祠堂

近來浙派入人深。樊榭家家欲鑄金。何似耕餘老居士。百篇猶有古遺音。謂鄭孝廉世元著有耕餘集

遊戲詩應歸苦海。性靈句實逼香山。同時老輩猶難及。只許錢程伯仲間。袁大令枚錢侍郎載程編修晉芳

四十九年前一日。世間原有斯人。此二句阿文成柱五十自壽詩相公奇句誰能敵。祇覺英雄面目真。

雲谿南北兩詩人。黃景仁追楊起文。不以烟霞蓋簪笏。尙書亦足張吾軍。錢文敏維城

鬼簿算經雖作俑。王楊盧駱信難訶。近來海內詩家少。一半人誇記誦多。

氣粗語大定何如。百輩先慚筆力輸。各有醇疵不相掩。弁山前後兩尙書。謂畢宮保詩集才氣橫逸絕似前明王尙書世貞

虞山文筆比詩工。邵編修齊齋一卷齊梁體格同。贊善鄭贊善學韓王王方伯大岳學杜。愛才兼有古人風。

描頭畫足高東井。高孝廉文照盪魄回腸瞿叔遊。瞿主簿華都遜上虞張處士。每誇醉刎月氏頭。張處士鳳翔上三人皆同余在安徽

學使朱學士琦署內張有詠西瓜燈詩內一聯云藍團虛杞臉醉刎月氏頭

祇覺時流好尚偏。并將考證入詩篇。美人香艸都刪卻。長短皆摩擊壤編。

將至固鎮

平岡方縱眺。烟水忽無涯。一道黃蘆港。都成白鷺家。竹房經雨壞。漁網帶風斜。問路偏難準。蒼茫十里賒。

過臨淮關憶亡友黃二景仁

及到淮南路。尋思三十年。夜窗書共讀。吟舫客如仙。癖更誰能解。貧仍不受憐。傷心黃叔度。泉下已高眠。

過滁州憶亡友朱訓導沛

所交盈海內。誰可作人師。只有朱居士。無慙元紫芝。百篇于道近。七十入官遲。腸斷西岡路。瀕行手重持。

自浦口放舟至觀音門

且展蓬窗緩舉杯。蒲帆百尺水鳴雷。不妨東海波臣笑。逐客新從西海來。

燕子磯守風

陸程何其長。一百二十日。方買一葉舟。風急橋又折。空灘一步不可移。烏鵲亦向西南飛。蘆花白處雲氣



黑坐看日腳平。沈西逐臣自分干天譴。萬死南回尙難免。何堪十日五駐程。風伯雨師頻致餞。柁樓攤書讀不休。飽飯更上空王樓。浮生過眼行可歎。沿江纍纍石俱爛。

抵家

鄰舍牆頭望。親朋戶外呼。生還亦何樂。聊足慰妻孥。

雪窖冰天歸戍客。瓊樓玉宇謫仙人。生還檢點從前事。五十年如夢裏身。

趙兵備翼以長篇題余出塞詩後報謝二首

四岳三塗力不支。避公海外去吟詩。惟餘日月同中土。不覺鴻濛是昔時。山鬼憤覘人動息。天龍爭共馬

奔馳。歸裝正苦無奇句。辜負先生弁首詞。

老結雲谿宋莫鄰。詞場官局幾番新。七千里外尋陳語。

君前任貴西兵備及余視學此省已距二十年尙于行部時見君吟詠

十四科中認

後塵。雪舫正堪談往事。雲山難得共閑身。玉堂此度眞天上。公作邊臣我逐臣。

附原贈作

趙翼

人間第一最奇景。必待第一奇才領。渾沌倘無人可鑿。不妨終古懵不醒。中原一片好景光。發泄已盡周漢唐。所未泄者蠻獠窟。天遣李白流夜郎。又教子瞻渡瓊海。總爲僞昧開天荒。伊犁城在西北極。比似炎徼更遠僻。烏孫故地羶裘鄉。雖咤何曾讀倉頡。近年始入坤輿圖。去者無非罪人謫。一聞嚴譴當

出關如赴鬼門淚流赤豈知天固不輕與若輩紛紛何足數要等風騷絕代人來絢鴻濛舊風土稚存  
先生今李蘇狂言應受櫻鱗誅熱鐵在頸赦不殺廣柳車送充囚徒天公見之拍手笑待子久矣子纔  
到鍾儀故是操南音斛律何妨歌北調從此天山雪嶺間神馬尻輿恣吟眺國家開疆萬餘里竟似爲  
君拓詩料卽今一卷荷戈詩已如禹鼎鑄魑魍狂風捲石落半嶺堅冰繫梯通九達人驚鷗撲抱頭竄  
雷怯龍鬪飛輪馳生羌變驢或剩腿降夷化魚皆遊屍皆詩中隨手拈作錦囊句諾臯狹陋寧須支翻  
嫌賜環太草草令威百日歸華表倘更留君一二年北荒經定增搜考憶君唯恐君歸遲愛君轉恨君  
歸早

歸里後案頭見友人問訊書積已盈寸作此奉答

南歸眞復對妻孥更訪黃公舊酒壚絕域先傳畀豺虎故鄉曾否見鷓鴣山海經鷓鴣見城郭則其國有放士傷離罷種文  
無草避毒誰攜押不蘆時有友人索阿魏等藥故及之好語海濱垂釣侶鮫人休更淚成珠

余文學彫畫山水竹石幅見貽作此報謝

千山萬山客始還無夢不與山相關忽然一客款門至贈我百尺山彎環危牆陰陰日光縮復有三竿五  
竿竹故人此意良獨殷以竹以山娛宋莫故人昔日知名早下筆萬言超意表賣文不活方賣畫賣畫纔  
供一家飽憶君更憶君茅堂亦有怪石兼修篁茅堂東邊雜雲樹我昔曾從畫中住腹痛鄭公門外路君

人余受  
經師也

答友人問近狀三首

自從伊江歸。閉戶不敢出。惜無先世田。可以給晨夕。中年一哀樂。并力事撰述。茅廬枕江汜。日起掃一室。蕭閒無客至。時復理卷帙。庶幾能備書。八口仰以活。

一兒初計偕。一兒未離塾。呼僮拾墮薪。庶可佐宵讀。其餘孫與子。襁褓尙善哭。梨桃雖未競。時欲索醴粥。昨來山中友。約我種黃獨。善卷山地美。歲歲少荒熟。吾將攜長鑊。畢命此山谷。

昨來方閒居。老僕忽窺牖。貽我尺素書。言來自江口。側聞雲霄客。念及耕釣叟。飢寒門內事。詎足累交友。幸茲中歲後。神智未衰醜。奇書倘編校。事或需下走。吾雖乏三長。一得庶時有。囊錢與束脯。計功良可受。

立春前一日出郊訪迎春堂故址因遇園叟均祥話舊均祥余乳媼子

四十一年上。衰翁挈家孫。來從太平寺。閒訪小東門。野鳥顏寧識。堂獅劣尙存。惟應灌園叟。猶認乍歸魂。咒觥還趙歌。爲趙大令貴覽賦

神廟嗣立當冲年。方禮師傅開經筵。忽然宰相報父死。據政乃不思歸田。編修吳中行。檢討趙用賢。詞垣本乏諫諍責。抗疏反在臺臣先。二公不死實天幸。血肉狼籍彤廷前。此時英英許文穆。獨執咒觥行且哭。同官餞別事亦常。正氣稜稜挽朝局。君不見。救朱雲。辛慶忘。救陽城。張萬福。武臣何忠諄。文臣反瑟縮。差

強人意惟許公。稍爲儒生洗慙辱。此旣閱歲二百餘。如璧歸趙盟無渝。我作咒旣歌。淚若綆貫珠。忤宰相者罪瀕死。忤聖主者當何如。始知吾皇聖德古所無。歐刀在頸赦不誅。僅使萬里行長途。樞庭昨忽下急符。絕域已把流人呼。小臣萬死不蔽辜。乃復荷此天高地厚恩施殊。我欲借咒旣。獻觴于九重。并爲千古萬古臣子勸。曷不肝腦塗地歸命于蒼穹。君不見。以今視昔何不同。堯舜之主臣偏逢。漢文宋哲尙爾遠不及。何況明代末葉之神宗。嗚呼曷不肝腦塗地歸命于蒼穹。

劉舍人召揚自山左寄示潘文學夢陽驛柳詩四首并約同作因恩猝賦此卽寄文學

萬綠濛濛夾去津。鞭絲影裏柳絲勻。何曾肯縮千回別。只解平飛十丈塵。地近紅心愁戍馬。天留青眼閱勞人。春明門外重分手。一度相看一愴神。

半生蹤跡共榮枯。記得迢遙往事無。李白舊曾傷遠道。楊朱今與泣岐途。秋期黯黯金風透。春路茫茫玉雪鋪。擬向下河亭長說。流年真欲寫成圖。

憶共柔條賦遠征。出門西望迴含情。萬株密蔭長楊館。一逕斜穿細柳營。馳道舊聞通候火。捷書先喜報銷兵。風光畢竟秦中好。走馬來聽谷口鶯。

和烟和雨一絲絲。三復君家憔悴詞。絕憶戍樓勞遠望。前歲余遣戍時君適在都下。送我獨遠并傾囊中裝相贈別。幾曾驛使寄相思。愁生王粲南登道。君時卽南歸。話到桓公北伐時。惆悵玉門千萬里。含情頻折最高枝。

小除日卷施閣祭詩作

不意茅齋內。居然拓八窗。源曾探西海。派尙憶長江。逐客形非獨。寒梅影亦雙。百壺聊自慰。淺醉對銀缸。

# 更生齋詩卷第三

## 山椒避暑集

辛酉正月二日步至前橋村上冢兼至大姊宅久憩

我行八九里。筋力喜尙強。前抵松柏林。連塵眺層岡。步緊不敢舒。先世之所藏。何意俯仰間。愛弟亦在旁。攀條泫然悲。我鬢久已蒼。地下骨肉多。會面庶久長。半里謁姊居。迎門慶扶將。亦有容膝居。闔戶羅酒漿。三田昨大收。已穀一歲糧。我謂隙地多。代補幾樹桑。卻待菜作花。還來啜新黃。

天寧寺僧借月兩以詩見投戲得八百二十字報之

我性不佞佛。而喜方外交。苦憶揚州僧。八旬名誦茗。西山有顛禪。神理亦復超。不語已九年。見客兩手招。今爲譎吏歸。偶詣知客寮。聞有借月僧。形穉事推敲。爲爾攜蠟屐。爲爾經谿橋。爾從百僧中。揖我坐砌坳。我于儔類間。望爾成詩豪。峨峨巽宮樓。宵爾詩筆高。迢迢西蠡河。似爾詩致遙。不然艤舟亭。綠水可半篙。與子攜竹籬。悠悠泛輕橈。不然紅梅閣。絳蕊已半飄。與子學坐忘。沉沉薰香茅。否則樓三層。夜半禮絳霄。否則塔七級。凌晨歷高標。猶勝居一菴。時時坐團蕉。蒲牢吼五更。木魚響終朝。禮佛佛不知。泥塑而木雕。喞佛佛不鷹。唇乾而口焦。窮老盡氣時。生趣總不聊。不聞金剛禪。能拒鬼伯邀。不聞大乘經。能使罪孽消。

他人飫八珍。爾獨食一瓢。他人襲重茵。爾僅絮一條。趨承衆檀那。世故仍膠膠。經營伊蒲餐。歲儉猶嗷嗷。不知天生人。洪鑪鼓鴻毛。天無所容心。人何必太勞。我得定命丹。非世所及料。生老與病死。安坐任所遭。不知人在世。蟻蝨處縵袍。附身身不知。偶或相爬搔。我得養生法。身外一切拋。雞豬與蔥蒜。遇便卽飽饕。結習苟未忘。間或追風騷。我唱子必和。我歌子其謠。三百六十日。往往忘昏朝。一十二萬年。茫茫齊壽夭。縱有甲子期。何必詢大撓。似聞三神山。亦已沉六鼇。羣靈無所歸。空中任翔翺。誰向足底過。下士嗤盧敖。生生遞銷除。物物難堅牢。惟有行樂方。可解末俗嘲。麴生時時來。向我屢折腰。醉鄉何其寬。一世皆并包。炎精貢火梨。金母致木桃。灤河鹿重胎。淮浦蟹兩螯。流沙割玄鳳。蘆水烹文鯪。芸芳出陽華。桂樹生招搖。閩中紅荔支。涼土黃葡萄。南州設寒具。北地致冷淘。妖姬萼綠華。童真王子喬。爲我彈素琴。爲我吹玉簫。湘靈鼓瑤瑟。洛浦鏗雲璈。或欲赤雙足。或復垂雙髻。翩翩有光施。裊裊難摩描。醉飽爲語言。古欲過卦爻。縑鋪三百軸。軸軸鮫人綃。文簫與采鸞。爲我玉手鈔。醉呼日月星。啜我醪與糟。狂吐江海流。變作醇與醪。子其從我遊。飄飄復飄飄。庶幾末路惺。不爲異說淆。彼教倘有人。卽以子作格。仍煩走諸方。一一呼其曹。或歸士與農。或混漁與樵。同祈享昇平。各復修宗祧。充腸苦齏鹽。潤之以脂膏。章身厭袈裟。束之以紳條。郁郁梅檀香。化作蘭與椒。森森旛幢林。化作旌與旄。所得如邱山。所失無纖毫。一炬尙可收。無待原火燎。一派尙可挽。無待洪流漂。我爲子作詩。非徒逞喧囂。冀子鑒苦心。中道回風颯。戒衣旣已穿。華髮亦已彫。

生既不可恃。死亦不必逃。我言既諄諄。我醉仍陶陶。

過祥源觀訪陳刺史明善

故人近住祥源觀。老友時過楊陟庭。

謂楊刺史  
徐字陟庭

準待北河春水發。墅橋安穩共揚舡。時約遊  
徐墅

十四夜同人至各廟觀燈。柵歸路過白雲谿步月。

青牛老子廟。白馬社公祠。古屋門齊敞。疎燈架已支。凍梅纔放後。春月正圓時。卻向雲谿步。無嫌夜漏遲。

辛酉元夕燈詞十首

百串歌珠百串燈。綠楊枝外九龍升。商量踏徧城東路。先把浮屠七級登。  
更闌女伴各招邀。八字尖西巷數條。走得三橋更思五。迎春橋轉玉梅橋。  
撥灰誰復認前塵。被酒黃墟屢欠伸。只有溪童偏識姓。廿三年上喚舟人。  
今宵無月有疎星。僻巷行來草乍青。挈得蔣三茶話去。洗心池上小方亭。  
燭龍七節影俱無。空有邗溪似畫圖。卻約十番諸子弟。孫家廳北戲於菟。  
夜久頻將玉笛催。白雲尖上冷徘徊。谿流到此先嗚咽。不見紅窗四扇開。  
轉憶輪臺樂事紆。蠻姬十隊合吹竽。三更人馬皆同色。杏子紅衫汗血駒。  
一條春港乍冰開。艇子如風去復來。看盡廟燈三十架。所思不到雨偏來。



兩邊簾幕影參差。方玉堂西月午時。只向最無人處走。芒屨先踏晏公祠。  
日日衙齋燈火盈。一樓絲竹慶昇平。人生只有鄉園樂。萬里孤臣夢尙驚。

積雨簡趙兵備翼

三月不雨當如何。內河水涸連外河。吳船寸步行不過。斷港日日挑泥螺。忽然一雨卽五日。怒雷聲聲喧不歇。人言未蟄先啓蟄。一百廿日晴晝失。西鄰翁歌苦寒。昨見示東手三日書難觀。東鄰叟歌苦雨。隔巷招邀期亦阻。皇天有意寬災黎。米價不復能居奇。昨朝三十今廿五。只有菜把仍拖泥。米價稍平。惟蔬價甚昂。市沽常糶泥  
出君不見龍嘴灘。舫盡走。豬婆灘。停不久。銜尾糧船出京口。

雨中得莊刺史炳榆林寄書言甘陝盜賊已盡喜而有作

閉門六晝雨如塵。枉卻江南乍好春。只有蟲書消永日。愁無蠟屐走西鄰。茅齋伴客餐乾糗。竈屋呼童爆溼薪。稍喜八行來遠道。早聞盜賊靖三秦。

廿四午後暫晴翌日復有雨意再柬趙兵備

乞得田間自在身。課晴課雨閱昏晨。天山尙夢三時雪。人海初平十丈塵。浪說戈頭能浙米。幾曾釜底乞分薪。燒燈市外雲如墨。辜負風光過早春。

東西街近屢經過。各有門迎八字河。此客半千殊未敵。買鄰百萬不爲多。書生絕檄曾磨盾。先生曾奉命參傳文忠公

征頰旬  
軍事 逐客新疆偶荷戈。咫尺五湖烟水闊。得閒休負釣魚蓑。

二月二日獨行至城東北謁土神祠幾徧回途至玉梅橋觀社火作二首

巷南行已徧。巷北此重經。一陣社公雨。三層雲母屏。水心初漾白。柳眼乍回青。絕憶年時事。斜橋且暫停。  
土風今已變。社日勝元宵。草綠烏衣巷。花明朱雀橋。滿堤喧畫鼓。隔院喚錫簫。聊復行歌去。城東有酒標。  
花朝日乍晴。邀諸同人各攜一壺一櫂至橫舟亭小飲乘月乃歸卽席成長句一首

檐漏乍歇。谿風清。天放一角東南晴。同人宿約竟思踐。十里五里同遊行。橫舟亭枕大河側。五兩往往衝  
簾旌。布帆樓外出無數。去者如送來如迎。辛夷纔放梅未落。牆角老杏先敷榮。風光好處一亭歇。綠柳裊  
裊空中縈。與花對面設高座。雄談四出聽者驚。烹蔬各復出新意。洗盞未了仍飛觥。沉思往事亦何幸。昨  
歲此日烏孫城。磨刀置頸久乃釋。賜以區脫全餘生。豈知此日對花飲。座上八客皆知名。溪光簾影恍如  
昨。一一逞態來檐楹。諸公莫更墜拊陣。頭上怪石危將傾。喧聲入樹鳥巢動。老鶻突出筵前鳴。酒酣各復  
繞廊步。衫袖拂處香何清。臨河亭子闕丈五。缺月未出波先明。嫣然修竹靜如笑。似與花朵爭高擎。嘿攜  
一盞向何處。苔滑石洞穿崢嶸。祝花生日并自壽。笑我一往饒深情。髯翁去後七百載。或者海外仍騎鯨。  
不然卽跨赤壁鶴。落落遊戲歸蓬瀛。文章在世匪偶爾。動與氣數關虛盈。矧公大節越流輩。詎止洛蜀稱  
耆英。零篇斷簡映天地。文采縱落留精誠。此詩此筆復緜讀。代有作者誰能爭。卽如硯池祇一泓。墨瀋尚

在光晶瑩。餘波沾溉及一世。清亦可濯塵中纓。眼前樂事最難得。何必擊筑兼吹笙。君不見。仙亦不羨茅初成。幻亦不學王方平。五侯鯖復懶入口。狎客詎識樓君卿。關心別有一二事。梁上語燕林間鶯。商量桃李及時放。牡丹芍藥況已萌。山陰清酒京口釀。誰其爲我儲百罌。此生萬事不可料。未審明歲將何營。興闌一笑出門去。攔客花影偏縱橫。

十三日同人復約至趙恭毅祠看杏花回飲蔣太守熊昌宅賞玉蘭花作

五更枕上聞剝啄。瘦僕排門徑相速。爲言紅杏開半株。恭毅祠西一間屋。江鄉又饋刀鯽至。驚筍出籬剛

一束。眼前光景期不負。遠拉髯吳俊臣及攏陸伯才。南華先生有加饌。出水鯨鱓悍雙目。潁州食指久已

動。有客樽前避酖毒。廚娘洗手緩烹飪。脇若凝脂肪如玉。其餘蔬果七八種。糟漉蟹螯鹽漬肉。吾徒寧僅

事口腹。冀欲昨詩今夜讀。況聞阿買近已殤。謂蔣驥昌通判昨殤一孫約至西齋慰歌哭。荒廳留客談益縱。茶味方回

酒剛熟。雖僧又復攜花至。七尺亭亭樹如沐。爲花位置久乃妥。徑把牆西古苔剝。旁栽修竹或四五。白壁

終須伴蒼藪。主人意欲傾家釀。一斗初完百壺續。參軍觴政東溼薪。作吏極良糾則酷。淋漓百盞急思避。

口令瀾翻及詞曲。雖然盤樂亦當戒。雅興何須十分足。半圭春月縱未墮。已換兩番銀蠟燭。歸途南北更

握手。天外濛濛柳絲綠。青錢三百倘復贏。明日定來看覆局。時太守與兩吳君角棋互有勝負

十五夜獨至雲谿步月

燕後花前春好。鷗邊竹外樓高。黃舒新柳一搦綠。響回波半篙。

可惜舊時風月。都銷一徑雲烟。倪嬸閣仍臨水。

即響齋倪宅

王家艇在誰邊。

舊雲溪有渡舟。響師名王太年。

十七日趙兵備翼蔣少府。庭曜疊邀賞山查及杏花。薄晚歸看燈作。

山查花紅杏花白。兩地賞花日已夕。寬衣側帽行水東。卻好徑側來和風。趙家茶花甲城郭。赤繖當空日華薄。蔣家文杏種亦殊。昔時一株今兩株。闌干影裏分南北。花上晚霞皆五色。春花艷極乃不香。祇以顏色酬春光。風光只有花朝好。燕剪乍來蜂尙少。兩家觴客酒百壺。月出隔岸聞歡呼。樓臺一帶光凌亂。花影入波波亦絢。沿溪約略三兩家。歸客攀樹驚棲鴉。齋鐘初動客初醒。花外萬枝燈火影。

十八日戴村土人約食河豚。因放舟詣其居并留宿。

鱖饒肪白土花斑。夙約凌晨出北關。卻到戴村渾半日。舵工云轉十三灣。牛宮斜對讀書堂。纔出堂扉使廣場。不種疎梅與桃李。門前十里菜花黃。

十九日偕陳刺史明善同詣亦園夜宿。卽席賦贈。

我初來亦園。主人耽賦詩。坐客劉駿。

文學

邵辰煥

屠紳

各各拈吟髭。我再來亦園。主人思彈冠。名士欲出

山笑殺蔣

侍御

與袁大令

山中猿鶴拋離久。卅載復來園畔走。紅香亭暗綠閣傾。一壑一邱何所有。亦園

主人亦可憐。五十乞養囊無錢。折腰空拜道旁吏。歸骨已少城南田。窮州遠在風沙窟。自說歸裝僅冰雪。

賣刀買犢記前時。作字換鵝空此日。主人工書時主人雖貧仍愛友。布置一筵談夜漏。園空月出棲鳥驚。

醉折園花爲君壽。

月上攜酒花神祠下小飲

夢中欲去醒復還。門外流水聲潺潺。主人約客啓一關。天嬌十二排紅闌。神兮卻立玉作顏。佩影空際鳴珊瑚。仙人顏色皆渥丹。騎鶴無數雲頭看。案旁一人堆髻鬢。艷若桃李香吹蘭。格高意遠不可攀。幸昨識面緣非慳。乍離乍合彈指間。嫣然笑口合覺難。三十三徧春花殘。始知神仙在世亦不閒。況我木石心同頑。作詩題壁興亦闌。月午花朵偏班斲。放船出口越數灣。臥看一桁船頭山。

古香齋柏樹歌爲陳刺史賦

古香齋頭兩株柏。出土根同榦如劈。主人齋屋斜向東。一樹從南一從北。虬枝擊屋屋已破。拔地青蒼刺天黑。森然四角沉陰滿。日出當心不能赤。人間落落古丈夫。天半亭亭挺孤直。飽經雨露顏仍黝。不與凡姿競顏色。主人愛客客奇絕。三十年前住昕夕。客行握別樹始栽。樹竟幾番長過客。今來盤薄山齋內。樹與主人皆素識。摩挲撫樹對主人。可惜主人頭竟白。客今行周三萬里。樹亦添高廿餘尺。祁連山頭櫛木滿。曾遜此株雄且特。頂平不待修雷斧。榦老偏能挽風力。枝經數折撐霄漢。根已二重透泉脈。因思復有三十年。樹欲扶天人入穴。沉吟不厭百回步。徙倚每聞三歎息。十圍櫟樹枝皆俯。半里松濤響誰敵。心空

早厭禽巢鬧。眼冷靜將人海閱。商量何物件歲寒。移得園東丈人石。

二十日微雨自徐墅七里步至潘墅買舟歸

徐墅及潘墅弓背路七里。雨絲雖驟灑。客步亦徐起。買舟東岸下。柳外天始霽。紆徐路何曲。偃仄橋欲圮。行至西小湖。驚翻一雙鯉。

廿一日同人遊東嶽廟久憇禮斗樓

奇花初孕鶴初胎。曾約幽人一再來。要望紫雲飛過處。大家排手上層臺。長日悶從何處破。拈得紙燈繙夜課。三層樓上月當心。燕子不來人獨坐。

寒食已刻趙兵備翼招同趙比部繩男蔣太守熊昌莊宮允通敏陳大令賓劉宮贊種之小飲山茶花下

### 卽席賦贈

萬花紅處屐初停。勝踏橋南百草青。此樹果然同畫錦。故交先已若晨星。十餘年前曾同盧學士文昭才莊明府繩祖謙此今皆下世

奇恥著談龍錄。席間主人論及近時人詩議極平允屋廣仍餘旋馬廳。何幸洛中耆老會。始衰先得附頽齡。坐中客自八十年

僅五十餘

是日晚偶成

月到廿三剛半夜。客從二十便孤征。何因沙漠歸來早。重見江鄉節序更。蒸黍未嘗忘絕域。伊掣清明日以蒸黍饋客

賣錫先已報清明。籬桃乍放溪梅落。算在人間又一生。

莫折柳歌

清明日早起見人家皆折柳插門戶感而賦此

君不見道旁人。歲復歲。傷陽春。又不見道旁柳。年復年。摧客手。赭白馬。迎人歸。所種樹。皆成圍。門內人。門外樹。縱相離。無十步。客欲折。人已曠。人愛樹。花憐人。前花朝。後寒食。柳眼青。人鬢白。

清明日早起

一片迎神鼓。驚從枕上來。最憐新節序。須覓好池臺。烏逐吟聲嘯。花同笑靨開。兒童漫相詫。廿載客初回。  
予自己亥後至此始仙里中清明

廿四日西堂獨坐

魏紫姚黃放尙遲。東風先落小桃枝。梨花白到銷魂處。只有雙雙鷓鴣知。

廿七日上城東浮屠遠望

偶踏城東路。孤僧爲煮茶。因登七層塔。看得一城花。  
挂帆東北去。尙未越溪灣。只有吟眸闊。能看百里山。

廿八日莊徵君宇達招飲小山堂看花作

抱病經時履跡稀。忽傾家釀佐鮮肥。春從傍水朱門入。花繞扶風絳帳飛。雲外子規啼緩緩。夢中胡蝶影

依依。主人未是耽狂飲。憐我新拋短後衣。

初二日味辛齋看海棠作

無香色已冠香林。艷向亭坳屋角尋。隔岸綠先浮曉漲。對牀紅欲膩重衾。秋花祇作傷心草。蜀魄原疑共命禽。一曲闌干三尺影。幾回燒燭到更深。

三月三日攜酒出遊并上城東浮屠

風光眞已勝清明。杏葉扶疎柳葉輕。上已幾年悲遠客。先庚三日喜新晴。初一日晚積雨始晴。至初四爲庚辰日。書從薄洛

津邊至。是日得蔣仲先河南書。酒向浮圖頂上傾。不是遇花偏痛飲。更誰佳節住江城。

顏大令崇榘寄示明楊忠愍公名印敬賦二律

不與頭俱碎。惟餘石一拳。百年宗社託三字姓名傳。入世心先剖。登壇肘偶懸。何須尋四角。應有怒蛟纏。卻憶明中葉。權奸盜國章。幾人關氣運。此石閱滄桑。尙有朱丹色。彌爭日月光。危塗如借佩。魑魅爾何藏。趙兵備詩來。嘲余牡丹未開。遽爾召客。因走筆用原韻作四百二十字報之。并邀同作。

前日上已過。後日穀雨至。天公逞春容。伎倆已畢試。惟餘木勺藥。牆缺尙需次。含苞雖未吐。已復極姿致。春鶯翩然來。胡蝶各展翅。鄰家雙紫燕。日向闌楯伺。主人亦瞿然。此足助詩思。萬物取氣先。遲恐不及事。以口試問心。催花具當治。倘經三兩日。蜂蝶必大肆。成團舞花下。人反無位置。鄰翁顧相嘲。笑我先設施。



何如花放日。花下具筵熾。看花仍縱飲。仍拜主人賜。不知主人心。蓋亦有所自。流年如電掣。稍縱卽欲逝。前時餞辛夷。欲待月十四。十三風雨破。白壁忽捐棄。留花無別法。祇隕花下涕。因之悟消息。事事須早計。一觴兼一詠。庶不失交臂。諸公誠詩豪。亦可預先製。名篇早流播。不使有疵累。又聞此花開。神仙定游戲。以我廁其間。造物或者忌。何如先數日。看此欲開意。花光雖未破。先足嗅花氣。梨桃及棠杏。四美況兼備。縱然輸國色。紅白亦奇麗。午餘新月好。旭日又晴霽。譬如名姝來。先已媵姪娣。遲延至月望。花迺徧甲第。家不排花筵。勢必窮百味。而我先設餐。庶不哂粗糲。先生展然笑。此或自爲地。牡丹開十日。鶯粟又當替。藤花三兩架。紫艷半空蔽。芙渠與金粟。一一緣此例。主人詞已畢。客或笑詞費。仍須罰主人。別具餅一筭。謝花兼謝客。并助詩氣勢。花月皆十分。何妨再揚鱗。

趙兵備以十四日招客讌牡丹花下。先期以花朵絕小作詩解嘲。因用原韻復得五百八十字答之。我家一叢花。發自月初九。將開及全放。自卯看至酉。凌晨攜臥具。月午佇尤久。今年比前年。花朵益濃厚。將傾十家產。約此數執友。忽然敲門來。遞到詩一首。千言何反覆。欲自飾怩忸。主人詞未畢。花已若蒙垢。我爲花歎息。轉向主人叩。解嘲旣前作。踵韻曷敢後。名花同主客。兩造愈紛糾。今來展詩讀。花乃開笑口。主人非憎花。其實乃惜酒。酒纔量升合。花敢大如斗。如能傾宿釀。日日約儕耦。更呼箏琵琶。花外小垂手。園亭雖未廣。水木足淵藪。池寧嫌屈曲。山不厭培塿。尋檐引芻尼。關港貯蝌蚪。斜飛紅蛺蝶。倒挂綠鸚鵡。

花光旣全舒。花蘊始盡剖。圓花與圓月。上下璧合紐。自然圍徑尺。益復致抖擻。酣春倚池臺。窺客入戶牖。黃紅紫墨綠。五色無不有。主人不負花。花肯主人負。今聞乃不然。花亦欲回詬。年前春乍半。挈棹至虎阜。買花先靳價。遂不計美醜。歸同薪把束。益致種雜糅。譬如龍鳳姿。肯齒牛馬走。名雖市娉婷。實則計子母。花神暗中笑。此老亦奚取。如何不自責。反使花受咎。不見劉中允。種不見蔣通守。昌千金買傾國。臉杏臂則藕。錢刀惟不惜。貴在得幼婦。名花倚闌檻。靜女執箕帚。理固無不同。珍皆等瓊玖。主人讀新詩。唯唯又否否。花無纖介失。過總主人受。鼠姑開已徧。次欲到鴉舅。香丁紫瑣碎。菜甲黃蕾苦。翻反山櫻桃。旖旎水楊柳。蕪蘭成一頃。樹蕙又數畝。凡茲眼前景。均足佐樽卣。如思共晨夕。竝可約誰某。名花分向背。好友列左右。目成原不易。心賞亦非偶。闌干巡乍徧。牆角放偏陡。商量設几席。羅列到蝨缶。肴寧侈水陸。囿自足筍韭。沿林探松莖。搜徑覓竹飀。將雛雉登木。合隊魚麗疊。山陰醅正熟。淮北麵須漉。一一炊溼薪。時時具乾糗。花前成勝賞。兼爲主人壽。我若醉百回。頽然亦成叟。

偶遊夾城菴題壁

夾城菴。風日好人欲往。橋先倒。牛羊多人跡少。百株花。一坡草。僧歸遲。燕來早。

十五夜小飲牡丹花下待崔三景侃不至

燕燕鶯鶯久作羣。牆頭入夜望如雲。得天獨厚開盈尺。與月同圓到十分。何處更容傾國見。此香先已上

樓聞誰憐露白燈紅夜。倚徧熏爐待鄂君。

劉中允種之齋頭紅牡丹盛開。招同人小集。卽席賦贈。

入座香風已四飛。姚黃魏紫認都非。神仙隊裏仍耽酒。富貴叢中獨賜緋。影共朱霞相激射。情於紅袖最因依。平泉十載纔開宴。怪底從前識面稀。

自無錫放舟至梅里謁泰伯祠

山城距山鄉。卅里挂帆往。土風何清淳。耕釣尙相讓。崇岡經數折。土殿亦軒敞。東西無雜木。列柏振清響。咫尺堯峯山。堯時日初上。

古藤歌

藤相傳爲宋蘇文忠公寓孫氏宅時手植。今宅歸湯方伯雄業。三月十九日。湯公子招同人宴集花下。卽席賦此。

建中靖國藤一條。剖半化作潛潭蛟。猶餘半榦臥偏穩。閱歲七百如崇朝。心空貌古枝尤禿。自砌及檐剛五曲。居停偶憶孫居士。移種竟傳蘇玉局。花時一巷吹古香。紫燕不敢棲雕梁。借公真氣方壽世。木理亦肖公文章。距花百步看乃足。高榦都遮出檐木。沿溪左右三十家。一半看花盡升屋。葛仙橋邊路四通。香氣已過橋欄東。半空紫繖益奇絕。千朵萬朵飛玲瓏。意思遠挈郛筒酒。祝樹與公同不朽。因花我復憶名

花香國亡來亦云久。藤側有香海棠一株亦文忠手植康熙中燬于火滁山釀水首重回。風味不減歐家梅。滁州醉翁亭側水上有歐陽文忠手植梅

廬陵幾載作滁守。公亦三度常州來。才名一代兼風義。落落寰中此師弟。詩狂久已上青天。榦古尙能蟠

大地。樓窗八扇正而花。欄楯屈曲枝丫杈。若將座客比花壽。細校歲月無多差。坐中十客年共計六百餘君不見紫藤

花開墨池漲。東坡洗硯池本在藤花側古色班斲各相抗。此花畢竟始何時。我欲東行咨石丈。

雲谿行送楊上舍元錫北遊

月出雲谿東。照見雲谿西。雲谿鯉魚亦成隊。生世不肯離雲谿。柰何溪邊人。屢放溪邊艇。我向溪頭望遠

行。布帆一一飛無影。君居雲溪已七世。三世及交情竝摯。君族祖衣文印曾及尊人敦復皆余故交矧君才筆勝昔人。使我論

交復傷逝。牡丹花紅繡毳綠。搖蕩溪光數間屋。家無長物殊可笑。祇有貯詩餘舊篋。城東別墅高數層。君家

有園在玉梅橋側俗名楊園老樹尙挂千年藤。昨因酒後一臨眺。君已薄醉難同登。最憐雲溪春。更向雲溪步。我屬溪

頭赤鯉魚。送君直到江干渡。

廿三日沈廣文元輅招飲餞春

首蓓盤雖舊。櫻桃讖已新。是日始嘗櫻桃歌仍呼趙鬼。論早薄錢神。二句隱括座中事半夜乍升月。五更猶是春。更欣時

雨足。歸路洗街塵。

屋後圃中翠粟盛。開率成一律

日日衝簾柳絮風。送春已覺酒杯空。牆頭新月半鉤綠。屋後好花三畝紅。芳草更繁人跡外。艷陽都在鳥聲中。誰憐萬里烏孫道。錦樣韶光罩郭東。伊犁年來粟最盛。花柔視內地加倍。

蔣州守業晉寄天遠歸雲圖索題

江漢爭流處。茫茫鸚武洲。又隨鴻北去。直到海西頭。楚國萍如斗。天山月掛鉤。何因暫謀面。兩地訝同遊。余兩至楚中。一詣塞外。與君略同。而路較遠。又戊午年乞假歸。曾于吳門一識君。

萬里端歸日。輪臺雨夜過。夢餘清淚落。天外斷雲多。此客情何逸。勞人鬢亦皤。披圖一惆悵。疑聽郢中歌。端五日偶成二首卽柬趙兵備

古人稱禁煙。不聞禁競渡。此如唐水嬉。亦若漢賜酺。一年惟數日。奔走及婦孺。書生縱憂俗。施設當有素。調劑得其中。貴在審時務。何因興大獄。幾至成黨錮。甘陵判南北。此事匪細故。流傳到絕域。衆口尙含怒。欲救舉國狂。惜哉謀已誤。余昨歲入嘉峪關卽知里中因禁龍舟至興大獄。

白雲一曲溪。夢寐三十載。流觀眼底人。已苦乏同輩。今晨新雨霽。耕者釋耜耒。萬屐鏗有聲。紛然聚闔閭。榴花紅似火。村女滿頭戴。橋左幔已張。溪光迭晴晦。沿溪尤曲折。窗牖分向背。龍舟銜尾至。畫舫亦成隊。俗奢原可慮。幸此豐歲再。江魚頻入饌。山果隨所愛。水明樓上望。趙叟已先在。相應攜蒲觴。終日與晤對。雲溪競渡詞十二首

雲溪如畫水如油。今歲歡場昨歲留。不肯更將風景煞。六龍城現四龍舟。  
高處燈光礙月輪。軒窗無地着飛塵。生生視昔加三倍。樹上禽巢樹下人。  
怒雷激電滿平川。艇子如風不及旋。齊向白雲尖上立。萬堆蠟屐雨聲圓。  
傳來新調唱攤黃。分半吳姬束急裝。八角鼓完三弄笛。十番絃索一齊忙。  
萬艇如梭集水隈。兩邊樓閣亦齊開。官河塞斷雙龍嘴。不管吳門水馬來。  
吳船裝束近來工。南北窗櫺面面通。一晌夕陽紅不定。杏黃衫子立當風。  
枇杷桃杏滿盤堆。遠有江鮮入饌來。屈指半旬交夏至。洞庭船不送楊梅。  
河泥船好六倉寬。村女梳頭映水看。燕麥兔葵蠶豆莢。曉涼先向舵樓餐。  
占得雲溪好景多。前門船向後門過。詩翁住處人能識。八字門臨八字河。  
角黍堆盤酒滿壺。家家歡喜易新符。董龍社橘人猶指。更禁魚蝦入市無。  
一句日日敵華筵。醉向東頭閣上眠。怪底月光飛不到。船船燈影接青天。  
夢裏雲山一萬重。生還真荷主恩濃。升平樂事誰能譜。我本江鄉識字農。  
續競渡詞十首

紅板平橋次第過。未昏燈火塞城河。風光暗覺年來換。畫舫珠簾卜夜多。

趙兵備所居  
前後皆枕溪

緩雲閣接甌香館。一帶紅欄間碧欄。正值白雲谿水漲。龍舟南北打招寬。  
鳴鉦日午說傳餐。鄉味偏驚水陸全。拋卻萬錢邀七客。將軍原合住樓船。  
劉總鎮烜譙客  
楊費爰戲及之

無舟可買上藍輿。祇覺今年興有餘。畫舫塞河人塞岸。更無隙地著禽魚。

郭東千尺水雲寬。老白龍來盡改觀。更向榜頭題御覽。天津城北昔迎鑾。

五色牙旗按五方。東西北廟藝真香。更穿白馬司徒港。去謁金龍四大王。

水中彩鷁岸雲身。鉦鼓聲喧雜晚筵。同向赤烏橋外過。霓旌紅閃半天霞。

百尺濃雲水上開。嫩晴先已過黃霄。白須社長從頭說。二十年中第一回。

兩邊簾幕不須遮。日日輕橈泛水涯。笑煞隔河諸女伴。釵鈿質盡不歸家。

雲蓑雨笠剩閒身。夢後樓臺愴客神。依舊瑣窗飛燕剪。就中偏少賭茶人。

趙兵備以地理數事見訪。因走筆奉答。猥蒙長篇獎假。并目爲行祕書。因率成四截句。酬之。卽戲效其體。

百篇君有連城壁。萬卷吾無紀事珠。一賦十年如製就。願同達載注三都。

尙慙正卯記醜博。敢說師丹老善忘。莫更一瓶緣舊例。次公猶恐醒而狂。  
來詩欲緣借書之例。問一事卽贈酒一瓶。故戲及之。

一巷東西本接連。數椽應愧卜居先。倘逢款戶求文者。大作家今在那邊。

三伏將臨九夏長。不辭揮汗走門坊。奚奴拍手還相笑。此兩閒人何大忙。

西谿漁隱歌爲會都轉燠賦

我家近南江。乃望北江北。桃花洲上三面山。久欲臨流築居宅。君家住西江。乃憶西湖西。西湖盡處一溪在。碧水蕩漾天低迷。我爲北江農。志不謀稻粱。江湖壁立一亭嵌。日校五雅兼三蒼。君爲西溪漁。意不在魴鯉。綠簑一領不肯穿。日日吟詩北窗裏。萬言落筆不得休。雕琢欲使前人愁。明堂左右列樽俎。武庫甲乙森戈矛。西溪漁隱詩六卷。派與西江亦殊判。沉思早抉天地奧。古色不供時世玩。竹西風月宦十年。珠履賓客盈三千。平山堂縱日登眺。清夢只落西溪邊。西溪近界江海中。溪上南北雙高峯。詩筒往往雜釣筒。得句時復驚蛟龍。才名京國誰能偶。輩行居然欲稱叟。西清東觀及外臺。十六年中一千首。歐陽戀穎湖。安石號半山。名流所在寓清興。好景何必皆鄉關。卽如西溪邊。咫尺接東海。拔地倚天詩筆在。潮生潮落爾許忙。漁弟漁兄欲誰待。君不見宮亭湖上源兩支。章水貢水流無時。西江宗派吾豈知。快意且讀西溪詩。

袁文學廷構移居載書圖

不惜兼金百計儲。牙籤時卷復時舒。一甌日詣袁居士。欲讀人間未見書。

委巷南頭與北頭。三遷我敢比前修。丹黃句讀依然在。時復傷心上小樓。

中河橋側委巷中有小樓二楹。余少孤時母太宜人授經處也。

今從弟顯吉等尙居之。



袁文學集明東林諸賢及黃石齋手札彙成長卷索題

不知我者不可言。知我何不書連篇。笏花委鬼正當路。舉筆欲下心憂煎。二周一魏書如此。悼歎人生不如死。求忠于孝古所云。忠節門仍生孝子。銅山先生起漳泉。萬言一疏人爭傳。明知末路不可挽。獨抱白日歸虞淵。蓼洲詩石齋集。筆底欲扶天地立。快論時歌復時泣。明家社屋已百年。紙上尙復生雲烟。君不見季侯箋。孔時箋。

跋巨超人足踏萬峯卷子

天下佳山水。南條與北條。我餐蔥嶺雪。目斷海門潮。是處皆飛錫。何峯合挂瓢。言從贊公宿。相與話迢遙。佛國鳩羅什。仙都梅子真。欲尋方外友。喜得箇中人。論已參禪悅。菴仍借隱淪。百篇心賞在。幽谷乍生春。十五日自京口渡江至焦山憇定慧寺作

西南行盡路萬千。返棹乃訪茲山巔。茲山風急不得上。幸有巨石攔洲前。山坳一石戴一屋。步縱曲折心安便。側身東望始寥廓。初日欲上潮無邊。心飛西海足東海。下瞰無地高惟天。放臣逐客罪應死。跬步懼有神拘牽。山靈怪我貌衰老。頭上雪色來祁連。齋廚粥飯客寮酒。彈指已近三十年。僧雖髮白野猿老。只有鶴頂紅逾鮮。四山松柏悉合抱。榦老盡起青蒼烟。少年事業百不就。削壁僅把新詩鐫。浮名在世究何益。回顧我已慙焦先。塵勞擾擾及一世。足繭欲乞空山眠。來歸萬里去萬里。祇覺豎亥堪隨肩。昨呼漁叟

與堅約。終老誓種江南田。

東升樓看日出

海日欲出海。先有龜鼉鳴。青氣一綫來。潮與佛閣平。樓上客未眠。光景榻畔生。一杵京口鐘。先遞瓜州城。山半訪隱君洞。

此山開何年。此客殊突兀。形骸生卽委。眞性任汨沒。遂令巖樹上。飛鳥性皆拙。想見千載藤。猶纏隱君骨。觀音厓待月。

我來觀音巖。月出斷厓口。棱棱紙聲碎。壁上蜥蜴走。海風吹幡竿。石冷坐偏久。夜半扶月歸。清輝膩人手。法界樓夜坐。

龍界與人界。相去僅咫尺。夜半驅潮來。知憑夜叉力。枯僧樓上坐。親見髮如戟。復恐漁叟驚。懸燈照昏黑。山齋訪冒鳴。茹壽衢兩秀才并招小飲。

書聲出戶蟲不鳴。山鬼一足深宵行。人頭魚身慣窺戶。見慣不怪心能平。昨來酷暑剛三夕。讀得好書盈一尺。鄰翁最喜文字交。夜半煮酒來相邀。

翠屏洲訪王秀才豫

此洲樓閣何參差。五十年前盡江水。廣陵城低波浪闊。藉此居然障東海。圍洲三面煙水空。正與北固成

屏風更殘日出東海東。照見一角樓窗紅。

六月二十一爲宋歐陽文忠公生日。同人賦醉翁操以壽。并邀同作。卽呈曾都轉燠。

醉翁去後七五十年。平山堂下仍復開賓筵。醉翁生日重理醉翁操。欲使醉翁心跡一一傳人間。醉翁十年二十年。孤露蹤迹殊可憐。父書讀罷母垂涕。筮骨尙未營新阡。卅年四十年。醉翁作直臣。彝陵滁州兩遷謫。身縱可屈眉仍伸。幾年作詞臣。幾年作循吏。治平至和中。遂爾登政地。醉翁文筆世莫儔。超軼六代。直接韓潮州。遠不識柳開。近不數穆修。醉翁志節尤崢嶸。手挈正士歸朝廷。是時青苗免役新法尙未行。洛黨蜀黨亦未交。相傾醉翁居朝端。一世仰作範。仁宗朝相不下數十人。公也獨參韓富范。醉翁勳業又如此。一世如公幾人耳。醉翁吟吟一篇。惜乏沈夫子。亦無杜彬琵琶皮作絃。醉翁操操土風。此曲依約來滁中。當時坡翁及涪翁。門生後進詩筆縱極工。若論文福一一皆輸公。昔者楊靈州。道公我前身。揚州守芳襟顧進士敏恒扶乩所言。公名如太山。詎敢追逸塵。惟餘一事薄相似。唇不掩齒厥效何其神。無事得謗如此見所著梁溪筆記。如前人。因之壽醉翁。醉翁或不噴。泠泠絲竹公賞音。逸興更或彈鳴琴。斜月欲墮長江潯。陳後山謂東浦方伯曾南豐。詩名官爵皆可次醉翁。不見題襟館中來日集。都轉生辰後公二日。荷榦荷葉依舊吹香風。滿堂樺燭漏盡不須剪。正好來日直接朝曦紅。

寄酬曾都轉見題荷戈集詩二首

記程一萬六千里。蔥嶺遙遙接蒜山。今日竹西歌吹地。又從吟榻夢陽關。  
我于經閣論心久。君已詩壇駐足牢。絕似鄴中諸子會。主人吟比客吟豪。

附原贈作

曾燠

君得爲詩是國恩。長歌萬里入關門。笑他紹聖元符際。蘇軾文章禁不存。

滄江風雨一船高。招我松寥看海濤。

君時在焦山避暑擬往訪之

絕少行吟憔悴色。知君未肯著離騷。

題襟館贈鶴

空廊怪底步不前。五鶴一客隨吟肩。廊斜入屋勢尤窄。鶴步故緩人爭先。回風開窗捲羅幕。客醉欲眠聞擊柝。閒扉六扇夜不扃。窗裏客眠窗外鶴。

又贈柳

柳枝西北禽巢大。枝下砌蟲鳴百箇。三更星暗月欲來。蟬響復從枝上墮。乍眠乍起天欲明。絲柳拂面人先醒。比肩豈獨同心友。添得三株水楊柳。

巨超偕棲霞僧慧超過訪喜賦

一僧江北去。復挈一僧來。把卷憶前度。論詩日幾回。病依筇作命。瘦與鶴同胎。夜久生衣薄。相遲般若臺。月波臺夜坐。

萬聲聽不絕。人靜此樓頭。地缺洲三面。天空月一鉤。烏鴉爭噪暑。蟋蟀遽鳴秋。夜半龍吟水。寥寥衆響收。贈巨超慧超卽題二僧詩集

巨公居江心。慧公住江滸。詩筆如龍復如虎。句成寶氣燭九霄。龍虎鉢中頭盡俯。生平我喜七字詩。不可世人儘知。眼中無人絳方外。一任下士相嘲謔。君看建業東來水。日夜滔滔欲歸海。二僧筆力可截江。端坐已受潮頭降。餘力更把焦山扛。巨公欲雲遊。慧公欲高臥。飛錫竝從天外墮。他日蓮臺孰高坐。

廿六日同人月波臺看潮

東南風轉急。全不見朝暾。雲欲沉江島。潮爭截海門。鬢因思舊白。眼覺讀碑昏。偶問滄桑事。枯僧幾個存。曾都轉燠及諸賓客約以廿六日至焦山見訪聞至瓜洲阻風二日尙不得渡作此戲柬

七日東南風不止。倒捲滄溟入揚子。順流一葉不得下。斷渡先從象山始。一客旣去不得來。一客留滯仍難回。時翠屏洲王下二生過訪一留象山一留此皆不得渡松寥閣小一無事。飽看雪浪飛千堆。回頭卻憶瓜洲客。日日江樓看風色。別來幾日心眼空。清夢時與焦公通。君不見。波濤繞榻一萬重。正好日試登山筇。時叱檻外巡江龍。

酬慧超僧二首

因覩竹柏樓月。遠指高旻寺燈。三世佛前老衲。六朝山下詩僧。嬾到不參佛座。閒來唯理詩瓢。寰中五岳難住。海外三山見招。

廿八日同巨公慧公松寥閣早飯

山僧約客松花飯。破曉同登竹葉樓。正爾日長思就枕。未妨風急遽回舟。

始聞都轉等以阻風回舟

怕傳消息來三楚。

時楚中教匪尙未淨盡

閒理心情說十洲。淺醉更從窗外揖。午潮無際接天流。

將至消夏灣在新塘守風晚值雷雨

一湖水欲入船。一湖風欲揭竿。雨沉沉三十里。消夏灣在波底。

泊舟夾浦七夕

此夕新湖汊口。昨年古浪城樓。笑看新月生處。曾到斜陽盡頭。

一叟自談衷曲。十年寄跡湖邊。衣食全家已足。瓜田盡處桑田。

夜攜酒至湖口望縹緲峯作

明月鋪不滿。全湖半生陰。東山飛鳥來。欲宿西山岑。一觴初完一觴續。倦向望湖橋上宿。潮生月落方賞

心。天盡海飛空極目。

東南風急不得至西山因回舟從伍浦抵東山作

白鷗入我夢。知我無窮意。憐茲眼前景。不作身後計。浮名生在死。卽休不見敗筆作冢糟成邱。石公咫尺

不得進。回棹決向東山遊。

自新塘至伍浦溪行雜詩

溪水綠已窮。巖扃忽重閉。日華與山翠。層疊川上賦。前村爨煙好。穿此石林細。一徑山雨來。寥寥入秋氣。瓜花黃無端。被此一川綠。晨涼把竿好。閑坐此谿曲。人家隔坡水。路暗通石谷。日午攜榼來。人聲出山腹。兩村本一村。中有雲水界。溪流經數折。南北已分派。連宵風色緊。目送去帆快。人定波有聲。神魚望星拜。陸行富桑麻。水行富蕩芡。惟茲雲水鄉。不虞年歲儉。門前臨水路。鵝鴨數堪點。屈指白露交。秋禾又將斂。寄長興邢大令澍二首并柬李司馬廣芸

故人久宰長興邑。逐客新遊消夏灣。甚欲牽船遠相訪。斜陽影外浪如山。

年前寄我長牋好。前寄實經說數條。逋峭文章擅一時。更憶南荒李司馬。同官同榜兩經師。

偶成

橫風兩日住江干。甕底桃花米已完。咫尺荒村無處糴。芡頭蓮實抵朝餐。溼雲堆裏漾龍鱗。一片荒寒景色新。猶勝玉門關外路。案頭無水動經旬。

伍浦夜泊

高士宅邊新月上。伍胥浦口落潮餘。多應念與雙峯結。未覺途經百里紆。別路更須尋馬蹟。此行端不爲鱸魚。宵殘燭跋攤書臥。靜聽松聲落枕虛。

五鼓自伍浦渡湖至東山

到來青歷歷。七十二峯巔。駭浪魚先拜。驚雷鳥已顛。水聲搖短夢。風色眯長年。昨夜前山雨。茫茫笠澤煙。喜晤程司理思樂

我借全湖水。來清百斛塵。故人吟骨健。遷客鬢絲新。感激樽前語。扶持難後身。廨旁營釣舫。久約共垂綸。煎東山道院

松杉千百株。小者僅及肩。歷盡松杉梢。一院開山巔。黃庭讀未完。丹爐火猶煎。道士識未來。勸我山頂眠。白雲有塔級。倘可升青天。

孫總戎廷璧坐上卽席賦贈二首并憶元總戎九敘四川軍營孫爲庚辰科武探花。

萬頃洪濤艇似梭。相逢先唱定風波。山中共說支離叟。天上同魁甲乙科。話舊半皆淪宦海。謂畢宮保沅童少宰鳳三人。溯源先到黃河。狂吟痛飲三更盡。衣上分明燭淚多。

獵獵營前秋雨斜。將軍筵上說龍沙。何曾一醉輪臺酒。余出關卽戒酒。憶昨同乘博望槎。薄譴最憐家似夢。感恩新覺鬢添華。誰知萬里歸來客。依舊軍門聽曉笳。時元在四川軍營効力已補都司矣。

初九夜乘月自東山放舟至西山消夏灣宿荷花內

花光礙月舟不前。花氣薰客宵難眠。三更一棹破花出。客夢尙結花香邊。東山荷花十里長。千枝萬枝送



容忙。花朵露滴波心涼。西山荷花一灣好。千枝萬枝迎客早。曙色上波花愈姣。楊梅樹繞荷花灣。深紫已落新紅殷。荷花香破夢亦闌。再轉已入仙人關。

梅花仙人歌爲程司理思樂賦

伯牙臺前花一山。

君家梅子山下

愛花人住梅花灣。無夢不與花相關。莫釐峯頭花萬樹。愛花人宦梅花渚。卻喜

官閑作花主。少年愛名花。花外無性情。離花一步不肯行。四十不復營功名。中年愛名花。花外少肝腸。一官雖卑意亦適。靜對花枝已忘食。世人不知君。笑君作花癡。君聞亦夷然。直受顧不辭。滿堂花開滿堂客。客或呼君作花癡。君聞若不聞。意亦良自得。一花初開詩一首。爲酌花枝亦呼酒。花神感君祝君壽。來歲居然七旬叟。花癡花癖君寧然。意與花有前生緣。君不見。梅花賦就三百篇。我今署作梅花仙。

消夏灣歌贈蔡博士九齡

全湖三萬頃。包此千仞山。湖流再轉已不見。山腹復有溪彎環。溪流迴與湖流異。湖水如油溪水膩。荷花世界夢亦香。淺白深紅炫天地。幽人家在花深處。正闢軒窗摘蓮蕊。蜻蜓舟小逐客回。半日醉客荷筒杯。荷筒杯。醉君酒。荷露烹茶沁人口。荷花中間結一樓。主人約客樓上頭。烹魚煮藕日尙早。手劈蓮房客先飽。

白雲

白雲濛濛空所依。傍天風吹之。偶落坡上。魚吹浪蹴。忽爾孤往。空中亭亭。儼若覆盆。成陰既溥。一世咸仰。新浴後。怡雲閣望縹緲峯。

不向前山策短筇。新涼浴後且從容。幽窗正苦日西轉。陡落一支縹緲峯。

雨花臺待同人不至

凌晨發清輿。瘦馬入絕壁。沿山石理黝。雨點亦深黑。馬力忽已微。斜行憇危石。風雷莽成障。花雨渺無跡。卻啓西北扉。高臺望孤客。

四鼓自西山渡湖

挂席向何處。五更風色微。海雲天半立。山雨月中飛。百念籌關隴。全家理釣磯。東峯此歸去。魚鳥爾何依。

此  
页  
空  
白

# 更生齋詩卷第四

## 滬濱消寒集

題孫文學韶行卷後卽送至浙江幕府

江左詞人最擅場。卷中亦復唱伊涼。通天臺下曾三過。怪底新篇壓沈郎。  
怨李恩牛意氣真。罪言草罷見經綸。能容一個真名士。足抵孤寒八百人。

重修水繪園卷子爲冒文學鳴作

記曾彌勒與同龕。園中廢爲僧舍近始復。小劫誰從靜後參。檢點樓臺及魚鳥。風光依舊壓江南。

人物當年勝永和。時時觴詠雜笙歌。更闌偶向樓頭望。天上星無座客多。  
雙鬢愁同萬樹凋。閒窗話舊雨瀟瀟。桑田是處連滄海。門外時時起怒潮。  
雲郎去後小楊枝。檀板卻吟絕妙詞。只有夜烏還記得。冒家園裏放燈時。

蔣斗燦童養媳呂貞女題詞

烏乎何辜。貞女生不見父兮。童養于蔣。又不及見姑。然貞女之幸兮。曾未結縭而已得數面。其夫何貞女之遇屯兮。守義二十五年而尙未及撫孤。我聞而心惻兮。感外氏之衰徂。緬前孫從表兄定安聘妻孫氏亦未嫁守貞年過五十

卒。而後呂兮。顧兩見夫貞姝。倘貞女而有後兮。吾將代卹夫遺雛。

生日自述

今朝柴門開。親故忽羣集。云將壽先生。共向草堂揖。我聞方猛悟。答禮恐不及。回頭語山妻。治具爾須急。嬌兒與孫子。禮數未爛習。賓來盡歡喜。傳語競出入。先看具杯茗。繼復羅酒汁。仍愁翁欲醉。預向膝前立。長孫纔毀齒。口語已捷給。私語更五年。阿翁剛六十。

偶成

閒從里巷說新事。臥聽兒孫讀故書。不必更攜芒屨出。閉門紅日下階除。

喜張上舍舟過訪口占以贈

五回曾領江淮運。君祖有衛籍。曾簽運糧艘五年。兩度同招楚蜀魂。華尚書沅。毛州守大瀛。與君最善。今先後歿于王事。赤米白鹽家已破。朱旗元

甲陣猶屯。多愁自覺新詩少。老友今餘幾輩存。話到十三年上事。渚梅零落野雲昏。辛酉年。新正在漢陽三山徑訪梅。握別。

黃主事不烈祭書圖

古人飲食必祭始。何以讀書則不然。致身通顯不知報。是爲飲水忘其源。先生剋例實陳例。拜庚子日尊文宣。陳書萬卷復千卷。燭炬如挺香如椽。書神報君亦孔厚。往往獲一珍珠船。宋元精塹本幾備。尤喜篇幅皆完全。先生嗜此若性命。快意不惜千金捐。搜羅書目所未探。中興館閣明文淵。樓名傳是閣天一。嗜

好亦恐無君專。就中精本祕不傳。緘以篋笥承之。既偶逢識者一啓示。先掃几席除葷羶。何應寒具致汚軸。千載以上嗤桓元。君家舍宇本精潔。又少俗客相糾纏。焚香偶復展一卷。眼與明月光同圓。君不見。時逢朔望列一筵。不必牢豕須新鮮。胥谿菱芡石湖藕。一一皆可成加籩。書田雅興穀田等。報賽或可祈豐年。我曾借本細讐校。例得陪祭來筵前。虔誠拜罷共飲福。一醉欲乞書倉眠。

九月十三日越來谿見燕

寂寞漁莊款水扉。越來谿上月微微。何因燕子不歸去。卻向夜涼庭院飛。

自吳松江抵上海與友人夜話

吳淞江上路。乘月去迢迢。海氣全疑雨。天風不捲潮。夢餘頻悵望。雲外偶招邀。及此燒紅燭。層樓已半宵。

唐大令仲冕招飲網師園卽席賦贈

纔從識面便忘形。飯我城東水上亭。老友瘦真同野鶴。謂王廣文。芭孫。殘荷多尙比天星。百身未易酬恩遇。時坐客詢

伊犛釋。同日。一石偏教吐性靈。歸去且營耕釣好。得閒隴畔使橫經。

偶成爲陳太守廷慶賦

一幅蠻牋任屈伸。半鈎新月倍精神。關心幽鳥能窺客。過眼空花不惹塵。雲影去來傷往事。水光搖蕩識前身。悲秋宋玉支離甚。況復登臨送遠人。

過盡三春爛漫時。九秋籬落訂交遲。來猶背面誰曾見。去不回頭事可知。海上早應隨范蠡。洛中枉自賦陳思。黃庭一卷香千縷。半欲銷魂半自持。

顏魯公名印歌

一方石千餘年。魯公名誰所鐫。海中搜龍劇龍骨。更點星星老蛟血。地老天荒丹天滅。君不見公名怪底天子驚。河北二十四郡僅一顏真卿。

哭蔣二尹齊耀

萬里歸來訪病身。劇憐面目已非真。余自伊犛歸訪君君半面已毀嘔心疾比龐眉客。懸腕書同透爪人。兩度悼亡形轉悴。一官瀕死志難伸。東山絲竹銷沉盡。垂老羊曇益愴神。余少受侍御舅氏知每過居第未嘗不揮淚也

偶成

萬念俱空後。寥寥酒易醒。未能離世網。聊展度人經。路暗燈明壑。窗疎劍指星。書生爾何意。空自逞心靈。石湖訪范文穆祠分賦得石字

茲遊日已斜。霞采疊蒼赤。携茲書畫舫。償我山水癖。舟行十餘里。心境一開釋。杉藤凌澗紫。鷗鷺點波白。濛濛湖一曲。落落嶺十尺。非無懷古意。風捲渺無迹。危登開士閣。幽轉范公宅。祠即文穆舊宅斯人預機軸。時事已逼窄。終焉感滄桑。渺爾念疇昔。憂時識希文。蹈海憶少伯。遭逢逮伊管。隱顯並賢哲。丈夫如有志。于世

匪無益。庶幾不朽名。勒此厓上石。

夢遊仙詩三十二首

屢讌瑤池鬢已蒼。偶從天半話滄桑。轆轤幸是仙人屨。踏盡紅雲到上方。  
科頭跣足任天真。隨分燒香拜紫宸。卻喜近來蕭散甚。蓬壺管領謫仙人。  
生世應居離恨天。愛從生後說生前。銅仙又復垂鉛淚。會面居然五百年。  
白雲紅葉影參差。欲向前頭訪素知。拖得月華裙半幅。卻來波面立多時。  
誰從天上號詞宗。淡寫新篇墨不濃。一朵絳雲環一字。笑他人世碧紗籠。  
尋常每夜不呼燈。卻坐雲窗第二層。一卷道書時背誦。惜無人與證飛昇。  
下弦殘月訂幽盟。青鳥傳來誤已成。幸有玉妃來世約。眼波回處定三生。  
慣拈針線作生涯。剪得靈河一道斜。認取近來花樣好。青城雲氣赤城霞。  
我識飛仙萼綠華。最憐秋鬢插春花。天田亦種人間果。一味香清愛木瓜。  
繞砌菖蒲倚閣松。仙人眠處五雲濃。夢回報道高真過。先鎖閑門十二重。  
出世情懷絕世姿。冥濛香氣散如絲。紅雲一瓣邀同坐。奇福難消是此時。  
紫府新來品秩高。隨風上下騁輕軺。磨厓五岳都應徧。且復題名北斗杓。



屈曲房櫳宛轉風。一樓疑復住虛空。盡驅雞犬雲中去。獨敞銀屏待八公。  
心思一串最瓏玲。更有長眉射眼青。欲筭人間未來事。滿盤珠借滿天星。  
挈伴時來阿母家。采蓮艇子住雙娃。神仙一例嬌羞甚。不折天池並蒂花。  
幽居隨處費提防。忽報飛星已入房。親到下方緣底事。借將弧矢禦天狼。  
生來不假麝蘭薰。坐處偏離粉黛羣。欲灑天山萬年雪。罩他巫嶺不生雲。  
住近天河水氣涼。萬株荷幹一方塘。蓮花蓮葉都嘗徧。不及仙人舌本香。  
欲逃百劫避羣魔。天上誰知事更多。斲斷玉虹橋百尺。神仙從此絕經過。  
桂樹扶疎月影涼。漫無情緒守吳剛。靈山採藥他年事。先與裁成出世裝。  
雲漢西頭路幾叉。浮家真欲擬乘槎。兩三紅淚揮天末。都作人間異種花。  
早住扶桑暮落棠。仙人遊戲本無方。忽然招手來天外。認得麻姑指爪長。  
雲駟一步一徘徊。不分前途分手來。啖得荔枝三百顆。此時應向海南回。  
日月雙丸剩半丸。東西海水亦齊乾。仙人一笑春風轉。萬劫偷從祕籍看。  
王母池邊踏月回。羣花妒影不曾開。何應三百神仙侶。總學劉禎平視來。  
巧笑仍含一種愁。見人常自不梳頭。朝來偶凭闌干望。自有神光照九州。

高居豈復有塵情。魔境應從道境生。惹得龍華先罷會。人間飛語謗雙成。  
要從南粵達南閩。天漢東頭與問津。十度錦箋何處寄。倩他三百六魚鱗。  
多應清福不曾修。逐浪來居羅刹洲。莫歎姻緣簿多錯。天孫亦復嫁牽牛。  
朝正儀從最輝煌。龍虎前頭列隊忙。騎得鳳凰拳一足。笑他六六紫鴛鴦。  
鋒車晨夕響如雷。結屋星辰頂上來。卻約下方人未到。天門一日走千回。  
日正斜時月乍圓。紅林處處露珠懸。洪厓洞古誰能訪。只有修真謝自然。

趙兵備翼以所撰唐宋金七家詩話見示率跋三首

一事皆須持論平。古人非重我非輕。編成七輩三朝集。好到千秋萬世名。未免尊唐祧魏晉。欲將自鄧例元明。塵羹土飯真拋卻。獨向毫端挾性情。

詩家別集已成林。一一披沙與檢金。作者衆憐傳者少。前無古更後無今。法家例可平心斷。大府文非刺骨深。卷卷漫從空處想。就中多有指南鍼。

名流少壯氣難馴。老去應知識力真。七十五年纔定論。一千餘載幾傳人。殺青自可緣陳例。初白差難踵後塵。君意欲以查初白配作八家余固止之。只我更饒懷古癖。溯源先欲到周秦。余時亦作北江詩話第一卷泛論自屈宋起。

附和作

趙翼武進

詞客低昂本不平。品題間弄腐毫輕。但消白首無聊日。豈附青雲不朽名。老始識途輸早見。貧堪鑿壁借餘明。洪崖拍手從旁笑。猶是燈窗未了情。

何限紛紛著作林。揀來只剩幾銖金。論人且復先觀我。愛古仍須不薄今。耳食爭誇談娓娓。鼻參誰候息深深。錦機恐負遺山老。枉度鴛鴦舊繡針。

晚知甘苦擇言馴。一代風騷自有真。老學我悲垂盡歲。大名君已必傳人。幸同禪窟參三昧。不笑兀關隔一塵。從此國門縣呂覽。聽他辨舌騁儀秦。

偶成

愁多久已置形骸。恩重終須異輩儕。長慶集仍含諷諭。東方論敢雜談諧。銷兵乍喜流亡返。橫潦仍嫌變理乖。何自近來恆斷肉。安貧聊學太常齋。

汪庶子學金以捉月圖屬題戲成三言詩一首

天上月。地上人。煙茫茫。隔十塵。隔十塵。欲捉月。馳風輪。風輪遲。月輪快。不得已。及天外。隔十塵。欲捉月。轉地輪。月輪寬。地輪小。不得已。出天表。隔十塵。欲捉月。借日輪。日輪紅。月輪白。不得已。兩相食。上弦月。捉不得。彎如弓。向人射。下弦月。捉不來。愁如眉。慘不開。十二三。十五六。圓疑環。白疑玉。玉與環。難把握。醉中客。總不知。時呼月。一問之。蓬萊山。作糟邱。捉不得。卽拍浮。滄溟水。作醇酒。捉不得。卽濡首。排千觴。列百樽。我

欲起爲解紛。仰明月呼先生。爲詩伯。爲星精。時或醉。時或醒。酒星暗。蟾月明。啓明落。長庚橫。萬萬古。傍月行。

### 曇陽仙觀題壁

生天成佛事皆真。二百年來記昔因。化鶴人歸窀已剖。釣鼈客到觀重新。觀爲州守鼈圖新建。蟲魚篆尙留遺跡。麟

鳳洲先謁後塵。上鳳洲兄弟首先稱弟子。畢竟傳疑由弟子。曇鸞枉說化前身。鳳洲作曇陽仙師傳未侈說師爲曇鸞師後身以致人疑

### 題明姜黃門藝圃諫草樓二圖

折檻朱雲氣已粗。時艱不敢作身圖。愚忠自欲回天地。臣罪原難保髮膚。滄海變來留隙壤。危樓築處傍浮屠。敬亭山下春蕪滿。月黑愁聞杜宇呼。

### 吳梅村祠題壁

寂寞城南土一邱。桼梅零落水雲愁。生無木石填滄海。死有祠堂傍弇州。同谷七歌才愈老。集中有避難仿杜七歌

### 題王應宸太守洞庭泛月卷子

修月八千日。常居天上頭。釣湖三萬艘。亦趁水東流。我覺飛仙好。時陪帝子遊。宵涼亦何事。嘯起岳陽樓。苦愛蓬心叟。煙雲筆底濃。冥濛舟似蟻。活潑水如龍。欲到三層閣。仍携九節筇。天風忽然遞。嶽麓寺前鐘。

又歲寒宴坐圖

不知門外路。爾許雪霜深。客念此時寂。鐘聲昨夜沉。淡然忘世味。渺爾豁幽襟。在在都無著。空明此夜心。  
如公能幾輩。未許臥蓬蒿。終爲蒼生起。應知素望高。志猶營宇宙。跡暫脫塵囂。卽此坐忘處。天風響海濤。

題扇贈汪童子元爵

昌黎已序張童子。魏國先知員半千。他日蓬萊問家世。童子祖父已三世記館四傳應號小神仙。

吳舫卽事

杜曲城南記最真。繁華悟後始尋春。蘭香仙去秋孃老。零落尊前見此人。  
水明樓上會羣芳。屑玉研珠費較量。折得一枝紅芍藥。鏡臺先欲贈花王。  
別友

謫下蓬萊又幾春。形骸疑假復疑真。天荒地老重相見。君是前身我後身。  
意外相逢是昨宵。可憐知復在明朝。十三夜月難連曉。魂斷溪南長短橋。

消寒第一會。萬大令承紀招集吳舫聽寧福校書彈胡琵琶爲賦長句。時長至前一日

金閨城外人煙密。琵琶一聲萬聲絕。萬聲縱沸亦不聞。琵琶聲高壓四鄰。夕陽欲滅猶未滅。喚出團圞海邊月。北風吹潮海上來。怪響迸入蛟龍堆。繁弦促節手不管。似有玉虬纏玉腕。神明矩度心不關。金鳳獨

翔金指環。一聲舒遲。一聲疾。霹靂出山天。乍裂大絃。展拓幺絃收。雲霞鋪空地欲浮。欲完未完聲一束。直立琵琶若鼇足。我行昆崙葱嶺二萬里。青氣漫漫障天起。非無胡琵琶。拉雜彈不已。妖姬十五如山魘。十指漆黑聲啾嘈。招來區脫彈數曲。帳外似虎天風號。烏孫戍客何曾久。意外生還感高厚。禽巢南枝獸邱首。百里遊行畏讒口。蒲帆無風向東走。忽復遭逢數良友。烹龍魚鳳爲我壽。更拉琵琶佐樽酒。金戈鐵馬音鏗鏘。奔厓裂石詞激昂。玉門關前天雨霜。天馬欲走蹄先僵。天山界畫陰與陽。日月影礙冰瓊瓊。曲終四坐慨以慷。似識遷客曾投荒。我爲琵琶歌。行酒復食炙。商婦當年已衰謝。何似茲樓起聲價。雲英翩翩未經嫁。拜起尊前貌閑暇。當時樂天淚墮琵琶下。我謂時平遷謫何足訝。況復經時卽蒙赦。南冠初除囚服卸。席地幕天無所藉。三百六日擇此最長夜。金烏玉兔光激射。二十八星環水榭。君不見樽前情淚何能灑。百歲浮生亦虛假。胷中之奇誰識者。出戶茫茫眺原野。有淚或向銅仙瀉。

消寒第二會汪庶子學金趣園座上追賦嘉慶戊午四月編輯婁東詩派成爲諸詩老設供建水陸道場用瑜伽薦度法并考生平行詣分上中下三壇別設閨秀一壇七日乃竣分賦得栢梁體一首

玲瓏水上飛千燈。東海璧月同時升。佛香妙處繙大乘。掃屋更結壇三層。一壇別設列采繪。雲鬢飛入皆鬢髻。天人丰格不敢誣。淨名居士智力宏。佐以百六高功僧。婁東詞客繁名脩。恆河沙數量不勝。詩編大小束以絙。平生慧業此可徵。魂魄化去心神凝。光采尙若燔薪蒸。靈車鬼馬空際騰。一一彼岸祈同登。否

亦尙冀天衢昇。仙人心中空鑒亦激。品第甲乙復經卞壇改定品第甲乙殊兢兢。空中垂問空中膺。忠如龍比孝閔曾。陳

雷朱范篤友朋。賈彪郭泰偕李膺。柱世風骨真稜稜。就中節義尤所矜。生可模楷沒豆登。列上上乘皆曰

應。其餘稍或寓勸懲。亦不以愛不以憎。原心略迹目匪菅。大邦齊魯小杞鄆。州蓼隨絞邾薛滕。次等亦復

難加增。灌夫罵坐肆轢轘。樓護結客多依馮。胷中鱗甲手葛藤。甚或遇事全模稜。諫垣瑟縮噉凍蠅。酷吏

伎猛同蒼鷹。亡身破家刺史澄。降胡負漢都尉陵。品列下下無能陞。知人論世最足憑。不以文筆相誇凌。

大弦稍緩幺絃掬。筆法直似朱絲繩。定論無用參疑丞。此邦前代尤峻嶒。後先七子稱代興。兩王荆石相

尙書事業世所稱。各有祠廟羅肴膾。迪功集若雲霞烝。日觀曦鳳天池鵬。梅村祭酒緒復承。此道亦屬三折

肱。歷年二百留雲祲。流光疾若矢射棚。琅邪太原壇坵仍。品題直到驢與騾。語簡而當爭鈔騰。我于彼法

習未曾。服此論斷非僂僂。忠賢奸佞各列棚。竟若二水分淄澠。學仙學佛縱不能。何必苦判溝與塍。山雲

欲凍海欲冰。萬丈雪霰愁難爇。歸裝幸有十束綾。敬錄一本隨行膝。

消寒第三會王孝廉履荃胡明經金誥邀遊樂郊園因出婁東十老圖索題

十老爲王育。字石隱。年八十。陸羲賓。字素朴。年七十一。宋龍。字子猶。年六十四。郁法。字儀臣。年六十五。

顧士埏。字殷重。年六十四。盛敬。字聖傳。年六十二。陸世儀。字道威。年六十一。江士韶。字虞九。年六十。陳

瑚。字言夏。年五十九。王撰。字異公。年五十。皆婁上明末隱君子也。

十人慘慘荒江潯。時歌時哭天爲陰。朝無食案夜乏衾。尙披朱履行空林。沈思古昔淚雨淋。往者不作何況今。魯運旣向滄海蹈。屈子又復湘江沉。田光刎頸萇宏脆。漸離矚目豫讓瘖。吹簫吳市亦時有。擊鼓河岸誰能尋。寰中止剩伯倫錘。海上自拊成連琴。龔生未授新祭酒。伏勝尙屬秦儒林。以之相較盡不愧。餘子未足披深襟。歸迂顧怪在咫尺。庶可與爾稱同心。

消寒第四會汪刺史廷昉座上賦南園古梅歌梅爲前明王文肅公手植名一隻瘦鶴

一隻鳳去不回。一隻鶴翩然來。城北卽雙鳳鎮翩然下啄莓與苔。渺爾化作羅浮梅。羅浮仙夢何時醒。幻作梅花

尙朱頂。三生落落出世姿。七尺亭亭照波影。不飛不鳴作高格。四出枝猶排逸翮。亭空月冷露欲零。仙客

欲騎騎不得。百餘年來丁令威。游戲尙復時來歸。人民城郭縱非是。尙認一樹衝寒開。幽人幾日園南住。

香氣橫飛海東路。滄溟今已作桑田。婆河口今疊長海沙遂至於寒此樹應須憬然悟。園林之主先後殊。昔者太保今尙

南園近爲畢秋帆尙書購得以居甥沈愨師圍棋賭墅偶然得。瘦骨尙欲凌高株。研薌居士開賓閣。邀客詠梅如詠鶴。長身

安得居樊籠。復恐化鶴飛橫空。

消寒第五集田大令鈞邀集官廨卽爲題荆樹山房圖卷子

荆樹山房爲大令六世祖明萍鄉令□□所建。嘉慶三年錢唐黃司馬易爲補圖。

田家集在何處。門前清濟會濁河。百世流傳紫荊樹。紫荊樹老花愈多。四出不復分枝柯。尋根旣悟一本



義攀樹時作同心歌。我願兄弟心。化作此樹陰。祥風甘雨萃一林。三冬三夏不使嚴霜烈日交相侵。仍願手足誼。化作此花蒂。千枝百枝同一氣。花葉雖繁枝不替。李家花萼樓。馮家棠棣碑。不及君家此樹好顏色。千古萬古名猶垂。山房三間下有池。容易得值花開時。花前盈盈酒滿卮。既不識。尺布斗粟三字辭。亦不聽。然其煮豆七步詩。君家此樹真堪愛。大令遠君剛六代。一門草木皆異常。茱萸不吟護樹背。龔梧生黃小松。爲君作圖作記皆極工。君不見紫荊花。花色異。絕愛君家好昆季。六世相傳幾循吏。更覓甘棠栽隙地。

消寒第六會汪公子彥國招集復初齋觀王石谷繪山水直幅

畫係石谷贈公子七世祖明處士汪溥溥亦工畫爲婁東第一手

我行徧天下。卻愛黔中山。黔中山勢盡壁立。出地萬仞無彎環。南峯升雲北峯月。畫裏溪山亦奇絕。靈泉破空山石裂。飛出千年萬年雪。崖窮路古林光倩。斷壑奔灘鬼神現。林花對客纔一笑。山鳥窺人剛半面。洞門怪響七尺筇。奇古似是商山翁。商山翁居海曲。得意時歌復時哭。地老天荒一間屋。滄浪之水清濯足。鸛鷓鷗茲與同浴。放艇時來玉峯麓。森然非松亦非竹。植立門前聞剝啄。主人開戶喜不速。邀坐茅檐背同曝。忽然一筆寫不足。肌膚如山骨如玉。狂叫自呼王石谷。我題此畫亦非偶。二百年前倘良友。畫中蕭疎兩閒叟。著罷枯筇偶垂手。瞥見洪厓拍肩否。王石谷自題有洪厓拍肩之語山中古洞如敲開。兩翁曳杖還能來。消寒集上醉幾回。大笑手覆三千杯。

消寒第七集唐明府仲冕招集吳縣倉廩觀唐六如畫馬

唐生畫馬如畫鶴。仙骨棱棱難捉摸。不識人間有鬚絡。唐生畫馬如畫人。霞采奕奕光瞳神。氣軼天半心難馴。唐生本是神仙謫。畫馬亦與龍麟匹。眼空千里萬里程。一點飛從草頭黑。蹄高四尺尾徑尺。全力都從尾間出。頭肩背腹鬣經膝。大氣回環如一筆。蠻靴烏帽衫落拓。此客我疑孫伯樂。不然何以神采飛騰。氣磅礴。我曾行經大宛兼烏孫。枕戈萬里求絕塵。生還豈意復相值。雪夜對此開芳樽。六如畫品陶山詩。落筆往往饒精思。前生不是趙承旨。或者卽爲李伯時。君不見。旄頭星尙照巴蜀。眼急捷書來不速。十萬驍駟競馳逐。饑火燒心尾毛禿。何如此馬真有福。飛行限以尺一幅。低首且食太倉粟。

消寒第八集孫兵備星衍邀同人泛舟至永昌鎮訪孫武大家率成四首

初日甫欲升。照我出東郭。巫門已迷離。何況冢廓落。言尋永昌鎮。十里路初拓。英雄骨未朽。其上已耕鑿。雖然巢冢鵲。鷹隼不敢搏。緡罷越絕書。酸風下懸閣。

伍胥貢奇士。本欲爲國謀。寥寥一寸心。亦報身家讐。要離與專諸。詎與公等儔。蕭蕭吳宮中。頸血五步流。遂令姑胥臺。濃春條成秋。平原不知兵。亦斬笑者頭。

生齊而仕吳。位視客卿例。如何蓋世才。乃用作兒戲。兵鋒纔一試。已取鄢郢地。嗟嗟甬東叟。不及盡奇計。至今十三篇。海內悉衣被。

荒墳極十頃。土有柏樹根。高碑止留跡。文字已不存。茫茫今古殊。地尙名孫墩。百步絕采樵。沒世若有神。千年尙思鄉。魂登望齊門。

消寒第九集臘八日李廉使廷敬招同人至虎阜憩梅花書屋看黃梅作

十步亘一閣。五步橫一臺。藐姑仙人尙未來。風信先已催黃梅。門開稜稜石千尺。徑險最宜雙蠟屐。小樓開處三面花。花下屋古如浮槎。闌干東西屋前後。不及捲簾香已透。紅紅白白不並時。南枝北枝開故遲。維餘寒影互激射。凍蕊落葉光參差。黃蜂千頭綴枝冷。只惜南園蝶無影。紆千山雀時一雙。噪得遊人發深警。日當臘八月上弦。樓上兩兩排華筵。飲中八客疑八仙。是日同在詞館者共有八人不飲我欲花前眠。花光旣分飛。燈影亦交錯。君不見談深不覺冬日促。幾樹夕陽黃不落。

古會晤詞

回頭卽相思。對面忽無語。妾身雖堅貞。妾意已相許。妾如團欒月無缺。儂似曉星常逐月。升天入地影不離。何必更判雲與泥。

古訣別詞

紫騮不會歸。青驄不會去。同行複道中。意外復相遇。黃梅一株香未折。花底忍寒來訣別。暗影朦朧啓北扉。嚴霜正白城頭月。

邗溪步月

空外月華直。幽人此際來。寒梅三兩樹。並影一齊開。

臘月十九日卷施閣邀同人爲宋蘇文忠公生日設祀作

東坡謫南海。我謫西海頭。東坡更三歲。尙未離儋州。我頃荷戈來。僅止三月留。我歸正值黃流漲。海外奇花未全放。天山六月汗不流。冰雪千層萬層障。竭來半載荒江沚。一念感恩先欲死。江田時陸復時沉。自歎浮生亦如此。年殘百事如蝟毛。歲未全稔民仍勞。憶公更憶初度日。置酒遠復邀朋曹。初陽離離開竹屋。黃白種梅香乍馥。遠行萬里今甫歸。濯足卷施一隅谷。君不見。坐中七客鬢皆斑。難得人閒歲亦閒。同獻樽前一杯酒。祝公生日我生還。

凌同年廷堪以其族曾祖明侍御□□遺札屬題率賦一首

一紙留遺墨。千秋識盡臣。更因懸腕疾。彌覺剖心真。臣節終橫草。朝端尙厝薪。傷心江總輩。文采竟亡陳。

借月歌爲借月上人賦

出門卽看山。閉門卽抱膝。上人于世何所需。祇借天空一瓢月。有時欲閒吟。一瓢月在心。空濛百斛光。先與祛煩襟。有時欲說法。一瓢月在頰。靈明百琲珠。如看瀉行篋。空空相色非。非想瓢月時。時復盈掌。離鄉忽欲念鄉山。天姥天台或長往。去年住城東。看此瓢月生。巽宮樓前燈影明。今年住城北。看此瓢月蝕。天

王堂中香炷熄。僧既不還俗。月亦不上天。假而不歸凡。幾年聞說塵劫歷。百年經千天邊之月時或缺。月在一瓢光不滅。

許上舍汝原觀濤圖

避人何敢學乘桴。東下滄溟住得無。轉眼忽憐塵世小。一杯海水一葫蘆。  
三千里路客何久。十八家村住亦難。我欲與君同卜築。城南陽羨好溪山。

題畫

峯峯嵐氣誰能辨。一色采雲分一面。山形正闕西北峯。卻好海霞生片片。山深六月徹骨涼。世事不到三間堂。回厓偶爾透日光。水流花開天地忙。石壇中間棋局具。五客入門饒逸趣。纔完一局已卅年。騎鹿公然上天去。

荅友人問近狀

門前三萬六千頃。架上二千四百年。曾次近來無一事。釣竿纔放枕書眠。

跋唐豐溪處士呂從慶詩集後

處士本大梁人。以唐廣明元年避黃巢之亂至歙。又自歙移旌德之豐溪。遂家焉。處士卒時年已九十。七。自題其墓碣云。唐詩人豐溪漁叟之墓。時已屆石晉天福中。蓋處士之不忘唐如此。自後遂世居豐

溪。迄今已九百餘年。子姓繁衍。多至數千家。余來主洋川書院。其末孫璽與培皆從余游。近復從零縑斷碣中。披羅處士之詩。并前所刊。共得四十五首。乞余序之。因并繫以詩。

君詩四十有五篇。流傳九百十六年。豐溪自此占居籍。百世尙識開封遷。人丁至萬戶。至千。前後南北圍墳田。清明歲歲上先家。十里以外聞香煙。千年家法堪則傲。不用西方化人教。牲牢奠後布路回。墳頭從不飛紙灰。君不見。司空表聖羅昭諫。唐末英英義聲見。詩人豈藉詩句傳。大節所在尤昭然。豐溪處士生晚唐。末路乃值晉與梁。時吟時輟心內傷。醉後自比陶柴桑。烏衣山。王官峪。糾嶺。柵峯。同巒。嶽。九原數子。如可作。愧煞陵陽杜荀鶴。

友人貽所知集見卷中錄先君子詩頗多敬讀一過感賦

親承色笑猶如昨。孤露餘生五十秋。夢好尙能依膝下。愁多時復上眉頭。傳家舊業詩千首。卜築新塘土一抔。便種梅花滿墳屋。他時地下鎮從遊。

此页空白

# 更生齋詩卷第五

## 箸嶺授經集

### 勵志詩三十首

獨不可製棟。乃反裁作橋。獨木之橋。心焉搖搖。獨木可立柱。乃反劔作舟。獨木之舟。或沉或浮。天形不知。以農爲師。地圖或溷。引商參問。欲知古詢。及賈欲通俗。訪及僕。羅網待物。不擇飛走。資格縛人。不問賢否。

慢神無福。諂亦如之。不慢不諂。是爲得之。學佛無益。毀佛無損。不佞不毀。達人所允。萬燈雖明。不敵一星。九流雖精。不敵一經。星晶瑩。海宇寧。經習熟。治術足。薜佐飲。菸佐食。腸浸淫。口呼吸。一火攻。一水厄。消肌膚。鑠精液。

一家飢寒擾。及里鄙。四民飢寒憂。及君相。

靈狐狼狽。善惑世人。神祠穴久。不媚土偶。林禽剪舌。巧過百物。有法制之。禦以木訥。身欲死。藥不靈。心欲死。語不經。語不經。神殛之。藥不靈。鬼殺之。

我欲上天。祇憑一梯。天之高高。梯則已低。我欲渡河。祇結一壺。河流湯湯。壺不可泝。



以力養人。力懼不展。以心養人。活及無算。以財濟世。財有匱時。以言濟世。利無窮期。妄思奇福。必得奇禍。妄思窖金。必至家破。

龍行雨聲不聞。龍出聲雷卽噴。鵬搏風翻不露。鵬奮翮天卽怒。

我所思在九域以外。九域旣窮。天地何屈。我所思在萬物之究。萬物旣究。孰持其後。心無敬傾。不畏雷霆。行無疵累。不畏社鬼。社鬼所搏。必非強梁。雷火所觸。人或不祥。齊三士可稱勇。伏劍死不旋踵。魯兩生可號儒。叔孫先不能污。齊三士誰可敵。田橫島五百客。魯兩生孰可同。哀平中。楚二龔。

衣無複單。難以禦寒。家無法紀。難以服官。衣之有複。潤及肌肉。家之有法。化及鵝鴨。惠人升斗。莫惠以口。殺人刀戟。莫殺以舌。口惠人。怨必叢。舌殺人。己必凶。

妖禽九頭。妖狐九尾。顧首顧尾。不見可喜。扞鼈斷足。形天斷頭。時起時舞。不見有憂。盜賊水火。不過家破。飢寒困窮。一身之凶。妒賢嫉能。殃及孫曾。利己害物。禍至殄滅。環堂而行。跬步有幾。行之不已。可積千里。索書而觀。書苦易竟。循環讀之。義乃不盡。欲身不病。無與物競。欲身無災。與物共財。

檻虎縱馴。不使導遊。吾誰與偕。岸有白鷗。籠禽雖俊。不與論心。吾誰款曲。案有素琴。

不隨俗。可挽俗。不趨時。乃掇時。

父母存。苦賤貧。齏鹽蔬菽。日以奉親。父母逝。感遭際。錢刀錦綺。僅以營祭。東流滔滔。逝不回。西日宛宛。誰能追。行持形骸。入蒿萊。元堂幽局。永趨陪。

鵬六翮。難傅天。蟲百足。難陟巔。終爲人所嗤。不爲人所憐。

百步之內。必有嘉木。吾拜松竹。重其先拔俗。一林之中。必有飛翔。吾拜烏鵲。重其不出鄉。一身之事。妻孥不詳。欲告我友。又苦各一方。百年之中。半不居里。惟蠹魚追隨。見我輒喜。

喜飲海水。喜食海魚。春夏卜居。無逾巨區。喜餐湖淥。喜采湖菱。秋冬讀書。宜傍禹陵。鏡不留物。影過卽滅。世不待人。事去卽陳。浮雲激電。生滅何速。視世以心。不視以目。

壬戌新正九日吳封翁端彝等邀集世經堂看梅作

昨夜羅浮月。微黃挂屋端。居然半間舫。釀足十分寒。殘葉樹頭墮。古香枝上探。花前兩年少。吹笛勸加餐。十八日偕陸孝廉繼輅莊上舍曾儀黃秀才載華至城東橫舟亭探梅回集卷施閣小飲卽送孝廉北上。東風纔解凍。北風又飛雪。已傷青春遲。復與友生別。陸郎卅載同鄉里。早歲聲名日邊起。蝶夢莊周昨已醒。牛醫黃憲今誰比。三君一例皆少年。各矯健翮凌風前。流光真慨熟羊腓。壯志欲餐生彘肩。嗟余病已經時臥。五十五年彈指過。范睢脅向生前折。荀偃頭從夢中墮。閉門且學楊子元。精義一一離言詮。雪花

六出梅五出。日月右旋天左旋。因茲悟徹無生旨。大地春光亦如此。要從鶯燕識春秋。不與蜉蝣共生死。

燭光千頭淚百堆。日昨畫鷁從東來。

元夕城東戚墅堰有競渡之戲。

天門一笑卽飛電。地軸半拆驚轟雷。閉門卻倩梅花

守。掃徑惟應待良友。二頃雖無陽羨田。百壺且中山陰酒。東門之東花幾株。草根樹皮春已蘇。大姑城訪

東晉刹。少伯河接西洮湖。荆湘米價平難得。楚蜀軍書尙馳驛。燈火初回眼已青。干戈乍歇頭先白。八角

籬門尺五汀。暫時分手若爲情。南行欲趁鳧溪棹。北上先題雁塔名。

將至洋川書院先詣郭北謁別先塋

經年方覺定羈魂。松柏蕭蕭謁墓門。已分頭顱行萬里。

昨歲蒙恩免死。遣戍伊犁。至戍所。將軍又欲行。亦荷聖恩以免。

僅留皮骨反孤

村。長愁擬共張平子。妙德慙無袁愨孫。揮淚更從原北望。鵝鵝聲裏上朝墩。

過東垠

已斷中江路。銀林五垠長。水難歸震澤。波轉突丹楊。別派分天塹。低圩減地糧。

五垠成高淳諸縣。遂爲澤國。前明遂奏減地租。派入

宜興荆溪等縣。

臺濛遺事在。三復感滄桑。

花朝日阻風。江口望采石。太白樓咫尺。不得上。

今朝花朝無一花。今夕月夕亦無月。因之酒人無酒飲。空向酒仙樓畔歇。沉思往事心內傷。陳劉應徐均

已亡。

謂三十年前學使署及沈太守業富署中諸賓客如邵學士晉涵高孝廉文照汪明經中諸人。我前同公謫夜郎。意外復得還江鄉。眼中千里與萬

里只坐沙洲慵不起。忘機雅有忘機伴。鶻鷓鷯絲飛不已。君不見、江源亦出昆命中。往者險欲探奇蹤。伊  
去昆命蔥嶺皆不遠。豈知勞人家住海東岸。江水過我始得東朝宗。犇馳歲月方三載。江水未移青鬢改。竹帛偏憐  
壯志虛。乾坤剩有詩名在。二更月出斷厓口。遠道呼童復沽酒。花時雖無桃花花。且向原南折新柳。  
涇縣道中夜宿

春山一路幽蘭香。菜甲遠襯斜陽黃。藍輿時向杏梢度。薄暝尙欲穿層岡。一山初平一山出。怪石總從頭  
上突。卻到山溪夜已闌。橋南一樹花如活。

過茹麻嶺

茹麻嶺南無隙地。麥隴盤盤上天際。青松陰裏紅杏花。波影日光微覺膩。疎疎一樹闌干右。燕剪未來蜂  
已逗。晴空復聞喚雨鳩。呪得一角陰雲浮。  
行次桃花潭山店看杏花作

整整斜斜劇可憐。桃花潭側杏花妍。銷魂樓上三更雨。似畫江南二月天。小語未妨留睨睨。閒情只欲惹  
鞦韆。慈恩回首眞如夢。露冷烟殘又十年。

山坑道中

雲乍離山日向晨。浣衣津口淨無塵。不知頭上花齊放。祇覺遊蜂戀美人。

抵洋川書院

來路雲已遮。去路山復塞。山禽亦分界。飛不妄南北。惟愁山外事。傳到此山側。預戒五尺童。不延山外客。追思荷戈地。亦有萬仞山。但覺白氣周。無此青彎環。攤書向檐前。鳥語殊綿蠻。勞攘三十年。獲此一歲閒。生徒十數人。曙卽攬衣起。周廊聽書聲。都穿白雲裏。與談前世事。一一盡色喜。所愧學業荒。款門來不已。樓前半畝花。紅氣通八牖。朝霞復相間。赤白分左右。欣茲讀書暇。時亦陟岡阜。日昨山雨肥。園丁獻新韭。詠亭側海棠。

薄暝行山坳。花氣籠一谷。紅襟一雙燕。守此花畔宿。紅紅白白競。半春只此花。態尤清淳。亦如名姝善守身。艷極不欲銷人魂。一花初開承一葉。葉上時時綴胡蝶。雲紅露白夜不眠。要看殘月來花前。曉起看梨花。

一白疑無影。亭亭物外斜。祇宜將曉月。襯此欲開花。飛瀑空相照。幽禽靜不譁。闌干兩三曲。何處著春華。山樓喜雨歌

一月不雨憂三田。四山出雲高接天。雨聲似挾海潮至。一夜迸落山窗前。山中懸溜本數重。添出百道如飛龍。喧聲忽然入室中。欲挾床几淩虛空。漫空花雨尤堪訝。桃花李花成陣下。海棠可惜昨始開。連葉都飛北窗罅。園丁失喜農師幸。風伯差嫌煞風景。翻盆雨驟晴亦驟。北斗仍看挂松頂。沉思往事聲暗吞。憶

昨雨急趨烏孫。竄身無地得空穴。雷電又入披驚魂。雨行作雪夜若年。我僕尙滯南山巔。羊裘溼盡不得脫。指凍欲裂。饑腸煎。卽今生還萬事足。況復眼前書可讀。雨聲風聲縱凌厲。足不下床頭戴屋。君不見。雨餘溼翠復幾堆。曳杖更欲登層臺。老饕無端笑口開。明日驚筍登盤來。

山館靜坐憶孫大星。衍戊戌年曾共隨學使按臨過此縣境。

峽號壘。簾澗響琴。卅年前事一追尋。巖腰柳尙凝青眼。谷口蘭真愜素心。偶爾塞翁悲失馬。依然山館仿來禽。舊遊十輩今誰在。最少如君白髮侵。

將至旌德趙兵備翼枉詩相餞未暇報也山館無事戲作長句柬之并約同遊黃山

逐臣初歸戀鄉土。日日醉眠腸欲腐。有花卽向花前飲。不問誰賓復誰主。少年英英丁與陸。明經履恒。孝廉繼輅。跌宕

宕文場氣頗粗。就中我敬西頭趙。七十高年健如虎。哦詩一字不相讓。往往雷霆雜吞吐。牡丹八首尤奇

絕。老筆轉能生媚嫵。百年文獻差不愧。一輩賓朋試重數。忘筌莊叟善高論。中允通敏。舍人召揚。

沈吳近又結詩社。廣文元輅。封君端彝。劉蔣頻招宴花圃。太守熊昌。撫鎮烜。賽神我憶月廿三。去歲二月廿三日清明。競渡人喧日端

五。波光已覺淨如綺。筆力復看強過弩。座中詩派判唐宋。壁上兵鋒看秦楚。危詞縱累十二碁。定律不差

分寸黍。便教長樂殿刁斗。敢與淮陰鬪旗鼓。強梁幾欲扛周鼎。弱肉何堪試蕭斧。叢譏杜老作詩瘦。轉學

苟卿著書苦。此來百里程迢遞。實避千言氣莽鹵。仍攜季豹同趨塾。時挈兒子符孫入塾。未擬伯鸞居賃廡。萬山已

距南來轍一屋祇開東向戶。三天子障肩堪並。五老人峯頭復俯。

九華山距此不及二百里

雲光破曉嵌眉睫。清氣歷

時充肺腑。恥同詞伯競壇坫。可許散仙居洞府。狂遊尙未卜時日。鄙意終須待儕伍。我餐黃獨纔匝月。君

跨青驄去何所。

時聞有吳門之行

名山欲入先鼓興。此老若來當步武。朱砂泉記仍可續。紅杏原詩不須補。緩程

水定由青弋。回路嶺仍登白紵。狂思策蹇升龍脊。醉或然犀燭牛渚。餘閒并可覓酒人。

陳巡撫淮近寓居蕪湖

得暇

未妨談食譜。君如爽約當有說。意必兩端持首鼠。蹤疲既畏行客笑。句劣或恐山靈侮。興公果係天機淺。

安石輒爲人事阻。縱然曳踵看山色。應悔埋頭住江潁。溪南帆席不肯挂。屋北降旗定須豎。歸時擲示一

巨編。讓我長歌擅今古。

登山半小閤

一開瞰四山。缺處望箬嶺。山坳一千戶。歷歷若居井。白雲穿入牖。曉夢尙難醒。幾家晨爨早。烟縷上山頂。

烟光觸花氣。倏忽暗朝景。獨坐心轉清。憑闌試新茗。

山下訪友

門前古樹分向背。千枝百枝鳥聲碎。有時出屋不及冠。頭上白雲如可戴。興來欲訪溪南友。水鳥鷺絲分

作隊。橋心甫過魚驚竄。瘦影亭亭嵌波內。南山雲晴北山暗。坐覺一窗殊顯晦。野人留客頗勤懇。手剪青

青一畦菜。家貧不諱瓶無粟。舍北村南總堪賃。飯餘一晌眠初熟。倏忽怒雷喧水碓。竹中一徑穿曾慣。人

去鳥來都不礙。零星舊事談難竟。送過前溪步方退。爲言山僻有一龕。明日倘來堪晤對。  
侵曉送客過嶺

孤帷隱一燈。行客尙未起。殘月下北山。寥寥犬初吠。

一峯抱一峯。劣徑入隻騎。十里吹溼香。原空瀉花氣。

偶成

鳥聲不下樹。蛙聲不上山。夢醒聞衆聲。寥寥隔層關。前宵一雨山光綠。添得水聲飛上屋。三層閣倚百尺松。飽聽日午吟蒼龍。

連日風雨花事零落殆盡牡丹芍藥尙無消息感而有作卽示諸生

岡北岡南厭登涉。十日看花都作葉。風飄萬朵無一存。隔隴蔬花尙層疊。閒情幾日少歸東。春夢百番難妥帖。負暄行客乍脫綿。驟暖高齋欲搖箑。無端頃刻變晴雨。或者陰陽欠調變。名花縱謝柔桑嫩。樹上家家有蠶妾。攜壺挈榼上冢忙。劇土四邊封馬鬣。茶畦偏多麥畦少。久矣斯風盛宜歛。洋川書院挺山半。築屋居然象城堞。一甌我尙遠借書。百里最慙爭負笈。閒繙左氏獲麟史。教做羲之換鵝帖。蜂腰終覺句可商。鳩舌半憐音不叶。九經四史孰淹貫。八體六書宜涉獵。百房燈影遙相射。半里書聲恍如接。埋頭已覺遙夜永。陟足偏欣上山捷。諸生英英志莫惰。春日遲遲睡防覺。何時便可放芍藥。此信定難瞞蛺蝶。花寬



十日五日約香已千枝百枝裏。新蟾屈指黃半鉤。嫩蕊關心紅一捻。二分纔向枝頭吐。一朵誰先鬢邊貼。花前勸我頻攜酒。花下阿誰時步履。醉同山簡接羅倒。雨學郭公巾角墊。金羈總向人前瀉。玉笛須從樹頭壓。半街月霧籠衫袖。五色花光照眉睫。商量卻待榴火紅。青弋江應放歸楫。

度嶺

一山初平一山起。更有一山生足底。怪峯稜稜都礙履。山鴉啼愁山鵲喜。翠柏青松淨如洗。山頭回身望山尾。來路都沉白雲裏。天梯初升石門啓。已隔下方三十里。

山樓曉望

花紅宜朝暎。花白宜曉月。梨花尙帶殘月光。一樹棠梨已迎日。人家分住東西嶺。菜甲作花連十頃。平田雨後飛溼光。雲朵亦與花爭黃。

微雨

天半浮雲過。山頭暗一重。早涼開北牖。微雨入前峯。已度三層澗。全迷萬壑松。冥濛看飛鳥。歸樹尙從容。

山行

添衣欲出門。日色驟晴煦。濛濛北原上。春氣零若雨。斜穿松櫟徑。百鳥頭上語。草花三兩種。曲折礙芒屨。前渡淺水灘。牽衣待儔侶。

三月三日憶里中雲溪諸勝

今晨三月三禁烟亦此日。風花無一朵。清冷值佳節。攜樽上高阜。轉覺鄉思切。遙憐池館好。疎雨亦將歇。北郭展嫩晴。雙橋上新月。應有挑菜人。延回出城闕。我家白雲溪。雲白溪亦漲。一鳥溪上鳴。千花樹頭放。近移東半里。築屋轉相向。春來倘無夢。夢輒在溪上。樓前楊柳樹。闢牖可閒望。花落溪水深。春人定惆悵。

郁李

階前郁李多。只惜花瑣碎。沉沉春晝影。迷客有如醉。幽蘭獨高格。開尙與人背。梨花嫣然姿。亦出桃李內。庶幾顏色淡。蜂蝶所不愛。三春孰蹤跡。一客獨盼睞。欣然攜茗具。晴晝看至晦。詎忍折一枝。夜窗仍晤對。半山看雨

雨聲欲走北。風力欲挽西。遂令一谷雲。分向西北飛。風驚西來雨。北走天頂依然挂。星斗風聲雨聲入。夜昏鳥歸人歸爭一門。君不見歸人歸鳥何太急。鳥亦有巢人有笠。

大風拔木歌寒食前一日

危亭不合皆畫龍。怪底拔宅思騰空。爪牙森森頭角挺。惹得天龍下窺影。雨聲飛完復飛雹。風力驟回先拔木。飛泉如濤響空谷。餘勢尙摧花與竹。畫耶真耶不可知。但見半壁雲分馳。雷聲亦自屋中劈。照見鱗

甲光參差。江南山高水復闊。幽處盡爲龍所窟。以龍招龍龍卽出。或者真龍怪唐突。黃山之西白嶽東。勸翁掃壁更畫高高峯。不爾龍挾此屋飛入雲當中。

寒食偶成

伊犂河上值清明。東距關門尙百程。今日萬山深處坐。雨花如夢撲簾旌。  
誰向洋川紀歲華。沿門都已採新茶。山中春事忙如許。桃李先開半月花。  
日午山窗睡起遲。東風吹夢入遊絲。愁無一架秋千影。閒煞滿庭紅杏枝。  
衰遲未敢說春愁。根觸鶯花憶舊遊。只有白雲知我意。隨風都到海東頭。

偕諸生至下洋川修禊各賦一首

我來已半月。未及洋水濱。茲逢禁烟節。又值上巳辰。諸生學經時。用志已不紛。相攜勝地來。驗此心賞真。  
聯行亦無多。童冠八九人。牽衣過石橋。酌蠡向水澗。頗感歲月馳。奄忽及莫春。吾徒勤讀書。尤在志行純。  
心性苟不漓。遑計泰與屯。朱雲折安昌。其氣尙未馴。及對薛贛君。品乃絕等倫。寥寥一千年。冀欲追絕塵。  
狂狷致失中。又恐戾聖門。同堂貴參稽。得聞盍共陳。歸及新月輝。陶然飲芳尊。

清明日望遠

三更白雲四更雨。踏青人聽更殘鼓。鼓聲纔絕人聲擾。已見春衫度林杪。濛濛松竹徑尙昏。春燕亦復隨

春人風光縱好春人訝。似怨桃花已先謝。山中一歲止一來。棠棣枝下仍徘徊。一句春鬢無顏色。卻戴幽蘭露猶滴。洋川曲折徑亦斜。沿路喜尋親串家。滿裙春水年年好。只惜紅顏鏡中老。

階前艸花黃白可愛爲賦一絕

黃黃白白滿窗紗。破悶聊拈午後茶。從此不嫌風景淡。草花能替樹頭花。

清明日憶女紡孫卻寄

小白長紅幾樹桃。嫩黃淺碧柳條條。春光偶到三層閣。客夢頻牽八字橋。堦可學文愁病肺。兒能涉筆幸

垂髻。

謂符孫

他時卜宅烏衣巷。

時得孫大季仇札約買宅共住江寧故云

門外山光卽六朝。

偶成

校得南華內外篇。晚春已覺日如年。新紅看罷看新綠。正是江南麥秀天。

夜起

尋詩似厭春晝忙。三更起行百尺廊。紅蘭花前月尤皎。白鷺影外天何長。樓臺密處欄干複。北斗正垂闌北曲。水西一燈行不休。夜半已到山南頭。款門殷殷人不識。失喜偏逢寄書客。山深不及羅酒漿。飯客祇有蔬花黃。主人將眠客復起。欲到縣中還卅里。

水北三松歌

日日樓上看三松。今日甫向松根過。亭亭拔地百餘丈。遠望仍疑水邊臥。松邊一橋亦千步。橋盡松根始  
全露。盤空天矯不可名。一半橫遮水南路。松梢沉沉足烟霧。白鶴不來棲白鷺。一枝北出勢更奇。豈得樓  
臺復無數。五松中間兩已枯。間向岸北尋根株。移南倘復十數武。老榦直欲捎浮圖。霜皮一尺裂一縫。堆  
得苔錢已無空。風聲雷聲昨倥偬。龍欲出山雷雨踵。倒海排山浪齊湧。只有此松兀不動。攫擎星辰疑有  
力。回轉陰陽不踰刻。根株盤盤穿入石。透出石中枝尙直。松聲近樹反不聞。數里外覺驚濤奔。鄰翁下見  
五代孫。自說輩行無松尊。愛之不忍手撫玩。一月幾回來斷岸。君不見。四山中間人跡斷。此客此松聊作  
伴。

暮窗看霧

分半山坡枕水涯。讀書樓上一燈斜。怪來眼界空如許。白霧漫漫蓋萬家。

望遠

挑菜滿裙總未曾。半旬常自睡蒼騰。小桃落盡春無夢。雙燕歸遲夜有燈。舊友許貽京口酒。新詩都寫剡  
溪藤。惟餘望遠心偏切。月黑高樓上幾層。

山杜鵑

十日不出戶。杜鵑紅滿山。始知造化功。足補春事殘。紫藤亦牽花。掩映松竹間。胡蝶去已久。何時復飛還。

曳杖一縱觀。花露衣上班。側聞鄰翁言。消息到牡丹。有此匝月紅。庶可待藥欄。

山中

山中雨半宵。三日足清響。蛙鼓亦上山。寥寥非意想。

卽事

山雲朵朵欲凌空。罩得山花處處紅。自覺著書心地徹。不知身在白雲中。

雨夜友人過訪友涇縣人

竹笠芒屨猛叩關。匆匆知自震州還。故人欲話三年事。積雨先沉四面山。勸客酒杯心轉怯。照人燈火鬢

初班。離家早已忘家累。擬築幽居水乙灣。所居水西山水尤勝

洋河橋題柱

洋川三面是人家。到得橋頭路已叉。卻趕牸牛山北去。不教喫盡野田花。

題士女遊春圖

白白紅紅艸亦香。且扶新月過橋梁。春光似海人如海。不避遊人說大方。羅衫葉葉趁春遊。竹粉時時拂面流。摘得菜花何處用。嫩黃先襯玉搔頭。黃蜂何處覓遊蹤。欲上層梯意轉慵。拂面遊絲已無數。第三層塔且從容。

驟晴驟雨筆難描。一朵輕紅未破苞。乳燕尙嫌毛羽重。祇教胡蝶上枝梢。  
曲曲溝塍之字斜。踏青纔了路偏賒。一條春巷門無數。何處能尋阿姊家。

十四日夜起

及此三更後。唵堂宗不譁。夜雲時作態。春月亦能華。蝶夢穿書幌。蟲聲落畫叉。空明一灣水。似不隔窗紗。  
十五日詣日涉園看牡丹

紅疎綠暗悵無端。路僻山深夜尙寒。似爾鏡中花爛漫。鬥他天上月團圓。風光豔憶餐霞閣。香味清逾承  
露盤。迢遞樽前小兒女。故鄉春好不同看。昨歲友人貽異種數叢植卷施谷中此時當亦盛開故憶及之

看花歸值急雨

雲頭倏已昏。雨腳來亦驟。歸途經略約。四面水聲湊。忘攜篋笠具。衫袖薄將透。幸茲坡險處。我僕已迎候。  
扶攜到軒墀。早復注簷溜。樓頭窗八扇。看雨敞前後。只隔山兩重。空明月如晝。

夜坐

好書圍四面。複屋住三層。花氣能消酒。雲光不礙燈。下帷更乍永。擁被月初升。只此清涼境。年前得未曾。  
十八日詣延芳書屋看牡丹

別分池館枕汀洲。花外纔停喚雨鳩。修到紅顏仍有福。開從綠野不知愁。吹香簾下頻牽夢。照影波中亦

並頭。倘仿徐熙圖。沒骨。焉支山下我曾遊。

歸途復過日涉園。花事尙盛。

別來莫恨花開緩。月缺一分花尙滿。風風雨雨卽不時。梅枝李枝能護持。牡丹旁有梅一株高梅枝高更出簷角。雨縱日飛花不覺。固知顏色異。泛常樹亦曲意憐花王。花前艸綠都如帶。花影將沉夕陽外。朝霞色淡莫色紅。雨後花尙嬌。春風片時危。坐北窗裏靜聽周廊鵲聲喜。君不見林陰初昏客初起。香氣逐人還半里。

二十日大風。雨屋瓦皆飛。至四鼓乃睡。

四山都幕雨。雲氣代成峯。怪響時穿屋。飛濤半入松。夜燈迷百級。露瓦揭三重。誰說高居好。眠遲待曉鐘。  
案頭盆蕙盛開。

書纔完一卷。蕙已舒九朵。清絕山館中。幽花伴人坐。

二十八日破曉雷雨。

驚雷一片穿窗紙。花上棱棱電光紫。朝霞欲上倏復收。讓此霹靂穿雲頭。日光初明電光暗。雲外數峯雷尙占。陰晴百變誰得知。殘月尙挂青松枝。

連日風雨。山杜鵑紅者盡落。復有黃色一種。花朵較大。滿山谷喜而有作。



昨朝山杜鵑。一雨紅盡退。今來黃更豔。萬朵出山背。深山花事好。五色若相代。花黃不到處。點入四山黛。  
森森碧合流。纍纍綠成隊。如拳復如合。花朵不繁碎。已有采藥人。嬌黃鬢邊戴。

自十五六日雨至此十餘日不止春事將闌感而有作

只惜花千片。都隨雨腳飛。此時孤客夢。樓上一燈微。夜久頻牽幔。春寒孰寄衣。惟應入簾燕。話舊尙依依。  
衆響居然寂。天風靜掃關。殘春懷遠道。斜月逗前山。影逐孤雲上。魂隨獨鶴還。鄰翁縱相約。花事恐闌珊。  
二十九日稍霽向山後縱步

上山平。下山險。霞光舒。露光斂。雲頭尙有瀑一重。雨腳亂飛花萬點。厓窮谷斷步欲回。對面樵客穿雲來。  
沿流飛渡捷于鳥。詫說北山花事好。

山樓讀書雜詩

朝陽出東山。生氣滿空谷。春禽飛不到。時亦響啄木。經時春露好。潤此松與竹。閒披東北牖。偶復眺村屋。  
空外飛爨烟。應知飯將熟。

晨興對聖賢。夜夢侍親側。神明渙然開。真趣誰復識。孤生百年內。所苦駒過隙。庶幾餘寸晷。藉以獲三益。  
平生尤與悔。至此已冰釋。

平皋三日晴。原野漲春氣。裊裊青竹竿。森森逼天際。高低楊柳外。鳥亦鳴得意。而我久客斯。孤生或如寄。

山農勤播種。僻壤少隙地。昨者餉豆苗。盈筐綠猶細。

山樓極高寒。所苦山霧重。誰云春日暖。幽谷未消凍。軒墀行迹絕。艸密已無縫。冠裳束高閣。月朔偶一用。離俗愧未能。經旬有鄉夢。

閒身三十年。一日書不離。每于積軸中。獲此神解奇。一義苟豁然。詎識渴與飢。遊山素所耽。近屢改日期。亦恐心志專。或以耳目移。殘漏披北窗。攤書竟忘疲。

山雲不出山。舒卷如在我。林禽知客意。時亦近窗左。軒墀無別物。積軸致堆垛。而我顧樂之。時行復時坐。風花雖已謝。又綻滿林果。今日山杜鵑。入簾開幾朵。

頻年著左傳。詰已欲告成。偶題一律。

頻年几案整精神。訓詁方輿勘較真。于世已疑成棄物。此經未愧號功臣。時將古意參前哲。不肯多端誤後人。紅豆一株今在否。莫教嘉種化爲薪。紅豆山房惠徵君定宇所居也。此書采徵君九經古義頗多。故憶及之。

三十日餞春

屈指將長至。攤書晝漏長。日濃花氣淡。山靜水聲忙。紅隱新遷社。青連古戰場。北去卽闕石。爲晉宣城守。桓彝屯兵。距蘇峻處。殘春今已盡。三復舉離觴。

山館卽事

三重碧澗客難渡。一片白雲吾與居。平心已任喚牛馬。壯志偶欲箋蟲魚。樓頭青松下芳艸。樓上著書人未老。經旬窺徑無一人。抗手欲招飛過鳥。

花光一重雲一重。花氣香入雲當中。雲頭花香亦分卸。高下任逐泠泠風。幽居百日絕忘念。山在屋頭看不厭。惟嫌村酒淡不釀。卅里呼童走山店。

初七日夜偕同人至鄭氏園亭看芍藥歸途遇雨作

閉戶纔旬日。高原麥已黃。亂流雲外湧。百草雨中香。地僻留春氣。廊虛閃月光。居人無乃笑。曛黑看花忙。

喜青陽陳明經蔚過訪

驚起山南鳥鵲羣。筍輿穿徑已斜曛。意中欲定千秋業。時以所作乞肩上猶飛五色雲。種蛤近添新事業。

近于江北置水田數頃射魚仍憶故將軍。君客福建將軍署中五年他時九子峯頭路。訪罷東巖便訪君。東巖卽九華東峯。三十年前與君分手處也。時

訂重遊九華

豐溪道中望天都峯作

山南地陷如智井。人鳥爭巢松柏頂。高低山麥皆已刈。留得白雲鋪十頃。千峯萬峯雨模糊。一峯獨立天所都。記曾曳杖至絕頂。七百里瞰高浮圖。戊戌歲隨學使者遊黃山。曾偕士人陳某登天都峯頂。天氣晴

土人名爬山虎名山歷徧人驚老。如虎健兒今亦少。君不見置身高處眼界開。足底復有千山來。聞死已及十年

畫眉嶺

竹笠芒屨雨腳粗。更從峯隙望平蕪。畫眉嶺上無多地。除卻茶菴便酒壚。

涇縣道中山行

水東水西天下最。一縣好山都染黛。人行螺旋不得休。纔欲出山雲復礙。溪光五采霞五色。霞外樓臺好登陟。艸頭黃白時有花。紫燕交飛亦如織。仙人溪上雲冥冥。山青一路至敬亭。君不見。車箱驢背坐已怕。欲借仙人鯉魚跨。

琴高溪小憩

連山雲氣暗層岡。瘦僕偏憐策蹇忙。只有雨絲無日影。琴高溪上十分涼。

琴魚琴筍更琴茶。琴高魚之外地產茶筍亦極佳土人名爲琴茶琴筍似與仙人共一家。欲約麻姑過溪上。平田添種女桑花。

渡小南湖

稍晴渡南湖。波闊三十里。鷓茲及鸕鶿。水面飛不已。一綫日影中。湖頭達湖尾。四山青乍露。雲已伏不起。何因吳地犬。見日亦鳴吠。只有南下人。推篷展然喜。時陰雨已及半月

第一村圖

于徵君宗林。家在蒜山之麓。相傳卽晉時孫子荆所居第一村也。壬戌六月十日。徵君招余過洲上信。

宿並命幼弟淵問業于余。坐次出此圖索題。因作長句以贈。

京江西頭第一村。大水細水吞柴門。柴門開處一峯立。

對門卽九子山。

直上棧棧百千級。水邊楊柳分三層。鳥巢

人屋魚有罾。水光不動山雲化。魚鳥與人皆入畫。東瞻北固南五洲。屋背更壓金山頭。徵君兄弟文筆優。

闢屋別築藏書樓。草堂時來第一流。十日五日能勾留。萬株青竹竿。百頃香水稻。九派江流入懷抱。君不

見。晉人風流安可效。合署此村名有道。

余過介休日。曾兩詣郭有道村。

十一日同人遊九子山

今朝北風好。吹我入南山。一谷怒當路。千花靜掩關。

時繡毬薔薇尙盛開。

客從三伏斷。雲自五州還。卻挂征帆去。幽

巖未及攀。

擬重遊獅子窟未果。

剪江至焦山并遊巨公厓諸勝

火雲燒處戶難開。卻被支公信使催。我比海潮還有信。兩隨圓月渡江來。

石骨峻嶒石髮纖。海雲東上日西淹。來看桃花處。之字江流品字巖。厓正對桃花洲。

巨超上人于焦公洞西北復闢一厓。境極奇峭。十二日邀余及同人避暑其下。并乞命名。余因以巨公名

之。復繫以詩。

道人夜洗山。洗入北山腹。玲瓏逢一竅。貼若巨龜伏。梳爬及三日。寬已半間屋。西來山勢猛。至此始盤曲。

石石悉欲雙。惟茲石成獨。安排青石磴。甫可展遊目。南瞻及京口。西正眺浮玉。鬱鬱卅里洲。雲烟互重複。鑿山疏水績。始事尤足錄。成功雖欲讓。衆論久已屬。剝苔題數字。庶配朗公谷。

十三日早至別峯菴看日出

一峯既別出。一水亦別流。山水各有別。于茲起危樓。樓上八牖開。正對東海頭。百怪未及藏。光已燭郁洲。森森赤玉盤。正向案上浮。朝景既已開。夜氣始盡收。我心亦空明。障翳一不留。僧雖訝久淹。敬進水一甌。移榻閣上眠。心神與天遊。

詣高旻寺如鑑上人招登天中塔望海

不信帆檣上。居然戶牖開。岸疑穿地出。山欲渡江來。舫屋東西接。樓船楚蜀回。贊公招手處。飛鳥亦驚猜。此日隨飛錫。多年歎轉蓬。三層歷霄漢。百級出樊籠。天意誰能問。坤輿已欲窮。請看東海水。流入尾閭中。茱萸灣別墅與諸同人納涼分賦卽放生池

茱萸灣中無六月。水竹水雲涼沁骨。支公迓客鶴亦隨。毛羽離披脛先折。房廊已遠官河口。四壁都依水楊柳。幽人見慣亦不驚。水面大魚人立久。斜陽欲入雙徑松。一杵已遞焦山鐘。雷塘螢火忽飛到。百劫尚識臨江宮。石牀旁邊安竹榻。僧古說詩如說法。道心不止鷗鷺喻。善念都看到鵝鴨。勞勞行客歷八荒。誰識此子疲津梁。天山冰雪話難竟。客詢及出寒傷事座客心地皆清涼。茶杯門罷門酒杯。七客反送孤僧回。君不

見東西咫尺涼燠異。隔岸火雲飛驛騎。

高旻寺行宮敬賦

一水居然跨兩州。塔前千尺步廊周。怪蛇古柏爭橫砌。海燕溪雲各上樓。話久綠莎廳外路。涼生黃屋殿西頭。誰憐憔悴江干客。曾侍長楊五柞遊。

侵曉詣放生池看荷花。因夏仲雨水過多。花事寥落池上謝。公祠等又半燬于火感而有作。回途復至十

家池小憩

謝公祠畔路。不是不能來。水雲旣已荒。水上無樓臺。半池枯菡萏。十頃黃蒿萊。沿溪三兩家。枕此蘆荻隈。終朝女墻影。鏡裏常裴回。待此曉日升。久坐石砌苔。回經下家池。紅荷反齊開。

盆蕙盛開

東南卅步回廊直。香氣出門如索客。尋香覓蕊淡不分。花葉稍分淺深色。枝亭亭凡九花。根蒂尙帶山中沙。君不見。離山更憶居山日。萬朵奇花一鈎月。洋川書院在山中。此花尤多。

哭張編修惠言

直爲朝廷計。尤須惜此人。義堪風有位。官僅作詞臣。嫉俗眉常斂。憂時意獨真。研心仲翔易。骨相亦同屯。

君時注  
虞翻易

萬里逢嚴譴。三秋值抱疴。避人來請室。鞭馬及渾河。已未八月余在請室中君無日不入訪 閱世知心少。

思鄉別夢多。屢欲乞假歸未果 十年無淚灑。爲爾一滂沱。

校禮圖爲凌同年廷堪賦

君年三十正據鞍。相與共客河之干。丁未戊申曾同客河南撫署 是時我有左傳癖。未暇從子研周官。禮經盤盤若干

例。君近著禮釋例甫完先擢第木天粉署非所願只覓著書將母地宣城僻在水一方昔爲詩數今禮堂

驚人。不賦謝眺句。解詰聞學盧中郎。我行千里與萬里。羨子枕書眠不起。昨宵訪舊來此州。萬卷都堆竹窗裏。遊談我已戒不根。況子經術今專門。留賓亦復太狡獪。倉猝爲我羅雞豚。君不見溪茶可煮筍可食。官滿十年階欲陟。他時博士擢禮官。兀兀看君稱其職。



此页空白

# 更生齋詩卷第六

## 蠡河傷逝集

夜宿九華山東巖讀壬辰年朱學使筠題名碑共十二人自亮吉外十一人無一存者感而有作

前遊十二人十一登鬼錄惟餘一生者西復窮地軸當其勢倉皇天地爲一哭寧知遄返迅又此濯雙足平生時檢點恐負友生屬餘年惟欠死除此萬事足山僧勤問訊把袂恍如昨灑酒對石厓四山紅躑躅度柯冲嶺

屋前童失聲屋後山起立尤愁沙石滑空處不置級斜暉初沒水行客勢轉急君看厓上樹迅羽亦不集飛騰如猿獠我僕愧難及明星三兩顆天已逼斗笠石罅出一門雷霆復相襲時時涼沁體衣袂宿雨溼過嶺望九華凌空向子揖

淇清園夜宿爲陳明經蔚點定所輯聯珠集

不用屏風六曲遮屋頭了了見金霞門外卽金霞峯一門詩集追元祐百里溪光似永嘉墨雨醉看飛四座水雲

涼欲卷千家平生幾兩遊山屐到處爭圍問字車

下洪溪憇雲嶺書屋贈芮茂才炳

泉聲碧玲瓏。石氣青鬖鬖。林梢花隘匝。潭隙魚瑣碎。主人雖獨坐。修竹列成隊。主人雖孤眠。翔禽舞成對。閒雲知夙契。空水識心愛。中年富文史。亦屢至都會。因緣無把臂。甘此事恬退。況今耽道寂。久與俗相背。閑仍課經卷。偶亦勤耜耒。拔履不出門。寥寥今卅載。

自廟首至石柱山久憇

二石絕不黏。高下及三丈。凌晨北風峭。積勢欲顛蕩。將頽仍不下。突兀出意想。奇峯覲千百。此石僅能匿。行人經脇下。險絕不獲仰。無心雲亦懾。出谷徑皆枉。孤盤千級磴。竟少一寸壤。艱危歷方盡。烟水忽駘宕。貪看遊屐過。樓閣幾家敞。夾岸紅蓼花。沿途足心賞。

歸途訪白山精舍

南山與白山。勢若不相接。青紅雲萬縷。祇向白山貼。望中纔數步。忽隔嶺千疊。松梢高復下。門此筍鞿捷。樹杪露石樓。參差間層堞。山深富文史。百里爭負笈。讀書精舍者甚衆禽巢及人屋。近若眉與睫。窗開瞰峯罅。鳥道人休歛。稜稜飛瀑外。山鬼或能涉。爆竹偶一聲。毵毵落如葉。

松澗

藍輿一折已入山。百折不獲升松關。鳥聲噪客一何急。飛瀑復向輿前攔。夕陽欲沒仍不沒。始覺石門天半突。雲頭陡落一片陰。且憇松澗聽鳴琴。

余本約焦山僧巨超同遊九華。巨超遲至山二日，遂不相值。巨超瀕行，丹徒顧文學鶴慶繪天臺踏月圖見寄，因作長句題後以貽。巨超卽寄文學及王秀才豫。

我前遊九華，苦乏熟客陪。有僧名道成，

道成俗家江都今主九華飛來峯精舍

有峯號飛來。登峯挈僧行，奇險始盡開。猶遲

過江僧，未及登天臺。天臺山高一千丈，卻值秋中月將望。山光正好客不來，一谷猿猱致惆悵。我來早數時，君來逾二夕。蒲帆何遲笱，鞵疾百里白雲迷。去轍數君住近桃花洲，見畫忽欲生離愁。君不見，我今讓爾出一頭。逸興竟與神仙儔，天空月華露不收。任爾徹夜成清遊。

余以九月初旬至黃山浴朱砂泉及門青陽陳博士坡文學壤及塾昆仲後十日始至亦不相值。博士等宿文殊院及紫雲菴各二日始下山并迂道過訪出遊山詩相質復率作此篇跋後兼寄巨超。

半春約客遊天臺，芒屨已返客始來。半秋約客入黃海，可惜疲蹤復難待。山靈笑我屢失期，不待伴侶相扶攜。豈知事會適然耳，僅隔百里趨先岐。山山秋爽山山月，爾乍入山余轉出。題饅說餅興益豪，不負秋中兩佳節。狂來翻怨天半風，不遞笑語來雲中。諸君清福亦誰及，各以月滿升中峯。一峯參天一拔地，盜得乾坤最清氣。環山宣歙十萬家，下視泠泠垤中蟻。九華旣愧雲水僧，黃海又復慙吟朋。君不見，天臺天都讓爾登。我轉下歷塔千層，萬峯中間一水澄。寶氣上燭光如燈，三宵七浴爾可能。痼疾若失神明增，靜中道氣時鬱蒸。他日或者能飛升。

七月廿三日道過宣城。凌教授廷堪邀趙舍人良壽戴教諭大昌陪遊南樓。晚日即飲教授學舍。率賦一篇奉贈。并呈趙戴二君。

我前來宣城。北樓正盛。南樓傾。樓頭七客作高會。璧月夜半縣簾旌。我今來宣城。南樓招客北已扃。江城不雨及匝月。樓上習習涼風生。地高正可瞰中外。岡阜缺處孤蒲平。春歸臺前望敬亭。山色無復前時青。

流光彈指卅年耳。舊友一輩誰崢嶸。紫微舍人有盛名。前遊正直歌鹿鳴。靈光歸然尙及見。謂舍人父侍

辰年隨學使者至此猶及見之令我再到思前型。西頭博士官極冷。大戴小戴俱橫經。教諭子孝廉揚輝亦隨行邀來共向此樓坐。意

外一一欣合并。我行僻路人罕經。頗怪百輩隨人行。我顏衰慙衛洗馬。我句拙愧蘇端明。郡人看我亦何意。後先轉告喜且驚。得毋平生性拙罪。屢櫻或者疑我非人情。不然又疑昆侖雪窟在何處。怪我萬里游行輕。豈知我荷再生德。投畀又許重歸耕。此來訪舊亦偶爾。難得四面山如屏。依然游興尙未減。九子蓮萼思逢迎。淩陽仙人竇子明。邀客不惜飛千觥。烹鮮斫膾煮菱藕。灑掃竹徑開荒廳。茶杯初停酒杯續。愛我奇論時縱橫。主人先醉客轉醒。隔屋僕豎杯難停。君不見。燭花墮穗已四更。門外僕馬催長征。炎天雖熱。夜氣清。嵐翠重疊浮冠纓。曹騰醉客路杳冥。照徑幸有東南星。南樓北樓此夜一回首。落落更鼓餘三聲。

霜降前二日得家書知山妻病甚亟時以事淹滯未得急歸書此遣悶

山館傳經底事忙。一旬猶未返江鄉。青林盡變爲紅葉。那得愁人鬢不霜。

宿京口于徵君宗林宅

日月雙丸竟若梭。此愁難遣酒銷磨。癸辛雜誌從頭讀。丁卯荒橋接踵過。鄰舫乍驚歌小海。寓樓偏苦逼長河。淹留信宿非無事。課得侯芭奇字多。

焦山法界樓記夢

法界樓前雨乍昏。半宵忽復見驚魂。夢中不畏波濤險。飛盡江關到海門。

幾番推枕睡難成。索索愁聞故紙聲。一語似傳陽羨好。微茫或已證來生。夢中見蔣宜人似言將往宜興。

悼亡八首

蔣宜人亡已匝月。心緒惡劣。不能握管。昨赴弔吳門。舟次無事。勉成八律。聊寄哀思云爾。

四壁都無百事非。依然佐讀忍朝飢。窮年累日埋頭慣。月地花天攜手稀。質釧記供除夜讌。購書先鬻嫁時衣。貴來只憶居貧候。宦海頻頻勸息機。

會稽僚壻最輕浮。心薄酸寒笑不休。顧我幾時纔奮翮。累卿長日鎮低頭。補衣怕在人前綻。缺米羞從舍外謀。春半好花秋半月。可曾結伴出清遊。

客久燕臺復吹臺。遠人難返遠書回。中年總覺愁眉斂。上第纔令笑口開。官俸薄憐隨手盡。宮紗新憶稱

身裁

宜人二次入都皆直端  
午拜內廷紗葛之賜

歡場畢竟平生少。夜夜遲眠漏暗催。

柰此迢迢遠道何。行完舟楫上車贏。七千里外攜家往。三十年來負汝多。憶塔夢魂逾紫塞。傷兒涕淚滴

黃河。

余視學貴州出都日次子盼  
孫忽殤宜人思之往往垂淚

浮生本擬難重見。卿咏飛蓬我荷戈。

百齡原未敢輕求。妄冀同將甲子周。昔日望夫幾化石。他時喚婦怕聞鳩。裹屍馬革吾曾具。滴淚牛衣爾

尙收。奉倩過情蒙叟達。悟來一笑欲忘憂。

常將家計一身支。甘苦誰人得盡知。慈母羹湯調隔日。

宜人自都中回母莊孺人年  
已九十宜人日饋甘旨不絕

兒曹衣履製隨時。輸

官不待催租吏。掃室先延課讀師。可惜了無情緒在。譜他遺事入哀辭。

深閨解笑元才子。捷徑行纔冠百僚。尙詔俸錢逾十萬。可知名節墮終朝。偶思卿語閒中涕。頻把生魂暗

裏招。我亦營齋更營奠。居貧未改舊箠瓢。

一種傷心譜不成。畫眉窗外總帷橫。何堪枕冷衾寒夜。重聽兒啼女哭聲。隻影更誰憐後死。遺言先已訂

他生。無眠轉羨長眠者。數盡疎鐘到五更。

客中雨夜不寐起坐讀吳祭酒錫騏近所寄詩

誰憐奉倩最傷神。起坐披書屢欠伸。垂老僅餘囊底智。獨醒時啖果中仁。閒將晴雨占庚子。未許雌雄判

甲辰。癸酒與予同舉鄉試  
井同庚故戲及之

正是客懷淒斷處。玉梅窗外影橫陳。

十二月十日同徐達源待詔陳煥理問唐在簡潘眉沈翹三秀才呂英馮珍兩上舍遊故宮傳周元理宅後五畝園率賦

我來黎里鎮。冬杪意淒肅。悠然思縱眺。退傅存老屋。維時款戶客。笑語聆皆熟。攔門富烟水。惜尙少喬木。尙書曾一面。歸棹昔何速。休神家術日。久已鬢毛禿。死有五畝園。生爲八州督。同時弇山叟。亦復振英躅。俄焉大星隕。倏爾故巢覆。並看饒遠略。獨此享殊福。無端判豐悴。誰得識倚伏。去去訪墓門。靈巖北山麓。

畢宮保墓在靈巖山麓

### 贈徐達源待詔

居鄰水國號山民。校勘陳編事業新。官爵偶同文待詔。唱隨欣得管夫人。君配吳夫人亦工詩。有寫韻樓集四卷。買書韶好通支港。寫韻樓高絕點塵。屋後女桑三百樹。不妨來訪異時春。

### 跋屠秀才挾鯨燈筆談

吳江書生授徒畢。不朽思憑退毫筆。文章李益詩韓翃。鬼董狐兼作三絕。比來作家殊可商。數日便已盈巾箱。春秋三傳閣上束。委宛一册匳間藏。豈知著書人。貴在義創獲。陳編盤盤出心得。世事悠悠嗤耳食。元之又元尙難冀。譌以傳譌究何益。韓陵碑外呼以驢。沈約傳中嗾作賊。游談縱欲宗儀衍。邪說遠不如楊墨。仍矜信手書一寸。可畏當頭法三尺。汗牛充棟出不休。郢書燕說吾所羞。流傳縱復屏不視。雅爲世



道人心憂掃除一切斯政要。作者竟煩天子詔。近有諭旨銷禁說部等書從茲委巷絕傳布。不與俗儒資語笑。六經置案廿史陳。吾儒事業本有真。見聞自此可畫一。風俗或者歸真醇。君之此書我所喜。有勸有懲非衆比。因君發我所欲言。白日當空照窗几。

阻風二首寄吳祠部蔚光

殘年心跡閑如此。爲訪知交屢阻風。料得故人吟案側。寥寥先有夢魂通。  
燕然日日荷戈馳。苦憶孤蓬聽雨時。何幸望湖亭外路。阻風中酒更題詩。

偶成

俗儒不知古。亦復不識今。喜作經世書。何異聾與瘖。聖人旨昭昭。不向六籍尋。沉埋語錄中。痼疾旣已深。事故紛疊來。隨俗而浮沉。仍然嗤老莊。又復哂向歆。一冊挾兔園。更詡工詠吟。遐哉鍾子期。何可託賞音。  
阻風二日隨地泊舟。率書所見四首

昨宿吳淞營。今宿海虞鎮。官塘咫尺不得近。且向波心候風信。雪花夜半縱復橫。一燈如豆寐不成。老龍窗外欠仲立。來聽五夜吟詩聲。

一村無十家。屋背皆黃蘆。村前村後集釣徒。衣食總靠門前湖。大魚網得愁無法。倔強先將石砧壓。魚多市遠不值錢。時割銀鱗飼花鴨。

人蹤既已稀。犬吠亦不聞。舟移一村復一村。對面忽迫前朝墳。荒碑半埋難卒讀。落月正懸墳上屋。多年翁仲欲出行。石馬石羊爭尾逐。

一舟依魚梁。一舟衝蟹鬻。鴉巢紛披鵲巢亂。風急船船欲登岸。清晨糴米路復遙。蠟屐險欲經危橋。船窗飽飯無一事。行客水鳥皆無聊。

### 山村雜咏

殘冬已見蟄蟲蘇。晝暖無人詣酒壚。看徧市橋春帖子。家家都已寫神荼。

豬欄鴨棚護偏牢。柴積先逾屋脊高。一事轉驚除夕近。堆盤春餅襯年饒。

蠻方聞未息烽煙。近聞廣東復自會匪蠢動造物恩于此地偏。但得臘頭三寸雪。江村又可卜豐年。

江鄉歷盡更山場。蝦菜都看入市忙。曉日淡黃天淡墨。竹梢先已逗春光。

自吳江歸取道宜興舟次值同年邢大令澍話舊卽席賦贈

前年西子湖。同訪孤山鶴。戊午冬仲在西湖把晤今年鼓歸棹。值子鷗波闊。我行萬里歸兩年。君官一縣還未遷。卽

令大吏舉尤異。鞍馬結束行朝天。官舟初停我亦泊。意外值君殊錯愕。山陰踏雪訪安道。西陵遇風獻康

樂。分張久已慨班尹。同泛近看追李郭。君才轉以繁劇進。我境苦從憂患縛。吟詩不已復著書。君前著全

近又欲緝宋會要官齋聚書至三萬卷多有藏書家所無者萬卷總爲秦風儲。精心復緝宋會要。俗吏百輩誰得如。邇來述作殊難說。

往往著書成頃刻。惟君畢力究經史。餘事猶能及金石。家山憶在古隴西。君家在階州近聞尙未歇鼓鞮。秦川之中血沒腕。白日已有妖禽啼。怪君語及顏色慘。日日心馳到關陝。飛書走檄君最慣。殺賊持刀我尤敢。瀕行索我輿地編。我今學業荒可憐。投荒來去絕吟咏。卽有亦不如年前。昨來歷徧甘涼肅。荒翳從誰借。書讀。河西子弟多才俊。健筆尙須資卷軸。君駝萬卷歸秦階。可作隴右藏書家。開門看山閉門讀。課子暇日還咿啞。妖氛銷盡山容爽。隴底平平亦如掌。秦中山川我神往。挈杖來遊異時儻。

夜泊

忽風忽雨入黃昏。繫艇聊從古樹根。五夜單衾驚驟冷。卅年舊夢喜重溫。荒途似訝非人境。密意憑誰寄鬼門。我已傷心不能說。更聽鈴鐸語荒村。

十二月十八日吳祠部蔚光招同邵聖藝封君孫原湘席世昌邵□□三孝廉雅集小湖田館卽席分賦小湖田館值年殘。難得詩人六輩閒。映雪半窗聊讀書。衝泥雙屐罷登山。休官未免仍憂國。荒飲何曾更閉關。尤喜賊氛消咫尺。符離城外戍兵還。昨宿州鹽梟戕官滋事。江蘇巡撫亦領兵至徐州防守。適聞事已大定。兵可撤還。

打冰行

船頭敲冰如戛玉。船尾打冰如擊筑。一冰飄來大如斛。船尾船頭手皆束。北風如虎冰所憑。冰面又復添層冰。嚴霜一層雪一層。照耀白日初東升。枯樹灣。白楊渡。舵樓指點鑿冰處。鼻涕先驚作冰柱。

守凍雙河口竟日對錫山喜賦

平時祇覺山容峭。不識玲瓏石千竅。今晨看山山益奇。九峯高處鳥不飛。半宵稜稜朔風驟。雪壓白雲如絮皺。更殘缺月上嶺時。雲白與雪光參差。霜加濃。雪增厚。襯得空林鳥巢瘦。三日凍雲難出岫。

小除前一日祭詩作

過江名士渺難求。溫嶠居然第一流。懶把黃金鑄生佛。閑栽碧玉繞新樓。時于屋後築一小樓先期種竹以待升歌尙有兒能讀。斗酒先無婦可謀。誰更殷勤送梨橘。蔣宜人在日。余夜飲歸必預儲梨橘以待未經沉醉已生愁。

癸亥元日影堂祀先感賦時蔣宜人亦附祀

收拾全家畫裏看。愁從紙上話團圓。如卿又已裝成軸。只我何時定蓋棺。殘臘雪封梅蕊白。五更風颺燭光寒。朝參久罷朝衣典。野老應知禮數寬。

新正十九日趙兵備翼招同莊宮允通敏劉官贊種之暨舅氏蔣檢討蘅湛貽堂雅集適同年會運使燠過訪遂并邀入會並詞館也兵備作三詩紀事余依律奉答并寄顧修撰皋莊吉士驛男謝吉士幹。是集本約

三君修撰以道阻。二吉士以屬疾皆不至。

堂高真認大羅天。五輩飛仙一謫仙。同羨玉皇香案吏。仍參絳縣老人年。檢討舅氏以年過八十賜第已甘名士稱龍尾。里中同館。余齒居末。每出多使余前馬。今日蓬瀛重預會。尙疑枚乘是張鷟。

一院陰陰覆薜蘿。清談原不沸笙歌。筵前客尙遲三少。修撰及兩吉士座末人猶冠七科。余子詞館爲後進。然下距壬戌新及第諸君子。

已屬七科前輩矣。選日早欣傳里鄙。使星偏欲駐巖阿。運使以公事赴吳門。歸途阻凍留宿余舍。揚州金帶圍休羨。只此梅花瑞氣多。

屈指先庚與後庚。兵備以庚午鄉舉。余以庚子前後却三十年。迢迢卅載許齊名。登科記憶蘇和仲。諫獵書慙馬長卿。九秩乍開稱晚進。檢討舅氏年已近九十宮。允與余皆舅氏執經弟子。一堂分半禮先生。家風雪窖冰天慣。敢詡巒坡世澤清。先文敏謝啓有父子相承

四上鑿坡之直云云用及之。

是日座上有懷孫兵備星衍復成一律卽呈諸前輩并寄兵備

白門旅客亦詞臣。卻望歸帆已浹辰。坐次尙虛三祕閣。飲中原擬八仙人。居然皓首稱先輩。同向青雲逐

後塵。兩度木天高會好。占他殘臘與初春。前歲臘八日李廉使廷敬于吳門作高會坐中同館亦有八人矣。祭酒錫騏范編修來宗李糧儲奕疇孫兵備星衍李太守堯棟張吉士溥暨余及廉使也。

棟張吉士溥暨余及廉使也。

十三日約蔣二廷曜出東郭看迎春

今朝卻喜值花辰。是日梅始放花。晴雪能消隔歲塵。卻約白雲溪畔客。試燈風裏看迎春。

二十四日小窗獨坐聞慧超巨超蓮艇三上人已抵西郭卽欲過訪喜賦

薄寒開南窗。默坐苦不樂。忽聞三上人。遠到慰離索。閒雲西北至。並落天際鶴。呼童掃三徑。先把長帚縛。

溪邊梅樹古。細驗開與落。山人庭宇窄。略復具疏鑿。更生新作齋。卷施昔名閣。沿階攤坐具。相與話寥廓。

未知江上艇。能得幾時泊。蕭然忘世味。蔬止辦藜藿。飲罷訪定僧。

謂天寧寺了月方丈

連翩出東郭。

二十五日雨中同三上人至紅梅閣探梅小憩

久晴既望雨。久雨亦望晴。街泥滑如油。攜屐忽遠行。一樓入虛無。三面柏作屏。沿階石狻猊。色帶苔蘚青。中藏全真廬。翛然誦黃庭。遠挈開士來。勞此道侶迎。清談忽移時。天色又已冥。仙人既飛空。梅蕊亦不馨。

時閣後古梅凋落殆盡

朔風擘衣裘。難臻橫舟亭。惟應梅檀香。歸塗訪天寧。

蔣宜人亡已百日感賦一首

生離每經年。死別又百日。感此泉下人。時添鬢邊雪。薄帷風乍舉。暗牖燈自滅。如何傷心淚。先作冰柱結。椒漿聊此奠。時物爲卿設。笑言猶在耳。音響已終絕。明明稱共命。惘惘冀同穴。行築土一坏。衰年願方畢。

邢大令澗松林讀書圖

作宦已十年。讀書近萬卷。仍然勤吏事。訊讞無剩案。時移六經筆。頻寫五花判。精嚴吏胥懾。事事取心斷。輕囂吳下俗。近已樸而愿。公餘仍泛覽。官廨若經館。寧惟勤載籍。百氏悉貫串。太湖三萬頃。此縣實南岸。旁通茗與雪。百里足灌溉。官清放衙早。嵐翠塞庭院。挹茲清遠境。迥異繁劇縣。松青三面列。竹綠四時看。官賢既如此。多士亦競勸。曾聞哲人訓。仕學本同貫。作吏即廢書。彼哉何足算。

二月十七日早至淩江關久憩浣梧道士爲招張高士鉉郭孝廉塋早梅花下小集于生淵昆仲聞信亦

至日昃更放舟至金山駐江天寺看夕照作卽寄浣悟道士

凌江高閣平明開。橫江一鶴先飛來。扉聲殷然磬聲落。道士迎門亦如鶴。修眉長爪彈素琴。朔風泠泠絃上音。張生郭生住咫尺。招我花下同披襟。花當爛漫人惆悵。萬事不如花未放。初春閣上景亦幽。春酒初濃月剛望。于生來從第一村。拜浪先復驚江豚。忽然興發欲西去。挂席日昃來山門。一山遊完屐方駐。樓小如船欲同住。回瞻閣勢尙隱然。卻在斜陽正紅處。

江天寺晚步

一曲中泠泉。至此波始闊。多年石最屨。筴理已欲活。豐碑八尺柏木韜。壓岸不使鼃鼃驕。青霞赤日疊絢采。神物終須走東海。

西來閣夜宿

一菴名西來。圓月向東出。江空遙夜永。雲水四邊徹。僧樓一一高挂空。倦客似鳥投樊籠。三更以後羣動息。萬夢並落蛟潭中。

曉登慈壽塔

孤筇摩青蒼。一塔壓白日。棱棱開四牖。絕頂海門出。濃雲浮江帆不舉。江北江南洗春雨。高寒鐘磬已絕聲。自在一鈴天上語。

頭陀巖小憩

墻頭開鳥巢。墻下出蟻垤。天風飄客下。已復抵石室。莓苔青青石色赭。人語依微出巖罅。陰房舉火照始驚。百歲枯僧墊其下。

方丈僧出宋蘇文忠公玉帶見示並恭讀純皇帝御製四詩敬賦三首

八尺囊裁宋刻絲。雕盤中有上清詞。平生不合時宜處。輸與團團碧玉知。七百年來步後塵。乘雲遊戲任天真。更從以上推前輩。只有金貂換酒人。蓬萊謫下已多時。肯向紅塵挂一絲。莫笑寶山空手入。髯翁留帶我留詩。

二月廿四日程文學贊皇吉士贊寧王上舍豫招往平山堂探梅卽席感賦一首卽寄汪司馬端光廣西并近東儲明經潤書汪秀才文錦

花朝已過十餘日。梅枝纔扞三兩花。舍舟登岸一展眺。令我三復悲年華。浮雲變滅誰能說。轉憶邗溝授經日。當時白袷諸少年。眨眼忽驚頭盡白。汪生憔悴秀才錦。金生死高郵金明經闕在揚州日。秋雨菴中土花紫。窮邊遠宦今何在。久不得汪司馬端光消息。三歲不貽書一紙。岡南岡北梅花村。何處可覓詩人魂。他時鶯燕亦惆悵。靦面已少前時人。新知雖多故知少。百歲交情願相保。徑草猶稀敗葉深。林禽已老雛僧小。花枝映水作淺紅。沿岸更溯東南風。回舟擬向虹橋歇。準待四更山吐月。



古意十篇奉酬范文學棠見贈作

西山望東海。東海何茫茫。銜此木石來。力苦不自量。何補涓與埃。口舌均已傷。青鳥昨獻規。與世期相忘。與世而相忘。在我殊不敢。閒居緬前哲。所慕莊與黯。平生櫻世事。又苦知識闇。欲獻封禪書。將毋近于諂。諂既不可學。慙亦不敢居。東溟及西洋。三萬里有餘。一身周其間。力竭敢告劬。自非覆冒恩。詎返先人廬。維茲先人廬。經始已卅閏。感此聖善恩。頻嚴義方訓。童年粗有識。先戒以干進。奉此庶畢生。敢稍逾尺寸。妖氛昨已殄。欣此海宇寧。耕鑿率厥常。時時詠升平。兒曹能讀書。僅令畢六經。留此樸魯風。長爲聖人氓。河汾伊洛間。風氣一何質。齊俗愧未能。先以訓十室。故人從政久。半已遁仙佛。獨善良所嘉。于人貴求益。波流何迢迢。熠燿亦裊裊。經天日月星。明豈藉腐草。所悲微末質。志欲燭昏曉。不畏霜霰零。銜寒出林杪。頻年筋力強。日出逐羣動。雖耕東海田。時有北闕夢。投荒獲歸骨。恩渥亦云重。懷抱尺一書。時時隴頭誦。平時苦諷誦。暇亦窮幽尋。尋源酌其流。問訊嘉樹林。此木經卅年。綿綿甫成陰。乃知造化功。生物具苦心。仙人海上來。貽我縑數尺。蟲書周四角。字古不能識。緘藏何敢讀。讀卽三歎息。中有經世言。今人豈能得。汪上舍璨自泰州枉道過訪不值卻寄一首

君居海陵倉。我客江瀆祠。相隔祇百里。聞聲久相思。故人昨復貽。新詠聞說薄。寒成小病。梅花香裏倘復來。同聽茅菴六時磬。講院旁。卽僧寺。

二月晦日家太守梧招同族子瑩族孫維德小集梅花下用少陵示從孫濟韻見投率酬一篇卽用來韻  
東風被郊原。寒久氣已溫。泠泠疎梅花。宛宛成一村。窺檐兩三株。樹古皆蟠根。吾家太守賢。花下羅盤飧。  
招邀數宗盟。情話逮日昏。宗支雖已疎。誼則視弟昆。同登三榜中。敢云齒未孫。吾家歛之西。里有通德門。  
義義忠宣公。品望自昔尊。平章及簽樞。畫象今尙存。所願子姓賢。追計泰與屯。我頃荷戈來。縱談及昆侖。  
冰天雪窖中。氈酪亦雜吞。得預合族筵。詎非大造恩。興到酒反疎。頻頻覆空樽。時久已節飲

閏二月朔日曾同年煥招同人至平山堂探梅歸途值風雨漫賦一首

今年花信何太遲。探梅幾及修禊時。寶珠木筆絕消息。風裏未見垂楊絲。長春嶺畔花千樹。縞袂紅裝出  
無數。仙人間有萼綠華。時綠梅數樹尤佳一湖波光飛上花。花光炫處波光暝。隔岸山容恍如病。花前舉酒不得  
休。花外時浮一聲磬。東風吹香香乍回。雨脚似妒花齊開。乍開乍落止一日。千點飛入黃金鬢。花香方濃  
酒香續。消得千條萬條燭。主人愛客客亦豪。風雨何嘗敗花局。一更初聞柔櫓聲。二更分燈入北城。三更  
濃香袖中起。客夢猶疑帶花底。

秋雨菴

溪花紅不然。溪水綠無語。瞳瞳日影中。似有蕭蕭雨。竹聲穿戶水到門。三面皆有春人墳。春人墳上梅花  
發。烟露濛濛棲獨鶻。

鎮海樓

一樓枕刊溝。江水出其右。到來東海聲。已復走南牖。炊烟十萬攢。郭門窗隙下。瞰千帆奔。樓頭城上統如鼓。風急三更遞江浦。

江口喜遇焦山僧巨超賦贈一首

時巨超將從焦山移主山陰縣玉笥山方丈

欣逢一棹入江灣。與話春波浩渺間。笑我轉成僧退院。時余以性疏懶將辭揚州梅花講席羨君真有術移山。何妨講席頻南北。更擬名區遞往還。爲語若耶溪畔客。忘機何似白鷗閑。

題秋海棠卷子卽贈金秀才學蓮

醉完春酒醉春茶。三十才人鬢欲華。滿砌海棠雙瘦影。時君已兩次悼亡。僅攜一姬寓維揚。傷心人看斷腸花。江左孫郎最少年。每吟詩輒問青天。君詩筆絕似吾友。孫君星衍少時此才只有君堪替。合跨茅龍統衆仙。

初至梅花書院

橫舍東西竹柏林。暫停行笈事披尋。二分明月三生夢。萬樹梅花一客吟。閱世更須堅晚節。傳經先已負初心。枕流漱石吾寧敢。且與同堂惜寸陰。

史閣部祠

尙餘坏土枕荒汀。冢樹蕭蕭戰血腥。末路愁呼大丞相。初心思挽小朝廷。時危未可無安石。事去先驚有

隕星擬把烏金鑄。螭馬程番與阮懷寧。

清明日招同人各攜一壺一碟。至艤舟亭小集。酒半。崔三景侃以事先去。餘十五人。並至月午始歸。分韻得闕字。

十五地上人。十五天上月。花初紅欲膩。月正圓不缺。相招花下飲。佳節興超忽。空濛柳絲外。水綠鑑毛髮。閑汀三五轉。怒草生鬱勃。亭亭辛夷花。香氣盈十笏。盤飧隨所見。各各辦嗟咄。無愁觴欲罄。門外酒旗揭。人生歡會少。半又感存歿。黃生景仁久埋玉。莊叟實書二人皆昔時同遊者又歸骨。神仙吾嬾學。況肯事禪窟。餘生益疎懶。久已罷干謁。惟餘花月夜。往往興孤發。客來常不速。客去亦倉猝。崔生逃席半。瘦影竄林樾。追之不能到。足滑致顛蹶。其餘凡幾輩。杯底任汨沒。天空亭月午。清響益疎越。空明無障礙。醉影自突兀。終當跨茅龍。矯焉歸玉闕。

舟行

一道溪流之字斜。阻風阻雨路尤賒。柳絲綠入船艙內。爲泊橋頭賣酒家。

泊楊家港

小樓三面花光顯。分半紅深半紅淺。濛濛三日春雨絲。浸得鶉鴉巢半偃。沿塔細艸三兩叢。艸心更比花心紅。一雙燕子乍前卻。似怨簾角西南風。

過三塔蕩

花光照夜都無隙。帆底略聞香氣息。三層簾外軟東風。開到桃花已無力。紅窗一扇紗斜破。夢裏驚聞紙鷺墮。湖波添得尺五寬。胡蝶驕鸞飛不過。

抵銀林埧

溪流南北都如箭。風急爭飛萬花片。愁看上埧亘高淳。不使中江走陽羨。沿溪水瘦湖水肥。水影分上征人衣。一帆如龍忽東去。劈浪欲上桃花堤。

渡小南湖

南湖雖小卅里周。水面亦復分三州。濤聲忽濺柁樓上。挂席風急知難收。舟輕半日穿湖罅。雲氣青紅不知夜。鷓鴣方欲飛入雲。激電正穿雲脇下。

廿一日抵宣城偕凌教授廷堪戴孝廉揚輝暨蔣表姪德培至城南看桃花值雨

此花綻日征帆開。看花直到宣城來。泥中處處留鴻爪。花笑征人在家少。官河一路春雨絲。嫩寒莫厭花開遲。紅紅白白競顏色。敬亭山放朝晴時。山雲青黃水雲墨。襯得此花成五色。看花人憶卅年前。花亦嫣然念疇昔。城頭細草已若麻。坡底正謝紅山查。固知地氣輸不盡。餘力尙放山鵲花。雨聲蕭蕭走西街。多半春陰壓衣重。幽人過曉尙未醒。小閣三層結春夢。

蘭石桓太常墓

古戰場邊置古祠。祠旁荒冢柏參差。猶疑上廁銜刀讖。想見櫻城伏節時。一瓣心香留故治。萬年遺臭付佳兒。孝侯生札充生勁。天道從來未可知。

重至洋川書院

依然林鳥喚春風。三面晴窗落采虹。採藥僮歸青嶂外。著書人老白雲中。東山未肯隨安石。北海憑誰問孔融。衰病漸將忘世事。經旬不更展郵筒。

山居雜詠

白露零有影。白雲流有聲。靜中一相值。倍覺幽興生。我欲過石橋。眺此殘月明。行穿竹柏中。疎鐘已三更。空際飛瀑來。忽向足底橫。

一月不出門。驚筍折衣架。偶然窺北牖。竹密已無罅。山中春仲月。氣已若長夏。生徒增日課。所幸仍有暇。意欲校道書。閒從佛樓借。

樓居一何高。高出雲百丈。樓前芳草地。一片綠如掌。攜燈坐深宵。空此一一想。竹梢穿入牖。坐久不獲仰。破曉山鷓鳴。官蛙始停響。

我從居山中。不復關世事。所苦剝啄聲。郵筒有時至。經旬及逾月。排案已鱗次。預擬欲別山。從頭一披視。

案塵。僮不拂。聊用一相試。此僮有機心。不遣案旁侍。

# 更生齋詩卷第七

## 西圃疏泉集

### 競渡燈船行

燈船尙隔三條橋。寶氣已復衝層霄。三橋百巷密如櫛。波上歷歷人聲囂。須臾赤焰將橋鎖。分半樓臺燭光裹。林鴉林鵲驚四飛。鴉背鵲頭都帶火。忽然龍爪攫半空。千人萬人看燭龍。橋回風勢亦稍緩。龍忽正面停波中。橋南百尺波如沸。龍甲龍鱗照天地。妖狐竄水魚登岸。光景欲從何處避。綠楊枝頭閣幾層。無數紅袖圍紅燈。船燈直與閣燈接。咳吐落處雲霞烝。百舟迎龍百舟送。別有百舟排不動。三更以後抵北關。一派火光飛入街。鉦聲已遠簫聲起。裊裊聲驚入雲裏。蜻蜓舟小琉璃暗。有客添衣出蓬底。雲溪我住三十年。客夢只落雲溪邊。回船復向溪上過。衫影笠影人疑仙。曙光曛曛斷更鼓。千萬燭光收入浦。君不見。何如天上兩燈忙。圓月乍傾圓日吐。

### 跋錢三維喬自製壙銘及三幻圖說後

雖非祖道電河干。易水一名電河。紙上蕭蕭風色寒。君是生魂我生輓。銀牋聊當白衣冠。

太虛偶爾綴微塵。詎有前身與後身。多少樓臺雜松竹。君皆疑幻我疑真。



宗忠簡祠

六百年來氣不磨。江干遺廟鬱嵯峨。迎門九派東歸海。臥榻三呼北渡河。夢裏銅駝餘涕淚。望中鐵騎敢經過。劉琨祖逖應同傳。未了忠心尙枕戈。

陳少陽祠

少陽祠外駐征輪。國士應知俎豆尊。已覺舉朝忘二帝。不妨在野蹈三仁。捐軀子諒彈仙客。並世朱雲值佞臣。一樣書生心跡異。曾前叩馬又何人。

城渡橋訪明唐襄文讀書處

荆川臺址尙峻嶒。卜宅當時愧未曾。余戊午乞假回將卜居于此後不果君慕古人三不朽。我甘世事百無能。牛腰卷軸傳

難必。馬革功名謗已騰。何似掩關長卻掃。白頭仍擁讀書燈。

讀晉書偶成

剩得荆揚半壁天。偏安土氣尙綿延。生憎謝客稱山賊。死笑孫恩作水仙。南渡化龍纔幾日。北來飲馬是何年。茫茫萬里中原土。只惜無人肯著鞭。

七夕京口淩江閣待友人不至。率成四絕。卽寄張文學崧郭孝廉塋暨及門于生淵。兩株高樹倚檐前。卻擁秋衾自在眠。絡緯乍停蟬又響。曉霞紅入寺門鮮。

煉丹臺畔值佳辰。也買甘瓜向曉陳。不敢更談天上事。久安心作謫仙人。  
北固潮頭未肯降。忽驚人影出蓬窗。誰言一葉舟偏小。滿帶秋聲過北江。  
年來百事總闌珊。門外江流亦漲灘。一枕水窗眠未醒。算來還比白鷗閒。  
是日過聽秋軒飯并觀瓜果筵作

華堂乞巧筵。商略祀牛女。天邊瓠包星。筵上戲摘取。  
華堂乞巧筵。商略坐宵永。籬角牽牛花。迢迢妒星影。  
陰晴客不知。榮悴草無語。門前洗手花。門外洗車雨。  
天孫踏鵲橋。中隔雲一片。靈鵲不擡頭。何由見仙面。  
千聲與萬聲。蛩響一何切。天邊方停梭。地上已促織。  
天上星神過。人間兒女忙。欲知霄漢事。除問杜蘭香。

攜于生淵夜半剪江至焦山

百尺驚濤內。呼舟半晚過。夜帆明蝶蝶。秋浪狎鼃鼃。舊雨南徐少。回風北固多。到山山已黑。撼樹且高歌。

焦山

山頭高士壘。山下大江潮。一柱中流兀。千年古像凋。氣猶凌北固。名欲並南譙。山本名譙山且把心香爇。魚龍

未敢驕。

張秀才學仁寄槎圖

家山同百里。各復感飄蓬。我在昆侖上。看君滄海東。枕戈馳遠夢。振袖揖長空。咫尺天河近。無須更使風。  
吾鄉錢生履坦在南昌。日作梅花卷子寄萬刺史。廷蘭到日正值刺史八十四壽辰。因繪爲長卷。刺史并作詩紀事。邀同人共賦。

此梅公手植。梅壽亦輸公。卻喜南枝早。香浮北屋中。老來長句健。客到一尊同。他日花開處。先酬百歲翁。  
翠屏洲

秋聲塞港口。風急船不過。江蘆明百頃。一叟截江臥。游鱗逐驚蛇。居然上舟柁。  
嘉魚港

大水抱細水。水盡波忽動。中有百頃潭。嘉魚歲堪種。食之可平心。兼乏江海夢。  
種竹軒

百竹綠半村。十竹綠一巷。人從巷口立。時與竹竿撞。海上蠓螋來。餘光半軒綠。  
巨公厓

重來巨公厓。石石悉迎客。惟餘一石傲。壓客險及額。石上雲亦奇。孤飛上天直。

初九日鄒水部文瓊載酒相訪因約同人松寥閣小集分韻得聲字

難得新涼載酒行。酒兵鬪罷鬪心兵。江光入夢仍如練。秋色搏空若有聲。悟後雨從衣上落。醉餘天向笠邊橫。京華舊事勞重說。臥看潮頭滅復生。

初十夜山半步月至三鼓始回

出門看山光。月色忽無盡。簾前秋景好。花氣亦徐引。江光山光新月光。點入秋色逾蒼涼。花香堂前一杯酒。杯底清光無不有。三更以後月愈明。興發我欲凌波行。秋花倘點頭。秋竹若搖手。秋鐘泠泠恍開口。一風吹人入竹樓。竹樓旁邊茶百甌。茶香雖清客沉醉。七尺竹牀三客睡。花香亦若憐酒人。忽灑花影來周身。夜光齊收夜鐘歇。卻夢酒魂飛入月。

十一夜東昇閣看孟蘭盆放燈作

一燈先出法界樓。大魚迎燈爭逆流。燈來大魚忽然竄。一鬼一燈擊不亂。三燈五燈波面停。鬼欲待侶方同行。有時一燈衆鬼擊。惹得燈影皆深青。燈光時分復時集。鬼臂壓魚魚直立。燈光叢處鬼亦夥。魚驚避鬼欲出波。大聲軒然波上起。盡捲燈光入雲裏。鬼車鬼馬已四飛。燈去鬼伯愁無依。洲東洲西萬聲沸。鬼氣居然避人氣。樓頭仙客正朗吟。激得波響如鳴琴。君不見。神燈紅。鬼燈綠。入海無心競遲速。東流燈影西上潮。鬼勢瑟縮魚龍驕。

萬刺史廷蘭邀集令子承紀丹徒官廨小飲卽席賦贈萬爲壬申庶常前輩

方壺員島振公名八十年來始合併佳士盡看稱弟子靈光真欲比先生南遊畫鷁仍須迓時約遊吳門日便道過訪

東下飛蝗偶有聲適有飛蝗過境幸不爲害今日宰官誠不易好傳良法拯疲氓刺史居官舊有聲

江口待慧超僧不至卻寄一首

松寥高閣不同登一榻慵眠醒未曾僧性最嬾我憶放生池上路秋花病鶴與孤僧

月波臺夜坐

月色轉綠天光青松梢盡處明一星星光忽隨白露零倒射北斗光泠泠星光墮後山光暝竹屋居然覆漁艇三更向盡吹曉笳海上已復生紅霞

林下二髯圖爲萬刺史昆仲賦

北江一漁舟日昨泊北固欣逢西江叟相與話情愫叟顏如春髯若戟髯上泠泠流古色比肩令弟何不來與共官齋話晨夕見公與公語別公展公圖我題詩贈公公見應軒渠君不見林泉不復營生計只有公家好兄弟一執奇書一如意石泉淙淙瀉奇氣石上松花積何膩山果投林有真味阿兄詩成屬余季老友寥寥亦堪寄石門前頭百級砌老木千章萬章蔽門外紅塵卽如沸一山遊完一山替五老八公時把臂我昔亦是神仙吏謫下九天居九地他時華髮倘下垂曳杖從公共遊戲

六月二十日偕同人載酒至城東陸氏中隱園看荷花至二鼓始歸率賦

今年水滿荷花低。前後一月稽花期。花期忽展六月杪。花朵如盤色逾好。陸家荷幹捎城牆。隔城薰風沸滿塘。橫舟亭畔一雙燕。聞信遠復來尋芳。雛鶯縱老尙引吭。蝶翅不待秋間黃。花前十客羅百觴。過午一來追涼。花枝迎客若問訊。一客一花須坐近。坐久未窮花底蘊。花下蛩聲亦殊韻。殘蟾出水光何陡。花竟嫣然開笑口。看花親切花轉羞。花已低頭客濡首。花梢蓮實花下藕。花底誰人小垂手。引得荷盤貯杯酒。月影星光滿盤走。看花旣足酒亦完。花外尙有千琅玕。深綠影護紅團欒。不須更與花朵語。花外鵲聲催客遽。一半酒人穿竹去。

陸孝廉繼輅洞庭緣樂府

下第才人暗自傷。忽驚奇福出尋常。龍堂入夜波如海。別展蛟宮作壻鄉。玉茗花殘閣亦傾。是誰拈筆與爭名。到頭一例神仙夢。樂府新傳兩柳生。陸公子鎔邀至城北看荷花而客坐正與花相背率賦一首時將遊焦山

屋向南頭水北頭。背花開讌我殊羞。預愁簾蒜遮香氣。聊折荷筒抵酒籌。有客苦談當世事。是誰能代古人憂。深杯到手休辭醉。明日征帆向潤州。

清泉濯足長卷

門前水屋後山。山深深水潺潺。紅塵三十年。足垢久當浴。尋常一曲流。又恐污吾足。奇峯千疊谿。九回溪。流曲處。點碧苔。客欲濯足時。歸來足垢既濯。登峯若飛。盧敖仙人。世外可期。飛空游行。有時倦。展我北堂。三萬卷。吉金樂石東西列。嗜硯居然又成癖。周秦彝器唐漢碑。硯材端溪復歙溪。何日約客來搜奇。我攜蜻蛉舟。爾居鴻雁浦。挂帆一日即詣君。與爾一軒談邃古。

年來里中賽神之會。事事競勝較。十年前費已百倍矣。感而賦此。七月望日俗所傳中元節也。

令節尋常事。奢風幾歲開。綺羅裁幘髮。金玉裹輿儻。神豈餘威及。人爭罄產來。徒充里胥橐。一日醉三回。

鳴鳩圖

金

占得危巢復幾時。滿天食雨劇相思。一枝費盡林鳩意。只有山禽總不知。

江流斷處有停水。數十步荷花盛開。偶賦。

黃雲昏處盡黃蘆。留在荷花世界無。渚上鷺絲爲料理。約風三日水平鋪。

新構卷施閣。成登眺偶賦。

萬瓦縱橫內。居然峙一樓。愛從雲盡處。看到郭東頭。世味都應熟。吾生合少休。掃梁迎舊燕。相與話初秋。

題范秀才來鳳鐵琴詩草

以鐵作簫。以鐵作笛。何如鐵琴。聲出金石。琴或以石。琴或以銅。何如鐵琴。逸響遏空。君家鐵琴詩。堅古亦

如鐵前古與後古。試問欲誰敵。一編能窺天地心。白電掣屋霜飛林。我攜君詩及鐵琴。海上落落求知音。月夜登北固更望金焦二山回途與友人憇演武廳小飲作

更從石脊眺昏黃。無盡江流入渺茫。百歲過人疑短夢。兩山與月鬥圓光。鷓鴣影逐浮溷沒。蟋蟀聲隨墜露涼。北府健兒京口酒。算來今日總尋常。

哭同年楊大令倫

一生心術及詩篇。都復研摩到昔賢。稷契許身聊復爾。君生平作詩服膺杜氏所著杜詩鏡詮二十卷羲皇入夢致悠然。填胸

卷軸逾三萬。歸骨程途渺七千。未敢與君中外斂。予與君皆蔣氏甥君母則余外家姊也忘形且自託齊年。

登別峯菴望海忽值風雨

朝曦色染滄溟綠。東望海門如半粟。滄溟突處天蕩搖。頃刻已見西來潮。象山南頭蒜山尾。一舸倒流還數里。風威不敵潮勢狂。吹角北岸停帆檣。君不見。日居萬瓦鱗鱗內。眼暗頭低殊不耐。此時懷抱覺暫開。足底隱隱聞驚雷。天公似把炎蒸洗。東海叱龍龍盡起。一晌江都電影來。翠屏洲上紅三里。

山中避暑聞同年曾都轉煥將報最入都卻寄一首

野客空山避暑遲。正聞輶傳入都時。西京鹽鐵何妨論。南國鶯花盡入詩。應有功名參計相。最憐風味似經師。愛才一例尤難及。報到平安杜牧之。



地燈行

五月朔燈高懸。不照地。乃照天。七月晦。燈下墜。不照天。乃照地。燈高懸。禮北壇。土人云。天燈爲天地水府而設。其實元張士誠有德于蘇常。蘇常之民于其死日。懸燈一月以報之。託言天地水三官神也。天地水府稱三官。燈下墜。出東郭。幽明教主轄萬族。俗傳地藏爲幽明教主。天燈不接天。僅與星斗聯。地燈不貼地。都復置塔砌。地燈數比天燈多。五里直接官塘河。雜以梵唄兼笙歌。千舫百舫燈前過。君不見。天燈完地燈接。更有水燈波上貼。三燈看盡無燈看。秋半皓月升團圓。偶檢故書得三友人遺札各賦一首

通政司副使錢澧

早年重望出遐陬。六詔人文第一流。作史舊曾居柱下。建言頻見伏螭頭。鷹從鳩化心仍恕。蓬自麻生節亦遒。君與余同年。葉舍人雯最善。我。是庾公樓上客。彈章傳到亦生愁。指甲辰年糾陝甘。警共寓居。每以名節相勗。

太子太保提督花連布。提督死事尤烈。其論祭碑文。余在翰林時所擬進也。與余同官貴州。交契尤密。生平以志墓文見委。故所撰碑文。敘其死事。頗詳盡云。

尺書肯爲故人題。已值倉皇盡命期。生戴頭來知秀實。死餘膽在說姜維。蠻荒屢共中宵讌。絕徼曾褰大將旗。君先。在金川著功。八百里驩休更御。送公天上去騎箕。君有善馬。嗜之成癖。

鳳山縣知縣贈雲騎尉湯大奎

廿年里巷憶同居。廟食今看義烈俱。君少時與余同居中河橋。委巷中。巷口。卽隋陳司徒。果仁祠。祠額名英風義烈。未到斷頭先墮指。最憐歸骨

尚銜鬚。書埋魚腹濤。空沸餉轉羊腸道。苦紆。君年前曾解餉甘涼。畢竟酒人能報國。君尤善飲。霸陵醉尉亦捐軀。時里中王麗可

亦以佐雜殉節陝西。  
近築西圃將次落成偶賦八截句

堆胸奇氣漸銷磨。山不嶙峋水不波。只有露臺高百尺。偶然平視到羲娥。  
薤草澆花久乏人。攤書聊剩此閒身。不妨我少元章癖。滿架傾欵滿座塵。  
荷戈歸後鬢初絲。未礙齋頭睡起遲。忽夢天山萬年雪。一燈如豆酒醒時。  
轉憶童時奉母居。三遷遺訓尙欵歔。半間板屋孤兒占。聊抵親存侍板輿。  
心事初冬鬢晚秋。祇餘春夏氣仍留。旁人莫笑閒居早。五岳遊完住此樓。  
人說池亭入畫圖。臨流時悼影形孤。防他春到鳩鳴急。巢好先無婦可呼。  
作達時時憶樂天。尙嫌七十始歸田。一丘一壑吾應足。不更描摩池上篇。  
屈指平生志業虛。勞勞蹤迹五旬餘。東西豎亥行將徧。纔得蝸牛一角居。  
蔣通判騏昌官興平縣日子土中得漢張騫印一方興平古槐里也壬戌歲出以相示并屬作一篇以紀  
西京世數傳至九。文爲仁君武英后。張騫鑿空縱萬里。金印何嘗大如斗。姓名惟剩玉一拳。誰果好事爲  
流傳。玉方一寸白如雲。或者采自黃河源。當時開邊承意指。堂邑氏奴同出使。隨軍卽以勳得侯。終是人

間妄男子功名雖奇意則妄。地上行完歷天上。惟應地下名不傳。想欲攜之伴深葬。騫經絕域我亦經。祇少一棹天邊行。伊江傳有故侯碣。伊犁傳有張騫石碣。訪究未能得也。搜訪百日終沉冥。四周雖完一角折。世上誰能盡

完璧。漢家末葉益可傷。傳國璽猶輕一擲。君不見廢丘千載剩荒丘。故物摩挲說故侯。國士一坏何處覓。

轉因槐里憶朱游。朱雲槐里人。墓已無考。

贈之  
同里戈裕良世居東郭以種樹累石爲業近爲余營西圃泉石饒有奇趣暇日出素筆索書因題三絕句

奇石胸中百萬堆。時時出手見心裁。錯疑未判鴻濛日。五嶽經君位置來。  
知道衰遲欲掩關。爲營泉石養清閑。一峯出水離奇甚。此是仙人劫外山。  
三百年來兩軼羣。山靈都復畏施斤。張南垣與戈東郭。移盡天空片片雲。

中秋夜坐

天上風初緊。人間暑盡收。獨搖明月影。頻訪市橋秋。暗響蟲藏砌。華燈燕出樓。年年當此夜。坐待曙光流。  
八月二十日抵寧國同年魯太守銓邀遊北樓并留飲桂花樹下賦贈二首

自有茲樓復幾年。爭傳句好問青天。人言李白曾低首。我是洪厓許拍肩。不覺玉盤遲出海。何妨金粟早

開筵。羣仙高會今三度。余與太守同年同門。然把晤甚少。惟己未歲太守謁選入都會飲二次。及此而三耳。一榻仍容醉後眠。

汝穎東西頌宰官。一麾出守又江干。魚頭參政家聲古。鶴背仙人鬢影寒。秋老茱萸先釀酒。衙荒苜蓿罷堆盤。凌教授欲招飲。以此而止。升沉中外誰能記。仍作龍華會上看。

半月臺久坐

正值下弦候。來登半月臺。夢中雙屐遠。足底萬屏開。閱世餘喬木。流光漬古苔。他時闌楯葺。太守欲修北樓及此臺。應許醉千回。

席上喜晤施上舍晉賦贈

十年不遇施居士。金粟花開偶來此。白須居士金粟花。我鬢亦與霜爭華。主人開筵當日夕。夕日暉暉照杯赤。我傾一斗君百杯。秋老頓覺春風回。陵陽仙人作校官。邀我苜蓿餐闌干。我嫌苜蓿不救飢。卻向太守求甘肥。山陰之尊飲不竭。滿案溪溪菱間山栗。仙人赤鯉脰作絲。興發不顧琴高嗤。青松枝頭碧月來。移酒欲上元暉臺。眼前百事不措意。肘後花朵驚齊開。山禽飛回水禽集。只覺樓高渺難及。何時百尺爲貯梯。時北樓梯拆不得上。送我白雲頭上立。

琴溪客館作

拉拉雜雜彈琵琶。蕭蕭瑟瑟開渚花。青天沉沉忽無見。殘月黯黯生光華。迢迢溪水何方瀉。漠漠山窗已成夜。膠膠擾擾擾鷄一鳴。雨點落落煙冥冥。

曉度籟嶺

屏山高萬仞。厚亦徑千尺。空明初日照。表裏恍不隔。寧知深谷底。夜氣未收墨。白鳥倚樹眠。青蟲抱枝蝕。林梢開百里。下嶺勢尤仄。天都雖半露。地脈已全坼。平塗無十步。絕頂一關阨。亭午日氣紅。楓林亦齊赤。夜宿許村。

許村凡五里。路險客難到。回厓視昏旦。絕頂突夕照。高低皆萬仞。山石時露竅。昏雅無樹集。占此社公廟。原北色已暝。原南赤如燒。蹤疲思托宿。地陷忽如窞。明晨還屈指。卅里路森峭。夜半嚙語多。擔夫時競道。與程吏部振甲話舊。

精廬百里走難停。依舊山排屐齒青。老眼讀碑猶似月。故人堆鬢已多星。揮毫尙記參旁午。君久值機廷繫險。今看邁五丁。君尊甫虛谷先生。修築嶺南北道。幾及百里。至今行人德之。君又續修府城中道。八門皆備。卻喜過庭詩禮在。半傳家法半傳經。

程君款我于丹丘。精舍前後凡五日。醉後率成二律。卽贈令子待詔洪溥。

帶得天都夢。來眠石室雲。半庭花韻寂。一谷草香薰。李白金魚佩。羊欣白練裙。醉中揮墨嬾。且與話離羣。山雲猶帶夢。山溜已驚眠。林果堆衾上。秋蟲出枕邊。宿醒吾尙病。縱飲客疑仙。問訊諸郎好。溪茶手自煎。河西橋太白。酒樓歌同汪孝廉燁。及程待詔洪溥作。

春人不肯留。春燕亦難駐。秋風開簾帷。微黃入山樹。山葉欲落禽驚翔。紅樓參差已夕陽。一千年上事誰

識樓上有客傾千觴。新安茶多苦無酒。何似山陰剡溪走。仙人遊戲無定方。飛去飛來亦何有。我疑黃山六六古未開。五字那不題元暉。不然元暉去後公復來。何以長句不賦空銜杯。驚人句好公問天。我轉欲問公從前。惜哉仙人蹤跡不稍待。祇見樓外山色黯黯谿水鳴濺濺。公前祇有樓。公後復有橋。石橋千步樓百尺。遠視城郭何迢迢。白雲中間立少時。適有遠札馳相思。時得方明經如川札約遊巖寺同遊年少亦清絕。瀟洒並若崔宗之。君不見樓頭一派揚之水。直下嚴灘復難待。故人憶我我憶公。雲自歸山水歸海。

### 烏聊山

女牆沿山百千級。客到女牆皆卻立。城南暝色似拒人。一片昏鴉堞樓集。山頽五石皆隕星。突處尙帶天光青。山僧煮茗餉山客。五客一人蹲一石。山頭有落星石今裂爲五。

### 太函山

離居幾日無情緒。雁尙未來春燕去。城頭乾鵲時一雙。咒得蘆花白如絮。太函山人晝掩關。五客偶復遊茲山。丹丘南頭碧潭左。一塔對窗如揖我。

### 傍溪菴

西風泠泠響天關。炊煙一城飛出山。炊煙飛青水煙白。襯得斜陽滿江赤。新安古刹皆李唐。此刹勢復凌層岡。石厓中飛雲縷縷。佛頂古苔堆寸許。

環峯閣

雲光開處穿飛騎。一嶺蓼花紅到地。瓜花黃蔓復上天。石屋疎疎集秋氣。屏風一曲隱一牀。窗扇重疊穿朝陽。芙蓉花生溪水死。一半遊鱗鏡中紫。

留別程吏部

茶香清後酒魂蘇。更對奇峯引百壺。明日兩重山外路。夢君先欲夢天都。偶向新安踏市塵。蕭然六合此閒身。煉丹池畔揮千紙。赤鯉先驚化墨鱗。

贈沈教授成渭

我愛沈夫子。平生見地超。鬢疎秋後葉。筆勁午前潮。地僻成鷄市。官閒類馬曹。醉談先世事。七十恍垂髫。贈莊司訓雋中

我愛莊夫子。中年薄宰官。

君大挑一等  
呈改教職

芙蓉開晚晚。首宿笑闌干。世事心知熟。羣經口誦完。俸錢餘數百。

先約客晨餐

出郭望天都峯

三爲歛嶺遊。一詣天都頂。天都頂上人。今晨若居井。蓮花何鬱鬱。蓮蕊何迢迢。蓮峯雖絕奇。未與天爭高。我雖憶天都。天都不思我。天風響空中。青紅落雲朵。昨登九子山。正面天都峯。闊別三十年。舉手揖半空。

芒屨久已穿。遊客亦俱蛻。謂壬辰歲同遊諸君我憶天都峯。無心返吳會。

半道宿吳公壁

危途怯宵征。百步亦千折。我攀飛鳥巢。忽見孤僧室。同儕亦驚喜。天上一燈出。寧知到天上。石屋左右列。酌我山腹泉。心空水清澈。重陽猶未屆。霜露已成雪。危梯延客臥。膚凍慘欲裂。濛濛衾枕膩。嵐翠入窗密。燒燈雖未燼。辨色戒行疾。出屋望始驚。山禽挂枝歇。

道中偶得二絕句即寄洪溥并呈瑤田徵君

煉丹池北小方亭。無數山光入幕青。贏得閉門三日醉。持螯左手不曾停。

易田三禮彝齋史。更有魚門五七言。怪底郎君家學好。春華秋實萃篁墩。徵君及文學敦編修晉芳皆篁墩支。

山中夜起

山空羣動息。木葉已先凋。衆響從何至。天風與蕩搖。砌涼蟲語寂。閣暗鼠聲囂。夜半催人發。新霜幕外飄。

霜降節在重陽日。時甫月初五。

重陽日霜降

白衣方送酒。青女正飛霜。聊記重陽節。今年在下洋。

唐二軼華罷東流。縣尉寓居皖口已二十年。昨得問訊書作此奉答并勸歸里。唐本名鵬。後以字行。



昔年曾住屋西頭。薄宦離家已卅秋。彭蠡九江時北望。廟溝一水尙南流。君舊居也。踏殘春草思前度。數到晨星憶舊遊。丘壠近聞荒翳甚。待君歸更理松楸。

見落葉有感

年已迫遲莫。無復少壯時。落葉既辭樹。終難上故枝。今年故枝衰。明歲新枝好。亦如人代謝。子老孫復抱。明年春異今年春。老人衰遲喜抱孫。花開千回落千徧。孫復抱孫吾不見。乘月行宣城道中

葉葉隨風逐去程。半空殘月出殘更。秋林紅到傷心處。先有曙鴉啼數聲。李白西樓眺北樓。南樓又占庾江州。老夫才地雖然減。也築危樓東海頭。

登北樓作

卅載時牽夢。今辰眺覽真。頽然五蒼柏。都似六朝人。徑有元暉月。樓無庾亮塵。更應招白也。同醉小陽春。是日立冬。

夜泊小南湖

小南湖畔路。舟泊已初更。四壁懸星影。千灘出雁聲。夢零前夜雨。雲識喆朝晴。魚鼓敲何急。如從枕上鳴。溧陽道中

木橋分西南。澗水四邊集。人家臨澗好。門外水聲急。青山無半里。朝爽近堪挹。村翁無一事。倚杖水邊立。兒曹農事竟。茅屋飭修葺。禽鳥靜不譁。深村啄餘粒。

瀟湖夜望

沿林風轉急。紅葉裹歸僧。隱隱青山隙。迢迢露塔燈。夜雲空際落。殘魄望中升。十月南湖澗。魚龍氣尙蒸。

題畫

留得春風自掩關。三層閣上著書閒。祇饒碧蘚無紅葉。不使秋冬氣入山。

蠡河感舊

挂席去無影。夕陽空閉門。重經昔時地。頻斷昨宵魂。檻折春禽占。廊虛暗水吞。尙餘煙柳在。依約舊衫痕。

乘月行攝山道中至朝陽門作

水雲村樹共彎環。樹裏人家未啓關。正是四更殘月好。騎驢行徧六朝山。南岡北阜界初分。遠憶茅濛蔣子文。江左名山本無幾。讓他一帝一眞君。

過徐中山王墓道有感

難從英辟共功名。事過猶令野客驚。彭越醢非三尺法。謂藍玉傳友德等范增疽盡一杯羹。中山病疽特賜鵝炙一斝食之乃卒龍蟠帝闕形仍壯。燕啄王孫兆已成。猶幸開平得前死。不然險欲壞長城。

送孫大星衍仍兵備山左

葛仙祠畔早披襟。

在句容訂交

不信居然莫景侵。

兩世逮君皆皓首。君祖母年近百齡。尊甫年已七十五。君須髮盡白。又數年矣。

一生于我

伴長吟。知交出處關成數。天地分明鑒寸心。良史異時商合傳。莫教廊廟媿山林。

采石重謁大白樓

枯僧驚爲起蓬關。三十年前棹始還。身後名輸一杯酒。眼中人隔幾重山。

前與孫大尚遊。今孫大尚留滯吳門。

夢留蔥嶺煙

雲外。月挂蛾眉杏靄間。公謫夜郎余更遠。得歸公亦代開顏。

然犀亭懷古

過江名士竟誰優。到死猶爭第一流。倘遇可兒先拔舌。早逢英物一開眸。孤亭正對天門峙。百怪將從地

府搜。卻憶登壇誓師日。義旗幾欲指荊州。

一事傷心說倚閭。求忠于孝果非虛。勤王縱使能投袂。將母何因使絕裾。休更火犀然穴鼠。也應風樹泣

臯魚。留賓截髮兒能報。羨殺陶家奉板輿。

涇縣黃田訪朱吉士瘠。因留宿培風閣。卽席賦贈并寄哲昆觀察理閩中。

君家門前溪水足。大石寬于百間屋。到來三折山已深。鎖徑一橋環碧玉。四山蒼蒼合一澗。澗水時聞不

曾見。青松點入紅葉灘。時有水雲飛片片。溪風蕭瑟溪雨涼。鷓鴣直來問字堂。縹緗堆架一何滿。山鵲亦

聽書聲忙。樓頭讀書日幾回。樓上客兩官蓬萊。西園子弟盡才俊。作賦險欲追鄒枚。一更月出斷崖口。卻對好山爲置酒。醉向培風閣上眠。窗疎不礙看星斗。談深復憶神仙侶。橐筆乍完仍叱馭。溪山如此不歸來。卻復看山廈門去。

列岫軒久憇

峯巒三面峻。都抱讀書堂。半夜吟聲苦。層霄月影涼。偶懸徐穉榻。真認鄭公鄉。他日來相訪。門前荷芰香。二十二日夜雨曉。起見山頂皆白。蓋天氣嚴寒。山半以上均已作雪也。喜而有作。

飛雪不到地。祇積高高峯。高處亦不停。旋轉西北風。稜稜夜半風尤猛。東嶺雪仍移北嶺。樓頭一白直接天。樓上客真同坐井。清寒入骨難久留。北風吹人下小樓。衝寒簾下一杯酒。酒色絕似清江流。曉風初收晚鐘動。山骨吟肩疊高聳。圍爐倚酒欲作書。飛白先驚入窗孔。

復憇松竹塢卽贈陳孝廉寶泉

松竹軒中說授經。授經人已久知名。詩傳一一鶴聲峭。考比非非國語精。墨鯉鏡中浮浪起。蒼龍天半怒濤生。闌干月上應無事。更掃書堂門酒兵。

莫愁湖久憇并謁徐中山王畫象

結綺臨春事久非。湖北卽清涼山臨春結綺舊址在焉隔坡樓殿尙依稀。到來海燕樓禪幄。運去山龍暗袞衣。空館尙餘調

鶴地眞王徒剩釣魚磯。今湖尙屬中惟應兒女英雄淚。灑向秋空作雨飛。

感賦年來里中同歲者相繼物故近聞劉舍人召揚亦歿于山左亦同歲之一也感而賦此

流光到眼若飛塵。零落知交倍愴神。鄉曲苦無同歲友。名場嗤作過時人。酬知事每失交臂。傳世書仍欠等身。只有壯遊聊自慰。記經星海陟昆侖。

偶書示友

習尙多年卽一更。後生原不及先生。好名亦是文人事。不近情人不近名。

楊大令倫劉舍人召揚歸櫬尙未抵里復追悼一首

一作郎官一省曹。五旬年命不堅牢。管寧死後無龍尾。謝守生前有鳳毛。君爲劉文定少子學博可曾編說苑。愁

多先已反離騷。殘秋旅櫬仍難返。望斷清江綠半篙。

天王堂謠堂在城東太平興國寺。

天王堂中屋不修。雨腳總打天王頭。耳中穴鼠雀啄眸。力士杵亦隨波流。欲修天王堂。泥閉天王目。一臂天王已先剝。臂落金剛復傷足。擡天王。出募錢。募錢疏挂天王肩。募錢縱多僧醉飽。卻任天王坐旁倒。以長至日太和殿早朝詩課院中諸生亦敬賦一首

鴛瓦千行瑞雪消。火城三面集金貂。記曾采服趨中禁。特荷殊恩拜內朝。至日皇上或不御殿則百官朝服列班午門外行禮惟值內廷

諸臣準采服拜乾清門塔下萬里烽煙清禹甸。丙辰丁巳長至日九天音樂奏虞韶。觚稜回首真如夢。獨向江村聽麗譙。

萬卷歸裝圖爲孫大賦

每恥前人我不如。年來妄念始消除。笑君積習偏難盡。尙喜人間未見書。君正褰帷我荷戈。買書錢已苦無多。丹黃別有三千卷。或可釐君校本譌。

月午樓歌

仙人好居樓。樓築青山頭。樓雲又比山居好。八牖居然拓天表。山樓明月不待宵。海上月出光先搖。讀書聲高月亦高。月午尙覺書聲飄。前黃高峯後箸嶺。書聲飄壓四山頂。松梢夜半老鶴醒。鶴唳亦比書聲清。樓頭鶴影兼人影。樓外雲鋪百餘頃。仙人世外無書看。聽書日日來檐端。月亦不得落。書亦不得完。君不見紅闌干前白玉盤。讀倦且把明霞餐。

此  
页  
空  
白

# 更生齋詩卷第八

## 北郊種樹集

### 讀史六十四首

大九州藏小九州。大瀛海外水仍流。九州各有開天聖。迭拄乾坤到盡頭。  
啾啾唧唧四邊鳴。造字臺邊夜哭聲。足見一篇無鬼論。便從上古已難行。  
一粟先看世界浮。女媧搏土不曾休。自從未有人行日。玉兔金烏已出頭。  
魯陽戈已嫌多事。第一尤憎后羿弓。正要不分昏與旦。懸他十日照寰中。  
棋家國手說秋儲。此局開從允子朱。破盡工夫究何用。笑他一著競贏輸。  
何須刻意別靈頑。物物同生宇宙間。各有出奇爭睜處。翼填東海壁開山。  
蠶食何堪四面來。陽人負黍踵難回。周家八百年天下。末路惟餘避債臺。  
曉饌牲牢夜擊鮮。華堂養士各三千。何如五百田橫客。蹈海都同魯仲連。  
督亢先看具地圖。樊于期忽仰天呼。燕齊海上多奇士。狗盜要難及狗屠。  
一椎一筑一匕首。三客果誰能策勳。滄海君來亦無用。先知獨讓瀉池君。



開國先愁乏遠圖。西都習尙遠東都。漢家一代崇虛誕。黃石兵書赤伏符。  
緣知隆準是真龍。白帝先愁試劍鋒。功狗已烹高鳥盡。祇留一雉雥深宮。  
萬卷先從客舍儲。撰成八覽紀乘除。笑他只善居奇貨。也學虞卿強著書。  
漢家中葉慶連綿。元狩元封國祚延。天上歲星來執戟。如何天子不長年。  
前殿危言批逆鱗。後宮恩重亦忘身。朱雲折檻熊攀檻。越顯名臣與美人。  
蘭茝招魂些續歌。楚天萬里不生波。願將魚腹詞人弔。文考湘江屈汨羅。  
宣元以後治優柔。況復專朝有五侯。正與商君法相反。蝨官不去鼠姦留。  
客未登車主候門。世家家法已無存。史臣倘爲宣尼諱。十四傳中削此孫。  
烈士傷心古道旁。一生曾未值孫陽。卻看老驥還千里。正負鹽車上太行。  
法堯禪舜亦家風。二十韶年作上公。不見露臺曾惜費。偏能全賜蜀山銅。  
著書空費萬黃金。剽竊根源尙可尋。呂覽淮南盡如此。兩家賓客太欺心。  
並世才能識魏公。死猶兩女嫁英雄。炙雞斗酒無多費。我欲時時醉冢中。  
大將王常太尉牟。嗇夫游徼盡通侯。東京人物寥寥甚。卓茂居然冠輩流。  
同時北海出儒宗。邴管仍堪合作龍。畢竟漢朝經學貴。黃巾爭拜鄭司農。

祖尙元虛自晉賢。黃初人物已開先。漢家盛日尊黃老。不習南華內外篇。  
霸業王基並有因。轉嫌封拜不酬勳。虞侯賜劍燕士刎。恐負難兄付託殷。  
謂孫大帝宋太宗。  
東京文格本來卑。一字無慚語亦欺。不被古人瞞到底。曹娥碑與郭君碑。  
多金贖女出匈奴。友誼曹瞞絕世無。愧煞君家五官將。刀頭難赦仲宣孤。  
聖證篇成漢學亡。六書訓詁孰推詳。一編難與專門較。杜預春秋甯穀梁。  
家世何應出阿戎。嗜錢鑽核作門風。葫蘆塵尾皆長柄。莫哂南朝王侍中。  
絃歌小邑最風流。一令寧輸督八州。強使名賢附華胄。泉明地下亦包羞。  
江東王氣總綿延。晉宋梁陳代屢遷。只有蔣山惟一帝。居然香火占千年。  
白雀空矜一世才。新支堡下忽徘徊。死胡尙嚙生天子。何怪堅頭入夢來。  
漁人何事舌偏饒。歷數炎精迄本朝。從此桃源不淳古。并知劉石與苻姚。  
虛無上八洞真僊。稗史新傳委宛編。不信堯時白蝙蝠。能知混沌與開天。  
已見苻堅過項城。八公鶴唳與風聲。淮南雞犬都仙去。尙剩沿山草木兵。  
妄思成佛反遭魔。歷劫應知負債多。何必贖身同泰寺。累他臨歿喚荷荷。  
武都山接谷軒轅。百頃仇池富水源。不是氐羌來據險。人間此亦種桃園。

蕭曹內魏冠西京。房杜淪亡姚宋生。只有漢唐人物好。中興開國盡名卿。  
三峯高接華山巔。下視蒼茫幾點煙。不是謫仙人在世。好詩誰敢問青天。  
胡雛相異兆生時。鐵額銅頭并護持。制得豬婆龍死命。僅須一個李豬兒。  
中唐風節數韓公。詎止文章一代雄。異類強藩盡低首。王庭湊與鰐魚同。  
總是滄桑劫裏來。唐除丑口呂書回。何應一落金門第。不作仙人卽盜魁。  
萬羊太尉李文饒。食料誰知命所招。日啖半升原作相。何需八百石胡椒。  
轉覺雙鬢有定評。旗亭聲價一時傾。怪他九級慈恩塔。徧檢都無李杜名。  
絕代才人韓致光。百篇詩句一奩香。虎須捋罷吟幺鳳。鐵是心肝錦作腸。  
述怪稽神作語林。誰知劫數已相尋。冠貂衣紫人如豆。籬下南朝徐楚金。  
年名五代不多時。七姓官家盡健兒。辛苦九朝長樂老。朝秦莫楚費支持。  
魯論半部篋中藏。垂老應知亦健忘。怪底一朝多語錄。用他學究佐興王。  
香孩兒事最堪疑。滅迹思將一代欺。身上黃袍袖中稿。製成恐不是臨期。  
百事都嫌強出頭。扶乩壇上亦來遊。神仙何苦名心重。處處題詩向酒樓。  
詩案曾留御史臺。儉人亦轉歎奇才。雄文卻要蛟龍助。不枉先生過海來。

尙書別有古文傳。西蜀才人著太玄。僭聖亦同非聖例。揚雄梅賾趙師淵。

今所傳通鑑綱目實朱子門人趙師淵所作揚以太玄擬易稿

以綱目擬春秋與梅賾撰僞古文尙書其罪一也

一成一旅總堪憑。萬頃洪濤一葉凌。不據西湖據東海。趙家端可號中興。

儒林道學本同原。分傳翻嫌史例繁。只我欲書三獨行。石工軍校鄭監門。

石工安民殿前軍校施全監安上門鄭俠

萬乘曾爲孤注來。惹他讒口一時開。契丹西夏非強敵。祇覺中原乏將才。

七尺終當死報君。黃冠南下屬傳聞。一編琬盪名臣錄。都讓王家生祭文。

戴主恩如戴昊天。投荒百日準歸田。家風尙愧鄱陽集。雪窖冰天十五年。

詩情畫筆號專門。三絕雖兼格不尊。說到彥回先齒冷。更誰人數趙王孫。

讀史常侵夜漏餘。時時一夢到華胥。可知不在青天外。竟欲乘風去卜居。

都似空中飛鳥過。強分名目費編摩。試將列傳平心看。一代傳人本不多。

千日中山醞已嘗。便須一鉢冢中藏。伯倫死酒非真死。想要逃名入醉鄉。

飲啄何須更好名。修真先要近人情。烹龍炁鳳瑤池讌。誰說仙家不殺生。

晉代旌陽唐李筌。是誰人已得真詮。近來老輩神仙少。數到元時白玉蟾。

寓興

一身從何來。父母之所畀。既須建修名。亦以綿世繫。受全歸亦全。所係實非細。曹然魂魄化。仍與親附麗。一一返厥原。同歸天與地。形骸既速化。齒骨朽亦易。留貽世間者。不滅惟此氣。

古人善讀書。書亦本來少。經年可卒業。不必徹昏曉。沉酣六經外。祕籍偶搜討。方書亦無幾。素問及本草。百二十國書。一一名作寶。少纔能肆力。多卽難見巧。陳編逮今日。富至不勝考。所以無用書。空資蠹魚飽。天地雖至大。物力本不多。惟茲搏節心。爲能養天和。日食數萬錢。遠聞王與何。飛走不得逃。高下設網羅。曾誇鼈重裙。兼詡四足鴉。風俗近益奢。背峯炙明駝。俊味罔不登。搜及燕雀窠。未流心竊憂。詎敢揚厥波。非有求福心。又豈懼譴訶。甘受鄙吝名。不敢知其佗。

學術本一途。後乃判釋道。魏收最無識。作史列三教。三教中復分。十百富名號。爭奇仍鬥捷。一一欲建效。遂令清淨域。無事亦爭剽。民生半無業。物力因已耗。合一縱甚難。何不各守要。兼收更非計。分路或同到。惟求心所安。誓不惑果報。

新進喜事人。不可位相將。持其一偏見。遑復計得喪。紛然變成法。畢竟無一當。古來大聖人。貴述不貴創。周官不善讀。邪說復首唱。青苗市易行。天地爲播盪。巴東亦不免。時露好事狀。偉哉無口瓢。此乃真宰相。側聞飛仙人。上者居列洞。騎龍跨鳳外。頑石亦能控。游行一世間。風伯自迎送。怡神雖足樂。于世究無用。況經年五百劫。數亦殊重。我意不謂然。除糜復時弄。空言如有裨。後世亦諷誦。無爲守丹竈。寧可抱酒瓮。

化人干無功。日昨屢入夢。沉冥雖已久。顏色益飛動。醉鄉苦無書。爲寫酒德頌。  
家儲萬黃金。或者有憂色。行乞得數錢。陶然樂昕夕。賤者未必非。貴者未必得。置身豐歉外。庶不爲物役。  
鍾乳一千兩。胡椒八百石。縱如彭祖壽。亦恐難畢食。徒然使後來。笑聲千載劇。  
少歲盛意氣。不願爲詞人。垂老筋骨衰。勤力始作文。投荒昨歸田。松菊僅有存。親亡逮卅年。兼復鮮弟昆。  
偕老願亦違。骨肉滿墓門。尙幸一室中。不乏子與孫。久客偶一歸。旨酒又已溫。僕婢立我前。勸我盡一樽。  
慰勞固多方。嘔笑恐未真。欲營山水區。庶畢勞瘁身。持此一寸心。不死期報恩。  
北轅窮大宛。西轡險棧閣。洪河狎蛟蜃。滄溟截鯨鱗。回思至危境。亦卽寓至樂。豈惟豁雙眸。胸次亦已拓。  
丈夫處閭巷。百事苦束縛。終年心賞處。僅止一邱壑。低瞻慙赤鯉。高視愧元鶴。寧知轆轤屨。天外亦飛落。  
平生無別嗜。有景必搜索。生當恣游覽。死卽安冥漠。一世誰最愚。南山石成櫛。  
束髮事結交。良友堪悉數。文章與談讌。各有投合處。立身復不同。分道各馳騖。揚雄性沉默。逸秀欣世務。  
君看華與管。始合分末路。彼此不必非。邪正性所賦。卽如同學者。意見亦參互。王何標理解。張趙崇傳注。  
璣稱善名物。曜乃詳訓詁。一得皆可傳。無須學跬步。君看天上星。東西各分布。飛何必嚙走。赤亦難誚素。  
絕交論亦褊。故者無失故。

學術尙周孔。治術尙黃老。漢家西京前。異說不得擾。官皆核名實。學亦具師表。黃初尙元言。配老乃以莊。

治術日以頽。沿流益荒唐。明道崇理學。升孟以配孔。專門學益希。語錄衍千種。寥寥一千年。感此風教殊。實政罕逮民。私心競師儒。誰祀周元公。誰讀軒轅書。

獨遊水西登煙雨亭久憇追悼朱學士筠江太守恂

壬辰四月曾同遊此

山城一水環如帶。雙塔影飛三里外。行人望塔路不迷。斜日已過山城西。別來江水依然綠。竹樹千尋路千曲。林梢盡處立一亭。日氣轉赤煙光青。亭危一角驚先拆。使我傷今復懷昔。春燕巢空春草枯。憑誰更問春消息。當時逸氣橫九垓。桃李迎客爭先開。寧知過眼若飛電。三客坐處生莓苔。卅年舊事愁難再。何況風光隔千載。龍徙空山杳莫尋。鶴歸華表寧能待。芒鞋已倦蒲帆舉。別意惟同夜鳥語。行客多時怨水風。危亭入夢仍煙雨。

過水西渡

已作如塵似夢看。殘春曾此一停鞍。能迎三十年前客。只有參天竹萬竿。

青弋江舟行

順流轉比逆水難。北風吹水欲上山。風中歸鳥性偏急。逆浪逆風穿樹入。青山影外溪流足。溪水亦輸江水綠。水西明月來水東。卻罩一角斜陽紅。

夜起

窗櫺高下綠低迷。夜半何人發水西。留得月痕剛一線。卻教山鵲盡情啼。

長至後一日消寒第一集諸及門餞余洋川書院之生雲閣分賦得山樓卽事四首

前宵雨初停。溼霧一山皺。白鳥入白雲。延回飛不透。

樓閣三百家。溪流自環繞。澗底出笙歌。年豐賽神早。

卻倚青松樹。迤東築小樓。昨宵驚驟冷。靈鵲宿牀頭。

紅林千百株。一夕已無影。山風颯然來。巢禽各延頸。

蕪湖喜晤張太守祥雲時攝道事

暫移五馬駐雄關。意外相逢遞往還。同輩漸如秋後葉。異書高比屋頭山。人傳海上魚龍橫。時洋匪在寶山嘉定一帶

滋我共江干鷗鷺閒。闊別十年重握手。喜君青鬢不曾班。

荅友人贈梅

一棹欲歸江浦。五株誰贈溪梅。卻掃軟紅塵去。安排萼綠華來。

港口小泊

濃濃雨細天垂黑。白鷺欲將行客嚇。眼前風浪轉不驚。飛鳥蹈空人蹠實。

消寒第二集陳孝廉懿本招遊蕪湖城東沿後湖隄至三昧菴看黃梅作



後湖三百頃。煙霧忽微茫。寺作前山界。隄真夾水塘。瓜分留寓縣。東晉時改蕪湖立襄垣。定陵遂道三僑縣。果熟薦空王。坐久還成雨。黃梅發古香。

十五日晚自東梁山移舟至西梁山泊晨起阻雨

東梁山上雲。欲作西梁雪。移此江南舟。過江看落日。江干三尺霧。又向江南結。三更迎面雨。隱此當頭月。已有曙鵲聲。愁霖苦難歇。

守風西梁山竟日

雲從西走東。頃刻一山出。回瞻東梁山。復向雲表沒。寧惟南下少。北去帆亦絕。檣鳥與林鷓。對語較清切。荒庵懸陡岸。正晝色如漆。我倦亦枕書。陶然醉終日。

舟過蕪湖始聞彭尙書元瑞之訃謹輓一首

不求立異不從同。十載追隨宋殿東。編集會昌名一品。蓋棺光政贈三公。沒後奉諭旨仍贈協辦大學士。升沉總在雲霄上。公自副相降補閣學復擢侍郎尙書皆直南書長。恩怨都銷氣燄中。最惜石渠天祿署。更誰博物比司空。公開見最博尤悉本朝掌故一時無兩。

十七日晨起北風尙勁書此遣悶

昨霄雨如煙。今晨雨如霧。多謝西梁山。留人三日住。咫尺不見娥眉開。山溜隱隱喧驚雷。明朝未敢望江浦。祇願征帆泊牛渚。

是日晚抵采石因獨遊三元洞作

西來長江一萬里。盡向石竇光中收。回頭滄海亦不遠。初日欲上潮驚流。孤僧聽慣亦不訝。枕上長江六時卸。長明燈燼已十年。空水光中不知夜。

夜起登太白樓

準擬宵深秉燭遊。然犀亭下泊扁舟。青天無月人無酒。辜負三更太白樓。

十八日早自采石挂帆將抵江寧訪孫大星衍先寄一篇即以志別

時將赴山東監司任

今晨挂席思凌空。五色已矚帆檣東。舵樓繙書未一卷。席帽亂捲三山風。新晴水面鋪朝旭。影外波濤尙如斛。艱危歷盡心已平。水狎鼉鼉岸麋鹿。此時卻憶單居使。可已乘流向揚子。白髮樽前有底忙。素心海內無踰此。河流雖濁官能清。河隄使者憎好名。得閒篆仿徐內史。好古客呼劉石經。功名試問誰能足。仕宦我知貧最樂。他時青兗來看山。北抵二嶠東岱嶽。

十九日早過烈山作

烏江浦口暫徘徊。昨日舟從采石開。半响柁樓眠未穩。六朝山已上帆來。

十一月二十一日消寒第三集胡戶部稷昆仲邀同孫兵備星衍冒雨至小倉山房探梅并留飲小眠齋即席賦呈並贈袁公子選

曾見郎君入抱時。傳經近復課佳兒。古梅似向閒人揖。舊事都應老鶴知。墩割一隅袁大令枚即埋謝傅。錦留五色付丘遲。談深紅燭全銷焰。門外三更雨若絲。

十二月二日消寒第四集李兵備廷敬招同人集平遠山房觀宋四家墨蹟卽席同賦

裝成橘頌荔枝詩。尙憶煙雲過眼時。余久客華宮保署見所藏宋四家至二十餘種尤奇者蘇文忠橘頌蔡端明荔枝詩也一代傳人原磊落。百年

真氣藉扶持。寒梅消息遲霜信。殘臘心情付酒卮。我是庾公樓上客。摩挲故物劇相思。

題秦宮人曉粧圖

仙雲如綺復如羅。天上新看鏡乍磨。錯認廣寒宮小集。一輪圓月一姮娥。

李兵備以會勘江浙地界泛海至羊山信宿公事畢繪泛海圖屬題率成長句以正

一帆出海何飄然。五百甲卒藏戈船。帆檣解與潮勢鬥。五色幢下蛟龍纏。竿梢時浮復時沒。蜃氣回環一山出。海風吹人若步虛。卻及島中方履實。誰言海外一事無。文案積若牛鬻粗。經時履勘事甫竣。瞰海絕壁如浮圖。故人尙有洪厓在。挂席何應不相待。請公別買一葉舟。我亦時來看東海。

初四日消寒第五集李明經筠嘉招同李兵備廷敬何徵君琪陸孝廉繼輅林鎬儲桂榮楮華李學璜鮑熙改琦徐棠諸文學並鐵舟上人吾園小集時余以明日旋里諸公皆卽席賦詩相餞醉後率荅一篇卽以留別

一鶴引一客。閑步汀西頭。汀西閣上人。一一如眠鷗。元裳丹頂時。窺牖堊鶴居。然戀紅袖。有時合隊出。探梅七尺亭亭影。俱瘦簾前新月輝。簾外踈梅開。春人結束登春臺。鼓吹復從門外來。主人約客排宵讌。落日暉暉坐中見。陸郎年少飲亦豪。十七人中稱最健。香巖儲高詠。竹圃鮑歌。激得閣外生回波。就中匿笑何春渚。七十風懷尙能補。坐中有歌者四人解衣作畫改七薈。我亦石上題牋忙。鐵舟開士詩才逸。畫筆年來亦如鐵。謫仙開衙東海頭。好客絕似劉荊州。穀人詞老梅村叟。前後可稱雙祭酒。時遲吳祭酒錫騏以病不至微嫌病酒及十旬。明歲花開可來否。一更飛觴至二更。坐上客始連翩行。冥濛歸路不知數。幸有導騎持燈迎。君不見新知雜故知。卜晝又卜夜。三更未醒船已行。挂席當從蠡河卸。

鐵舟上人邀至南園早飯

晨餐未了午雞啼。好客應知劇孟齊。上人坐上。食客嘗滿。一味孤行最相稱。公參玉版我黃齏。

舟過昆山有感徐司寇乾學王司農鴻緒舊事率賦二絕句

傳是樓空水榭荒。百年先已感滄桑。早知身後名皆在。何必師生軋百場。司寇奉命所修一統志。及司農明史稿。皆係可傳之書。

人言太僕繼南豐。微覺前賢面目同。我讀亭林居士集。不求工處自能工。

初七日消寒第六集瞿應謙別駕攜酒招遊虎丘久憇生公石時宿霧漫山飲畢不見一人悵然而返分賦得石字

山僧啓山關。驚出雙逸翮。寧知攜榼者。先已候門隙。僧寮雖未啓。已布行客席。樓臺丹碧影。裹此寒霧白。三載偶一來。爲歡感今昔。兼攜亡友句。時適攜亡友遂寧張問簪詩爲閱定久憇生公石。同儕櫻世事。一晌閒不得。時待諸同人並

不至千人石上苔。寥寥坐雙客。

臘八日破曉過錫山作

山雨接天白。破寒溪上來。北風吹別袂。南酒勸銜杯。宿鳥依林顫。驚魚蹴浪回。呼僮泛膏粥。聊賞膽瓶梅。先壠側形家。言尙有昭穆二穴。因以昭穴葬亡婦。而舍弟家適被水漂。遂遷葬于穆穴。自此先壠已無隙地。他日子姓不得更附葬。并此作詩以爲戒約。暇日復課兒子等添種松百本。作籬衛之。庶幾封殖之義云爾。

憶從葬西原。子姓殊不少。一輩課十株。佳柯已繚繞。冬青女貞樹。墳道藉以表。東南離百步。溝水成曲沼。春到上冢船。粼粼碧波小。經營三十載。齒髮慙已老。無貽地下差。吾行倘堪保。

十步依我祖。五步依吾親。料量松柏株。芟此荆與藁。石凡清且修。藉以列俎尊。吾弟近亦遷。庶免水嚙墳。弟冢爲水嚙墓門爰遷耐穆穴全家骨肉多。鬱鬱滿墓門。統計一室中。誰亡復誰存。恒榦有自來。吾以還二人。

逐臣西戍日。卜冢渾河源。回頭蔥嶺高。萬仞瞰北原。豈知螻蟻微。竟荷天地全。荷戈復歸來。衣敝履亦穿。得耐先壠旁。此事豈偶然。願旣遂首邱。萬念盡可捐。所慙德未酬。以勗子與孫。

憶昔初結褵。白雲溪畔室。追隨三十載。亦旣衣翟茀。一朝人事改。丹旆屋頭設。明明同命者。今日乃獨活。忍心奚若此。委彼在林樾。翁姑歲時饋。地下冀修潔。卻待松有濤。吾行亦歸骨。

十七日消寒第七集。楊上舍槐招同趙兵備翼莊宮允通敏劉宮贊種之金太守粲方明府寶昌早飯石竹山房復至秦園茶話始別分體得五古一首

春筍未及抽。石竹已成列。草堂花氣暖。無異讌春日。主人工治饌。廚婢亦修潔。溪魚及園韭。日昨已梳剔。樽羅會稽釀。盤滿洞庭橘。寧惟充口腹。志意亦怡悅。尤欣嘉會早。讌罷日方昃。復有縮地方。秦園茗堪啜。

宅北有茶亭。仿錫山秦園爲名。

### 更生齋獨坐

更生齋獨坐。俗客無一到。圖書堆滿案。藉以拓褻抱。主人五十八。始覺有白須。蓋棺無幾時。所幸樂有餘。前時葬山妻。日昨哭亡友。平茲萬古愁。庶藉一杯酒。林梅旣寒香。水仙亦幽姿。呼兒開甕頭。屈指當祭詩。讀歸方伯景照猶女佩珊詩冊。率跋一首。時聞方伯已從戍所。旋里卽以寄之。

每詡嬌兒筆陣逾。憶偕臣叔戍西郵。李騰空仙不旋踵。段秀實歸仍戴頭。種樹經曾攜萬里。方伯在塞外時菊種至數百。簪花格已定千秋。東山絲竹真堪慰。各有深閨侍唱酬。

### 過白土鎮

古縣華陽驛。前朝白土鄉。剩坡餘臘雪。微雨出朝陽。月向螭頭墮。人從驢背忙。盤飧思往事。乙未冬過此本鎮茂才紀

開爐以盤飧頻問讀書堂。斗酒見餉

青元觀

仙人高臥處。觀後卽葛仙翁大冢一巷亂雲飛。列闕真如峙。蒼松相與依。鵲靈朝語警。鶴古道身肥。法侶來迎客。仍

穿禮斗衣。

重至句容展亡友王廣文吉士殯率賦一篇卽呈令兄司馬周南理問斗南

卅年不到華陽岡。岡南栝栢都已蒼。縣中老友誰更健。腹痛最憶西頭王。與令兄周南分居東西宅當時賓從頻來往。

修竹山房及西舫。漫士心情沈隱侯。校官風度王元長。騎驢已倦牽車來。醉客何止三千回。澹香吟屋賦

詩處。采筆一一埋青苔。朱茂才舖及令姪潑駱秀才三奇均已下世孫郎遠宦鴻河口。我亦荷戈天外走。前時白袷諸少年。相

對各驚成老醜。青元館前訪葛仙。更向烏翅岡頭眠。三峯遠復有前約。時將遊茅山道士待客排雙筵。城南欲

別頻回首。復挈城西草莽酒。一杯酌爾應快心。生友竟堪成死友。

臘月十九日消寒第八集王司馬周南招宋學博保賢令弟理問斗南文學簡可陪遊獨鶴山莊看梅歸

飲修竹精舍卽席賦贈分韻得莊字

三十年來事渺茫。塢中藤蔓屋頭葉。何期句曲羣仙會。重醉先生獨鶴莊。天上黃人曾捧日。時話四精舊事月邊

青女自飛霜。遲眠緩步消餘酒。嗅盡寒梅樹樹香。

二十一日自句容沿破岡瀆抵綠野村裴主政暢招同楊文學鳳翔暨小阮中翰錡上舍鉞集金粟山房作消寒第九集并約明日同遊茅山卽席分體得長短句一首

我飲秦淮水。欲覓秦淮源。荒岡百折走不盡。側耳已聽流聲喧。未遘赤山湖。先逢破岡瀆。古澗寒流三尺足。其上莓苔蓋深綠。關心七日卽小除。爆竹響已盈衝途。年殘只我無一事。尙向山腹搜奇書。道人相貽綠玉筇。一笑欲上高高峯。寧知遊興昨方發。大茅山頂雲先紅。招邀伴侶皆踈散。祀竈黃羊亦充饌。饋歲人貽赤鯉魚。經時我啖青精飯。主人頻開綠瑩堂。更約入夜傾千觴。一門羣從悉來謁。問我何事投遐荒。遐荒萬古風沙集。我感君恩仍兩泣。不是天邊早賜環。何能地上周遊屐。陶貞白。葛仙翁。拍手空際欣相逢。神仙大半遊世上。宰相亦復居山中。清涼境地真殊絕。一樹寒梅一甌雪。我向梅花樹下眠。羅帷夜半飛明月。

遊裴氏園亭

深澗遊魚五色。小樓乾鶻千聲。寒日欲斜松阜亂。雲已暗山城。

破岡瀆夾岸皆栽桃。裴明經鍼于此送別更約花時復遊。因作此贈之。

破岡瀆後亂山多。結屋欣看傍澗阿。此是碧桃花世界。不妨開日更經過。



入茅山自黃仙墓至乾元觀宿

死非死。生非生。黃仙蛻處還留聲。出不出。處不處。宰相居山究何補。平生不解陶華陽。念念都欲縈君王。惟餘一事差快意。愛聽千尺松聲涼。宦途不礙神仙境。句漏旌陽兩仙令。但使能修駐景方。周妻何肉都非病。我來依茅岡。咫尺鄰荒墳。山風蕭瑟溪水溫。夜半白狼來叩門。

山北尋老君垂雲諸洞

半月西已墮。半月東復升。團團滿月光。莓苔結三層。一洞嵌碧月。一洞垂紫雲。紫雲欲下條復上。離地驚看不盈丈。高低元氣若吐吞。一朵突出驚當門。其餘一朵復一朵。忽若雕盤貯新果。朵雲盡處叩石鐘。復有雷鼓聲隆隆。君不見。蠻中飛雲亦已奇。此洞何止雲能飛。洞中英英鋪不足。卻惹生雲夜來宿。

乾元觀夜起乘殘月看梅

萬夢初醒處。回廊歷幾周。好花紅蝶背。新露白烏頭。徑轉風千尺。簾斜月一鉤。是誰喧客耳。春水竹中流。宿乾元觀有懷孫兵備星術

百轉千回歷鬱岡。跨驢前事渺難忘。曾攜天上神仙侶。來憇山中宰相堂。今日故人分出處。更憐餘子半

存亡。

乙未冬同遊者兵備外爲林公子崇緝與及門鄭聯華今均已下世

蓬萊海水都清淺。

道書以陶貞白爲蓬萊都水監故及之

畢竟誰尋駐景方。

張太守鳳枝謫戍伊犁。以愛姬再寄其姊滎陽令署華太君處。越歲太守札致太君偶不及姬。姬本思憶。

成病復因是銜恨。遂雉經。卒太守自戍所還傷之屬賦此詩。

繁臺幾化望夫山。卻待征人久未還。情到死生何以報。揮殘老淚入陽關。

七千里外別銷魂。姬貴州人十五年前誓尙存。郎不薄情儂薄命。再生端欲入空門。

地府永埋千載恨。天山不寄一行書。傷心三尺生綃影。入夢多時尙未除。

索嶺盤江歎遠官。相隨幾見月團圓。定情金縷裙猶在。摺向空箱不忍看。

東坡南海公。西海莫雨朝雲夢。總空寂莫小桃墳。上樹異花猶染淚珠紅。

魂小仍隨油壁回。憶郎門向裏河開。築他燕子樓千尺。供養平生畫像來。

瞥見驚鴻影未真。在貴陽日太守曾喚姬出拜青綾步幃動遊塵。多應平視劉公幹。罰作新詩悼洛神。

尙有西臺讞案存。誓心終不出侯門。九原若遇河陽令。謂陳大令熙藩時亦久卒更欲低頭拜昔恩。

小除日更生齋招諸同人祭詩

年殘風雪寒。良朋悉遄歸。如何未入春。石砌已墮梅。東西比鄰中。雅有數子才。招來更生齋。相與銜深杯。

諸君盡華年。感我莫景催。送客復入門。晴陽尙暉暉。

趙司馬懷玉自山左奔喪歸同官贈以一舟至清江浦渡河膠敗舟圯八口幾至覆沒以救得免司馬作

厄解自嘲并索余一詩記事

大舟峩峩高百尺。敗久無人肯相索。先生途窮欣得之。輦致妻孥及書策。忙中方渡天妃闌。意外忽趨河伯宅。無端突起尺一波。竟敢馮陵四千石。兼攝本郡馮生詎欲謁陽侯。展氏不關多隱隱。艙無阿堵物堪羨。舟有辛餘靡亦坼。郎君幸免魚頭戴。如願本從龍窟得。篙工舵手聲齊奮。撒網持鉤拯亦亟。微軀險欲爲人鮮。定例并須援嫂溺。孤兒一日三番哭。水厄仍兼絕糧厄。推量其故亦可曉。至寶隨身遭迫逼。龍神要看瀧岡碑。鮫府思按辟雍刻。不然畫寶吳道元。或者字藏黃魯直。遭風濕米考竟升。落水蘭亭價誰敵。評書旣貴屋漏痕。佞佛本當衣壞色。但令釜底不生魚。何必篋中長貯帛。罷官尙飲八閘水。助葬誰貽一船麥。可憐剩有朝衫綠。亦復染成天水碧。窮經先已集坎壈。讀禮還遲卜窀穸。曝日神方時僂僂。見星歸路難匍匐。髮膚未毀真天幸。妻子得全容衆力。王楊盧駱半遭此。君曾刊唐四傑集才大例須沉澤國。先生盛名亦不減。一死何妨塞其責。卽令萬一免沉淪。從此尤應斷縑墨。如何更不思愆咎。更準解嘲成解阨。君毋更以性命戲。勢必重遭神鬼劾。一官青社旣偃蹇。三載聖廬須簡默。仍愁溺後陸士龍。照見麻衣笑聲劇。

更生齋詩餘卷一

冰天雪窖詞

主人少喜填詞。壯歲後。恐妨學。輟不復作。卽偶一爲之。終歲不過一二首。歲戊午。自京邸乞假回車。箱無事。輒填至數十闋。及自塞外回里。亦時時作之。遂滿一卷。名曰冰天雪窖。從其後言之也。少日所作。亦不忍棄。并裁作一卷附焉。機聲燈影詞是矣。

臨江仙

綠鬢學仙愁已晚。卽今況復蒼顏。天空烏去不曾還。未知雙蠟屐。再入幾名山。半世著書難得了。硯臺肯放清閒。酒人相約掩蓬關。臉從花索笑。心與石爭頑。

憶王孫

涼風吹綻一天星。約伴時時過水亭。說鬼宵深不可聽。掩疎屏。小婢齊聲唄佛經。過汀故說愛新涼。躲過前頭姊妹行。私語喃喃已不妨。卻提防。移得鸚哥出畫廊。兩重門內忽相逢。一串花香出袖濃。剛賭秋千氣力慵。且從容。眼角回青頰轉紅。傷春長自下簾鉤。杏葉扶疎柳葉柔。三月花前雨不休。沒來由。私語催人上小樓。

滿江紅陳其年先生填詞圖爲伯恭學士賦

卅載填詞香一瓣。敬酬陽羨。可可是家山百里。畫中頻見。前曾見先生四十畫像涉筆偶描秋士影。關情別有春風面。笑青衫、五十尙沉淪。工排遣。將擷笛先施轡。乍展卷仍安硯。仗卿卿壓盡。等閒釵鈿。別夜最憐天似水。當頭吹落雲成片。算個儂風味。有誰窺。梁閒燕。

試問熙朝人物在。宋元之右。只己未宏詞一榜。尤稱淵藪。前輩愛才真似命。昇平樂事吾能究。趁閒來、歌板兩三聲。消清晝。竹垞老。梅村叟。招玉叔。攜紅友。且不知秦七。何論黃九。翡翠几暫停。三寸管。新腔已落千人口。羨當年。風月最清華。誰能又。

雙調江城子紅豆詞爲禮親王世子作

深秋門巷動涼颺。掩關遲。雨如絲。折得一枝紅豆。立多時。天上亦添新別恨。人不見。渺相思。拈來枝葉影參差。意誰知。酒難辭。且與梁園賓客。譜離詞。只有文園消渴甚。賦不到。九秋枝。

十六字令初冬

風。一夜千林葉墮空。開軒望。斜月正中峯。

減字木蘭花

香濃月淡。幾朵露蘭光欲泛。行過房櫺。福橋栽燈墮小紅。茶甌清冽。留得那年元夜雪。說夢聲低。偏惹

簾前鸚鵡疑。

唐多令

真氣本無前。豪情忽欲顛。一百番、沉醉酣眠。亂摘九天星與斗。權當作、酒家錢。寥廓約頑仙。踏紅雲種田。待秋成歲月三千。擬釣六鰲滄海去。雖不飽、且烹鮮。

眼兒媚

杏花樓上杏花香。無語斷人腸。干他甚事。鶯鶯燕燕。咒盡年光。依然簾幕依然鏡。依舊隱斜陽。如今再要。當時人面。卻費商量。

又

嵌心百事總難忘。閒處一端詳。鮑姑紈扇。柳娘羅襪。謝姊縑囊。愁多不合住江鄉。夢少也干場。笙歌元夕。鶯花上巳。簫鼓端陽。

轉應曲

雷鼓雷鼓。打過春三四五。還虧列闕豐隆。催得前村挂龍。龍挂。龍挂。一幅水鄉圖畫。

蝶戀花時欲乞假南回書示子弟

十二闌干紅半曲。桃杏將開。一雨先舒萼。多分散人真有福。半春好夢無重複。卅里迢迢煙艸綠。欲望

江南遠樹偏遮目。好水好山生計足。汝曹莫恨歸期促。

賣花聲春分

艸綠未成茵。柳線難勻。等閑鶯語幾曾聞。只讓杏花同燕子。占盡春分。心切望朝暾。霧暗連晨。關心西北有征塵。日日玉堂天上坐。卻是閒人。

謁金門

誰決策。除是劉琨祖述。一事差堪羸越石。承平非狎客。叉手巡行今夕。放眼追思疇昔。好友緣儒都入

墨。寥寥心孰白。

相見歡

黃昏獨下珠簾。病懨懨。差喜眉頰常苦。夢常甜。三叉渡。三生路。白雲尖。恁悅長林斜月。影纖纖。

鳳棲梧

畢竟春來饒氣勢。萬鳥啼春。萬夢隨春至。惹得玉梅添意智。花開又豈干春事。白袷春衫聞已製。輕暖輕寒。春轉無倫次。何是與秋非一致。春人只把情懷試。

滿江紅譚子受英雄兒女圖

大蘇高牙。問此是誰家年少。只亘亘、倚天長劍。勢將離鞘。千里偶追流電影。萬金願買傾城笑。算渠儂、二

十五年前堪同調。且緩緩。金樽倒。更艸艸。離愁攪。看車前。努目。急思投効。兒女情懷何者是。丈夫志業誰能料。問卿卿。何日定天山。紅旗報。

菩薩蠻

玉皇宮殿高無極。東西龍虎更番直。天上事偏多。仙人鬢亦皤。麻姑空一笑。偶自舒長爪。搯破碧桃花。花光照萬家。

減蘭寄舍弟

吾家阿弟。先我一年辭帝里。玉版銀鱗。飽啖江南二月春。小桃開落。穩坐卷施東畔閣。應念衰翁。騎馬朝朝冒朔風。

應天長直廬卽事

構巢招得雙鷓鴣。激水養成千屬玉。長林麓。橫溪曲。卻向此中開竹屋。閑官殊不俗。所喜更無拘束。昨賜萬條官燭。寫三朝要錄。

江南好時將乞假南回作此寄里中親舊

鄉園夢。昨已到雲溪。生小樓臺三徧換。柳邊門巷亦全非。新綠浸簾衣。

鄉園夢。昨已到花橋。對舫乍憐詩社歇。陸祁生每與丁叔候兄弟及隔河添得酒旗飄。燈火徹清宵。兒子餽孫等聯吟時並遠出



鄉園夢。昨到橫舟亭。小港蓄魚橋半圯。荒庵燒笱戶全扃。僧老厭緇經。

鄉園夢。昨到放生池。煙柳綠交楊令宅。楊大令西河宅在池側水雲碧卷謝家祠。清景待題詩。

鄉園夢。昨到驛樓前。障眼市塵高百尺。關心鄉語別經年。真個說歸田。

鄉園夢。昨到石橋村。高隼欲盤雲外塔。神魚時拜竹閒墳。松子積臺門。

鄉園夢。阿弟屢邀呼。新築水亭招社燕。別營山冢葬童烏。猶子明男近殤作達且提壺。

鄉園夢。好友遞將迎。木杪軒中搜逸句。竹初庵內證長生。奇論尙縱橫。

鄉園夢。外舍最依依。榆莢綠迷穿徑水。薔薇紅隱上樓梯。花發子規啼。

鄉園夢。羣從亦翩翩。坐我小樓敲句好。輸卿長日枕書眠。屋外水周天。

前調 擬江南境作

江南地。一碧已無塵。小市雨晴初試馬。長隄星暗乍逢人。猶剩一分春。

江南月。不厭徹宵看。無奈乍圓還乍缺。未妨輕暖與輕寒。長凭玉闌干。

江南岸。屈曲漾蘭橈。舊事乍思情漠漠。夜程初急雨瀟瀟。已過驛西橋。

江南艇。鷓鴣與同飛。待得柳梢殘月出。水禽蹤跡已全迷。留得夜烏啼。

江南屋。低小只如船。一樹石榴初吐豔。四更銀燭尙高然。隱隱笛聲穿。

江南路。從此遂幽尋。韓偓艷詞容寄意。陽城下考亦甘心。別念撫孤琴。  
江南夢。日昨已全醒。黃卷誤人頭欲白。綠楊窺客眼猶青。閣小戶仍扃。  
江南客。天末溯歸蹤。漁唱使須蘆笛和。芰衣仍待柳絲縫。鷗鷺且從容。  
江南侶。說著已銷魂。松柏徑中尋舊友。鶴鴿原上指新墳。尤歎此衰門。  
江南節。屈指已天中。絲柳乍青蒲葉綠。楊梅初紫杏丸紅。水淺試雙龍。

虞美人

黃昏獨坐闌干左。竹葉深深鎖。橫陳玉體見何曾。知道紅窗六月、不燒燈。  
夢中嚶語愁人覺。小婢都辭卻。無聊長自睡蒼騰。懊惱一鉤殘月、鬢邊升。

江城子

生疎廊屋幾曾經。意恹恹。步伶仃。偏是半邊團扇有流螢。縱向曲闌深處躲。防照見。一星星。  
紅闌干外路三千。病恹恹。說當年。贏得半生憔悴半生眠。只有畫籠鸚鵡好。渾不記。有從前。

采桑子

別來已覺無情緒。放了風箏。過了清明。總向閒門冷巷行。何時約略三春夢。多比流螢。少比疎星。春睡

曹騰白晝醒。

轉應曲

天上。天上。誰把兩丸安放。東西滄海漫漫。出沒真如轉丸。九轉。九轉。天也有時不管。明鏡。明鏡。看了有時仍聽。吉祥善事多般。頓覺愁顏喜歡。歡喜。歡喜。儂與鏡兒知己。春夢。春夢。誰向小窗分送。夢中說夢尤疑。身外分身絕奇。奇絕。奇絕。魂共燭花凝結。千里。千里。只在離人足底。別來吳苑花香。又復燕臺夜涼。涼夜。涼夜。酒薄衾單多謝。虞美人

人人愛說芳菲節。更愛團圓月。箇儂心事獨嬌憨。卻喜花看春半、月初三。長安道上金貂集。青紫容人拾。到來生怕說頭銜。只戀年時憔悴、舊青衫。

昭君怨

原是一般年紀。可算他作弟。記得小名無。衆中呼。入夜畫樓先鎖。百計要將人躲。何意學生疎。上頭初。

柳梢青

纔賭千秋。又邀鬥艸。且漫藏鉤。衆裏聰明。箇中機警。格外溫柔。日斜剛下粧樓。招女伴、更番出遊。鳳尾墩邊。鵝毛洲上。龍嘴灘頭。

西江月

夢裏鶯花繚繞。愁中風雨廉纖。一般時節症懨懨。起對燭花呵欠。小膽疑聞鬼語。細心時卜神籤。病兒生怕不增添。百計把人排陷。

減字木蘭花

乍談心曲。何事小名呼小玉。彈指年華。未比梅花比杏花。最憐同調。八字果然生剋肖。判與他生。自有麻姑肯玉成。

蝶戀花

閒日偶從妝閣偵。聞說驚鴻。險被袁宗聘。私語又防人竊聽。團圓只指隨身鏡。情短情長何自定。除了今生。更把來生訂。一晌遲疑還未應。喃喃只說心腸硬。

酷相思贈俠士

日晚黃塵都似織。徒倚徧樓南北。便四海無家歸未得。一劍也。千金直。一騎也。千金直。恥向人前稱羽客。況肯談天釋。任醉眼昏昏青轉白。天上也。誰相識。地上也。誰相識。

醉春風

好把春衣換。更舉離觴勸。眼前誰可寄相思。算算指上先掄。心頭久嵌。口中難喚。合是人天眷。莫更

情懷亂。個儂只怕太酸寒。看看爾許年華。這回風格。那般詞翰。

羅敷媚

年來情事誰能識。神也瞞他。佛也瞞他。小婢依微道着些。無端兩地難牽合。心在誰家。身在誰家。夢裏時愁去路賒。

又

秋千架下分頭走。姊住東谿。妹住西谿。只望秋千影不迷。更闌重到秋千下。月也低迷。露也低迷。畫索斜拋烏夜啼。

長相思

風蕭蕭。雨蕭蕭。窗裏無人響玉簫。紗燈壁上搖。夢無聊。醒無聊。窗外荷珠落亂跳。游魚蹴浪高。

木蘭花慢

秋夜重愁園飄書屋示蔣二振三

只團飄書屋。仍一片。挂斜陽。算杏已摧紅。蘭先殞紫。桂尙杼黃。悵悵那邊門巷。歎簾衣何短。艸何長。百遍欲尋歸燕。幾番試問寒蟄。十年羣從半淪亡。頭白剩蕭郎。縱見了桃根。尋他菱角。也費猜詳。平時枕書眠處。是何人重與擺繩床。酒醒佛燈藏幔。夢回鬼語沿廊。

又太湖縱眺

眼中何所有。三萬頃。太湖寬。縱蛟虎縱橫。龍魚出沒。也把綸竿。林威丈人何在。約空中同凭。玉闌干。薄醉  
正愁消渴。洞庭山橘都酸。更殘星霧杳漫漫。激電閃流丸。有上界神仙。乘風來往。問我平安。思量要栽  
黃竹。只平鋪海水幾時乾。歸路欲尋鐵甕。望中陡落銀盤。

念奴嬌生日東西家。

半秋纔過。不多時。到了初三新月。八字雙飛。胡蝶好。生與菊花同日。剛欲題糕。仍邀說餅。且把書聲歇。齊  
肩齊歲。那人先占佳節。猶記七夕樓頭。穿鍼簾底。腰瘦頻頻折。知道個儂勤頂禮。偏喚小名何必。笑鬢  
方開。愁眉更斂。梁燕防饒舌。燈花解事。雙雙紅蕊偷結。

菩薩蠻贈俠客。

偶然來預朱門宴。身輕只比梁閒燕。驀地出人頭。燈前尙閃眸。一腔填恨血。匕首懷中熱。座客酒遲乾。  
先防冷眼看。

木蘭花慢

己未中秋內城  
南池寓舍作

歎八年此夜移。八處看陰晴。算幾載持衡。兩番入直。一度歸耕。西風欲催人老。趁乍寒刮得鬢星星。已被  
月中人笑。從今莫更多情。依然薄醉擁桃笙。如水玉階平。只三十年前。境難依約。夢不分明。沉思那回  
塵劫。把深杯都向夜臺傾。一例碧虛解事。半宵霞采橫生。

臨江仙

恭纂高宗純皇帝實錄第一分  
進呈擬欲乞假南下偶此書事

人說綠篔簹青箬好。可容仍殿朝班。玉堂官燭影闌珊。昨朝書已奏。明日棹當還。天上樓臺曾小住。明湖如帶回環。夜涼偏欲夢鄉關。屋前雙疊港。屋後一堆山。

琴調相思引歸燕

一樣樓臺夕照昏。杏無心緒入朱門。欲飛還止。銜得舊時恩。差喜故巢同海上。好春仍得話溫存。倘逢精衛。可許代招魂。

減字木蘭花

夜涼人定。正好明心同見性。一縷茶煙。透到梅花小閣邊。休休莫莫。夢好正嫌無着落。與我周旋。莫鬥眉梢眼角禪。

滿江紅贈崔三瘦生

十八年前相見在。謝家庭院。驚一揖。玉梅花底。與花同顫。葛塢東西山水窟。劉綱夫婦神仙眷。便匆匆。從宦向湖頭。湖冰泮。蒼雪上。頻開讖。荊郢路。頻傳箭。只悠悠。七載。幾曾謀面。蔥嶺南頭時入夢。蒜山北下。仍相見。歎人生。聚散總無端。空中電。

昭君怨苦雨

窗隙與誰同坐。咒雨鷓鴣兩箇。兜起卅年愁。舊南樓。暫向曲屏高臥。夢又把人顛簸。睡覺夜燈青。影伶仃。

滿庭芳

雨窗簡蔣振三昆仲

撇卻千山。行完萬水。偶來茅屋勾留。又教聽雨。日日捲簾鉤。畢竟誰人過訪。三兩客、兼雜鳴鳩。門扃響。奚奴睡熟。親爲點茶甌。鸞鷗。風乍急。紙窗搖動。無異扁舟。擬乘流徑去。隨分清遊。東海波臣尙笑。曾見汝。大漠西頭。祁連冢。何時築就。埋骨此荒丘。

念奴嬌

元夕醉中復至城東懋巽宮樓

餘生何意。擘蠻牋。重寫孝侯風土。醉我百杯元夕酒。更聽一堂簫鼓。我醉還歌。歌仍引滿。說盡邊亭苦。妻孥雨泣。昨年投畀豺虎。殘夜出戶閒行。城門東去。彌望多平楚。一領綠篔收拾好。恰稱瀟湖漁父。踏曲歸來。兒童指我。眉目皆飛舞。爲言此客。與樓與月千古。

前調

錢竹初松菊猶存圖

十年歸計。只剛剛、長就滿籬松菊。買得半園工位置。儘可賞心娛目。忽悟浮生。因求大藥。并禮西天竺。回頭自望。髣髴毛鏡裏先禿。差幸服食祈年。迷途未遠。末路仍堪贖。莫待扁盧俱束手。醫雅難于醫俗。一逕香清。一簾花好。一味茶初熟。這回休誤。白駒頭上行速。



因而自省笑先生，曷不工于責己。萬里歸來行樂好，何以埋頭不起。幾尺牙籤，三分燈影，一寸書堆，几蠹魚規客。先生今盡休矣。倘冀後世名乎。三唐兩漢，試問誰堪擬。況是傳人皆有命，不朽古來能幾。文仿淵雲，經研鄭賈，詩筆還蘇李。君應謂我愚，公愚更無比。

沁園春 喜趙味辛乞假歸里即送之  
青州司馬新任依原調二首

司馬江州從事，青州頭銜若斯。歎機庭綸閣，鳳池遽奪。治中別駕，驥足安施。竿上緣魚，磨中旋蟻，可是先生宜與詩。呼驢問，儘才堪令僕，汝好爲之。雖然樂已難支，只白髮高堂健飯時。算阿奴碌碌，無慙令弟。

深源咄咄，尚有佳兒，跨鳳清才，乘鸞仙客。君諸婿皆有名都唱微雲山抹詞，掀髯笑趁唐灣風月。且倒金卮。

三十年前稱詩少年，惟君不狂，看元卿三徑，招邀二仲。謂黃仲則左仲甫宏農別館，款接他楊。楊介祉蔚之元之叔姪少時過從最

密西廬則系出山陰故以他楊例之陌上班騅，堤邊畫舫，新樣蠻箋，古錦囊。今消歇，已半登鬼錄，半下名場。別來萬里投

荒，幸絕域，歸鬢乍蒼，便依然花鳥，何時索笑，依然樓閣。何地傾觴。蔥嶺煙雲，祁連冰雪，夢裏都憐徹。骨

涼。君知我是愁多易老，恩重難償。

金縷曲 題萬大令廉山請纓圖作于大令年十五時後二十年  
大令隨畢秋帆尙書姜杜香侍郎勳辰州紅苗最著勞績

此客真先識，趁升平時，時時留覽。九邊阨塞，試問請纓何太早。髮正垂垂覆額，天下事，引爲己責。手理鞞鈴，仍躍馬，果湖湘，陡建非常績。勳勒徧，壺頭石。丈夫自信饒奇策，況生平，服膺所在。劉琨祖逖，如許少年。

能十輩。分置楚南川。北談笑盡。萑苻之澤。只我感恩思。効死便歸耕。尙枕投荒戟。隨爾去。殺殘賊。

鷓鴣天

秋杪雲溪曉望

谿光未是廿年先。一樣闌干到眼前。風急萬鴉爭古木。露寒獨鶴舞長天。情漠漠。淚綿綿。舊家仍倚白雲邊。尋春去問堂前柳。破夢來穿渡口煙。

滿江紅中秋夕雨

窮海歸來。正盼望。此年此夜。遠準擬。半宵燈市。半宵水榭。三徑久。灑風伯掃。萬錢欲向天公借。更持螯。左手右持盃。人閒暇。雲驟暗。重簾罅。雷驟起。層檐下。忽蕭蕭。瑟瑟瓦溝如瀉。移樹鷓鴣驚巢乍。走橋人。嬾粧先卸。歎街泥滑處。約良朋。稱多謝。

西江月

九月初七日雨窗遣悶

門外愁霖似潑。帳中清淚同揮。一年多事上心來。不飲已防先醉。明歲重陽何處。去年此夕方歸。人言死別復生回。今日正當周歲。

鷓鴣仙

日斜時候。日斜年紀。又是日斜風味。斷腸言語不須多。況正值。斷腸天氣。前宵牢記。昨宵牢記。此夜更須牢記。半生最怕說銷魂。敢再到。銷魂田地。

江城子

柳絲南北罩通津。水波勻。月痕新。卻到晏公祠畔，暫逡巡。偏是畫船紅燭影，頻照見，夢中身。

又

播錢堂上記還真。是穠春。是花晨。依約別來如影，復如塵。安得學他雙燕子，來與去，不隨人。

壺中天

和女史歸佩珊韻即寄令叔方伯伊犁

從天試問，恁詞華，只付掃眉才子。百歲含愁容易過，經得幾番彈指。未盡名心，先拋世味，且復營書史。回看海水，比來清淺如此。猶憶絕塞歸來，君家癡叔，憔悴何能死。寥落雁鴻千萬里，憑寄阿兄數紙。并說中閨，尤憐嬌女，詩思清如水。比來相見，怪他風味都似。

又贈僧鐵舟

浮生如夢，記恩恩，滬瀆城邊小別。石爛海枯重握手，相對各驚華髮。瓶鉢隨身，才名蓋世，詩畫書三絕。鋼經百鍊，鐵舟果否如鐵。今日短簿祠前，長洲苑外，客路將鋪雪。一領袈裟渾欲破，賣字依然得活。極目天南，關心鄉國，鞞鼓聲纔歇。何時飛渡，醉眠黃鶴樓月。僧漢陽人

浣溪紗

病後般般總率真。見時故故不溫存。已教銷盡昨宵魂。開士心情居退院，美人顏色賦長門。年來偏重

過時人。

鷓鴣天

百罰深杯總不辭。忽從酒半透微詞。前房阿母都瞞卻。只許青溪小妹知。重攪鏡。更添衣。衆中偏覺語支離。不知天上頻攜手。故說人閒會面稀。

臨江仙

六月二十日詣學宮觀諸生釋菜并登尊經閣遠望

憶向校官稱弟子。春秋祀屢追陪。仲丁六十又三回。舊題名已暗。明倫堂有進士舉貢題名余皆預焉親爲拂塵埃。尋徧

浪淘沙

壬戌中秋夜起望月不見時在洋川書院

纔歇雨冥濛。月甚朦朧。玉塔處處有吟蟲。咫尺好山都不見。說是秋中。少壯去如風。老尙飄蓬。別家還

喜住江東。金粟玉簪開已徧。閒卻簾櫳。舍間廳事側多此二花

蘇幕遮

醉題焦山月波臺

屋禪關。樓法界。十仞高臺。更能危樓外。奇氣尙能除百怪。穩坐蒲團。且受江豚拜。舉杯遲。吟句快。乞篆題縑。總仗孤僧介。一日已償詩畫債。興來不學前人派。

瀟湘夜雨

汪秀才次玉屬題夜意圖時余悼亡日近與君同病爰率賦此寄意

悟徹前因。銷磨塵劫。又來樓上孤眠。微黃燈影。鏡臺偏。聲慘慘。寺鐘初動。光黯黯。簾幕斜褰。無聊境。我方  
匝月。君已三年。兩愁相校。望夫山外。愁更堪憐。只投荒歸日。病正纏綿。渾欲訴。金戈鐵馬。念誰禁。激管  
哀絃。忘情好。他時同穴。百歲鎮隨肩。

八聲甘州夢亡婦

向空房。盡處瓦燈昏。缺月影橫陳。算傷離感逝。殘冬既爾。何況經春。打疊半牀衾枕。時爲拂纖塵。奩鏡都  
安好。與照歸魂。畢竟瞞卿何事。只夜臺相值。問尙殷勤。歎襄王孤館。久已斷行雲。想闌干。東西十二。便  
夢回。總欲一周巡。梅花句。從今不賦。防要含顰。

前調常熟訪吳祠部竹橋賦贈

又匆匆。扶醉入山城。雪意釀寒更。算玉芝堂朽。赤厓閣圯。紅豆莊傾。今日劍門吾谷。都已屬先生。壓徧江  
南北。壇坵崢嶸。小弟頭銜一品。但才名艷絕。似遜難兄。羨盈門弟子。分日鬥心兵。更傳聞。量才尺好。隔  
絳帷。親授與雲英。憑誰有。平生奇福。來入詩盟。

小重山

夢不分明醒可憐。小樓簾半卷。月初弦。喘聲低緩。髻斜偏。朦朧坐。誤認卜金錢。衾薄忍添綿。舊曾揮淚  
處。錦仍鮮。擁來都恨夜如年。無眠客。今轉羨長眠。

如夢令 十三日侵曉  
過碧浪湖

龍氣出波冉冉。鷺鷥絲皆閃。海日未升時。幾片斷霞如斬。休賦。休賦。驚破一羣鵝膽。剩得曉星數顆。芒角出同諫果。尙未破天光。水碧盡將魚裹。孤坐。孤坐。千尺浪中一我。

菩薩蠻 十四夜過  
南潯鎮

高高下下游鱗繞。侵人不已侵巢鳥。一碧作魚天。空明不起煙。東西樓似織。出水高千尺。玉手盡垂空。長廊接斷虹。

減字木蘭花 十五日五鼓  
過平望湖

偶開窗扇。破曙鵲聲波上亂。百頃湖光。捲上先生六尺牀。雪花難集。倔強水蟲多不墊。落月團團。東海魚龍尙愛看。

昭君怨 吳江道  
中夜行

惹得夜烏難住。萬點鬼燐穿樹。似復有人行。散如星。鷺鷥絲屬玉。齊傍水仙祠宿。宵半忽爭鳴。學巡更。

清平樂 湖中  
迷道

風風雨雨。且向前湖去。欲問來船船不遇。進退總愁無據。忽然香氣縱橫。半空舉手將迎。岳瀆貴神抗

禮算來只有書生。

浣溪紗萬頃橋。

萬頃湖頭萬頃橋。雨簑煙柳共飄搖。水從天外綠周遭。宿火照將鴻雁暝。曉霞烘得鷺絲驕。是誰來伴

客無聊。

鳳棲梧戊子秋杪至虞山赴邵先生荀慈之喪時亮吉結禱甫三日今復以事來遊則距悼亡日甚近也感而賦此

憶昔來遊才合卺。新婦三朝。尙向紗帷隱。小別乍歸爲整鬢。對人言語尤奇窘。三十三年眞轉瞬。未比

松筠。早向深秋殞。紅豆莊前紅淚隕。回途魂已銷將盡。

虞美人寶帶橋。

蒲帆過盡危橋百。徑縱無千尺。便將蠓螋屈成梁。只惜都無寶帶一般長。泠泠橋外光如電。雲朵裁成

片。頃傳三萬六千寬。聞說眞仙不穀。放漁竿。

憶秦娥殘冬甚暖夏蟲並出感而賦此

羊裘熱。營營案上蠅聲出。蠅聲出。醉螿當漉。凍魚須徹。煤逋藥債都應逼。商量艸艸營除夕。營除夕。年

年共命。此年獨活。

清平樂孫解元子瀟屬題雙紅豆卷子

夢回永晝。滿地春光皺。半領綠衫花氣透。胡蝶趁香來嗅。文窗特與丁寧。東風格外垂青。欲配一雙紅豆。除非天上雙星。

浪淘沙

夢入小紅屏。露灑簾衣。鏡奩殘月影微微。偏是獨眠人帳外。胡蝶雙飛。小膽更多疑。怕踏層梯。畫屏深處認依稀。七尺紫檀香案上。誰共扶乩。

前調

斜照鬼門關。落日彎環。夜臺可望夫山。生怕瘦魂扶不上。添箇紅闌。推枕漏初殘。朱淚斑斑。寒宵何止夢能還。地下若無埋恨處。仍到人閒。

十六字令

拚。歷徧長廊耐曉寒。梅花瘦。不厭百回看。聽一雁。寥寥下遠汀。荒寒境。月黑鬼燈青。休。斷送春人不上樓。三更夢。和月挂簾鉤。遲。已是踈鐘報曉時。山禽影。蔌蔌落高枝。念奴嬌。

未至常熱四十里。值大風雨。



三更向盡忽驚呼。飛去蓋頭竹笠。鐵馬金戈聲乍沸。波峭半篙難入。絕壑魚龍。陰厓神鬼。空處通呼吸。推蓬起望。一湖湖水全立。只有卅里遙程。前舟顛簸。側拾回須急。病羽樓頭。秋蟲砌下。纔復商量。愁人無寐。殘宵短夢千摺。

水調歌頭

自吳江常熟回舟欲至婁上作

性既不談釋。又不學神仙。半生纔一彈指。何苦慕長年。卿自埋憂地下。我欲寄愁天上。索醉向雲閒。自有十洲客。供我八方錢。胥江口。雪溪畔。尙湖邊。回頭三十三載。舊事散如煙。昔日蘆簾紙閣。今日梅花紙帳。清冷耐孤眠。短夢乍回處。殘月影床前。

前調

偶厭玉虛住。屈作世閒人。人生誰最快意。良夜與良辰。我欲花開地下。更使水流天上。耳目一番新。倘荷化工允。寧懼俗流噴。又誰願。朝列闕。叩羣真。百年三萬多日。臥足幾回伸。九野分鋪列宿。五岳填平四海。從此罷揚塵。萬事等閒耳。無鬼亦無神。

點絳脣

題折枝圖贈友

遠恨新愁。半春已覺難消受。海棠花瘦。鴝鴖雙雙咒。十二紅闌。春氣應全透。關心否。鶯前燕後。定有人垂手。

賣花聲

過三叉河  
贈練塘僧

洲樣亦如瓜。淺泊江沙。二分月已透窗紗。留得雪泥鴻爪影。都爲梅花。稍遠市樓譚。港到三叉山僧親

爲煮山茶。白髮一龕忘世久。與證年華。

浣溪紗

梨花和金  
手山秀才

一棹春游蘇小家。紅紅紫紫信方賒。玉闌干外幾枝斜。仙子衣裳原縞素。美人顏色本空花。淡雲流水

證年華。

望江南

過京口訪駱佩香  
女史率成二首

忘世事。只有杜蘭香。焚得一爐煙未燼。萬帆門外去來忙。吟客鬢都蒼。

淒冷處。招得女生徒。女徒殷姓其姊爲故尙書和琳側室琳死桃李盛時顏未莫。海山佳處語模糊。猶憶

故尙書。

此页空白

更生齋詩餘卷二

機聲鐙影詞

蝶戀花 題畫

絲雨絲煙湖上道。夢裏年華，深淺誰知道。天上玉梅開過了。又教人世東風早。春事及今偏艸艸。有分披圖。月與花枝小。獨立數峯吟句峭。乾坤分半輸懷抱。

鷓鴣天

學畫敲詩與轉闌。更從花裏響銅環。雕籠出語偏生脆。翻遣鸚哥課小蠻。顏冷落，致闌珊。萬重密意總相關。鄰家姊妹邀同坐。說夢先消春書閒。

點絳脣 春病

隔箇紅窗，強將八字排來看。自憐魂斷。欲把他生算。支枕應難。且復憑詩案。誰相伴。喘聲低緩。虧得鸚哥喚。

風入松

題春山  
獨往圖

翛然一境迥難攀。幾家人住谿灣。疎籬敗壁憑誰補。借亭亭、隔岸青山。小史亂頭粗服。先生雨笠雲衫。

生綃忽破酒人顏。清夢置其閒。谿塘正好營高閣。待他時、風月人還。仲蔚蓬蒿須補，劉安鷄犬都刪。醜奴兒令

海棠小院春深見。一晌難描。千種無聊。容易將人挂眼梢。低徊不解傷春句。一卷離騷。纖手難拋。自把蠅頭小字鈔。

紅林擒近

紅錦香猶淺。白閒春正長。睡起懶無事。鬢花礙釵梁。春衫攜來早皺。呼小婢、熨沉香。屈指桃菜年光。待畫艇尋芳。麗句傳鸚母。名絲繡雁娘。妝樓無事。鏡邊更展縹緗。算傷春未敢。閒愁無據。背人私自禱海棠。點絳脣送春。

又是春殘。海棠花外游絲亂。淚珠成串。待把年光換。惜別匆匆。鎮倚閒庭院。闌干畔。綠愁紅怨。約略傷春券。

漁家傲

題陳野航畫竹

午餘睡起茶初熟。一竿愛寫玲瓏玉。葉葉枝枝濃淡各。還須屬。三更窗外秋聲莫。娟娟穩稱輕綃薄。圖成好置闌干角。待得晚涼新雨足。天如沐。月痕倒挂梢頭綠。

酒泉子

鶯地行來。一樹好花離地。出雕闌。排玉砌。陟瓊臺。四更玉笛聲三弄。肩上露華堆重。與雲飛。隨月上。逐風回。

探春令

題侍女屏風

晚妝初罷怯春寒。約伴花閒步。正一縷愁來無著處。把十三絃偷訴。玉簫斜倚林閒路。想個儂丰度。到宵深。霜月空濛。錯認作梅花幾樹。

醉桃源前題

薰風池閣簾微亞。日暖豪犀偷卸。行到綠沉窗下。一樹榴花謝。滿樽蒲酒人初暇。結伴消他長夏。采戲又還輸卻些事關心者。

紅窗聽前題

一院飛花空白晝。看結束。春弓閒走。隄畔盈盈堆絮厚。襯得鞦韆瘦。簾幕深深垂錦繡。闌干外。總燒金獸。昨宵霜冷。今宵風驟。屈指剛三九。

買陂塘

題錢孝廉澗川鸚鵡媒傳奇

爲多情。青衫血淚。生生判向愁老。冰絃誰把傷心譜。又早別懷縈擾。幽會巧。君不見。茫茫碧落相思鳥。芳心寸拗。待密約重圓。愁盟暗續。一一淚珠織。銷魂處。我亦青鸞信杳。年來暗損懷抱。江南江北傷春恨。

付與斷腸衰艸。辜負了。是舊日、金釵鈿盒情多少。閒愁待掃。又一兩三聲。無端逗起。清夢隔簾悄。  
河瀆神迷藏。

游戲共登壇。窄靴小袖衣單。身輕總欲避遮攔。空裏時時指彈。同是曲欄何處躲。慧心先向偏左。女伴  
盡皆藏過。百忙何苦尋我。

清平樂

楊花恁早。不待春歸了。可惜玉人渾未曉。逗點與他知道。晝長人倦敲詩。畫屏一枕閒支。睡覺數聲搏  
黍。消他春日遲遲。

點絳脣

花事關心。東風吹到茶蘼架。燕兒多謝。呪得春成夏。不放春歸。斜日簾微亞。秋千下。游絲無賴。又向荷  
錢惹。

鵲橋仙

玉鉤響斷。玉簫聲斷。更苦玉人音斷。清明上巳總無聊。欲飛去、晴江南岸。小園春半。小窗月半。尤喜小  
樓天半。黃鶯紫燕不曾來。只蟬螻、與人作伴。

望江南

幽夢破斜倚小紅樓。又是卷簾人不見。滿街絲雨。糝春愁。綠暗幾重流。

昭君怨江行

帶得綠簑鐵笛。消受短篷秋月。帆影入江流。小鷗。目極楚天遙。句潮接海門如線。一點着林梢。是金焦。

減字木蘭花

垂垂一樹。曾見個儂珍重處。已分成陰。頭白蕭郎恐不禁。還憐飛絮。一樣東風飄泊去。郎已沾泥。莫趁流鶯是處飛。

相見歡夢中作

無端踏卻輕鷗。共清遊。夢裏居然東海向西流。雲中屨。風中麤。不能收。幸喜天鷄初叫始回頭。

一叢花

林禽喚我作春遊。煙景逼南州。藍輿卸處幽吟好。尋僧話。又引閒愁。無事銜盃。有山埋骨。此外總悠悠。消沉白了少年頭。青鏡惜風流。江山勝處余歸也。等幾度。白玉成樓。悟徹孤花。彫殘心字。春總不如秋。

青玉案

玩月十三夜

東風又把細梅染。看靜裏、簾斜捲。追取十年前事轉。亭涼月暗。漏深花滿。兩兩傷春券。如今細雨沿門



糝幾陣落紅愁欲浣。鐵笛五更吹更慘。任他風雨任他憔悴。再也無人管。

千秋歲瓶梅

春來心性。花與人同命。香未拆。愁先進。一枝聊供汝。五夜誰相訊。最好是、百花頭上懨懨病。晝永寒先警。骨冷魂尤勁。花總謝。香難並。幾絲芳意織。一瓣心香永。拚得是、閉門風雨無人省。 晝永寒先

買陂塘

邵二雲姚江歸棹圖

黯然歸。一肩行李。春風不遣人住。姚江雙槳悠悠去。去也更休回顧。天意苦。要汝是、名山夜雨成千古。功名射虎。只亘亘平生。才皆中下。李蔡豈君伍。當年事。千佛名經曾數。一枝原最高處。衫青袍紫都閑物。惹我酒閒起舞。君莫誤。君尚有、數椽茅屋秋風浦。萍蹤語汝。恐又引先生。酒闌燈燵。清泪滴殘炷。

天仙子

溪上鷺絲忙報客。玉人遣透春消息。恁恁相送已嫌遲。無可說。祇相憶。門外瀟湖千頃碧。

蝶戀花落梅

白白紅紅開未止。一擅孤標。卽兆飄零始。如此人生剛半世。問年一樣輸餘子。入夜春愁爲剪紙。屬汝重來。休昧初來旨。多分柔魂猶在水。五更吟斷梅花詠。

又

窗外游絲空復漾。十見花殘。那得人無恙。莫向酒閒矜跌宕。春風已把飛瓊葬。花未開時愁已釀。寄語桃根。春到休輕放。人世有情還有障。招魂供汝青綾帳。

賣花聲

獨客正思家。到曉啼鴉。灑窗寒雨又如麻。不放南枝開到好。春是些差。客裏事堪嗟。似錦年華。幾人紅泪隔窗紗。燕子平生真恨事。不見梅花。

倦尋芳

春星

寂寥銀闕。怪底瓊妃。媵他數個。三五春宵。可許玉階同坐。人說高寒應讓汝。九重天上還難妥。喚風詩。只咏到衾裯。被他喚做。也知我。殷勤看爾。駐向樓頭。幾番難過。錦樣連錢。一例被風吹墮。仙掌夜過防暗摘。月盤露冷。愁輕箴。寄新詩。先問汝。點頭也麼。

荷葉杯

病到幾番委頓。誰問。曲闌旁。畫眉頻喚不能住。猜是甚心腸。

蝶戀花

啼鴈和  
什則

艸繡平堤。花繡樹。如此江南。隻影堪飛度。畢竟塵情猶未悟。雨晴簾角聞呼侶。倚樹鷓鴣爭笑汝。三度營巢。依舊無家住。幾日酒痕兼墨污。樓頭催澣春袍袴。

前調鷓鴣

莫向天涯棲苦竹。只遇啼鴉。歸計須頻屬。望帝愁魂魂已續。此閒樂亦應思蜀。何事啼聲常傍屋。解喚哥哥。引起春人獨。花到黃陵千度落。這回尙憶詩人谷。

憶秦娥

春時節。春人住處春光別。春光別。膩紅花朵。膩黃新月。濛濛膩綠千條結。樓梯欲上愁三折。愁三折。文簫聲動。剪刀聲歇。

柳梢青

新柳次高東井韻

向曉層巒。將煙做霧。釀雨成寒。鬢綠衫青。眉長眼瘦。子女何干。一枝折了重看。怪徹底春愁總譜。柳宿前身。萍花再世。我亦差堪。

沁園春

題萬黍維持籌握算圖

儒林傳耶。貨殖傳耶。君因併書。嘆百不如人。一籌還展。十嘗九誤。些子都輸。業可拋經。讀宜從律。且把蒼生經濟儲。他年看。看致君事了。更累錙銖。滿盤算了還虛。怕仰屋他年更苦劬。只田從玉局。須求陽羨。家從杜牧。更創吾廬。我謂先生。歸謀之婦。料理牀頭阿堵鋪。先生笑。有五銖七幣。盍往觀乎。

摘得新

難得來。休教到使回。屋頭雙喜鵲，久徘徊。紅窗故啄墮青梅，勸銜杯。

### 玉珥墜金環

晝永窗虛嫩寒先。把花朝做幾番凝恨。上重樓樓又教人鎖。長自雨篩風簸。把春陰、當成功課。沉思往事，判盡浮名，換他真個。寂寞深園，小桃也肯留人坐。細拈春夢寫春愁。夢又將人躲。知道枕衾孤臥。算風光、幾曾到我。年華誤盡，到了今番，更教難安。

### 東風第一枝

桃花

團泪成花。搓煙做骨。商量不遣春瘦。幾番醉了重蘇。依然十三時候。前塵誤汝。應一例、向風回首。笑無端、占了珠簾。肯放玉人垂手。只花也、憐人非舊。問此度、探春何後。簸錢堂上重來。不似那時清晝。芳心易逗。算薄命、永供人咒。待拈他、花片緘來。付汝一春消受。

### 八聲甘州

又西風吹雨上空樓。點點雜更聲。正涼隨雁至。宵同燭永。夢與年更。十二鏡雲何處。江館聽吹笙。多分樓前約。不記啼鶯。一半塵封玉鎖。看碧紗籠處。墨雨縱橫。只蠻箋消息。何事苦難憑。想蕭郎、傷春恁遠。料夢魂、逗不上銀屏。須知我、青衫泪濕。不爲浮名。

### 南鄉子

自雲溪放舟至青山莊

藥王廟。晏公祠。北關剛值午晴時。三折水程欣已到。都贊好。門外水田門內沼。  
花塢曲。月廊周。半塘煙雨幾時收。百步小橋隨鶴過。思久坐。翡翠北軒晴日墮。

長亭怨慢蟹

猛霜風。漸肥郭索。是處橙香。薦他黃玉。記得年時。酒徒醉月小樓曲。深盃浮綠。陡地向。天公祝。臣願把浮名。都付與。蟹螯添足。稻熟。漸燈明深港。糝破一溪寒綠。鱸魚便美。怎占得。九秋名目。第一是。左手須閒。怕明日。故人相速。只紫蛤紅螺。風味幾堪作僕。

金縷曲

寒夜重光齋頭看秋海棠因言前曾于花下掘得古觀發之。儼內妝宮嬪也。余感其事。因併賦之。嬪蓋齊梁時宮人云。

燭冷人初醒。正虛廊。角聲吹徹。商聲又警。籬落寒花開自好。露點欲斜。仍整粧。慘淡。玉人微病。不向春園。誇勝事。伴艸根。菜甲。三秋永。其下有波如鏡。千年舊事。思量猛。被西風。吹將世換。泪珠紅併。一半齊梁遺蹟在。漠漠土花填井。待說與。古懷誰省。落月微黃。天乍曙。向闌干。逗出銷魂影。重認取。劫灰冷。

玉燭新

窺簾新月小。卻數朶花枝。照人寒峭。新詩寄與。雙環巧。故把幽期漏了。文鴛堆枕。密意取。夜香薰好。又早是。玉漏星星。門前乳鴉啼曉。紅箋付與。殷勤。只此恨平分。幾時堪繖。歸期及早。重到也。不是玉簫年少。萍浮絮裊。試逗點與他知道。須記取。錦瑟年華。暗中易老。

鶯啼序

闕神武廟後有隙地。里人別構諸葛忠武祠落成謹賦。

丞相祠堂看古栢。陰陰翠繞。重來處。一瓣名香。空裏晴絲自裊。黃石兵書。吾懶讀。青田洞府愁難到。只先  
生志業。今古幾人同調。憑高回首。炎精中燼。天意殊難曉。聞說定軍山下。翠羽靈旗。山昏月黑。鼓聲猶  
惱。陰平貽悞。夔門敗踵。滿盤都錯。何須說。更譙周黃。皓知幾早。相隣壯繆遺祠。未了忠心。此時重表。茲  
地當年。紫髯虎踞。更周郎年少。柰江山。數著殘棋。着手便教輸了。把荆梁。十郡名區。輸纖屨。小兒坐嘯。尙  
躊躇。北定中原。南清江島。當途高也。往日紛紛割據。算曹瞞尤狡。匹馬過秦中。早鷄筍全拋。虎鬚重燎。  
巾幗謀臣。彈碁胄子。一揮羽扇愁俱倒。只遺恨。在五原秋艸。十年深計。擬將赤帝關河。重藉手。還高廟。

法駕導引

補赤城韓夫人詞。

天上樂。天上樂。博戲更藏鈎。怪底燭龍呼不醒。兩丸日月覆金甌。螢火照清秋。  
雲漠漠。雲漠漠。飛渡赤城梁。摘取列星歸北斗。倒傾銀漢入西江。天闕費平章。  
銀漢畔。銀漢畔。織女起高樓。玉作簾衣花作座。海雲爲佩月爲兜。縹緲坐牽牛。  
偕勝侶。偕勝侶。仙閣坐虛無。一賦玉樓猶未竟。人閒甲子總模糊。長爪比麻姑。

點絳脣

次黃仲則韻。

尺五荒墳。小桃一樹傷心艷。寄將花片。沒個人兒便。芳艸多情。引他歸騎尋教遍。模糊見。月殘如線。霧

隱傷春面。

如夢令

簾外日遲風簸。簾內粉消香灑。未慣是撈捕。輸了更拋金鎖。還我。還我。莫被小鬟猜破。

摸魚兒

清風亭故址

又斜陽晚林一抹。天空飛破歸鳥。危亭覓遍蓬蒿徑。咫尺謝家山到。吟未了。算好景如前好句還輸。脫初三月早。看一縷吟魂。寒鴉爭瘦。逗去碧波小。當年事。此地放歌孤嘯。狂來幾側烏帽。詩名天地成何補。身後一椽誰保。吟愈峭。把長句風前漫博先生笑。思君欲老。怕騎鶴還來。此間亭上。留得醉中艸。

青玉案

過凌敲壘故址

凌敲臺剩荒基也。雨洗石苔侵瓦。到日短衣尋客話。庾郎年少。衆中爭羨。不醉看盤馬。孤城陡築寒山罅。城裏猶聞暮潮打。休怪客愁容易惹。那邊人語。者邊雁叫。月照荒荒野。

減蘭

聞遊采石。早起披衣看曙色。不敢窺簷。烏鵲南枝夢正甜。酒衫芒屨。二十男兒工跳躍。一縷吟魂。先向

風前逗早春。

金縷曲

清風亭夢李白

天與人俱老。又何爲。一千年後。此閒憑弔。一半江山歸李白。一半分還謝朓。我到也。祇餘衰艸。畢竟微軀容易盡。覓些須。身後名纔好。勤打疊。零星彙。青衫百計供人笑。只悠悠。非公知我。恨和誰告。金粟前身真小劫。墮作五湖年少。有夢也。不離蓬島。猛憶人生何者是。只浮雲。偶寄孤飛鳥。殘夢破。余歸了。

前調

再次汪劍潭詩

花是明朝放。只萋萋。滿城芳艸。已供凝望。多病年時誰付與。綠酒紅愁同量。且小立。雨中惆悵。若許鶯花還再世。拉春人。早向春風葬。簾蒜揭。心旌蕩。樓高總伴閒雲上。有當年。鏡盟衫誓。篋懷琴況。可惜韶光都健在。春到也。須微恙。莫輸與。個儂門巷。我比絮泥心更定。背天桃。穩坐青綾帳。塵夢覺。釵鈿響。

前調

蠟屐嫌疎放。任些時。殘紅剩紫。幾曾凝望。廿載可憐青鬢改。江水未勝愁量。春付與。別人惆悵。我慕蠹魚能再死。趁餘香。好伴殘編葬。渾未管。流鶯蕩。聽歌人在青雲上。只年時。招邀勝侶。尙牽游況。杜牧揚州人已換。只有月還無恙。照慘慘。幾家門巷。尺五桃潭三徑艸。瓣心香。供汝青綾帳。添一綫。春潮響。

前調

再次汪劍潭詩

夢遠金鈴響。正無聊。紅窗睡足。倚帷牽帳。羅襪閒行花露重。頗怯曉風深巷。渾悟到。玉人春恙。薄酒多愁眠易醒。問樓高。更有何情況。梯隱約。難重上。傷春早怕春飄蕩。把泥金。書成梵字。伴花同葬。一例有情



應解取花也對人惆悵已開滿十分春量此度見花應背面誤人人簾底三年望屬來歲休輕放

醉花陰

爲孫大和婦  
士采薇韻

日午麴塵何處避斷粉零紅且自由天地三十年華愁也未不回頭負春人意情到九原須更記骨冷  
灰飛灰冷情還膩幽夢壓簾魂壓被醉醒怕沒絲兒氣

浪淘沙

路遠小樓低花朵分飛依然銜恨上重梯何止舊人尋不見梁燕都非愁裏闌窗屏殘月剛西畫簾風  
破鏡臺欹只有曲屏風六扇猶罩羅衣

點絳脣

門艸歸來一窗好夢非無據筆床茶具且復安排預強自支持鬼病終難愈誰來覩藥爐煙畔只有風  
飄絮

憶王孫

山坳池閣水邊樓一雨銀塘便覺秋長日無人掉小舟水分流胡蝶閒來立鴨頭

青玉案

算來未到銷魂地偏是識愁滋味欲寫紅箋珍重寄隨肩小妹隨身小婢多恐難回避幔垂不放通花

氣。又早斜陽把門閉。莫道文窗蹤跡祕。黃鶯紫燕。畫眉百舌。箇箇知人意。

浣溪沙二首

玉腕偏憐金釧寬。鳳釵頻撥獸煙寒。萬重心事壓闌干。杜牧已留來世約。蕭郎不作路人看。雖然猶覺恨無端。

前調

背面難禁萬種愁。見時無語只凝眸。初陽一綫下簾鉤。百計未能通一語。暫時曾許共扁舟。淚痕和露咽心頭。

傷春怨劍客

匕首飛將過。到處人頭疑墮。日昨詣叢祠。土偶居然離坐。旋空中如磨。電影終難挫。驀地指晴空。一道采虹中破。

金縷曲

之。 僮窺園從予八年矣。體弱善病。今年予秋試被落。忽爾辭去。念事傷離。不能無作。命沽酒歌此調以送之。

衣薄還如紙。最淒涼、前宵瑣操。今宵送爾。八載追隨無別事。傷病傷離傷死。總誤爾、朝飢飲水。苦訪蟲魚。

摩挲籀。但論才。爾便成佳士。休更作朱門使。無家我共僧居寺。只蕭蕭寒雲丙舍。尙堪南指。入夢總從吾父母。醒處怕逢妻子。況薄命。久無人齒。明日出門誰念我。就飄蓬。斷梗商行止。爾去矣。淚流駛。

前調重九日陶然亭作

車馬長安道。有誰憐。中秋雨暗。重陽花少。尺五開亭三徑柳。亭徑尙餘秋艸。更難得。紅塵似掃。半舫斜陽新月影。借團蒲。穩夢仙人島。算懷抱。此時好。玉山莫向壚前倒。只空囊。俸錢難假。酒錢輸了。門外鍾聲催客去。衣上薄寒清峭。料理是。餽糟代飽。無數樓臺凝醉眼。訝籬頭。果大星辰小。歸尙有。未棲鳥。

前調僮得前詞泣不忍去復成此闕

暗裏驚聞泣。一聲聲。無端惹我。青衫又濕。多病經旬誰得似。欲共候蟲秋蟄。爾似燕。舊巢還入。典盡衣裘。頻擁絮。更同扶。瘦影當風立。渾不怕。霜華襲。八年侍我肩差及。笑囊空。新詩屢付。傭錢未給。費爾一杯村落酒。爲我解除狂習。說月好。今宵初十。樓上三更雲氣淨。看星辰。如豆天如笠。吟正遠。催歸急。

青玉案十一日同人飲長安酒樓

臨街樓上冷。冷語醪味薄。催添糯。一院酒人揮不去。持螯手冷。潑醅顏熱。繞著筵吟句。臨街樓外疎疎樹。已覺秋聲落無數。一院酒人招不住。來時天慘。去時月暗。繞著城徒步。

憶秦娥寄季仇

鍾已動。一聲破我長安夢。長安夢。世情未了。鬢絲先種。書乍捧。故人遲我華陽洞。華陽洞。丹沙填壙。碧山成家。

浣溪紗

薄暝微醺枕酒瓢。病心一縷逐風搖。夢無來歷入鴉巢。初八夜星還照曉。十三涼月卻終宵。瘦魂尤避出林鷗。

買陂塘

送繆公子笠莊至江浦

趁霜風沿林飛徧。巢荒去住無據。雁聲卻有東歸信。切莫更留征羽。淒燕語。道千里同來。千里應同去。霜鴻未許。算我願隨陽。卿尤避熱。各自歎羈旅。天涯路。來日風風雨雨。別離頓起愁緒。江南兄弟誰能健。羨爾雁行有序。須記取。只紫塞重逢。可識前時侶。天空欲舉。穩待爾重來。春風三月。共看滿林絮。

漁家傲

宣武坊前清酒美。多錢約客誰來會。日午闌窗人似海。孤劍在。萬金難買心無愧。畢竟浮名猶可待。少年莫學呈身銳。鼎鼎百年君誤再。棺已蓋。幾時贖取從頭悔。

一萼紅

龔孝廉克一寓居晉陽庵側因屬余顏其齋曰聞鐘并係以詞

傍禪關。構閒亭似舫。四面啓疎櫺。十五良宵。一雙人影。三千里外鐘聲。有多少。春人心事。柰秋窗。黃葉已

先零借了蒲團，緜殘梵頁，悟徹鐙槃。我亦能來聽此，只青衫似夢，百倍淒清。苦竹疎蘆，幽花淡艸，此身如在江城。況惹起寒蟲鳴砌，又丁丁，蓮漏滴殘更。待得蕭齋響寂，人語還生。

摸魚子

龔克一遊遊夕照庵，卽展其令弟紫樹殯。

正無衣，壚頭索醉，油車忽引君到。愁中天氣還如霧，咫尺遠山舒眺。煙柳道，算怕是逢人，只是逢僧好。無多落照，但挂近禪房，和將夕磬，便有暮雅叫。荆高市酒人一樣，潦倒塵沙埋盡，年少江干舊侶，今誰在。癸巳秋，予與劍潭紫樹同客姑孰，至宣城始別。可惜龔生竟天，渾未料看冠蓋如雲，更有閒人弔。高原古廟，但肯費茶瓜，時時款客，我輩不須召。

荷葉杯

自夕照庵步至萬柳塘。

三里望中依約，樓角亭館太荒蕪。萬株楊柳一行無。風急戰菰蘆。林際黑歸一片，雅點隔寺暮鐘聞。寂寥城上去閒雲。雲薄帶斜曛。

小重山

舊日紅闌已作薪，玉蘭花滿樹，曬春裙。經過燕子亦嫌貧。呢喃語，故故入西鄰。寂寞掩重門，小樓三面暗，易斜曛。屏風吹淨十年塵。中還有，兩小舊啼痕。

謁金門

送龔曉升南歸，卽題其長松片石行幃。

歸亦得。卷裏天青雲白。不誤今宵歸計決。誤前時爲客。屋三閒。醒夢適。何止長松片石。七十二峯晴歷歷。在先生密隙。

梧桐影

將至仙遊潭迷路

馬獨來。南山麓。厓上石樓纔一閒。推門且抱神龕宿。玉女泉清無極。雲外木魚聲不停。三更月向東峯直。

臨江仙

溪山秋曉卷子

十里空濛雲外水。水雲光隱回汀。最無人處小舟行。到來谿館冷。秋燕語分明。渾異踏青前度至。滿坡花氣將迎。剩他幾樹綠無情。四更山曙早。紅葉點疎星。

蘇幕遮

寒禽枯木卷子

綠初離。紅乍失。白釀層雲。黃澹初升日。空裏數聲禽語切。似說宵寒。約略明朝雪。凍絲黏。冰綫結。莫折高枝。恐有東風出。轉向竹梢深處歇。玲瓏石愛蓬山骨。

臨江仙

蘇州

紅鶴谿山烏鵲館。金闈從古繁華。三分樓閣二分花。一分留隙地。隨分種桑麻。海物新奇爭入市。晨餐都厭魚蝦。等閒吳語六時譁。笙歌叢作隊。脂粉瀉成注。

玉樓春

園空膽小愁無侶。錦幕時時風欲舉。生憎梁燕不歸來。銜得徑泥何處去。三更又是瀟瀟雨。剩得燈光青幾聚。小樓西畔宵無人。一片落花浮鬼語。

點絳脣

傳粉攤書。硯旁小匣先安鏡。梅花同命。瘦到年時影。小別生疎。問語都愁應。更初定。爲憐春病。偷向床頭省。

好事近

抱處恍如無。柰小語心尤怯。夢裏有誰知覺。紅上雙雙頰。三更碧月淡紗帷。涼把重衾壓。欲訴二年情事。和淚開吟篋。

金縷曲

元夕柳子廟道中作

綠鬢還如舊。又依然、長隄風細。碧空雲皺。艸艸柴門元夜到。催送斷腸時候。幸濁酒、數杯還穀。愁欲成癡眠轉醒。怕相思、一夕人天瘦。欹枕處。淚痕透。樓高往日長垂袖。摘疎枝、殷勤記取。柳邊花右。分半紅窗堆卷軸。多付個濃消受。渾可惜、此生難又。欲倩雪衣爲懺悔。更煩他、百舌聲聲咒。春夢破。月如晝。

霜天曉角

讀天寶遺事

開元致倦無逸圖先換。頻到秋來羽扇無多日、賢臣竄。  
責哥舒翰。戚畹更相煽。羯奴先兆亂。河北河南皆叛。何須

河湟使典宰相居然忝。天子更思康譽。遠應惜無人薦。  
怨長生殿。傳箭出郊甸。馬嵬軍又變。啓殿堂開月假。休專

臨江仙

八月十一夜雲  
谿晚步有感

猶記石橋橋畔路。死生離別匆匆。綠波搖月去如風。唾痕都作血。岸柳不曾紅。  
重得相逢。夜臺沒箇寄書鴻。廿年如夢過。來聽渡頭鐘。留得一行臨別語。幾生

減字臨江仙

十二夜步  
葛仙橋

十日秋陰情緒減。乍眠卻喜新晴。紅墻千尺月華生。水明鐙暗。依約卷簾聲。  
分飄零。柳絲笑客眼猶青。好天涼夜。祇剩一人行。豁口寂寥尋渡少。酒徒多

烏夜啼十三夜

水邊門掩重重。海棠紅。不信者般顏色。墮西風。相扶醉。相偎睡。意惺忪。正好一鐙私語。伴秋蟲。  
中年一種情牽。病懨懨。欲借舊家樓閣。訴當年。黃庭卷。丹爐畔。學飛仙。留得一絲兒恨。未生天。

小冲山

十四夜無月  
三更後微雨



一種閒情那得知。乍眠還又起。出門遲。秋鐙替月已多時。三橋走。衣袂雨絲絲。空外影參差。西風吹不斷。柳絲兒。呢他燕子說相思。還生怕。燕子笑人癡。

滿江紅十五夜坐雨

百事輸人。祇贏得、幾番沉醉。又若是、宵燈替月。秋霖成歲。說餅齋拋荒徑外。采菱舟冷青溪內。倚闌干、聽雨到更殘。何曾睡。風轉處。枝枝背。檐漏處。聲聲碎。只無端兜起。舊愁無奈。白玉盤埋雲慘淡。黃金花買秋憔悴。擘蠻牋。題恨寄花前。花垂淚。

八月圓十六日顧唐橋步月

昨宵細雨沿門糝。深巷掩重扉。繞砌寒蟲。滿廊歸燕。秋思依依。今宵暢好。橋邊樓上。人月雙輝。曉漏將殘。夜烏啼徹。直自忘歸。

醉太平十七夜庭柱甚開。鄒人復有秋葵野菊者。獨飲偶賦。

葵芳菊芳。蜂忙蝶忙。小庭節近重陽。是秋花總黃。疎枝貼窗。濃陰滿廊。人間月午清涼。比天邊更香。

金縷曲送唐大令庶儀之。蠓縣任。

衣上春雲起。記征程。錢唐到日。好花開矣。兄領三州君作縣。穩稱陸家難弟。只手版也須隨例。昨夢越江東去好。是紅塵不到天光賦。官事少。看山未。京華往日曾聯騎。憶匆匆。斜陽古道。柳絲同繫。丁未春借君及孫淵

如計借一幅東風吹上了。兩兩金門高第。偏剩得杜陵書記。捉鼻功名知不免。笑他時。我亦神仙吏。輸一  
北上。著。早曾計。

買陂塘

送莊舍人植三南歸。並寄蔣太守。星仲趙舍人億生莊進士葆琛。

又槽騰。幾番煙月。東風吹過年少。寂寥三徑尋遊侶。只有阿蒙還小。忘不了。是當日。曾經擲果蘭陵道。一  
官亦好。看衣桁簪花。佩囊橐筆。渾稱此風貌。夷門路。金尊昨日頻倒。天涯尙未生艸。回來恁不同將去。  
撓亂數旬懷抱。歸正巧。算剪韭烹葵。煮筍都堪飽。寄聲短趙。更瘦蔣風流。攏莊繡藉。相憶令人老。

虞美人

二十夜。楊孝廉敬之。招集騰光館看桂。

艸元亭在雲溪北。暇日能邀客。寂寥深院倒金尊。添得幾絲疎雨。易黃昏。廿年前記題詩處。花壓闌干

住。故人多半起雲霄。只我閒居尙赴。小山招。

南歌子古州道中。

似柳應同韻。疑花未解羞。慣拋白足上危樓。喜折連枝果葉。插人頭。生熟居然異。形聲迥不侔。怪來行

立總如猴。拗得脆蛇寸寸。啖同遊。生苗有能啖蛇者。

人月圓

黎平試院作。

蠻中三月春光好。新雨又新晴。纔離豚水。仍盤獅嶺。又抵黎平。昨宵上巳。今辰寒食。來日清明。釀碧成

蒼催紅做綠。有甚心情。

浣溪紗

楊太守席上看牡丹作

雲作簾衣絮作塵。向前還有幾多春。艷陽天氣說生辰。

圓比十三將望月。嬌如二八上鬢人。晚蘭香味

玉精神。

又杏花

一晌花枝欲上樓。東風先爲揭簾鉤。和煙和露搭床頭。

百五時光容易過。十三年紀不知愁。初陽籬落

悄凝眸。

菩薩蠻

淇縣道中贈譚上舍子受

青泉落處紅雲碎。馬啼亂踏林聲脆。十里繞淇泉。愁無青竹竿。

遲行雖數里。已覺唵聲起。知我欲回車。

來朝度曲徐。

桂殿秋

飯已熟。忽呼茶。滿盤堆得雨前芽。蠶杯到手復揮去。獨自開簾看杏華。

三字令

天上月。枕邊來。似追陪。香一盒。貯玫瑰。襯珠蘭。和玉蕊。髻旁堆。羅幕外。燕疑猜。蝶徘徊。鐘已歇。漏仍催。

婢。朦。朧。窗。隙。報。浴。蓮。開。

此  
页  
空  
白

呂子曰樂之有情譬若肌膚形體之性情也。情失則蕩。音必鉅。失則隘。音必小。失則危。音必清。失則煩。音必濁。太鉅。太小。太清。太濁。則必若雷霆。若聚蚊。若哀弦。若噪蝸。夫古之爲樂也。有節有侈。有正有淫。陽散則定。以陰。陰閉則宣。以陽。陰陽滯。則爲淫。爲侈。陰陽調。則爲節。爲正。其所以爲淫爲侈者。情之失也。其所以爲節爲正者。情之得也。夫上古之樂。情至而樂興。中古之樂。樂成而情生。是故笙簧琴瑟。樂之器也。詞章譜曲。樂之文也。而皆非其情也。執笙簧琴瑟之所調。詞章譜曲之所著。而強襲焉。蹈合焉。以爲是樂也。是情也。人人皆樂。樂幾何不亡耶。夫漢魏晉唐之樂府。樂之糟粕也。當其時之爲之。則皆有情焉。然其文止以述時事。非以敘古人也。敘古難於述時。則以古人之情。未必今人之情。以情述情。無過情。無不及情。則古今又未必不相及也。何也。夫人之形骸。肥者瘠者。高者矮者。髯者疾者。肌膚之白者。墨者。赭者。而皆不得以己與也。然其爲情也。則必隨乎其肥瘠。高矮。髯疾。白墨。赭者。各自肖而各不相肖。故其爲樂也。可觀可興。可羣可怨。其爲詞也。可曲可直。可豐可廉。皆適如其情而止。夫適如其情而止。雖古之樂府可也。況今之樂府乎。夫今之詞章譜曲。無所施於笙簧琴瑟之用。而以爲樂府。則樂之各有。而樂之實亡矣。然而吾不以名存實亡而樂府之者何也。夫必漢魏之人之樂府。有是題。有是篇。而今之人之樂府。亦因以有是題。有是篇。是無情也。是無樂也。若古無是樂。而今樂之。則不必笙簧琴瑟。而詞章譜曲。固可以如其情而出之。譬如優孟衣冠。以爲樂也。吾不謂然。陶氏之琴無弦。乃真琴聲也。夫今之樂府。鐵崖始之。茶

陵繼之。悔菴又繼之。稚存洪子曰。吾之爲樂府也。祖此矣。昨歲喜晤洪子。且喜讀洪子之樂府。將以吾之。所以論樂府者質之。而未有以問也。今洪子梓其樂府。乞余之序之。余固何以序之。錄其將以告洪子者。以寄洪子以爲然否耶。夫清廟之瑟。朱弦而疏越。一唱而三嘆者。有進乎音者矣。洪子年少力學。而性情自得。將不徒乎樂之有節無侈。有正無淫已也。異日者。且與洪子相遇於無言也。皆乾隆歲次辛卯夏月。松崖學弟管幹珍拜跋。

余童時從黃石緘先生遊。先生素邃史學。平居爲說典午南北之際事極詳。余聽之靡靡忘倦。每日夕自塾中歸。粗憶其節略。爲諸姊弟言之。太夫人顧而色喜。忽忽十數載。余童而冠。而先生則已休神家術矣。頃歲以來。粗知讀史。又以不獲從先生遊。得悉其緒論爲恨。今秋文戰報罷。因取兩晉南北史事雜書之。爲擬古樂府百二十首。非敢計工拙。亦以誌童時結習未盡。而所聞于先生者。雖忘失殆半。輒根觸于燈昏雨黑時也。抑余聞先生言。西涯、西堂皆以樂府名家。然西涯上下千百年。而篇什較少。西堂則珊瑚木難與牛溲馬勃竝列。有陸平原才多之嘆。則先生雖伏膺二公之樂府。而尙不能無遺議也。因先生言。益增今日之愧。

乾隆三十五年長至後二日、稚存洪禮吉自序。



此  
页  
空  
白

擬兩晉南北史樂府目錄卷上

馬同槽

廣武嘆

蘇門嘯

社稷勳

作佳傳

別駕謠

峴山碑

飛渡江

銅駝嘆

清談誤

雉短短

金谷讖

中台圻

華亭鶴

陽湖洪禮吉稚存謨

屠 紳笏巖

同里

管幹珍松崖

錢維喬竹初

閱

趙懷玉味辛

除三害

思子臺

寧馨兒

侍中血

龍虎爭

十二月

赤白氣

特尙可

壯士歌

留降款

中興瑞

夜半舞

王與馬

新亭淚

呼伯仁

拜士行

踐海冰

義旗指

獻行璽

一目主

識英物

日書空

海西公

鬼董狐

東山臥

牛心炙

阿房城

長星見

負舂來

行路難

丁零王

新平寺

五經表

借鬼兵

續佛經

槐樹賦

虎臺謀

沭諱刺

彗星出

義義號

桃源記

此页空白

擬兩晉南北史樂府卷上

馬同槽

聲嘈嘈。馬騰槽。火炎炎。龍上天。去年乘黃鉞。今年加九錫。龍旂十二旒。天子在頃刻。桃花源。武陵船。問魏與晉何茫然。

魏武帝夢三馬同食一槽甚惡之謂太子丕曰司馬懿非人臣也泰始元年晉王炎稱皇帝廢魏主為陳留王

廣武嘆

一日哭。留狂名。百日醉。留酒名。酒名狂名俱不免。先生能作青白眼。驅車何茫茫。廣武何荒荒。當時楚與漢。莽莽百戰場。百戰場。斜日下。豎子成名尙堪詫。擾擾何況牛與馬。

阮籍登廣武觀楚漢戰處嘆曰時無英雄使豎子成名籍能為青白眼見禮俗之士以白眼對之

蘇門嘯

阮生狂耶。稽生傲耶。先生何人。冷冷嘯耶。咸熙魏耶。咸寧晉耶。先生何人。冥冥隱耶。

孫登隱蘇門山善嘯阮籍見之歸著大人先生論稽康從登遊三年問其所圖終不荅將別謂曰子才多識寡難乎免於今之世矣

社稷勳

炎精中燼赤帝死。祖龍西來作天子。大開明堂錫弓矢。謀臣誰。裴與王。股肱誰。荀與羊。金符玉册何琅琅。策勳第一推平陽。當時曾殺高貴鄉。

武帝將廢賈后。楊太后爭之。曰。賈公闕有大勳於社稷。公闕賈充字。充使成濟殺高貴鄉公。

作佳傳

一丸藥。勞侍婢。千斛米。作傳紀。彼哉譙周及門弟。三分竊據孫與曹。正統那付當途高。君不見。一士已沒。賴半士。定論早出習鑿齒。

陳壽遭父喪。使婢丸藥。謂丁儀子曰。覓千斛米爲尊公作佳傳。習鑿齒作漢晉春秋。以蜀爲正統。因有蹇疾。符堅稱爲半士。

別駕謠

海沂之康。寔賴王祥。邦國不空。別駕之功。嗚呼別駕。今三公。惜哉不作徐州終。

王祥爲徐州別駕。郡中謠云。魏亡入晉。官太保。年八十五始卒。

峴山碑

杜公碑。碑書功。高岸爲谷。谷作陵。叶羊公碑。碑墮泪。茫茫淚枯。碑不碎。碑不碎。由民心。君不見。古來賢達。皆爭名。羊公碑後碑俱泯。此碑非金亦非石。碑之崇。崇以德。

羊祜墮泪碑在襄陽峴山。杜預好爲後世名。刻石爲二碑。紀其勳績。一沉萬山之下。一立峴山之上。

飛渡江

前揚帆後執柁。南人倉皇北人坐。橈居前楫居左。岸軍愁呼水軍臥。城門開降帆來。七萬騎全軍回。當時若聽王渾指。北兵安得飛至此。

王濬率舟師直抵建業。吳人曰：北來諸軍，乃飛渡江也。詔濬至秣陵。受王渾節度。渾遣信令濬暫過計事。濬舉帆直指，報曰：風利不得泊也。

銅駝嘆

立人當立德。擇子先擇嫡。宮門老臣三嘆息。銅駝會見在荆棘。老奴亦言座可惜。為官乎。為私乎。此座何不歸桃符。

索靖知天下將亂，指洛陽宮銅駝嘆曰：會見汝在荆棘中。齊獻王攸，小字桃符，文帝嘗指御座曰：此桃符坐也。

清談誤

王與謝揮麈尾。樂與衛饒名理。清談麈麈從天來。洛中已建單于臺。

王弼謝琨善清談。樂廣衛玠善名理。桓溫自江陵北伐，登平乘樓望中原，嘆曰：遂使神州陸沉百年。邱墟王夷甫諸人，不得不任其責。

雉短短

雉短短。飛來入宮院。欲竊主權欺主闈。昨日殺龍母。今日殺龍子。可憐銅駝宮。化作荆與枳。

惠帝后賈充女也。武帝嘗曰：賈公有五不可種，妬而少子，醜而短黑。后廢楊太后於金墉城，絕膳八日而卒。使太醫令程據毒太子。



金谷讖

紅蕤花開置行幕。一盃兩盃緩行樂。美人頭向盤中落。珠歌翠舞听斜陽。珊瑚七尺施作牀。人間夢醒春茫茫。花枝如烟墮高閣。散盡黃金恣揮霍。白首同歸訊潘岳。

潘岳金谷園詩。投分寄石友。白首同所歸。後岳與石崇同死。趙王倫之難。遂成讖。

中台坼

去年誅韓信。今年醢彭越。駿珧既首禍。瓘亮亦繼沒。南風當國勢絕倫。手持天下歸先生。叶中台星坼日復蝕。先生不言務簡默。金墉城太后薨。許昌宮太子凶。誰與殺者張司空。

中台星坼。張華少子。謹勸華遜位。華不聽。華將死。謂張林曰。卿欲害忠臣耶。林稱詔詰之曰。卿爲宰相。太子之廢。不能死節。何也。華曰。式乾之議。諫事俱在。曰。諫而不聽。何不去位。華不能答。

華亭鶴

華亭鶴。雲間哭。聲何悲。悲二陸。白紵喜談兵。貉奴寧作督。机山深。三泖陰。蓴鱸千里方揚舲。此時笑殺張季鷹。

陸機將死。嘆曰。華亭鶴唳。可得聞乎。張翰聞秋風起。思菰菜蓴羹鱸魚膾。即日挂冠歸。

除三害

禾兮芄芄。稷兮翼翼。父老不樂。仰天太息。一解長跪告父老。父老究何苦。父老不苦。長橋之蛟。與南山之猛。

虎<sup>解二</sup>父老慎勿悲。山有虎兮虎可摧。水有蛟兮蛟可揮。兒不讀書。兒身何爲<sup>解三</sup>。兒讀書。讀書不忘始。少慕

奮身十年俠士。長慕事親十年孝子<sup>解四</sup>。兒讀書。讀書不近名。兒爲良臣兮。天王聖明。兒爲忠臣兮。讒人毀

成<sup>解五</sup>

周處爲御史中丞。梁王彤違法。處深文按之。及齊萬年反。彤部督關中諸軍事。賊有衆七萬。彤逼處以五千兵擊之。絃盡矢絕。遂力戰而沒。

### 思子臺

南風狂。惠風閉。千歲髑髏齒牙利。承華門。詔誰作。黃門侍郎有潘岳。許昌宮。逆誰預。黃門將軍有孫慮。思

子臺。愁雲結。許昌一聲飛。蓋裂。金墉城中貯金屑。

惠帝爲愍懷太子立思子臺。太子妃名惠風。太子喪發許昌。大風雷電。幃蓋飛裂。賈后廢金墉城。飲金屑酒死。

### 寧馨兒

寧馨兒。乃具媚人骨。少無宦情。皇皇詣闕。長無宦情。營營三窟。一代龍門竟誰識。可憐車前拜石勒。阿堵

積室中。持籌亦錢癖。新婦可作阿戎匹。

王衍勸石勒稱帝。衍妻郭氏好聚斂。嘗令婢以錢繞牀。使衍不得行。衍晨起見之。謂婢曰。舉阿堵物却。

### 侍中血

長安門開鼓聲死。賊騎如雲走天子。西來從輦無一人。萬乘蒼茫草間止。行間殺氣何紛紛。侍中獨拜車

前塵馬前飛。矢着龍節。侍中獨濺衣。上血侍中血。中散琴琴聲欲絕。日欲沉。有子乃不傳廣陵。

稽紹蕩塗死。箭血濺帝衣。後左右欲浣衣。帝曰。稽侍中血。勿浣也。稽康將刑。顧視日影。索琴題之。曰。廣陵散于今絕矣。

龍虎爭

虎皇皇。北來牽兩狼。南飛值龍龍。角張洛中碩鼠尺二長。解一莫打虎。打虎先傷龍。龍鱗十五五。解二莫打

鼠。打鼠已驚犬。犬聲欲聞數武。解三雄鷄默雌鷄啼。大馬死小馬饑。解四

元康中童謠。虎從北來鼻頭汗。龍從南來登城看。指齊王圍成都。王頰永嘉初童謠。洛中碩鼠尺二長。若不早去。大狗至鼠指東海。王越狗指荀晞。大寧初童謠。老馬死小馬餓。指明帝崩成帝幼而亡。

十三月

十三月。狼生獮。五月。獮生徐。徐生已難禦。徐生奈何許。蛟龍何況得雲雨。絳灌無文。隨陸無武。以之讀

書。橫覽今古。父作蒙珠離。子作遮須夷。神州擾擾不可止。洛中又出新天子。

劉淵十三月而生。淵子聰。五月而生。聰子嘗。死復蘇。見淵為蒙珠離國主。且曰。遮須夷國無主。待汝父為之。

赤白氣

旗獵獵。天門開。雲中天子騎龍來。赤光耀以西。白氣耀以東。非烟非霧。杳不知其濛濛。熒熒煌煌。遂開明

堂。嚮嚮落落。雄藝卓犖。石武鄉。一生低首惟高皇。幕中乃有張子房。

石勒生時。赤光滿室。白氣自天。屬於中庭。勒嘗謂人曰。若逢高皇。當北面事之。遇光武。當並驅中原。勒以張寶為謀主。寶自比張子房。

特尙可

鍾離崩陷石穴。一如丹。一如漆。入穴多于蟲。出穴莫敢雄。拔劍刺屋居其中。鹽神冉冉兮。紛相從。神之一飛兮。九日盡落。澹旬茫茫兮。不見城郭。天空空。野夢夢。遺以青縷。射以雕弓。鹽神去。王廩地。特與雄。廩君裔。欲寄食。寧作賊。官貪如狼政如火。李特尙可尙殺我。

李特爲廩君苗裔。先鍾離山崩陷赤黑二穴。出黑穴者四姓。出赤穴者卽特先。五姓爭爲神。相約以劍刺穴。屋惟廩君劍獨着。遂爲神。有鹽神從之。其飛閉天廩君射殺之。天乃開朗。特據寗漢百姓謠曰。李特尙可。羅尙殺我。

壯士歌

七尺刀。八尺鞍。壯士歌。悲陳安。啾啾唧唧。天陰雨黑。伏兵邀我西。飛騎追我北。班駝無聲草間匿。嗟嗟見入不見出。西流水。東流河。壯士歌。奈爾何。

陳安與趙將平先戰。會日暮雨甚。匿於山中。爲呼延青所殺。隴上人思之作壯士歌。

留降款

一千義軍守陴哭。城中天子亦食粥。誰歟守者索都督。長安城闕生蒿萊。長安城門不肯開。車騎來。萬戶來。

劉曜逼長安。城中飢甚。愍帝食麴屑粥。索琳留降款不發。使子說曜曰。若許琳以軍騎萬戶者。請以城降。

中興瑞

綿綿延延華光燭天正氣萃此者五百二十六年時已過運乃昌朱旗卓地一丈長金符落天走建康化龍一馬與真王龍爲王馬遂亡

始秦時望氣者云五百年後金陵有天子氣至晉元帝中興果五百二十六年初玄石圖有牛繼馬後故宣帝深忌牛氏及恭王妃夏后氏竟通小吏牛氏生元帝太安時童謠五馬浮渡江一馬化爲龍

夜半舞

鷄三聲客三喚起視東壁有疎燈啓明光已亂英雄乘時空浩嘆元明之間久無日

祖逖與劉琨俱爲司州主簿共被同寢中夜聞荒鷄鳴蹴琨起舞

王與馬

王與馬共天下將軍前丞相亞將軍無謀丞相詐丞相謂將軍三州勢堪藉事成爲王失爲霸嗚呼將軍遠叱咤鼓頻頻肆逆氛丞相大義已滅親白旗懸首煩將軍

王敦王導秉政時人語曰王與馬共天下永昌元年敦率衆內向以誅劉隗刁協爲名敦死懸首南桁莫敢收葬者

新亭淚

慎勿學楚囚對慎勿灑新亭淚天茫茫天方醉人茫茫人方睡

過江人士，每至暇日，相要出新亭飲宴。周顛中坐嘆曰：「風景不殊，舉目有山河之異，皆相視流涕。」王導愀然變色曰：「當共戮力王室，克復神州，何至作楚囚相對！」

### 呼伯仁

渡江來不安坐，茂倫一言伯仁賀，向見夷吾在江左，夷吾有急呼伯仁。伯仁百口還理君，爲君瀝肝膽，爲君全令名。叶伯仁言感天子，夷吾不言伯仁死。三司耶，令僕耶，知人不易古所嗟。夷吾亦殺鮑叔牙。

王敦反，王導每旦率子弟詣朝待罪，見周顛入，導呼曰：「伯仁，以百口累卿，顛不應及入爲導申救，甚至出，又上書明導忠誠，導不知甚恨之。」及王敦問顛于導，三問不對，敦遂殺之。

### 拜士行

朝亦運百甓，暮亦運百甓，欲清中原還致力。古人陰惜寸，今人時擲尺。欲清中原先惜日。叶陶士行，真名臣，神機魏武忠孔明。叶陸遜陸抗非其倫，前年擊杜弼，今年殺蘇峻。君不見，元規枉自受顧命，賊來亦拜陶士行。

蘇峻反，庾亮詣陶侃拜謝，侃止之曰：「庾元規亦拜陶士行耶。」尚書梅陶與曹識書曰：「陶公機神明鑒，似魏武忠順勤勞，似孔明陸抗諸人，不能及也。」

### 踐海冰

北風吹海海欲立，海底潛蛟抱冰泣。馬蹄踏海聲隆隆，三日不拆玻璃宮。玻璃平鋪三百里，鐵騎茫茫踐之起。君不見，一聲篳篥海水開，海底已執乖龍回。

燕慕容皝討慕容仁，天寒海凍，從昌黎東踐海冰而進，凡三百餘里。仁部下叛，執仁以降。

義旗指

去年反王敦。今年反蘇峻。六師束手。庾元規。八州觀望。陶士行。君父之難安可逃。義旗一指。天為高。官軍已成。白石壘。賊騎不越。朱雀橋。功成倘憶絕裾處。夜夜精靈泣牛渚。

蘇峻之難。溫嶠約陶侃東下。後侃以糧盡欲返。嶠謂曰。公若沮眾。敗事。義旗將回指于公矣。初。嶠欲將命。母崔氏固止之。嶠絕裾而去。

獻行靈

獻行糧。獻行靈。尚薄袁本初。何敢學成李。二十八宿纏宮門。大業無愧張耳孫。龍章九錫未入告。白哈入棺還自悼。還自悼。百六乾坤總羣盜。執手傳家自忠孝。

前涼張軌。漢張耳十七世孫。據涼時。有平石白點成二。十八宿。子茂。以未受王命。白哈入棺。勉嗣子以忠孝。

一目主

長安天子眇一目。長安城中月鼎足。妖星茫茫射黃屋。死我者堅活我雄。東海大魚化為龍。男皆為王女為公。

苻生眇一目。童時。祖洪戲之曰。吾聞瞎兒一泪。信乎。生引佩刀刺出血。曰。此亦一泪也。性殘忍。祖洪欲殺之。雄勸乃止。生立太史奏。長安城中三月竝出。

識英物

兒勿啼。兒啼驚一切。兒啼何奇。知兒是英物。兒勿來。兒來光一室。兒來何殊。知兒有奇骨。星茫茫。墮兒顛。

中七山巖巖橫兒頂中一君不見溫太真擅奇術燃犀照餘幽魅出何不攜來照英物。

桓溫生未朞溫嬌見之曰此兒有奇骨可試使啼及聞其聲曰真英物也溫面有七星。

### 日書空

夷甫矜空談神州已陸沉深源復中起蒼生更誰倚嗟嗟一百年處士相後先書空計已左周旋猶作我東山捉鼻四十春蒼生所望真斯人。

殷浩被廢在信安終日恒書空作字揚州吏民尋義逐之竊視唯作咄咄怪事四字而已。

### 海西公

局縮肉馬作犢海西公犢化龍犢化龍是龍子朝向離宮生暮向吳宮死吳宮死悲何如君不見永嘉袖手永昌呼入廟曾言帝室儲何因龍種欺黃犢會見鷄雌擾鳳雛。

海西公不男使左右向龍與內侍接生子以爲世子民間謠云本言是馬駒今定成龍子局縮肉元帝時謠孝武時謠云黃雌鷄莫作雄父啼。

### 鬼董狐

鬼董狐事何略天地茫茫總初覺元凱誰鱗而攫元海誰鱗而躍敦與溫重筆削君不見枋頭旣敗史筆誣定論只有鬼董狐。

千寶作搜神記劉惔曰卿可爲鬼之董狐杜預在荊州因宴醉臥外人聞嘔吐聲竊窺於戶見一大蛇垂頭而吐劉淵母祈子于龍門見一大魚頂有二角伏于祭所夜夢旦所見魚變爲人遂生淵。



孫盛作晉陽秋直書枋頭之敗溫見之大怒孫諸子懼遂竊改之

東山臥

大謝執如意小謝揮麈尾中謝無所為冷冷善名理一門羣從真無慙閨中飛絮還撒鹽君不見四十東山臥初足與人同憂亦同樂別墅風流賭棋局

謝安兄奕為桓溫司馬喜執玉如意弟萬常着鶴氅裘白縵巾安悅兄子元戲賭紫香囊得即焚之

牛心炙

欲知名啖牛心欲書名聚鵝羣叶昔不減阮主簿今可伍王懷祖攜諸子抱弱孫婚嫁畢學尙平學尙平事亦足中年以後傷哀樂叶得閒且自陶絲竹

王羲之十三時詣周顛時重牛心炙坐客未啖顛先割啖之由是知名阮裕有重名為王敦主簿敦嘗謂羲之曰汝不減阮主簿王述字懷祖與羲之齊名

阿房城

鳳凰鳳凰止阿房一雌一雄雙翱翔不見雀來入燕室但見浮雲閉白日鳳西飛雀東飛腸斷朱宮復紫隄錦袍一領軍前卻鳳皇鳳皇不如雀

苻堅時謠云一雌復一雄雙飛入紫宮又謠云鳳皇鳳皇止阿房時慕容冲與姊清和公主俱有寵慕容垂妻亦得幸於堅與同輩宦者趙整歌曰不見雀來入燕室但見浮雲閉白日慕容冲逼長安一領冲却之

長星見

熒惑入南斗。天子下殿走。熒惑來天垣。天子坐未安。坐未安。亦何有。長星勸汝一盃酒。臣願天子聖。列辟賢。追古七十二帝恩綿延。臣更左執矢。右執鞭。妖星射落淵底眠。陛下聖壽千萬年。

長星見孝武帝甚惡之。子華林園舉酒祝曰。長星勸汝一盃酒。自古何有萬年天子耶。

負春來

負春來。洛陽鬻望塵來。司隸逐。卿無忘螭蟠。朕無忘龍伏。嗟嗟景略奪何速。不事西夷事南服。八公山悲苻融。五將山毒吳忠。景略有君死。葺手。景略有兒熱。泓首。丕登先亡鎮惡後。鎮惡死。報苻氏。

王猛少時鬻春於市。苻堅七歲戲官道。左徐統戲曰。不畏司隸縛耶。堅至五將山。姚萇遣將軍吳忠圍之。求傳國璽不得。遂縊堅。猛孫鍾惡奔晉。隨劉裕滅後秦。為沈田子所殺。

行路難

行路難。歌以哭。四座茫茫慘無樂。叶松柏何啾啾。屋下尸自愁。挽歌何慨慷。道上殯自往。袁山松。愁何工。君家兄弟才偏雄。呼盧十萬擲布帽。卿輩可識袁彥道。

袁山松喜歌行路難詞。又喜道上作輓歌。時謂張湛屋下陳尸。山松道上行殯。袁耽字彥道。桓溫嘗博進負數萬。求濟于耽。耽許之。就局十萬一擲。直上百萬。探布帽擲地曰。竟識袁彥道不。

丁零王

丁零中。一隅地。幾人稱王幾人帝。

翟斌據丁寧慕容垂以爲河南王。翟劍改元定鼎後敗爲慕容永所殺。

新平寺

長星出天十丈長。東掃宛洛趨雍涼。明光殿前老父走。甲申乙酉悲魚羊。魚羊食人人更少。長安十陵長秋草。威鳳重飛入禁中。蛟龍更出屯官道。東帝鮮卑西帝秦。英雄歸骨向新平。萋登自構君臣禍。垂永還操門戶兵。

後秦姚萋縊堅于新平佛寺。堅時有人于明光殿大呼曰甲申乙酉魚羊食人。慕容永爲西燕。後燕主垂復滅之。苻登載堅木主與萋戰。每事必啓主後行。

五經表

宗生去。大事已。趙生來。大事濟。彼棄龍頭附蛇尾。才何奇。九州小。書何奇。五經表。不處城廬處洲島。沮渠據北乞伏西。自鄗以下還無譏。

禿髮烏孤據廣武。秦王興使韋宗覘之。歸曰吾乃知九州之外。五經之表。復自有人也。宗生名敵。趙生名振。烏孤曰吾得趙生。大事濟矣。沮渠據張掖。乞伏據金城。

借鬼兵

城門西。鬼兵十萬啾啾啼。城門東。陰旗獵獵愁。城騎欲向南。鬼伯趨趨趨。賊騎欲向北。啾啾啼。鬼伯城門開。待鬼來。椒漿爲汝奠。靈甲爲汝裁。一朝賊退歸海中。幕府上簿皆鬼功。鬼兵不來兮。奈何許。賊兵皇皇兮。矢如雨。風折兮。蜚弧。血染兮。頭顱。將軍苦身折。天師竟無術。彼夫人兮。眞丈夫。抽刀殺賊賊卽呼。

天壤欲似王郎無。

孫恩攻會稽內史王凝之素奉天師道官屬請出兵凝之曰我已請大道借鬼兵守諸城門各數萬不足憂也及敗遂爲恩所殺妻謝道蘊聞變肩輿出手殺數人。

### 續佛經

君不見長安天子好禪論。浮屠沙門多以萬。殿陛空陳豐草詩。深宮自進伊蒲飯。又不見長安天子多武功。蜀氛西靖燕東封。一朝熒惑星失守。萬劫昆明火更紅。可憐德脩期愈促。自謂當時邀佛福。邀佛福。三千佛經盈臥閣。萬死難懺姚萇惡。

後秦姚興好佛與鳩摩羅什續佛經長安里中沙門至萬人興好獵杜挺著豐草詩以諫熒惑入瓢瓜中忽亡不知所至是歲秦大旱昆明池竭童謠訛言國人不安。

### 槐樹賦

槐樹賦述志賦。撰作遐方一何富。上馬能殺賊。下馬作露布。龍吟夜半與真人。譜系乃出飛將軍。彼夫人兮亦清節。三年不言似亡息。

西涼王李嵩隴西人李廣裔著槐樹賦述志賦。夫人尹氏有志節以先適馬元正三年不言。

### 虎臺謀

兄爲囚。妹爲虜。父命事仇無不可。叶父已死。兄已誅。父命殺仇仇卽夫。父仇不報豈女子。反面事人有餘恥。事已不成寧惜死。黃泉有血流浩浩。九州之外五經表。

南涼王儼檀女爲秦王熾磐后。與其兄虎臺謀殺熾磐事泄死。

沐謙刺

一尺七首三尺雲首。提革囊飛入秦。飛入秦。殺龍子。感恩茫茫復中止。君有疾。吾侍之。君有藥。吾奉之。涪涪淚下不能止。義士今時爲君死。匣中夜半風颼颼。恨不飛斬仇人頭。

劉裕使沐謙刺司馬楚之。楚之待謙甚厚。謙未得間。乃夜稱疾。楚之果自齋湯藥往。視情意勤篤。謙感楚之恩。反爲之用。

彗星出

明堂坐一龍。纜升一龍墮。慟哭來徐公。徐公得無過。星離離。入太微。經北斗。絡紫微。茫茫一百二十祀。酖君以生不如死。晉亡亦有死節士。

彗星出天津。晉恭帝禪位於宋。自遜于瑯琊第。祕書監徐廣痛哭。謝晦曰。徐公得無小過。裕使張偉酖帝。偉曰。酖君以生不如死。遂自飲而卒。

義義號

仇池一隅世忠孝。宋家日月飛不到。永初年間義義號。當時彤弓與盧矢。老臣自當臣晉死。我死善事新天子。嗚呼國亡不與亡。柴桑處士仇池王。

仇池王楊盛聞晉亡。不改義義年號。謂世子玄曰。吾老矣。當終爲晉臣。汝善事宋帝。及玄立。始用元嘉年號。

桃源記

不聞人聲。但聞琴聲。不聞絃聲。但聞指聲。桃源中人。羲皇上人。何論魏人。何論晉人。

陶潛性不解音。畜素琴一張。絃徽不具。每朋酒之會。則撫而和之。曰。但識琴中趣。何勞絃上聲。

此  
页  
空  
白

擬兩晉南北史樂府目錄卷下

陽湖洪禮吉稚存撰

屠 紳笏巖

管幹珍松崖

同里 閱

錢維喬竹初

黃景仁仲則

一尺劍 味卿言

金昌亭 東山屐

檀江州 春月畋

封狼胥 佛經識

宜速斷 見要人

竹林堂 遠導旨

領軍腹 石頭城



天王家

移吾牀

易犬子

郎君書

解散髻

八騶嘆

閱武堂

合肥捷

談風月

山中相

鹿子開

房公馬

鮮卑奴

水東流

南飛吉

明月謠

狐非狐

金甌缺

臣如龍

寒山石

百年冤

握槩來

劉桃枝

金叵羅

延年杖

無愁曲

百升謠

殺一園

腳杖痕

景陽樓

高涼洗

阿干歌附外城

魚鼈橋

鬼鼓喧

雌雉卜

金羊牀

新羅人

雨爲歲

孔雀羣

燉煌西

日出處

此  
页  
空  
白

擬兩晉南北史樂府卷下

一尺劍

一尺劍。馴兩蛇。五百載。還劉家。一炎精斷。典午亂。真人興。紹皇漢。二草肅肅。沒輦轂。金之刃。之悔不速。三

宋武帝本漢後為高祖弟楚元王交裔武帝伐荻新洲大蛇長數丈射之傷明日見數童子青衣擣藥宋時有童謠云欲知其姓草肅肅蓋肅道成受禪之讖

味卿言

恪誰長。慕容暉。有霍光。猛誰伍。秦苻堅。有仲父。裕誰堪。司馬宗。有曹瞞。知人何詳。己何略。如君之才。總誰

角。可憐死。慙高著作。

崔浩與魏太宗論近世將相之臣太宗悅賜御縹膠十觚水精鹽一兩曰朕味卿言如此鹽酒浩後以譏國史族誅高允為著作郎十七年不遷官

金昌亭

東華吳聲猶未已。司空中書執戈起。同謀亦聞檀道濟。廬陵何人。武皇愛子。陛下弟。金昌亭邊鼓聲沸。磨

刀霍霍且及帝。五蛇升一龍去。龍歸若得瞻皇馭。應問爾來何太據。

徐羨之與傅亮謝晦受遺詔輔少帝帝居喪無禮羨之等令檀道濟引兵入殿帝為營陽王復弑之金昌亭并殺廬陵王義真

東山辰

東山屐屐不釋。屐不釋。作山賊。西堂夢。夢莫論。夢莫論。思王孫。君才苦多實苦少。別夢盈盈滿春草。君心苦難迹。苦幽探。奇累累。山靈愁。山靈愁。向天訴。桃墟邨。中夜相捕。君鬚成佛骨未仙。生天乃落孟顛前。謝靈運既徙廣州欲要合鄉里小兒于三江口篡取爲秦郡將宋齊所發于桃墟邨獲七人靈運遂坐誅靈運將刑捨髮作維摩詰像孟顛事佛精懇靈運素輕之曰癩生天當在靈運前成佛當在靈運後

檀江州

可憐白浮鳩。枉殺檀江州。萬里長城君自毀。明年飲馬長江水。長江飲馬君有知。目光裂電神駢馳。

魏人聞檀道濟雄名憚之圖以禳鬼道濟被收脫幘投地怒曰乃壞汝萬里長城魏太武引兵南下文帝登石頭城望之謂江湛曰檀道濟若在豈使胡馬至此

春月畋

咄爾簞。嗟爾笠。曷不遠睭。我馬欲逸。咄爾騎。差爾王。曷不傍皇。我田欲荒。一日荒。不得實。一日飢。不得活。王將四征營三驅。驅斥老農胡爲乎。還君壺觴不敢食。我田我田食我力。

衡陽王義季都督荆湘嘗春月出畋有老父被苦而耕左右斥之老父曰盤於游畋古人所戒今陽和布氣一日不耕民失其時奈何以從禽之樂而驅斥老農也義季曰賢者也賜之食不受

封狼胥

朔風一夜長城倒。百萬甲兵如電掃。石頭城上烽連天。不見居人見秋草。秋草秋肥胡馬驕。江南地赤總無苗。雍徐白骨連青冀。又見催書集飛騎。君不見耕當問奴織問婢。封狼居胥亦何易。

朱文帝欲經略中原王元謨尤好進策帝曰觀元謨言令人有封狼居胥意沈慶之諫曰耕當問奴纒當問婢陛下伐國而與白面書生謀之何由濟帝不聽魏人凡破南徐徐兗豫青冀六州所過赤地無苗春燕歸巢於林木

### 佛狸識

江水飲莫飽佛狸死江島去年歲在寅今年歲在卯崔伯深死亦早

魏太武南下童謠云瘦馬飲江水佛狸死卯年佛狸太武小字崔浩字伯深

### 宜速斷

禁林半夜愁鳥號深宮一舉雙鷗梟鷗梟食母獍食父假以羽翼授以刀齋宮門開燭未滅舉几一揮指齊裂漑之不斷江漑遲陛下裁弟難裁兒難裁兒已殺父嗟嗟雙鷗梟更假一鷗鷗

太子劭始興王濬與嚴道育王鸚鵡巫蠱事發帝欲廢太子劭賜濬死與徐漑之江漑王僧綽謀之僧綽曰事宜速斷當斷不斷反受其亂帝久不決更以謀告潘淑妃妃濬母也以告濬於是太子劭遂與徐漑帝并殺潘淑妃徐漑之江漑俱死

### 見要人

衣如鶉馬如狗道逢八騶不得走平生不喜見要人要人近復生公門君不見要人耶亦堪喜陛下有綸臣仲禮

顏延之子竣既貴常乘羸牛策車道逢竣函簿即屏往道左謂竣曰平生不喜見要人今不幸見汝侯景圍臺城邵陵王綸及都督柳仲禮按兵不戰梁武帝嘗問策於柳津對曰陛下有邵陵臣有仲禮

不忠不孝  
賊何由平

竹林堂

寧馨兒父不知渠大齷鼻何如斯。齷鼻不懼鬼射鬼鬼殺爾今日當屠豬。急付大官廚豬來代爾宰天下。

竹林堂空鬼亦怕

廢帝射鬼於竹林堂為壽寂之等所殺。王太后疾篤呼廢帝不往怒曰那得生寧馨兒。帝入太廟指世祖像曰渠大齷鼻如何不齷。帝嘗惡湘東王彧呼為豬王一日忤旨帝縛之使擔付大官廚曰今日屠豬建安王休仁笑曰豬未應死待皇太子生彧遂免。

違導旨

欲言耶負導旨不言還負翟黑子宮中門啓戈矛森。臣寧負迹不負心天威煌煌距尺咫。臣寧負生不負死高渤海真純臣天文書上天顏溫臣才區區勞獎述清河司徒臣不及。

高允嘗授太子經及崔浩國史事發并欲誅允太子入言允小心謹密且制由浩請赦其死魏太武問曰國書皆浩所為乎對曰浩所領事多總裁而已至於著述臣多於浩太武怒曰允罪甚於浩何以得生太子懼曰天威嚴重允迷亂失次耳臣向問皆浩所為太武問信如東宮所言乎對曰臣罪當滅族不敢虛妄殿下哀臣欲乞其生耳太武為太子曰臨死不難辭信也為臣不欺君貞也遂赦之允退為人曰我不奉東宮導旨者恐負翟黑子耳先是翟黑子奉使并州受布千匹事發謀於允允勸首寔翟黑子不從太武殺之魏太武使允集天文災異書凡八篇太武善之謂不減崔浩。

領軍腹

七日宴慎勿開司空血裏長安臺牽牛星慎勿見蒼梧首離仁壽殿江州首禍徐州亡天意總在蕭建康。

箛中有箭箭有鏃痛恨不穿領軍腹。

宋明帝以七月七日殺巴陵王休若後廢帝亦以七夕死帝醉寢仁壽殿令楊玉夫伺織女渡河以見當報我不見當殺汝玉夫懼遂弑之帝嘗直入領軍府值蕭道成晝臥帝畫其腹爲的欲射之以王天恩言遂以飽箭射

### 石頭城

石頭城悲孝子悲忠臣寧爲粲死慙淵生叶江陵市爲忠臣爲節士不作充生作陵死。

袁粲與子暹同死曰汝不失孝子我不失忠臣沈攸子將起兵曰吾寧爲王陵死不作買充生攸司馬邊榮亦不屈死

### 天王家

生不落降王車死不入天王家王敬則虎而翼板輿迎居別宮耳司馬家亡亦如此王光祿獺尾哭興亡兩見勿復哀鸞飛又向天邊來。

宋順帝禪位於齊王敬則以板輿入迎帝帝曰欲見殺乎敬則曰出居別宮耳官先取司馬家亦如此帝曰願生生世世勿復生天王家右光祿大夫王琨晉世已爲郎中至是攀車獺尾慟哭曰人以壽爲歡臣以壽爲戚既不能先驅蠅蟻遂復類見此事

### 移吾牀

紀僧真無所須從官乞作士大夫士大夫非天子命江家謝家聽不聽欲娶須造中書堂欲貴須近尙書牀桃笙三尺牀七尺尙書移牀遠俗客。



紀僧真得幸於齊武帝請曰臣出自武吏階榮至此為兒復得婚荀昭光女無所復須但願乞作士大夫武帝曰此由江敷謝淪可自詣之僧真詣敷登榻坐定敷顧左右曰移吾牀遠客僧真喪氣返曰士大夫固非天子所命

易犬子

延昌宮中國祚短神龍墮地化作犬楊婆咒禱空紛紛寧知金翅啣王孫王孫憶翁須好作翁死旬時還奏樂花枝裊裊春綿綿楊郎宮中恣醉眠狐裘錦衣左右直徐郎殿前躬畫敕寧失官家朝莫犯周侯刀寧遠至尊訓莫拒舍人命禁中刀敕空縱橫國運詎識歸宣城尙書不言侍中走舉朝盡醉吳興酒

齊武帝時有小史性皇名太子帝為移點於外作犬子何點曰太子作犬不得立矣後文惠太子果卒鬱陵王為皇太孫時令女巫禱祀速求天位及太子卒益加敬信世祖崩大斂畢即呼伎作樂帝左右楊珉與何后同寢處帝寵任蔡母珍之周奉叔及宦者徐龍駒等珍之有所求無不應有司相語曰寧拒至尊敕莫違舍人命奉叔有單刀二十日嘗語人曰周侯刀不識君龍駒至代帝畫敕宣城公鸞謀繼大統多引朝中名士參畫侍中謝朓心不願求出為吳興太守至郡致酒數斛與弟吏部尙書淪曰可力飲此勿豫人事

郎君書

郎君書悲欲死不死三軍死尺紙田橫客走安歸先生血染門生衣陸家門生頸已折袁家門生遭狗齧

先生之靈幾時沒

晉安王子懋與防閣陸超之童僧會舉兵討蕭鸞為參軍于琳之所殺僧會見懋子昭基書曰郎君書也悲痛而卒或勸超之遠遁超之曰恐田橫客笑人遂為門生所殺頭斷而身不僵門生亦助舉棺棺墮折其頸而死袁粲死後其家匿一少子投粲門生狄靈慶靈慶遂抱兒以首兒死後靈慶嘗見兒騎大犄狗戲年餘靈慶竟為犄狗所殺

解散髻

華林園中宴初設。彥回琵琶稱第一。清歌沈季葉王郎。三公解事惟拍張。尙書尙書技偏乏。稽首臣須用。臣法。臣今有法。臣知書。當時封禪推相如。帝曰休哉盛德事。琵琶聲停拍聲止。一代風流比謝安。插簪散髻解朝冠。王郎何似吳興守。力飲不肯解纁綬。

王儉爲國子祭酒。作解散髻斜插簪。嘗謂人曰。江左風流宰相。惟有謝安。意以自比。齊高帝幸華林園宴集。使各效技藝。褚彥回琵琶。王僧虔柳世隆彈棊。沈文季歌子夜來。王敬則脫朝服拍張。獨儉無所解。誦相如封禪書。齊主曰。此盛德事也。齊主受宋禪。以謝朓爲侍中。不肯解纁綬。乃用王儉爲之。

八騶嘆

君不見鄧仲華。二十佐命人爭誇。又不見王僕射。弱冠與齊推定策。君名照耀同扶桑。三十官止中書郎。前無八騶任搥壁。人何轟轟我寂寂。絳衫戎服官門來。嗟君殊非濟世才。濟世才。任輕薄。驢乎驢乎汝好作。如汝人材皆令僕。叶

中書郎王融。自恃人地。三十內望爲公輔。嘗夜直省中。嘆曰。爲爾寂寂。鄧禹笑人。行逢朱雀桁開。喧嗽不得進。植車壁。嘆曰。車前無八騶。安得稱大丈夫。齊武帝疾亟。融欲矯詔立竟陵王子良。戎服絳衫。于中書省閣口。斷太孫仗。不果。遂坐誅。融嘗與劉祥同載。祥見道旁驢。曰。好爲之。如汝人才。今皆令僕矣。

閱武堂

閱武堂。種楊柳。至尊屠肉妃酤酒。阿兄來。盤馬走。阿丈來。醉一斗。宮中夜遊誰敢毀。宰相已作破面鬼。

東昏侯於芳樂苑設店坐而屠肉百姓歌曰闕武堂種楊柳至尊屠肉潘妃酤酒東昏呼潘妃父為阿丈俞靈韻為阿兄沈昭略臨死罵徐孝嗣曰廢昏立明古今令典宰相無才致有今日以甌擲其面曰使作破面鬼

合肥捷

合肥城邊鼓三下將軍乘輿不跨馬。麾幢繖扇沿河堤。兵不貴多還貴寡。三關關北增高樓。將軍閉壘征人愁。征人誰知法中法。法在用強還用法。百戰孰比將軍功。將軍豈數曹景宗。原頭射獵師不競。行路空歌霍去病。

韋叡體素羸每戰未嘗跨馬嘗乘板輿合肥之捷魏人歌之曰不畏蕭娘與呂姥但畏合肥有章虎先是諸將請益兵叡曰兵費用奇豈在衆也梁武帝使叡救馬仙理叡至安陸增築城二丈餘更開大壑起高樓衆頗譏其怯叡曰不然為將當有怯時曹景宗救義陽頓兵不進但原頭射獵而已

談風月

南尚書奔競謫詹事官求不獲。北尚書選格裁洛陽令爭不迴。停年格銓選格羽林夜火尚書宅。南尚書北不如宵來風月談軒渠。

徐勉為吏部尚書客有因宴求詹事五官者勉正色曰今日祇可談風月魏崔亮為吏部尚書立停年格洛陽令崔瑒上書諫不聽先是張瑀立銓選格排抑武人羽林相率焚其宅

山中相

華陽夢破生紅塵。山中宰相作外臣。芒鞋尋山芝草竟。茯苓屢辱官家命。官家手敕來岩陬。先生不願金

籠頭同時亦有何處士。捋鬚不得臣老子。

陶宏景隱居茅山國有大事每遣使咨訪時號山中宰相梁武帝遣所在給茯苓武帝手敕禮聘不出唯畫兩牛一著水草間一金籠頭武帝欲拜何點爲侍中點捋帝鬚曰乃欲臣老子耶

### 鹿子開

建康城頭衆驚走。根根取人飼天狗。朝呼食肉宵呼肝。根根得人食始歡。食始歡。殺鹿子。龍公不死鹿子死。四十八年王氣止。

梁武帝立長子統爲皇太子時民間謠云鹿子開城門蓋反語爲來子哭也後太子果薨天監十三年都下訛言有根根取人肝肺及血以餵天狗百姓大懼

### 房公馬

糗盈升草盈把。兒童競養房公馬。見公之馬還思公。連錢蹀躞奔兒童。兒童粟多果馬腹。更辦名香馬前哭。馬前哭。因思公。君不見房公之馬鮑氏驄。

房謨爲大寧太守有惠政以不起兵應爾朱世隆爲所執以其馬別給戰士戰敗蜀人得之謂謨遇害莫不悲泣善養之謂爲房公馬

### 鮮卑奴

銅拔打鐵拔。元家歲將末。鮮卑奴起渤海東。電隱隱兮雷轟轟。朱家魏家總非匹。一冒空拳一穿鼻。賊來百箭殺百人。武牢不死真有神。宣訓宮中叩頭列。一母三天亦人傑。

高歡累世北邊習其俗遂同鮮卑魏孝明時洛下以兩拔相擊謠言銅拔打鐵拔元家歲將末武牢之敗親信都督尉興慶謂歡曰王去矣興慶腰邊百箭足殺百人歡妻婁氏生六子洋演邁皆爲

帝時謠云一  
母生三天

水東流

欲要君四十啓。叶欲爭君二千騎。東帝不成作西帝。征途歔歔悲啼勿啼。君心有南北。此水無東西。水東西。猶入海。魏東西天命改。

魏孝武帝惡丞相高歡。西依宇文泰。歡上。帝四十啓。帝不省。泰率二千騎逆帝。中途帝謂侍臣曰。此水東流而朕西上。因流涕泣下。帝至關中。復與丞相泰有隙。飲酒遇醜而殞。

南飛吉

烏鴉耶。燕雀耶。南飛者利耶。轅門中置大鼓。將軍紫衣氣如虎。彎弓北來射鸚鵡。

賀拔勝奔梁三年。梁武帝遇之甚厚。屢乞師討高歡。不果。乃求還。勝自後每執弓矢。見飛鳥南向者。皆不射之。以申懷德之意。魏時童謠云。可憐青雀子。化作鸚鵡子。青雀指孝靜帝。鸚鵡指高歡。

明月謠

明月明月。相隨不滅。昨宵入懷抱。今宵委荒草。

魏孝武帝閨門無禮。從妹不嫁者三人。皆封公主。平原公主明月尤寵。帝以之入關。爲宇文泰所殺。

狐非狐

天門開。焦梨狗子天邊來。狐非狐。貉非貉。吠聲長。達河朔。青雀何嗷嗷。新巢復舊巢。舊巢鸚鵡啄。新巢飽犬腹。犬乎犬乎。爾何酷。會見金鷄樹頭哭。

魏孝武時謠云狐非狐貉非貉焦梨狗子嚙斷索蓋指宇文泰俗謂之黑獺也秦母孕泰時夢抱子升天機不至而止周初童謠云白楊樹頭金鷄鳴祇有阿舅無外甥蓋指隋受周禪之兆

### 金甌缺

蕭繹盲老公侯景跛老子中原龍戰四十春乾坤戾氣歸斯人斯人不來國不破誰使金甌向空墮當殺不殺慕紹宗當斷不斷吳老公跛奴之禍禍已酷盲僧覺成還骨肉

梁武帝欲納侯景曰我國家如金甌無一傷缺脫納景致紛紜奈何後以朱异言卒納之景右足偏短慕容紹宗追景急景謂曰景若就擒公復何用乃縱之湘東王釋眇一目初武帝夢盲僧託生王宮遂生釋

### 臣如龍

天子勿走馬大將軍噴大將軍勸陛下酒敢勿聞黃門郎來前且受意癡人勢亦小差未欲進食先揮刀龍耶虎耶亡崇朝亡崇朝反及禍臣如龍北面坐臣如虎尙是可臣如鼠已殺我

東魏高澄忌魏靜帝使黃門郎崔季舒伺帝動靜嘗與書曰癡人比復何似癡勢小差未澄爲膳奴蘭京所殺高洋欲受魏禪母婁氏曰汝父如龍兄如虎尙終身北面汝何人欲行舜禹之事乎

### 寒山石

一片石寒山頂餘者誰比蛙黽蛙聲蚓聲猶可識邢家魏家工作賊

庾信使北歸人問北方人土何如曰惟溫子昇寒山一片石堪共語餘若驢鳴犬吠耳邢邵曰江南任昉文體本疏魏收非直模擬亦大偷竊收聞之謂人曰伊嘗于沈約傳中作賊何敢言我

### 百年冤

濟南毅魄死。不灰。九死上叫天。關開精誠入。日日忽變。白氣夾日。如長圍。涼風臺前血一斗。百年來時繞塔走。兒今何罪生王家。乞命作奴還俯首。深宮半玦留分明。兒今已死忍獨生。忍獨生。還把玦。明月不來空斷絕。君不見。婁家血泪還纏綿。濟南悲罷悲百年。

北齊昭帝廢故主為濟南王。尋復弑之。立子百年為太子。及昭帝疾。婁太后視之。問濟南所在者三。不對。太后怒曰。殺之耶。遂不顧而去。武成帝立。封百年為樂陵王。河清三年五月。白虹圍日。再重。又赤星見。帝欲以百年厭之。使召百年。知不免。割帶玦與妃斛律氏別。見帝于涼風臺。曰。乞命與阿叔作奴。帝不聽。卒殺之。妃把玦不食。月餘亦卒。玦猶在手。父光自擘之。乃開。

握槊來

臣彈箏。君進酒。君持觴。臣為壽。君王沉醉宮生春。兒家乃有握槊臣。趙郡痛哭宮門首。臣為國家不為酒。珠簾終蔽和士開。兗州刺史需君來。士開生。趙郡死。非常作事有龍子。

北齊和士開以善握槊彈琵琶有寵於武成帝。使士開與胡后握槊。復得幸於胡后。及武成帝殂。後主尤委任之。趙郡王劼與司空婁定遠立請出士開。外任太后命賜劼酒。劼正色曰。臣論國家大事。非為厄酒。後主不得已。出為兗州刺史。士開載二美女。珠簾詣婁定遠。願得一辭。二宮定遠許之。士開遂與太后及後主謀殺劼。瑯琊王劼殺和士開。斛律光聞之。撫掌曰。龍子作事固自不凡。

劉桃枝

劉桃枝。信力士。所為如此事。永安耶。鐵籠死。平秦耶。露車死。趙郡耶。雀離死。大明宮裏呼家家。腸肥腦滿悲瑯琊。桃枝桃枝。技還絕。飛向青天斬明月。劉桃枝。慎勿過。君如鶴鷗。見者禍。嗚呼爾。首何時墮。

劉桃枝。齊天保間力士。齊文宣囚永安王浚。上黨王浹於鐵籠。使桃枝就籠刺浹。因自殺。浹呼曰。平秦王歸。彥被獲。載以露車。使桃枝拉殺之。桃枝拉殺趙郡王劼于雀離佛院。瑯琊王劼將死。呼曰。乞

見家桃枝以袖掩口殺之。周章孝寬畏斛律光，縱謠言曰：百升飛上天，明月照長安。光字明月，故言光至涼風臺，桃枝自後撲之不仆。光反，顧曰：桃枝嘗爲如此事，我不負國家。齊文宣嘗使桃枝殺高德，政桃枝不敢下。顯祖怒曰：爾首卽墜。

### 金叵羅

爲丞郎郎善盜金叵羅，在官帽爲達官，官善溫，胡桃油，獻至尊爲三司，司善刺黃金丹，寬一死爲流囚，囚善柔，蕪菁子，薰兩眸，盲人當國亦識古，官欲殺弟引慶父，盲人當國還傾朝，官欲殺舅引薄昭，盲人耶，竟誰恃，外有和老公，內有女媧氏。

北齊著作郎祖珽疏率無行，嘗因宴失金叵羅于珽，鬻上得之。武成帝爲長廣王時，珽爲胡桃油以獻。武成帝將殺珽，珽曰：陛下勿殺臣，臣爲陛下合金丹，因徙光州，置地牢中，夜以蕪菁子爲燭，由是失明。胡長仁瑯琊王儼之死，皆珽引經成之。珽媚後主保母陸令萱，謂後主曰：令萱女媧以後一人而已。

### 延年杖

延年杖南面植，大司馬前爲進鳥，太師前爲設席，皇帝陛下北面進爵，百僚捧匱，三公洗勺，臣學孫吳，不學孔孟，羣公雍雍，陛下至聖。

周武帝視太學以太傅子謹爲老，賜以延年杖，謹入門，帝迎拜，謹荅拜。太師宇文護設席，謹升席，南面坐。大司馬豆盧寧正，息帝立于斧辰之前，西面有司進饌，帝跪設醬豆，袒割，謹食畢，帝跪受爵以酌。謹幼好孫子兵書，于經史但略窺而已。

### 無愁曲



日短短苦未足夜遊還秉燭琵琶絃撥無愁曲鬪鷄開府鷹儀同無愁天子歡無窮歡無窮起相和杞人莫自憂天墮女媧宮中捧石坐

北齊後主好自彈琵琶為無愁之曲內侍和者百數民間謂之無愁天子有鬪雞號開府狗馬及鷹皆有儀同郡君之號

百升謠

清風園中菜租減盲老公言百升反棗枝十束弓廿張百升反具何尋常老公言時老母證官家比來亦大聖天亡明月資秦人中河不事椎屠冰吁嗟二妃一皇后敕勒老公知不久

北齊後主以鄴清風園賜穆提婆於是官無菜賒買于人負錢至三十萬斛律光以為言提婆大怨祖珽以章孝竟謠言啓後主且續之曰盲老公背受大斧饒舌老母不得語盲老公自言老母指陸令萱後主曰人心亦大聖我前疑其欲反果然籍孝家得棗枝二十束弓廿張先是周人懼齊兵之西度恒以冬月中河椎冰及齊政衰反畏周至冬月冰結齊警使人椎之

殺一圍

撮許賊何能為官家更勸殺一圍平陽城頭賊鋒挫美人不來城不破嚴兵何紛紛伐鼓何喧喧美人一呼官家奔官家奔亦何往君不見馬上徒膺禕翟榮車前已作降王長

周師圍急安吐根曰一撮許賊馬上刺取擲汾水中耳後主與馮淑妃獵于天池聞晉陽陷齊主欲還淑妃請更殺一圍齊人作地道攻平陽城陷十餘步將士乘勢欲入後主敕馮淑妃共觀之妃粧點不時至城遂不下先是後主以淑妃為有功勳將立為左皇后遣使詣晉陽取服御禕翟等至是遇於中途後主拔響為淑妃着之

脚杖痕

欲從君。君不可從。陛下爲不孝。孝伯爲不忠。欲爲身。身不可避。堂上有老母。地下有武帝。天昏昏。誰與伸。嗟嗟陛下。勿捫脚杖。

周宣帝爲太子時。有過。武帝輒加捶撻。及武帝崩。捫杖痕。大罵曰。死晚矣。宣帝嘗從容問鄴。譯曰。我脚杖痕。誰所爲也。對曰。事由烏丸執事。文孝伯。宣帝與孝伯謀殺齊王憲。對曰。陛下爲不孝。臣爲不忠。尉遲運勸孝伯出外。孝伯曰。今堂上有老母。地下有武帝。爲臣爲子。知欲何之。

### 景陽樓

樓高高。插天表。玉樹一聲。天下曉。宮中天子樂事新。一日可敵千萬春。齊軍三來。周再至。不恃人心恃形勢。宮女烟花狎客箋。送君還上九重天。噫吁嘻。胭脂井冷。何堪辱。此間樂復不思蜀。一曲吳歌酒千斛。

陳後主聞隋兵臨江。曰。王氣在此。齊兵三度來。周兵再度至。無不摧敗。彼何爲者乎。後主入隋。嘗酹醉。罕有醒時。隋文帝問飲酒幾何。對曰。與子弟日飲一石。每預宴。文帝恐致傷心。爲不奏吳音。

### 高涼洗

中原龍戰苦不息。兵戈變盡狼虎跡。帝以倫常付巾幗。江南王氣悲銷沉。銷沉忠義無一人。投袂乃屬夫人城。許家善心亦國士。陳亡不死隋亡死。死時應愧夫人耳。

陳亡。嶺南數郡共奉高涼郡太夫人洗氏爲主。號聖母。保境拒守。隋遣陳叔寶遣夫人書。諭以國亡。使之歸。隋夫人集首領數千人。盡日慟哭。許善心聘於隋。會陳亡。病哭三日。後以宇文氏篡弒。不屈死。

### 阿干歌附外域

莫聽阿干歌。阿干心獨苦。棘城西去白蘭山。茫茫隔今古。阿干爲弟言。馬傷君莫怒。弟言報阿干。連枝本

同父阿干歌悲無窮阿干有子還思忠登高山而望遠海慨異國之朝宗阿干歌歌自悼阿干有孫還識孝報讐不得留讐衣縛草作讐兮射讐貌阿干歌歌以風此歌安得流寰中君不見宋湘東與梁湘東

河南王吐谷渾慕容廆之庶兄也因二部馬鬪廆使讓之吐谷渾遂度隴而西居於白蘭地方數千里廆追思之為作阿干之歌河南王吐延雄勇多猜忌為羌西姜聽所殺子葉延立痛念父讐常縛草泣射白蘭王阿柴登西強山觀整江源見水東流慨思朝宗因遣使入貢於宋

魚鼈橋

高句麗乃是河伯之甥赤烏子精誠貫日日倒戈河伯乃遣魚鼈為填河魚耶鼈耶今日濟我犬耶豕耶昔日飼我

高麗王嘗得河伯女閉於室內女為日所照遂有孕生一卵大如五升王棄於野犬豕飼之後破卵得一子名曰朱蒙高麗人謀殺朱蒙朱蒙出走遇一大水無梁後追騎甚急朱蒙告水曰我是日之子河泊外孫今追兵垂及如何得濟於是魚鼈為之成橋

鬼鼓喧

銀刀霍霍波鄰鄰江魚見水不見人與魚同居識魚性刺魚要伺魚入定魚一尾直百錢得魚買醉神祠邊深秋鬼鼓何填填

獠人能臥水底持刀刺魚百發百中以口嚼食以鼻飲取人面皮籠之于竹及燥號曰鬼鼓每有慶賞即用之

雌雉卜

羽肅肅飛來手中伏。男王叩頭女王祝。欲待粟須剖腹。腹中粟如玉。今年穀大熟。九層樓中仙樂作。蘇毗千秋阿脩羅萬福。

女國在葱嶺南世以女爲王姓蘇毗。倘祠阿脩羅神歲初以人祭祭畢入山祝之有一鳥如雌雉來集掌上破其腹視之有米粒則稔瓦礫則凶謂之鳥卜。土嘗居九層樓。

### 金羊牀

陽春有脚不得走。赤帝騎龍作歲首。蠻王笑擁金羊牀。琉璃珊瑚琥珀光。眞珠瓔珞垂兩襜。七月七日華筵張。腰銀弓。手金戟。橐駝飛來能啖客。

波斯國王坐金羊牀視朝。國以六月爲歲首。有鳥如橐駝能高飛丈餘食草與肉亦能食人。其國嘗以七月七日宴會。

### 新羅人

新羅人。新羅人。新羅山多水復險。終古猶匿秦遺民。常是避秦竟深人。深入千年作都邑。武陵太守空驚傳。寧知處處皆桃源。桃源中共棲歇。他時飲馬長城窟。城邊猶認秦時月。

新羅國其先世本秦亡人避長城役來此。馬韓割其東界居之以秦人故名之曰秦韓。

### 雨爲歲

婆羅蠡鼓喧沙堤。綠魚千頭迎客飛。舟行海中不見海。云是鯨鯢腹中水。王開北戶迎北人。蔗酒旣設椰漿陳。椰漿陳。且高醉。春爲年。雨爲歲。

赤土國在南海中。冬夏常溫。多雨少霽。隋使常駿通之。既入海。見綠魚羣飛水上。又數日。至一處。水色黃氣腥。舟行一日不絕。云是大魚糞也。其國重北戶。北面每有南使至。則啓北戶迎之。以甘蔗作酒。亦以椰漿爲酒。

孔雀羣

孔雀孔雀。頭珠懸。尾翠壓。朝飛暮飛。與人狎。蠻中不識文禽尊。呼作家鷄與野鴨。毛霏霏。羽堪衣。尉犁山北不可棲。雀乎何不東南飛。

龜茲國土多孔雀羣。飛山谷間。人取而食之。孳乳如鷄。驚其王家。常養千餘隻。尉犁山在龜茲國南。

燉煌西

燉煌西。白骨撐。日月飛不進。鬼火欲與天爭青。朝行暮行不見影。鬼聲西來落空井。魍魎耶。魍魎耶。叢叢細草生。枯骸枯骸欲歌人欲哭。燉煌之西且裹足。

高昌國在燉煌西。自燉煌向其國多砂磧。茫然無有蹊徑。欲往者尋其人畜骸骨而去。路中每聞歌哭聲。行人尋之多致亡失。蓋魍魎魍魎也。

日出處

子夷人不可悉。我家乃在扶桑之東。見日出。日出。不識日所歸。茫茫渡海尋光輝。尋光輝。光欲竭。汝家乃在滄溟之西。見日沒。日出必有方。日入必有鄉。願隨東升日。東升朝日王。

倭國人自稱子夷。其王以天爲兄。日爲弟。嘗以夜半治事。至日出而息。曰。付諸弟。其誕妄如此。隋時遣使入貢。曰。日出處。天子致書。日入處。天子無恙。

# 跋南北史樂府後

屠紳譔

小年欲竊。堪逞志者墨兵。大雅相歡。乍移情兮樂部。擅三長而搦管。原四始以審音。聲與政通。辭緣情綺。論詩每稱爲史。咏史那得廢詩。振古如斯。當今無輩耳。洪君對巖。才不患多。書能求閒。以譚天之口。成擲地之聲。謂夫兩介山河。六朝金粉。天醉投壺之酒。感此茫茫。人迷夾岸之花。憐其擾擾。龍爭入好奇之局。鵲起高門。靡之文。試將翠管填詞。難盡摸魚戀蜚。若命紅牙按曲。何妨換羽移宮。爰變新聲。獨彈古調。事或未經人道。言無不獲我心。晉啓化龍。陳亡擒虎。三百年王氣將終。甥承冒頓。舅代宇文。十六國人情可見。易淫哇而高如白雪。裁穢史則穆若清風。蓋筆有鹿盧。胸無芥蒂矣。若夫呼豨飲馬。陳陳已苦於相因。鹽州石壕。戛戛更難其獨造。何似取千秋金鑑。爲兩部鼓吹。登傀儡于場中。追魂而攝魄。寄陽秋于皮裏。恍目以薊心。縣門且不易千金。畫壁豈徒驚一絕。此日博聞強識。官可秘書。異時按部就班。郎宜協律。走也不知許事。欲喚奈何。樂認鈞天。編疑艷異。彼羌無故實。等閒當贖馥殘膏。苟別有會心。遮莫付銅喉鐵板。

中華民國二十四年十二月初版

(83134.2)

國學基本叢書 洪北江詩文集三冊

每部定價國幣貳元

外埠酌加運費匯費

撰者 洪亮吉

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

上海图书馆藏书



A541 212 0006 0938B



